

Āṅuttaranikāyaṭṭhakathāya
Pañcamādinipātānaṃ Atthavaṇṇanābhūtā

Bhadantasāriputtatherena katā

Sāratthamañjūsā nāma

Āṅuttaraṭīkā

(Tatiyo bhāgo)



Romanized from Myanmar version published in 1961

© Buddhasāsana Society

Ṭikā Series 20

First published in 2008 by Ministry of Religious Affairs

Yangon, Myanmar

THE PĀLI ALPHABET
IN BURMESE AND ROMAN CHARACTERS

VOWELS

အ a အာ ā ဣ i ဤ ī ဥ u ဦ ū ဧ e ဩ o

CONSONANTS WITH VOWEL "A"

| | | | | |
|------|-------|------|-------|------|
| က ka | ခ kha | ဂ ga | ဃ gha | င ṅa |
| စ ca | ဆ cha | ဇ ja | ဈ jha | ည ṇa |
| ဋ ta | ဌ tha | ဍ ḍa | ဎ ḍha | ဏ ṇa |
| တ ta | ထ tha | ဒ da | ဓ dha | န na |
| ပ pa | ဖ pha | ဗ ba | ဘ bha | မ ma |

ယ ya ရ ra လ la ဝ va သ sa တ ha ဋ ḷa ၵ ṁ

VOWELS IN COMBINATION

-၁ ၵ = ā ၵ = i ၵ = ī ၵ - ၵ = u ၵ - ၵ = ū - = e -၁ ၵ = o

| | | | | | | | |
|-------|--------|--------|--------|--------|---------|--------|-------------|
| က ka | ကာ kā | ကိ ki | ကီ kī | ကု ku | ကူ kū | ကေ ke | ကော ko |
| ခ kha | ခါ khā | ခိ khi | ခီ khī | ခု khu | ခုူ khū | ခေ khe | ခေါ kho ... |

CONJUNCT-CONSONANTS

| | | | | | |
|---------|---------|---------|--------|--------|---------|
| ကက kka | ဃ န္ဂha | ဏ န္ဓha | ဈ သ္ဃa | ဋ ပla | ဋ လla |
| ကွ kka | ဇ င္ဂa | ဇ န္ဓa | ဇ သ္ဃa | ဋ ပba | ဋ လya |
| ကျ kya | ဆ င္ဂa | ဆ န္ဓa | ဆ န္ဓa | ဋ ဗbha | ဋ လha |
| ကြ kri | ဇ ဣja | ဇ န္ဓa | ဇ န္ဓa | ဋ ဗya | ဋ ဝvha |
| ကလ kla | ဇ ဣjha | ဋ တa | ဋ န္ဓa | ဋ ဗra | ဋ ဝsta |
| ကွ kva | ည န္ဏa | ဋ တha | ဋ န္ဓa | ဋ မpa | ဋ ဝstra |
| ချ khya | ပ န္ဏa | ဋ တva | ဋ န္ဓa | ဋ မpha | ဋ ဝsna |
| ခွ khva | ပ န္ဏa | ဋ တya | ဋ န္ဓa | ဋ မba | ဋ ဝsya |
| ဂွ gga | ဆ န္ဏa | ဋ တra | ဋ န္ဓa | ဋ မbha | ဋ ဝssa |
| ဋွ ggha | ည န္ဏa | ဋ ဒda | ဋ န္ဓa | ဋ မma | ဋ ဝsma |
| ချ ဣya | ည န္ဏa | ဋ ဒdha | ဋ န္ဓa | ဋ မya | ဋ ဝsva |
| ဂြ gra | ဋ တa | ဋ သya | ဋ ပpa | ဋ မha | ဋ ဝhma |
| ကံ ṅka | ဋ တtha | ဋ ဒdra | ဋ ပpha | ဋ ယya | ဋ ဝhva |
| ခံ ṅkha | ည ဒda | ဋ ဒdva | ဋ ပpya | ဋ ယya | ဋ ဝḷha |
| ဂံ ṅga | | | | | |

| | | | | | | | | | |
|---|---|---|---|---|---|---|---|---|---|
| ၁ | ၂ | ၃ | ၄ | ၅ | ၆ | ၇ | ၈ | ၉ | ၀ |
| 1 | 2 | 3 | 4 | 5 | 6 | 7 | 8 | 9 | 0 |

Aṅguttaraṭīkā

Tatīyabhāga

Mātikā

Piṭṭhaṅka

Pañcakanipāta

1. Paṭhamapaṇṇāsaka

1. Sekhabalavagga

| | | | |
|--------------------------------|-----|-----|---|
| 1. Saṁkhittasuttavaṇṇanā | ... | ... | 1 |
| 2. Vitthatasuttādivaṇṇanā | ... | ... | 1 |
| 7. Kāmasuttavaṇṇanā | ... | ... | 2 |
| 8. Cavanasuttavaṇṇanā | ... | ... | 3 |
| 9. Paṭhama-agāravasuttavaṇṇanā | ... | ... | 3 |
| 10. Dutīya-agāravasuttavaṇṇanā | ... | ... | 3 |

2. Balavagga

| | | | |
|----------------------------|-----|-----|---|
| 1. Ananussutasuttavaṇṇanā | ... | ... | 4 |
| 3. Saṁkhittasuttavaṇṇanā | ... | ... | 4 |
| 4. Vitthatasuttavaṇṇanā | ... | ... | 5 |
| 5. Daṭṭhabbasuttādivaṇṇanā | ... | ... | 5 |

3. Pañcaṅgikavagga

| | | | |
|----------------------------------|-----|-----|----|
| 1. Paṭhama-agāravasuttādivaṇṇanā | ... | ... | 7 |
| 3. Upakkilesasuttādivaṇṇanā | ... | ... | 7 |
| 5. Anuggahitasuttavaṇṇanā | ... | ... | 7 |
| 6. Vimuttāyatanasuttavaṇṇanā | ... | ... | 10 |
| 7. Samādhisuttavaṇṇanā | ... | ... | 11 |
| 8. Pañcaṅgikasuttādivaṇṇanā | ... | ... | 12 |
| 10. Nāgitasuttavaṇṇanā | ... | ... | 14 |

Mātikā

Piṭṭhaṅka

4. Sumanavagga

| | | | |
|-------------------------------|-----|-----|----|
| 1. Sumanasuttavaṇṇanā | ... | ... | 15 |
| 2. Cundīsuttavaṇṇanā | ... | ... | 15 |
| 3. Uggahasuttavaṇṇanā | ... | ... | 16 |
| 4. Sīhasenāpatīsuttādivaṇṇanā | ... | ... | 16 |
| 6. Kāladānasuttādivaṇṇanā | ... | ... | 17 |
| 8. Saddhasuttavaṇṇanā | ... | ... | 18 |
| 9. Puttasuttādivaṇṇanā | ... | ... | 18 |

5. Muṇḍarājavagga

| | | | |
|--------------------------------|------|-----|----|
| 1. Ādiyasuttādivaṇṇanā | | ... | 19 |
| 3. Iṭṭhasuttavaṇṇanā | ... | ... | 19 |
| 4. Manāpadāyīsuttavaṇṇanā | ... | ... | 20 |
| 5. Puññābhisandasuttādivaṇṇanā | ... | ... | 20 |
| 7. Dhanasuttādivaṇṇanā | ... | ... | 21 |
| 9. Kosalasuttavaṇṇanā | ... | ... | 21 |
| 10. Nāradasuttavaṇṇanā | ... | ... | 21 |

2. Dutiyapaṇṇāsaka**(6) 1. Nīvaraṇavagga**

| | | | |
|--|-----|-----|----|
| 1. Āvaraṇasuttādivaṇṇanā | ... | ... | 22 |
| 3. Padhāniyaṅgasuttādivaṇṇanā | ... | ... | 23 |
| 5. Mātāputtasuttavaṇṇanā | ... | ... | 24 |
| 6. Upajjhāyasuttavaṇṇanā | ... | ... | 25 |
| 7. Abhiṇhapaccavekkhitabbaṭṭhānasuttavaṇṇanā | ... | ... | 25 |
| 8. Licchavikumārakasuttādivaṇṇanā | ... | ... | 26 |

Mātikā

Piṭṭhaṅka

(7) 2. Saññāvagga

| | | | |
|-------------------------|-----|-----|----|
| 1. Saññāsuttādivaṇṇanā | ... | ... | 26 |
| 6. Sājīvasuttādivaṇṇanā | ... | ... | 27 |

(8) 3. Yodhājīvavagga

| | | | |
|--|-----|-----|----|
| 1. Paṭhamacetovimuttiphalasuttādivaṇṇanā | ... | ... | 27 |
| 3. Paṭhamadhammavihārīsuttādivaṇṇanā | ... | ... | 28 |
| 5. Paṭhamayodhājīvasuttādivaṇṇanā | ... | ... | 29 |
| 6. Dutiyayodhājīvasuttavaṇṇanā | ... | ... | 29 |
| 7. Paṭhama-anāgatabhayasuttādivaṇṇanā | ... | ... | 30 |
| 9. Tatiya-anāgatabhayasuttavaṇṇanā | ... | ... | 31 |
| 10. Catuttha-anāgatabhayasuttavaṇṇanā | ... | ... | 31 |

(9) 4. Theravagga

| | | | |
|-------------------------------------|-----|-----|----|
| 1. Rajanīyasuttādivaṇṇanā | ... | ... | 34 |
| 3. Kuhakasuttavaṇṇanā | ... | ... | 34 |
| 6. Paṭisambhidāppattasuttādivaṇṇanā | ... | ... | 35 |
| 8. Therasuttavaṇṇanā | ... | ... | 35 |
| 9. Paṭhamasekhasuttavaṇṇanā | ... | ... | 36 |
| 10. Dutiyasekhasuttavaṇṇanā | ... | ... | 37 |

(10) 5. Kakudhavagga

| | | | |
|---------------------------------|-----|-----|----|
| 1. Paṭhamasampadāsuttādivaṇṇanā | ... | ... | 38 |
|---------------------------------|-----|-----|----|

3. Tatiyapaṇṇāsaka

(11) 1. Phāsuvihāravagga

| | | | |
|----------------------------|-----|-----|----|
| 1. Sārajjasuttādivaṇṇanā | ... | ... | 39 |
| 5. Phāsuvihārasuttavaṇṇanā | ... | ... | 39 |
| 6. Ānandasuttādivaṇṇanā | ... | ... | 41 |

| Mātikā | | Piṭṭhaṅka |
|---|--------------------------------|-----------|
| (12) 2. Andhakavindavagga | | |
| 1. Kulūpakasuttādivaṇṇanā | ... | 41 |
| 5. Maccharinīsuttādivaṇṇanā | ... | 42 |
| (13) 3. Gilānavagga | | |
| (14) 4. Rājavagga | | |
| 1. Paṭhamacakkānuvattanasuttavaṇṇanā | ... | 43 |
| 2. Dutiyacakkānuvattanasuttavaṇṇanā | ... | 44 |
| 4. Yassaṁdisaṁsuttavaṇṇanā | ... | 44 |
| 5. Pattanāsuttādivaṇṇanā | ... | 46 |
| 10. Sotasuttavaṇṇanā | ... | 46 |
| (15) 5. Tikaṇḍakīvagga | | |
| 1. Avajānātisuttavaṇṇanā | ... | 47 |
| 2. Ārabhatisuttādivaṇṇanā | ... | 48 |
| 4. Tikaṇḍakīsuttādivaṇṇanā | ... | 49 |
| 7. Asappurisadānasuttādivaṇṇanā | ... | 50 |
| 4. Catutthapaṇṇāsaka | (16) 1. Asaddhammavagga | 51 |
| (17) 2. Āghātavagga | | |
| 1. Paṭhama-āghātaṭṭhapaṭivīnayasuttādivaṇṇanā | ... | 51 |
| 6. Nirodhasuttavaṇṇanā | ... | 52 |
| 7. Codanāsuttādivaṇṇanā | ... | 52 |
| 10. Bhaddajīsuttavaṇṇanā | ... | 52 |
| (18) 3. Upāsakavagga | | |
| 1. Sārajjasuttādivaṇṇanā | ... | 53 |
| 7. Vaṇijjāsuttādivaṇṇanā | ... | 53 |

| Mātikā | | Piṭṭhaṅka |
|------------------------|-----|-----------|
| 9. Gihisuttavaṇṇanā | ... | 54 |
| 10. Gavesīsuttavaṇṇanā | ... | 54 |

(19) 4. Araññavagga

| | | |
|-------------------------|-----|----|
| 1. Āraññikasuttavaṇṇanā | ... | 56 |
|-------------------------|-----|----|

(20) 5. Brāhmaṇavagga

| | | |
|-----------------------------|-----|----|
| 1. Soṇasuttavaṇṇanā | ... | 56 |
| 2. Doṇabrāhmaṇasuttavaṇṇanā | ... | 57 |
| 3. Saṅgāravasuttavaṇṇanā | ... | 58 |
| 4. Kāraṇapālīsuttavaṇṇanā | ... | 59 |
| 5. Piṅgiyānīsuttavaṇṇanā | ... | 60 |
| 6. Mahāsupinasuttavaṇṇanā | ... | 61 |
| 7. Vassasuttavaṇṇanā | ... | 71 |
| 8. Vācāsuttādivaṇṇanā | ... | 72 |
| 10. Nissāraṇīyasuttavaṇṇanā | ... | 74 |

5. Pañcamapaṇṇāsaka

(21) 1. Kimilavagga

| | | |
|-----------------------------|-----|----|
| 1. Kimilasuttādivaṇṇanā | ... | 76 |
| 5. Cetokhilasuttavaṇṇanā | ... | 76 |
| 6. Vinibandhasuttādivaṇṇanā | ... | 77 |
| 9. Gītassarasuttādivaṇṇanā | ... | 77 |

(22) 2. Akkosakavagga

| | | |
|---------------------------|-----|----|
| 1. Akkosakasuttādivaṇṇanā | ... | 78 |
| 3. Sīlasuttādivaṇṇanā | ... | 78 |

Mātikā

Piṭṭhaṅka

(23) 3. Dīghacārikavagga

| | | | |
|-------------------------------------|-----|-----|----|
| 1. Paṭhamadīghacārikasuttādivaṇṇanā | ... | ... | 79 |
|-------------------------------------|-----|-----|----|

Chakkanipāta

1. Paṭhamapaṇṇāsaka

1. Āhuneyyavagga

| | | | |
|----------------------------------|-----|-----|----|
| 1. Paṭhama-āhuneyyasuttavaṇṇanā | ... | ... | 81 |
| 2. Dutīya-āhuneyyasuttādivaṇṇanā | ... | ... | 82 |
| 8. Anuttariyasuttavaṇṇanā | ... | ... | 88 |
| 9. Anussatiṭṭhānasuttavaṇṇanā | ... | ... | 88 |
| 10. Mahānāmasuttavaṇṇanā | ... | ... | 88 |

2. Sāraṇīyavagga

| | | | |
|-----------------------------------|-----|-----|----|
| 1. Paṭhamasāraṇīyasuttavaṇṇanā | ... | ... | 89 |
| 2. Dutīyasāraṇīyasuttavaṇṇanā | ... | ... | 95 |
| 3. Nissāraṇīyasuttavaṇṇanā | ... | ... | 95 |
| 4. Bhaddakasuttādivaṇṇanā | ... | ... | 96 |
| 6. Nakulapitusuttavaṇṇanā | ... | ... | 97 |
| 7. Soppasuttavaṇṇanā | ... | ... | 97 |
| 8. Macchabandhasuttavaṇṇanā | ... | ... | 98 |
| 9. Paṭhamamaraṇassatisuttavaṇṇanā | ... | ... | 98 |
| 10. Dutiyamaraṇassatisuttavaṇṇanā | ... | ... | 99 |

3. Anuttariyavagga

| | | | |
|-------------------------------|-----|-----|-----|
| 1. Sāmakasuttādivaṇṇanā | ... | ... | 99 |
| 3. Bhayasuttavaṇṇanā | ... | ... | 100 |
| 4. Himavantasuttavaṇṇanā | ... | ... | 100 |
| 5. Anussatiṭṭhānasuttavaṇṇanā | ... | ... | 101 |

| Mātikā | | | Piṭṭhaṅka |
|------------------------------|-----|-----|-----------|
| 6. Mahākaccānasuttavaṇṇanā | ... | ... | 101 |
| 7. Paṭhamasamayasuttavaṇṇanā | ... | ... | 102 |
| 8. Dutiyasamayasuttavaṇṇanā | ... | ... | 103 |
| 9. Udāyīsuttavaṇṇanā | ... | ... | 103 |
| 10. Anuttariyasuttavaṇṇanā | ... | ... | 105 |

4. Devatāvagga

| | | | |
|-----------------------------|-----|-----|-----|
| 1. Sekhasuttādivaṇṇanā | ... | ... | 105 |
| 5. Vijjābhāgiyasuttavaṇṇanā | ... | ... | 106 |
| 6. Vivādamūlasuttavaṇṇanā | ... | ... | 106 |
| 7. Chaḷaṅgadānasuttavaṇṇanā | ... | ... | 107 |
| 8. Attakārīsuttādivaṇṇanā | ... | ... | 108 |
| 12. Nāgitasuttavaṇṇanā | ... | ... | 108 |

5. Dhammikavagga

| | | | |
|-------------------------------|-----|-----|-----|
| 1. Nāgasuttavaṇṇanā | ... | ... | 109 |
| 2. Migasālāsuttavaṇṇanā | ... | ... | 113 |
| 3. Iṇasuttādivaṇṇanā | ... | ... | 114 |
| 7. Khemasuttavaṇṇanā | ... | ... | 115 |
| 8. Indriyasamvarasuttavaṇṇanā | ... | ... | 116 |
| 9. Ānandasuttavaṇṇanā | ... | ... | 116 |
| 10. Khattiyasuttavaṇṇanā | ... | ... | 117 |
| 11. Appamādasuttavaṇṇanā | ... | ... | 117 |
| 12. Dhammikasuttavaṇṇanā | ... | ... | 118 |

2. Dutiyapaṇṇāsaka

6. Mahāvagga

| | | | |
|-------------------------|-----|-----|-----|
| 1. Soṇasuttavaṇṇanā | ... | ... | 120 |
| 2. Phaggunasuttavaṇṇanā | ... | ... | 121 |

| Mātikā | | | Piṭṭhaṅka |
|---------------------------------|-----|-----|-----------|
| 3. Chaḷabhijāṭisuttavaṇṇanā | ... | ... | 122 |
| 4. Āsavasuttavaṇṇanā | ... | ... | 124 |
| 5. Dārukammikasuttavaṇṇanā | ... | ... | 132 |
| 6. Hatthisāriputtasuttavaṇṇanā | ... | ... | 133 |
| 7. Majjhesuttavaṇṇanā | ... | ... | 134 |
| 8. Purisindriyañāṇasuttavaṇṇanā | ... | ... | 135 |
| 9. Nibbedhikasuttavaṇṇanā | ... | ... | 138 |
| 10. Sīhanādasuttavaṇṇanā | ... | ... | 140 |

7. Devatāvagga

| | | | |
|--------------------------------|-----|-----|-----|
| 1. Anāgāmiphalasuttādivaṇṇanā | ... | ... | 142 |
| 4. Saṅgaṇikārāmasuttādivaṇṇanā | ... | ... | 142 |
| 6. Samādhisuttavaṇṇanā | ... | ... | 142 |
| 7. Sakkhibhabbasuttādivaṇṇanā | ... | ... | 143 |

8. Arahattavagga

| | | | |
|-------------------------------|-----|-----|-----|
| 1. Dukkhasuttādivaṇṇanā | ... | ... | 144 |
| 4. Sukhasomanassasuttavaṇṇanā | ... | ... | 145 |
| 5. Adhigamasuttavaṇṇanā | ... | ... | 145 |
| 6. Mahantattasuttādivaṇṇanā | ... | ... | 145 |
| 8. Dutiyānirayasuttādivaṇṇanā | ... | ... | 146 |

9. Sītivagga

| | | | |
|----------------------------|-----|-----|-----|
| 1. Sītibhāvasuttavaṇṇanā | ... | ... | 146 |
| 2. Āravarāṇasuttādivaṇṇanā | ... | ... | 146 |

10. Ānisāmsavagga

| | | | |
|----------------------------|-----|-----|-----|
| 1. Pātubhāvasuttādivaṇṇanā | ... | ... | 147 |
|----------------------------|-----|-----|-----|

Mātikā

Piṭṭhaṅka

Sattakanipāta**Paṇṇāsaka**

| | | | |
|-----------------------------------|-----|-----|-----|
| 1. Dhanavaggavaṇṇanā | ... | ... | 149 |
| 2. Anusayavagga | | | |
| 4. Puggalasuttavaṇṇanā | ... | ... | 149 |
| 5. Udakūpamāsuttavaṇṇanā | ... | ... | 154 |
| 6. Aniccānupassīsuttādivaṇṇanā | ... | ... | 155 |
| 10. Niddasavatthusuttavaṇṇanā | ... | ... | 158 |
| 3. Vajjisattakavagga | | | |
| 1. Sārāndadasuttavaṇṇanā | ... | ... | 159 |
| 2. Vassakārasuttavaṇṇanā | ... | ... | 161 |
| 3. Paṭhamasattakasuttavaṇṇanā | ... | ... | 163 |
| 4. Dutiyasattakasuttādivaṇṇanā | ... | ... | 165 |
| 7. Saññāsuttādivaṇṇanā | ... | ... | 166 |
| 4. Devatāvagga | | | |
| 5. Paṭhamamittasuttavaṇṇanā | ... | ... | 166 |
| 6. Dutiyamittasuttādivaṇṇanā | ... | ... | 166 |
| 5. Mahāyaññavagga | | | |
| 1. Sattaviññāṇaṭṭhitisuttavaṇṇanā | ... | ... | 167 |
| 2. Samādhiparikkhārasuttavaṇṇanā | ... | ... | 169 |
| 3. Paṭhama-aggisuttavaṇṇanā | ... | ... | 170 |
| 4. Dutiya-aggisuttādivaṇṇanā | ... | ... | 172 |

| Mātikā | | | Piṭṭhaṅka |
|-------------------------------|-----|-----|-----------|
| 6. Dutiyasaññāsuttavaṇṇanā | ... | ... | 173 |
| 7. Methunasuttādivaṇṇanā | ... | ... | 173 |
| 9. Dānamahapphalasuttavaṇṇanā | ... | ... | 174 |
| 10. Nandamātāsuttavaṇṇanā | ... | ... | 175 |

6. Abyākatavagga

| | | | |
|-------------------------------|-----|-----|-----|
| 1. Abyākatasuttādivaṇṇanā | ... | ... | 176 |
| 3. Tissabrahmāsuttavaṇṇanā | ... | ... | 177 |
| 4. Sīhasenāpatisuttādivaṇṇanā | ... | ... | 177 |
| 8. Pacalāyamānasuttavaṇṇanā | ... | ... | 177 |
| 9. Mettasuttavaṇṇanā | ... | ... | 180 |
| 10. Bhariyāsuttavaṇṇanā | ... | ... | 185 |
| 11. Kodhanasuttavaṇṇanā | ... | ... | 186 |

7. Mahāvagga

| | | | |
|-----------------------------------|-----|-----|-----|
| 1. Hiri-ottappasuttādivaṇṇanā | ... | ... | 187 |
| 3. Nagaropamasuttavaṇṇanā | ... | ... | 189 |
| 4. Dhammaññūsuttavaṇṇanā | ... | ... | 191 |
| 5. Pāricchattakasuttādivaṇṇanā | ... | ... | 192 |
| 7. Bhāvanāsuttavaṇṇanā | ... | ... | 194 |
| 8. Aggikkhandhopamasuttādivaṇṇanā | ... | ... | 195 |
| 10. Arakasuttavaṇṇanā | ... | ... | 196 |

8. Vinayavagga

| | | | |
|-------------------------------------|-----|-----|-----|
| 1. Paṭhamavinayadharasuttādivaṇṇanā | ... | ... | 198 |
| 9. Saṭthusāsanasuttavaṇṇanā | ... | ... | 199 |
| 10. Adhikaraṇasamathasuttavaṇṇanā | ... | ... | 199 |

Mātikā

Piṭṭhaṅka

Aṭṭhakanipāta**1. Paṭhamapaṇṇāsaka****1. Mettāvagga**

| | | | |
|-----------------------------------|-----|-----|-----|
| 1. Mettāsuttavaṇṇanā | ... | ... | 203 |
| 2. Paññāsuttādivaṇṇanā | ... | ... | 205 |
| 5. Paṭhamalokadhammasuttavaṇṇanā | ... | ... | 206 |
| 6. Dutiyalokadhammasuttādivaṇṇanā | ... | ... | 206 |
| 9. Nandasuttavaṇṇanā | ... | ... | 206 |
| 10. Kāraṇḍavasuttavaṇṇanā | ... | ... | 207 |

2. Mahāvagga

| | | | |
|-----------------------------|-----|-----|-----|
| 1. Verañjasuttavaṇṇanā | ... | ... | 208 |
| 2. Sīhasuttavaṇṇanā | ... | ... | 220 |
| 3. Assājānīyasuttādivaṇṇanā | ... | ... | 226 |
| 5. Malasuttādivaṇṇanā | ... | ... | 226 |
| 9. Pahārādasuttavaṇṇanā | ... | ... | 227 |
| 10. Uposathasuttavaṇṇanā | ... | ... | 231 |

3. Gahapativagga

| | | | |
|--------------------------------------|------|-----|-----|
| 1. Paṭhama-uggasuttādivaṇṇanā | ... | ... | 233 |
| 8. Dutiyabalasuttavaṇṇanā | ... | ... | 234 |
| 9. Akkhaṇasuttavaṇṇanā | ... | ... | 234 |
| 10. Anuruddhamahāvitakkasuttavaṇṇanā | | ... | 235 |

4. Dānavagga

| | | | |
|------------------------------|-----|-----|-----|
| 1. Paṭhamadānasuttādivaṇṇanā | ... | ... | 236 |
| 5. Dānūpapattisuttavaṇṇanā | ... | ... | 237 |

| Mātikā | | | Piṭṭhaṅka |
|-------------------------------------|-----|-----|-----------|
| 6. Puññakiriyavatthusuttavaṇṇanā | ... | ... | 237 |
| 7. Sappurisdānasuttādivaṇṇanā | ... | ... | 239 |
| 9. Abhisandasuttādivaṇṇanā | ... | ... | 239 |
| 5. Uposathavagga | | | |
| 1. Saṁkhittūposathasuttādivaṇṇanā | ... | ... | 240 |
| 9. Paṭhama-idhalokikasuttādivaṇṇanā | ... | ... | 241 |
| 2. Dutiyapaṇṇāsaka | | | |
| (6) 1. Gotamīvagga | | | |
| 1. Gotamīsuttādivaṇṇanā | ... | ... | 242 |
| 4. Dīghajāṇusuttādivaṇṇanā | ... | ... | 244 |
| 6. Bhayasuttādivaṇṇanā | ... | ... | 245 |
| 9. Puggalasuttādivaṇṇanā | ... | ... | 245 |
| (7) 2. Bhūmicālavagga | | | |
| 1. Icchāsuttādivaṇṇanā | ... | ... | 245 |
| 6. Vimokkhasuttavaṇṇanā | ... | ... | 248 |
| 7. Anariyavohārasuttavaṇṇanā | ... | ... | 250 |
| 9. Parisāsuttavaṇṇanā | ... | ... | 250 |
| 10. Bhūmicālasuttavaṇṇanā | ... | ... | 251 |
| (8) 2. Yamakavagga | | | |
| 1. Saddhāsuttādivaṇṇanā | ... | ... | 264 |
| Navakanipāta | | | |
| 1. Paṭhamapaṇṇāsaka | | | |
| 1. Sambodhivagga | | | |
| 1. Sambodhisuttādivaṇṇanā | ... | ... | 267 |
| 3. Meghiyasuttavaṇṇanā | ... | ... | 267 |

| Mātikā | | | Piṭṭhaṅka |
|--|-----|-----|-----------|
| 4. Nandakasuttādivaṇṇanā | ... | ... | 283 |
| 6. Sevanāsuttavaṇṇanā | ... | ... | 284 |
| 7. Sutavāsuttādivaṇṇanā | ... | ... | 284 |
| 2. Sīhanādavagga | | | |
| 1. Sīhanādasuttavaṇṇanā | ... | ... | 285 |
| 2. Sa-upādisesasuttavaṇṇanā | ... | ... | 286 |
| 3. Koṭṭhikasuttavaṇṇanā | ... | ... | 286 |
| 4. Samiddhisuttavaṇṇanā | ... | ... | 286 |
| 5. Gaṇḍasuttādivaṇṇanā | ... | ... | 287 |
| 10. Velāmasuttavaṇṇanā | ... | ... | 287 |
| 3. Sattāvāsavagga | | | |
| 1. Tiṭṭhānasuttavaṇṇanā | ... | ... | 289 |
| 3. Taṇhāmūlakasuttavaṇṇanā | ... | ... | 291 |
| 4. Sattāvāsasuttādivaṇṇanā | ... | ... | 293 |
| 6. Silāyūpasuttavaṇṇanā | ... | ... | 294 |
| 7. Paṭhamaverasuttavaṇṇanā | ... | ... | 294 |
| 9. Āghātavatthusuttavaṇṇanā | ... | ... | 296 |
| 10. Āghātaṭṭhavinayasuttavaṇṇanā | ... | ... | 296 |
| 11. Anupubbanirodhasuttavaṇṇanā | ... | ... | 296 |
| 4. Mahāvagga | | | |
| 1. Anupubbavihārasuttavaṇṇanā | ... | ... | 297 |
| 2. Anupubbavihārasamāpattisuttādivaṇṇanā | ... | ... | 297 |
| 4. Gāvī-upamāsuttavaṇṇanā | ... | ... | 297 |
| 5. Jhānasuttavaṇṇanā | ... | ... | 298 |
| 6. Ānandasuttavaṇṇanā | ... | ... | 299 |

| Mātikā | | | Piṭṭhaṅka |
|----------------------------------|-----|-----|-----------|
| 7. Lokāyatikasuttavaṇṇanā | ... | ... | 300 |
| 8. Devāsurasāṅgāmasuttādivaṇṇanā | ... | ... | 301 |
| 10. Tapussasuttavaṇṇanā | ... | ... | 304 |

5. Sāmaññavagga

| | | | |
|---------------------------|-----|-----|-----|
| 1. Sambādhasuttādivaṇṇanā | ... | ... | 304 |
|---------------------------|-----|-----|-----|

Dasakanipāta

1. Paṭhamapaṇṇāsaka

1. Ānisaṃsavagga

| | | | |
|---------------------------------|-----|-----|-----|
| 1. Kimitthiyasuttavaṇṇanā | ... | ... | 305 |
| 2. Cetanākaraṇīyasuttādivaṇṇanā | ... | ... | 305 |
| 6. Samādhisuttavaṇṇanā | ... | ... | 305 |

2. Nāthavagga

| | | | |
|-----------------------------------|-----|-----|-----|
| 1. Senāsanasuttādivaṇṇanā | ... | ... | 306 |
| 5. Appamādasuttādivaṇṇanā | ... | ... | 307 |
| 7. Paṭhamanāthasuttādivaṇṇanā | ... | ... | 307 |
| 9. Paṭhama-ariyāvāsasuttavaṇṇanā | ... | ... | 309 |
| 10. Duttiya-ariyāvāsasuttavaṇṇanā | ... | ... | 309 |

3. Mahāvagga

| | | | |
|---------------------------------|-----|-----|-----|
| 1. Sihanādasuttavaṇṇanā | ... | ... | 312 |
| 2. Adhivuttipadasuttādivaṇṇanā | ... | ... | 319 |
| 5. Kasiṇasuttavaṇṇanā | ... | ... | 320 |
| 6. Kālīsuttavaṇṇanā | ... | ... | 321 |
| 7. Paṭhamamahāpañhasuttavaṇṇanā | ... | ... | 322 |

| Mātikā | | Piṭṭhaṅka |
|-------------------------------------|-----|-----------|
| 8. Dutiyamahāpañhasuttādivaṇṇanā | ... | 326 |
| 10. Dutiyakosalasuttavaṇṇanā | ... | 327 |
| 4. Upālivagga | | |
| 1. Upālisuttavaṇṇanā | ... | 329 |
| 5. Akkosavagga | | |
| 1. Vivādasuttādivaṇṇanā | ... | 331 |
| 9. Sarīraṭṭhadhammasuttādivaṇṇanā | ... | 332 |
| 2. Dutiyapaṇṇāsaka | | |
| (6) 1. Sacittavagga | | |
| 1. Sacittasuttādivaṇṇanā | ... | 333 |
| (7) 2. Yamakavagga | | |
| 1. Avijjāsuttādivaṇṇanā | ... | 333 |
| 9. Paṭhamakathāvatthusuttādivaṇṇanā | ... | 338 |
| (8) 3. Ākaṅkhavagga | | |
| 1. Ākaṅkhasuttādivaṇṇanā | ... | 339 |
| 5. Migasālāsuttādivaṇṇanā | ... | 345 |
| (9) 4. Theravagga | | |
| 1. Vāhanasuttādivaṇṇanā | ... | 346 |
| 9. Kokālikasuttādivaṇṇanā | ... | 347 |
| (10) 5. Upālivagga | | |
| 1. Kāmabhogīsuttādivaṇṇanā | ... | 349 |
| 5. Uttiyasuttavaṇṇanā | ... | 350 |
| 6. Kokanudasuttādivaṇṇanā | ... | 350 |
| 9. Upālisuttādivaṇṇanā | ... | 352 |

Mātikā

Piṭṭhaṅka

3. Tatiyapaṇṇāsaka**(11) 1. Samaṇasaññāvagga**

| | | | |
|------------------------------|-----|-----|-----|
| 1. Samaṇasaññāsuttādivaṇṇanā | ... | ... | 353 |
|------------------------------|-----|-----|-----|

(12) 2. Paccorohaṇivagga

| | | | |
|----------------------------------|-----|-----|-----|
| 1. Paṭhama-adhammasuttādivaṇṇanā | ... | ... | 353 |
| 5. Saṅgārasuttādivaṇṇanā | ... | ... | 355 |

4. Catutthapaṇṇāsaka

| | | | |
|--------------------------------------|-----|-----|-----|
| 1. Brāhmaṇapaccorohaṇīsuttādivaṇṇanā | ... | ... | 356 |
|--------------------------------------|-----|-----|-----|

(21) 1. Karajakāyavagga

| | | | |
|-------------------------------------|-----|-----|-----|
| 1. Paṭhamanirayasaggasuttādivaṇṇanā | ... | ... | 356 |
|-------------------------------------|-----|-----|-----|

Ekādasakanipāta**1. Nissaggiyavagga**

| | | | |
|-----------------------------|-----|-----|-----|
| 1. Kimatthiyasuttādivaṇṇanā | ... | ... | 357 |
|-----------------------------|-----|-----|-----|

2. Anussativagga

| | | | |
|----------------------------------|-----|-----|-----|
| 1. Paṭhamamahānāmasuttādivaṇṇanā | ... | ... | 357 |
| 5. Mettāsuttavaṇṇanā | ... | ... | 358 |
| 6. Aṭṭhakanāgarasuttavaṇṇanā | ... | ... | 361 |
| 7. Gopālasuttavaṇṇanā | ... | ... | 363 |
| Nigamanakathāvaṇṇanā | ... | ... | 370 |

Aṅguttaraṭīkāya tatiyabhāge mātikā niṭṭhitā.

Suttantapiṭaka

Pañcakādinipāta

Anguttaraṭīkā

Namo tassa Bhagavato Arahato Sammāsambuddhassa.

Pañcakanipāta

1. Pathamapaṇṇāsaka

1. Sekhabalavagga

1. Saṅkhittasuttavaṇṇanā

1. Pañcakanipātassa paṭhame kāmāṃ sampayuttadhammesu thirabhāvopi balaṭṭho eva, paṭipakkhehi pana akampanīyattaṃ sātisayāṃ balaṭṭhoti vuttaṃ “**assaddhiye na kampatī**”ti.

Saṅkhittasuttavaṇṇanā niṭṭhitā.

2. Vitthatasuttādivaṇṇanā

2-6. Dutiye **hirīyatīti** lajjati virajjati. Yasmā hirī pāpajigucchanalakkhaṇā, tasmā “**jigucchatīti attho**”ti vuttaṃ. **Ottappatīti** utrasati. Pāputrāsallakkhaṇāṃ hi ottappāṃ.

Paggahitavīriyoti saṅkocaṃ anāpannavīriyo. Tenāha “**anosakkitamānaso**”ti. **Pahānatthāyāti** samucchinnatthāya. Kusalānaṃ dhammānaṃ upasampadā nāma samadhigamo evāti āha “**paṭilābhatthāyā**”ti.

Gati-atthā dhātusaddā buddhi-atthā hontīti āha “**udayañca vayañca paṭivijjhitum samatthāyā**”ti. Missakanayenāyaṃ desanā gatāti āha “**vikkhambhanavasena ca samucchedavasena cā**”ti. Tenāha “**vipassanāpaññāya ceva maggapaññāya cā**”ti. Vipassanāpaññāya vikkhambhanakiriyato sā ca kho padesikāti nippadesikaṃ katvā dassetuṃ “**maggapaññāya paṭilābhasaṃvattanato**”ti vuttaṃ. Dukkakkhayagāminibhāvepi eseva nayo. **Sammāti** yāthāvato. Akuppadhammatāya hi maggapaññāya khepitaṃ khepitameva, nāssa puna khepanakiccaṃ atthīti upāyena ñāyena sā pavattatīti āha “**hetunā nayenā**”ti. Tatiyādīsu natthi vattabbaṃ.

Vitthatasuttādivaṇṇanā niṭṭhitā.

7. Kāmasuttavaṇṇanā

7. Sattame asanti lūnanti tenāti **asitaṃ**, dāttam. Vividhā ābhañjanti bhāraṃ olambenti tenāti **byābhaṅgī**, vidham. **Kulaputtoti** ettha duvidho kulaputto jātikulaputto ācārakulaputto ca. Tattha “tena kho pana samayena raṭṭhapālo nāma kulaputto tasmimyeva thullakoṭṭhike aggakulikassa putto”ti¹ evaṃ āgato uccakulappasuto **jātikulaputto** nāma. “Ye te kulaputtā saddhā agārasmā anagāriyaṃ pabbajitā”ti² evaṃ āgatā pana yattha kатhaci kule pasutāpi ācārasampannā **ācārakulaputto** nāma. Idha pana ācārakulaputto adhippeto. Tenāha “**kulaputtoti ācārakulaputto**”ti. **Yuttanti** anucchavikaṃ, evaṃ vattabbataṃ arahatīti attho. Sesamettha uttānameva.

Kāmasuttavaṇṇanā niṭṭhitā.

1. Ma 2. 245 piṭṭhe.

2. Ma 1. 20 piṭṭhe.

8. Cavanasuttavaṇṇanā

8. Aṭṭhame **saddhāyāti** iminā adhigamasaddhā dassitā. Catubbidhā hi saddhā āgamanīyasaddhā adhigamasaddhā pasādasaddhā okappanasaddhāti. Tattha **āgamanīyasaddhā** sabbaññubodhisattānaṃ pavattā hoti. Āgamanīyappaṭipadāya āgatā hi saddhā sātisayā mahābodhisattānaṃ paropadesena vinā saddheyyavattum aviparītato gahetvā adhimuccanato. Saccappaṭivedhato āgatasaddhā **adhigamasaddhā** suppbuddhādīnaṃ viya. “Sammāsambuddho bhagavā”ti-ādīnā buddhādīsu uppajjanakappasādo **pasādasaddhā** mahākappinarājādīnaṃ viya. “Evametan”ti okkanditvā pakkhanditvā saddahanavasena kappanaṃ okappanaṃ, tadeva saddhāti **okappanasaddhā**. Tattha pasādasaddhā paraneyyarūpā hoti savanamattenapi pasīdanato. Okappanasaddhā saddheyyaṃ vattum ogāhitvā anupavisitvā “evametan”ti paccakkhaṃ karontī viya pavattati.

Cavanasuttavaṇṇanā niṭṭhitā.

9. Paṭhama-agāraṇasuttavaṇṇanā

9. Navame **appatissayoti** appatissavo va-kārassa ya-kāraṃ katvā niddeso. Garunā kismiñci vutto gāravavasena patissavanaṃ patissavo, patissavabhūtaṃ taṃsabhāvañca yaṃ kiñci gāraṃ. Natthi etasmim patissavoti **appatissavo**, gāravavirahito. Tenāha “**ajettako anīcavutti**”ti.

Paṭhama-agāraṇasuttavaṇṇanā niṭṭhitā.

10. Dutīya-agāraṇasuttavaṇṇanā

10. Dasame **vuddhinti-ādīsu** sīlena **vuddhim**, maggena **virūḷhim**, nibbānena **vepullaṃ**. Sīlasamādhihi vā **vuddhim**, vipassanāmaggehi **virūḷhim**, phalanibbānehi **vepullaṃ**. Ettha ca yassa catubbidhaṃ sīlaṃ akhaṇḍādibhāvappavattiyā suparisuddhaṃ visesabhāgiyattā appakasireneva maggaphalāvahaṃ saṃgharakkhitattherassa viya, so tādīsena sīlena imasmim dhammavinaye

vuḍḍhiṃ āpajjissati. Tena vuttaṃ “sīlena vuḍḍhiṃ”ti. Yassa pana ariyamaggo uppanno, so virūḷhamūlo viya pādapo suppatiṭṭhitattā sāsane virūḷhiṃ āpanno nāma hoti. Tena vuttaṃ “maggena virūḷhiṃ”ti. Yo sabbakilesanibbānappatto, so arahā sīlādiddhamakkhandhapāripūriyā sati vepullappatto hoti. Tena vuttaṃ “nibbānena vepullan”ti. Dutiyavikappe attho vuttanayānusārena veditabbo.

Dutiya-agārasuttavaṇṇanā niṭṭhitā.

Sekhabalavaggavaṇṇanā niṭṭhitā.

2. Balavagga

1. Ananussutasuttavaṇṇanā

11. Dutiyassa paṭhame **abhijānitvā**ti abhivisiṭṭhena nāṇena jānitvā. **Aṭṭhahi kāraṇehi tathāgatassā**ti “kathā āgatoti tathāgato. Tathā gatoti tathāgato. Tathalakkhaṇaṃ āgatoti tathāgato. Tathadhamme yāthāvato abhisambuddhoti tathāgato. Tathadassitāya tathāgato. Tathāvāditāya tathāgato. Tathākāritāya tathāgato. Abhibhavanaṭṭhena tathāgato”ti evaṃ vuttehi aṭṭhahi kāraṇehi. Usabhassa idanti **āsabham**, seṭṭhaṭṭhānaṃ. Tenāha “**āsabham ṭhānanti seṭṭhaṭṭhāna**”ti. Parato dassitabalayogena “dasabalohan”ti **abhītanādaṃ nadati**. **Brahmacakkanti** ettha seṭṭhapariyāyo **brahmasaddoti** āha “**seṭṭhacakkan**”ti. Cakkañcetaṃ dhammacakkaṃ adhippetam.

Ananussutasuttavaṇṇanā niṭṭhitā.

3. Saṃkhittasuttavaṇṇanā

13. Tatiye kāmaṃ sampayuttadhammesu thirabhāvopi balaṭṭho eva, paṭipakkhehi pana akampanīyattaṃ sātisaṃ balaṭṭhoti vuttaṃ “**mutṭhassacce na kampa**”ti.

Saṃkhittasuttavaṇṇanā niṭṭhitā.

4. Vitthatasuttavaṇṇanā

14. Catutthe **satinepakkenā**ti satiyā nepakkena, tikkhavisadasūrabhāvenāti attho. Aṭṭhakathāyaṃ pana nepakkaṃ nāma paññāti adhippāyena “nepakkaṃ vuccati paññā”ti vuttaṃ. Evaṃ sati añño niddiṭṭho nāma hoti. **Satimā**ti ca iminā savisesā sati gahitāti paratopi “cirakatampi cirabhāsitampi saritā anussaritā”ti satikiccameva niddiṭṭhaṃ, na paññākkiccam, tasmā **satinepakkenā**ti satiyā nepakkabhāvenāti sakkā viññātuṃ labbhateva. Paccayavisesavasena aññadhammanirapekkho satiyā balavabhāvo. Tathā hi ñāṇavippayuttacittenapi sajjhāyanasammasanāni sambhavanti.

Cirakatampīti attanā vā parena vā kāyena cirakataṃ cetiyaṅgaṇa vattādimahāvattappaṭipattipūraṇaṃ. **Cirabhāsitampī**ti attanā vā parena vā vācāya cirabhāsitaṃ sakkaccaṃ uddisana-uddisāpanadhammosāraṇadhammadesanā-upanisinnakaparikathā-anumodanīyādivasena pavattitaṃ vacīkammaṃ. **Saritā anussaritā**ti tasmiṃ kāyena cirakate kāyo nāma kāyaviññatti, cirabhāsīte vācā nāma vacīviññatti, tadubhayampi rūpaṃ, taṃsamuṭṭhāpakā cittacetāsikā arūpaṃ. Iti ime rūpārūpadhammā evaṃ uppajjitvā evaṃ niruddhāti sarati ceva anussarati ca, satisambojjhaṅgaṃ samuṭṭhāpetīti attho. Bojjhaṅgasamuṭṭhāpikā hi sati idha adhippetā. Tāya satiyā esa sakiṃ saraṇena saritā, punappunaṃ saraṇena anussaritāti veditabbā.

Vitthatasuttavaṇṇanā niṭṭhitā.

5. Daṭṭhabbasuttādivaṇṇanā

15-20. Pañcame **savisayasmimīyevā**ti attano attano visaye eva. **Lokiyalokuttaradhamme kathetunti** lokiyadhamme lokuttaradhamme ca tena tena pavattivisesena kathetuṃ. **Catūsu sotāpattiyāṅgesū**ti sappurisasamsevo saddhammassavanaṃ yonisomanasikāro dhammānudhammappaṭipattīti imesu catūsu sotāpattimaggakāraṇesu. Kāmañca tesu sati-ādayopi dhammā icchitabbāva tehi vinā tesam

asambhavato, tathāpi cettha saddhā visesato kiccakārīti veditabbā. Saddho eva hi sappurise payirupāsati, saddhammaṃ suṇāti, yoniso ca aniccādito manasi karoti, ariyamaggassa ca anudhammaṃ paṭipajjati, tasmā vuttamā **“ettha saddhābalaṃ daṭṭhabban”**ti. Iminā nayena sesabalesupi attho daṭṭhabbo.

Catūsu sammappadhānesūti catubbidhasammappadhānabhāvanāya. **Catūsu satipaṭṭhānesūti**-ādīsipi eseva nayo. Ettha ca sotāpatti-aṅgesu saddhā viya, sammappadhānabhāvanāya vīriyaṃ viya ca satipaṭṭhānabhāvanāya yasmā “vineyya loke abhijjhādomanassan”ti¹ vacanato pubbabhāge kiccato sati adhikā icchitabbā, evaṃ samādhikammikassa samādhi, “ariyasaccabhāvanā paññābhāvanā”ti katvā tattha paññā pubbabhāge adhikā icchitabbāti pākaṭoyamattho. Adhigamakkhaṇe pana samādhipaññānaṃ viya sabbesampi balānaṃ saddhādīnaṃ samatāva icchitabbā. Tathā hi “ettha saddhābalan”ti-ādīnā tattha tattha etthaggaṇaṃ kataṃ.

Idāni saddhādīnaṃ tattha tattha atirekakiccataṃ upamāya vibhāvetuṃ **“yathā hī”**ti-ādi vuttamā. Tatridaṃ upamāsaṃsandanaṃ—rājapañcamasahāyā viya vimutti-paripācākāni pañca balāni, nesaṃ kīlanattham ekajjhaṃ vīthi-otaraṇaṃ viya balānaṃ ekajjhaṃ vipassanāvīthi-otaraṇaṃ, sahāyesu paṭhamādīnaṃ yathāsakaṃ geheva vicāraṇā viya saddhādīnaṃ sotāpatti-aṅgādīni patvā pubbaṅgamatā, sahāyesu itaresaṃ tattha tattha tuṇhībhāvo viya sesabalānaṃ tattha tattha tadanvayatā, tassa pubbaṅgamassa balassa kiccānugatā. Na hi tadā tesam sasambhārapathavī-ādīsu āpādīnaṃ viya kiccaṃ pākaṭaṃ hoti, saddhādīnaṃyeva pana kiccaṃ vibhūtaṃ hutvā tiṭṭhati puretaraṃ tathāpaccayehi cittasantānassa abhisankhatattā. Ettha ca vipassanākammikassa bhāvanā visesato paññuttarāti dassanattham rājānaṃ nidassanaṃ katvā paññindriyaṃ vuttamā. Chaṭṭhādīni suviññeyyāni.

Daṭṭhabbasuttādivaṇṇanā niṭṭhitā.

Balavaggavaṇṇanā niṭṭhitā.

1. Dī 2. 231; Ma 1. 70 piṭṭhesu.

3. Pañcaṅgikavagga

1. Paṭhama-agāravasuttādivaṇṇanā

21-22. Tatiyassa paṭhame **ābhisamācārikanti** abhisamācāre uttamasamācāre bhavaṃ. Kim pana tanti āha “**vattavasena paññattasīlan**”ti. Sesam suviññeyyameva. Duttiye natthi vattabbaṃ.

Paṭhama-agāravasuttādivaṇṇanā niṭṭhitā.

3. Upakkilesasuttādivaṇṇanā

23-24. Tatiye **na ca pabhāvanti** na ca pabhāsampannaṃ. **Pabhijjanasabhāvanti** tāpetvā tālakajjanapabhaṅguraṃ. **Avasesam lohanti** vuttāvasesam sajātilohaṃ vijātilohaṃ pisācalohaṃ kittimalohanti evaṃpabhedam sabbampi lohaṃ. **Uppajjitum appadānenāti** ettha nanu lokiyakusalacittassapi suvisuddhassapi¹ uppajjitum appadānena upakkilesatāti? Saccametam, yasmim pana santāne nīvaraṇāni laddhappatiṭṭhāni, tatha mahaggatakusalassapi asambhavo, pageva lokuttarakusalassa. Parittakusalam pana yathāpaccayam uppajjamānam nīvaraṇehi upahate santāne uppattiyā aparisuddham hontam upakkiliṭṭham nāma hoti aparisuddhadīpakapallikavaṭṭitelādisannissayo paḍīpo viya. Apica nippariyāyato uppajjitum apadānena tesam upakkilesatāti dassento “**yadaggena hī**”ti-ādimāha. Ārammaṇe vikkhattappavattivasena cuṇṇavicuṇṇatā veditabbā. Catutthe natthi vattabbaṃ.

Upakkilesasuttādivaṇṇanā niṭṭhitā.

5. Anuggahitasuttavaṇṇanā

25. Pañcame **sammādiṭṭhīti vipassanāsammādiṭṭhīti**-ādinā aṅguttarabhāṇakānam matena ayaṃ atthavaṇṇanā āradhā, majjhimbhāṇakā panettha aññathā attham vadanti. Vuttam hetam **majjhimaṭṭhakathāyam**²—

1. Suvisadassāpi (Ka)

2. Ma-Ṭṭha 2. 246 piṭṭhe.

“**Anuggahitā**ti laddhūpakārā. **Sammādiṭṭhī**ti arahattamaggasammādiṭṭhī. Phalakkhaṇe nibbattā cetovimutti phalaṃ assāti **cetovimutti**phalā. Tadeva cetovimuttisaṅkhātāṃ phalaṃ ānisaṃso assāti **cetovimutti**phalānisaṃsā. Dutiyapadepe eveda nayo. Ettha catutthaphalapaññā **paññāvimutti** nāma, avasesā dhammā **cetovimutti**ti veditabbā. “**Sīlānuggahitā**”ti-ādīsu **sīlanti** catupārisuddhisīlaṃ. **Sutanti** sappāyadhammassavanaṃ. **Sākacchā**ti kammaṭṭhāne khalanapakkkhalanacchedanakathā. **Samatho**ti vipassanāpādikā aṭṭha samāpattiyo. **Vipassanā**ti sattavidhā anupassanā. Catupārisuddhisīlaṃ hi pūrentassa, sappāyadhammassavanaṃ suṇantassa, kammaṭṭhāne khalanapakkkhalanaṃ chindantassa vipassanāpādikāsu aṭṭhasu samāpattīsu kammaṃ karontassa, sattavidham anupassanaṃ bhāventassa arahattamaggo uppajjitvā phalaṃ deti.

Yathā hi madhuraṃ ambapakkam paṇibhuñjitukāmo ambapotakassa samantā udakakoṭṭhakaṃ thiraṃ katvā bandhati, ghaṭam gahetvā kālena kālam udakam āsiṅcati, udakassa anikkhamaṇattham mariyādam thiraṃ karoti. Yā hoti samīpe valli vā sukkhadaṇḍako vā kipillikapuṭo vā makkaṭakajālam vā, tam apaneti, khaṇittim gahetvā kālena kālam mūlāni parikhaṇati, evamassa appamattassa imāni pañca kāraṇāni karoto so ambo vaḍḍhitvā phalaṃ deti, evaṃ sampadamidaṃ veditabbanṃ. Rukkhasa samantato koṭṭhakabandhanaṃ viya hi sīlam daṭṭhabbanṃ, kālena kālam udakasiṅcanaṃ viya dhammassavanaṃ, mariyādāya thirabhāvakaṇaṇaṃ viya samatho, samīpe valli-ādīnaṃ haraṇaṃ viya kammaṭṭhāne khalanapakkkhalanacchedanaṃ, kālena kālam khaṇittim gahetvā mūlakhaṇanaṃ viya sattannaṃ anupassanaṃ bhāvanā, tehi pañcahi kāraṇehi anuggahitassa ambarukkhasa madhuraphaladānakālo viya imassa bhikkhuno imehi pañcahi dhammehi anuggahitāya sammādiṭṭhiyā arahattaphaladānaṃ veditabban”ti.

Ettha ca **laddhūpakārā**ti yathārahaṃ nissayādivasena laddhapaccayā. Vipassanāsammādiṭṭhiyā anuggahitabhāvena gahitattā maggasammādiṭṭhīsu ca

arahattamaggasammādiṭṭhi. Anantarassa hi vidhi paṭisedho vā, aggaphalasangamādhimhi tapparikkhāradhammesuyeva ca kevalo cetopariyāyo niruḥhoti **sammādiṭṭhīti arahattamaggasammādiṭṭhi. Phalakkhaṇeti** anantaram kālantare cāti duvidhepi phalakkhaṇe. Paṭippassaddhivasena sabbasaṅkilesehi ceto vimuccati etāyāti **cetovimutti**, aggaphalapaññam ṭhapetvā avasesā phaladhammā. Tenāha “**cetovimutti phalam assāti, cetovimuttisaṅkhātam phalam ānisaṃso**”ti. Sabbakilesehi cetaso vimuccanasāṅkhātam paṭippassambhanasaññitam pahānam phalam ānisaṃso cāti yojanā. Idha cetovimuttisaddena pahānamattam gahitam, pubbe pahāyakaḍḍhammā. Aññathā phaladhammā eva ānisaṃsoti gayhamāne punavacanam niratthakam siyā. **Paññāvimutti phalānisaṃsāti** etthāpi evameva attho veditabbo. Sammāvācākammantājīvāsīlasabhāvattā visesato samādhissa upakārā, tathā sammāsaṅkappo jhānasabhāvattā. Tathā hi so “appanā”ti niddiṭṭho. Sammāsatisammāvāyāmā pana samādhipakkhiyā evāti āha “**avasesā dhammā cetovimuttīti veditabbā**”ti.

Catupārisuddhisīlanti ariyamaggādhigamassa padaṭṭhānabhūtam catupārisuddhisīlam. **Sutādisupi** eseva nayo. Attano cittappavattī-ārocanavasena saha kathanam saṅkathā, saṅkathāva **sācchā**. Idha pana kammaṭṭhānappaṭibaddhāti āha “**kammaṭṭhāne -pa- kathā**”ti. Tassa kammaṭṭhānassa ekavāram vidhiyā appaṭipajjanam khalanam, anekavāram pakkhalanam, tadubhayassa vicchedanī apanayanī kathā **khalanapakhalanacchedanakathā. Pūrentassāti** vivaṭṭasannissitam katvā pārentassa brūhentassa ca. **Suṇantassāti** “yathā-uggahitakammaṭṭhānam phātim gamissati”ti evam suṇantassa. Teneva hi “**sappāyadhammassavanan**”ti vuttam. **Kammam karontassāti** bhāvanānuyogakammam karontassa. Pañcasupi ṭhānesu anta-saddo hetu-atthajotano daṭṭhabbo. Evam hi “yathā hī”ti-ādinā vuccamānā ambūpamā yujjeyya.

Udakakoṭṭhakanti jalāvātam¹. **Thiram katvā bandhatīti** asithilam daḥham nātimahantam nātikhuddakam katvā yojeti. **Thiram karotīti** udakasiñcanakāle tato tato pavattitvā udakassa anikkhamanattam jalāvāṭapālim thirataram karoti. **Sukkhadaṇḍakoti** tasseva ambagacchassa sukkhako

1. Ālavālam (Mūlapaṇṇāsake mahāvedallasuttaṭīkāyam)

sākhāsīsako. **Kipillikapuṭoti** tambakipillikapuṭo. **Khaṇittinti** kudālaṃ. **Koṭṭhakabandhanam** viya **sīlam** sammādiṭṭhiyā vaḍḍhanūpāyassa mūlabhāvato. **Udakasiñcanam** viya **dhammassavanam** bhāvanāya paribrūhanato. **Mariyādāya thirabhāvakarānam** viya **samatho** yathāvuttāya bhāvanādhiṭṭhānāya sīlamariyādāya daḷhībhāvāpādanato. Samāhitassa hi sīlam thiratarāṃ hoti. **Samīpe valli-ādīnam haraṇam** viya **kammaṭṭhāne khalanapakkhalanacchedanam** icchi tabbabhāvanāya vibandhanāpanayanato. **Mūlakhaṇanam** viya **sattannam anupassanānam bhāvanā** tassā vibandhassa mūlabhūtānam taṇhāmānadiṭṭhīnam palikhaṇanato. Ettha ca yasmā suparisuddhasīlassa kammaṭṭhānam anuyuñjantassa sappāyadhammassavanam icchitabbaṃ, tato yathāsute atthe sākacchāsamāpajjanam, tato kammaṭṭhānavisodhanena samathanibbatti, tato samāhitassa āradhavi-passakassa vipassanāpāripūri, paripuñṇā vipassanā maggasammādiṭṭhim brūhetīti evametesam āngānam paramparāya sammukhā anuggaṇhanato ayamānupubbī kathitāti veditabbaṃ.

Anuggahitasuttavaṇṇanā niṭṭhitā.

6. Vimuttāyatanasuttavaṇṇanā

26. Chaṭṭhe vimuttiyā vaṭṭadukkhato vimuccanassa āyatanāni kāraṇāni **vimuttāyatanānīti** āha “**vimuccanakāraṇānī**”ti. **Pāḷi-attham jānantassāti** “idha sīlam āgataṃ, idha samādhi, idha paññā”ti-ādīnā tamtampāḷi-attham yāthāvato jānantassa. **Pāḷim jānantassāti** tadatthabodhinim pāḷim yāthāvato upadhārentassa. **Taruṇapīṭīti** sañjātamattā mudukā pīti jāyati. Katham jāyati? Yathādesitam dhammam upadhārentassa tadanucchavikameva attano kāyavācāmanosamācāram pariggaṇhantassa somanassam pattassa pamodalakkhaṇam pāmojjam jāyati. **Tuṭṭhākārabhūtā balavapīṭīti** purimuppannāya pītiyā vasena laddhāsevanattā ativiya tuṭṭhākārabhūtā kāyacittadarathassa passambhanasamatthatāya passaddhiyā paccayo bhavitum samatthā balappattā pīti jāyati. Yasmā nāmakāye passaddhe rūpakāyepi passaddho eva hoti, tasmā “nāmakāyo passambhati”ccheva vuttaṃ.

Sukhaṃ paṭilabhatīti vakkhamānassa cittasamādhānassa paccayo bhavituṃ samatthaṃ cetasiṃ nirāmisasukhaṃ paṭilabhati vindati. **Samādhīyatī**ti ettha pana na yo koci samādhi adhippeto, atha kho anuttarasamādhīti dassento “**arahatta -pa- samādhīyatī**”ti āha. “**Ayaṃ hī**”ti-ādi tassam desanāyaṃ tādissa puggalassa yathāvuttasamādhīpaṭilābhassa kāraṇabhāvavibhāvanāṃ, yaṃ tathā vimuttāyatanabhāvo. **Osakkīti**ti dassituṃ. **Samādhīyeva samādhīnimittanti** kammaṭṭhānapāḷiyā āruḷho samādhi eva parato uppajjanakabhāvanāsamādhissa kāraṇabhāvato samādhīnimittam. Tenāha “**ācariyassa santike**”ti-ādi.

Vimuttāyatanasuttavaṇṇanā niṭṭhitā.

7. Samādhīsuttavaṇṇanā

27. Sattame sabbaso kilesadukkhadarathapariḷāhānam vigatattā sātīsayamettha sukhanti vuttam “**appitappitakkhaṇe sukhattā paccuppannasukho**”ti. Purimassa purimassa vasena pacchimaṃ pacchimaṃ laddhāsevanatāya santapaṇītataraḥbhāvappattam hotīti āha “**purimo -pa- sukhavipāko**”ti. **Kilesappaṭippassaddhīyā**ti kilesānam paṭippassambhanena laddhattā. **Kilesappaṭippassaddhibhāvanti** kilesānam paṭippassambhanabhāvaṃ. **Laddhattā** pattattā tabbhāvaṃ upagatattā. Lokiyasamādhissa paccanīkāni nīvaraṇapaṭṭhamajjhānanīkanti-ādīni niggaḥetabbāni, aññe kilesā vāretabbā. Imassa pana arahattasamādhissa paṭippassaddhasabbakilesattā na niggaḥetabbam vāretabbāñca atthīti maggānantaram samāpattikkhaṇe ca appayogena adhiḡatattā appitattā ca aparīhānivasena vā appitattā **na sasaṅkhāraniggayhavāritagato**. **Sativepullappattattā**ti etena appavattamānāyapi satiyā satibahulatāya sato eva nāmāti dasseti. **Yathāparicchinnaḡalavasenā**ti etena paricchinnaḡatiyā satoti dasseti. **Sesesūti** nāṇesu.

Samādhīsuttavaṇṇanā niṭṭhitā.

8. Pañcaṅgikasuttādivaṇṇanā

28-29. Aṭṭhame karo vuccati pupphasambhavam “gabbhāsaye kiriyatī”ti katvā. Karato jāto kāyo **karajakāyo**, tadupanissayo catusantatirūpasamudāyo. Kāmaṃ nāmakāyopi vivekajena pītisukhena tathāladdhūpakāro, “abhisandeti”ti-ādivacanato pana rūpakāyo idha adhippetoti āha “**imaṃ karajakāyan**”ti. **Abhisandeti**ti abhisandanam karoti. Tam pana abhisandanam jhānamayena pītisukhena karajakāyassa tintabhāvāpādanam sabbatthakameva lūkhabhāvāpanayananti āha “**temeti**”ti-ādi. Tayidaṃ abhisandanam atthato yathāvuttapītisukhasamuṭṭhānehi paṇitarūpehi kāyassa parippharaṇam daṭṭhabbam. **Parisandeti**ti-ādīsupi eseva nayo. Sabbam etassa atthīti sabbāvā, tassa **sabbāvato**. Avayavāvayavisambandhe avayavini sāmivacananti avayavavisayo **sabbasaddo**, tasmā vuttam “**sabbakoṭṭhāsavato**”ti. **Aphuṭam nāma na hoti** yattha yattha kammajarūpaṃ, tattha tattha cittajarūpassa abhibyāpanato. Tenāha “**upādinna kasantakī**”ti-ādi.

Chekoti kusalo. Tam panassa kosallam nahānīyacuṇṇānam karaṇe piṇḍikaraṇe ca samatthatāvasena veditabbanti āha “**paṭibalo**”ti-ādi. **Kaṃsa-**saddo “mahatīyā kaṃsapātiyā”ti-ādīsu¹ suvaṇṇe āgato. “Kaṃso upahato yathā ti”ādīsu² kittimalohe. Katthaci paṇṇattimatte “upakaṃso nāma rājāsī, mahākaṃsassa atrajo”ti-ādī³. Idha pana yattha katthaci loheti āha “**yena kenaci lohena katabhājane**”ti. **Snehānugatā**ti udakasinehena anuppavisanavasena gatā upagatā. **Snehaparetā**ti udakasinehena parito gatā samantato phuṭā. Tato eva **santarabāhirā phuṭā snehena**. Etena sabbaso udakena temitabhāvamāha. **Na ca pagghariṇī**ti etena tintassapi tassa ghanathaddhabhāvam vadati. Tenāha “**na bindu bindū**”ti-ādi.

Tāhi tāhi udakasirāhi ubbhijjatīti ubbhidaṃ, ubbhidaṃ udakaṃ etassāti **ubbidodako**. **Ubbhinna-udakoti** nadīṭire khatakūpako viya ubbhijjanaka-udako. **Uggacchana-udakoti** dhārāvasena uṭṭhahana-udako. Kasmā panettha

1. Ma 1. 36 piṭṭhe. 2. Khu 1. 33 piṭṭhe Dhammapade. 3. Jātaka-Ṭṭha 4. 80 piṭṭhe.

ubbhidodakova rahado gahito, na itaroti āha “**heṭṭhā uggacchana-udakañhī**”ti-ādi. **Dhārānipātabubbuḷakehī**ti dhārānipātehi ca udakabubbuḷehi ca. “Phenaṇaṭalehi cā”ti vattabbaṃ, **sannisinnameva** aparikkhobhatāya niccalameva, suppasannamevāti adhippāyo. **Sesanti** “abhisandeti”ti-ādikaṃ.

Uppalānīti uppalagacchāni. **Setarattanīlesūti** uppalesu, setuppalarattuppalanīluppalesūti attho. **Yaṃ kiñci uppalam uppalameva** sāmāññaggahaṇato. **Satapattanti** ettha sata-saddo bahupariyāyo “satagghī”ti-ādīsu viya. Tena anekasatapattassapi saṅgaho siddho hoti. Loke pana rattam padumaṃ, setam puṇḍarikanti vuccati. Yāva aggā yāva ca mūlā udakena abhisandanādisambhavadassanattam¹ **udakānuggataggahaṇam**. Idha uppalādīni viya karajakāyo, udakaṃ viya tatiyajjhānasukhaṃ.

Yasmā **parisuddhena cetasā**ti catutthajjhānacittamāha, tañca rāgādi-upakkilesamalāpagamato nirupakkilesaṃ nimmalaṃ, tasmā āha “**nirupakkilesaṭṭhena parisuddhan**”ti. Yasmā pana pārisuddhiyā eva paccayavisesena pavattiviseso pariyodātātā sudhantasuvaṇṇassa nighaṃsanena pabhassaratā viya, tasmā āha “**pabhassaratṭhena pariyodātam veditabban**”ti. **Idanti** odātavacanaṃ. **Utupharaṇatthanti** utuno pharaṇadassanattam. **Utupharaṇam na hoti** sesanti² adhippāyo. Tenāha “**tañkhaṇa -pa- balavaṃ hoti**”ti. **Vattham viya karajakāyoti** yogino karajakāyo vattham viya daṭṭhabbo utupharaṇasadisena catutthajjhānasukhena pharitabbattā. Purisassa sarīraṃ viya catutthajjhānaṃ daṭṭhabbaṃ utupharaṇatṭhāniyassa sukhasa nissayabhāvato. Tenāha “**tasmā**”ti-ādi. Tattha ca “**parisuddhena cetasā**”ti cetogahaṇena jhānasukhaṃ vuttanti daṭṭhabbaṃ. Tenāha “**utupharaṇam viya catutthajjhānasukhan**”ti. Nanu ca catutthajjhāne sukhomeva natthīti? Saccam natthi, sātālakkhaṇasantasabhāvattā panettha upekkhā “sukhan”ti adhippetā. Tena vuttam **sammohavinodaniyam**³ “upekkhā pana santattā, sukhamicceva bhāsītā”ti.

1. Abhisandanādisambhāradassanattam (Ka) Dī-Ṭī 1. 264 piṭṭhe passitabbaṃ.

2. Savisesanti (Dī-Ṭī 1. 264 piṭṭhe.)

3. Abhi-Ṭīha 2. 171 piṭṭhe.

Tassa tassa samādhissa sarūpadassanassa paccayattā
paccavekkhaṇañāṇaṃ **paccavekkhaṇanimittaṃ**. **Samabharitoti** samapuṇṇo.

Maṇḍabhūmī papāvaṇṇabhūmi. Yattha salilasiñcanaena vināva sassāni
ṭhitāni sampajjanti. Yuge yojetabbāni yoggāni, tesam ācariyo **yoggācariyo**.
Tesaṃ sikkhāpanato hatthi-ādayopi “yoggā”ti vuccantīti āha pāliyaṃ
“assadammasārathī”ti. **Yena yenāti** catūsu maggesu yena yena maggena.
Yaṃ yaṃ gatinti jivasamajavādibhedāsu gatīsu yaṃ yaṃ gatiṃ. Navame
natthi vattabbaṃ.

Pañcaṅgikasuttādivaṇṇanā niṭṭhitā.

10. Nāgitasuttavaṇṇanā

30. Dasame **uccāsaddamahāsaddāti** uddhaṃ uggatattā ucco patthaṭṭo
mahanto vinibbhijjivā gahetuṃ asakkuṇeyyo saddo etesanti
uccāsaddamahāsaddā. Vacīghosopi hi bahūhi ekajjhaṃ pavattito atthato
saddato ca duravabodho kevalaṃ mahānigghoso eva hutvā
sotapathamāgacchati. **Macchavilopeti** macchānaṃ vilumpitvā viya gahaṇe,
macchānaṃ vā vilumpane. Kevaṭṭānaṃ hi macchapacchiṭhapitaṭṭhāne
mahājano sannipatitvā “idha aññaṃ ekaṃ macchaṃ dehi, ekaṃ
macchaphālaṃ dehi”ti, “etassa te mahā dinno, mayhaṃ khuddako”ti evaṃ
uccāsaddaṃ mahāsaddaṃ karonti. Macchaggahaṇatthaṃ jāle pakkhittepi
tasmim ṭhāne kevaṭṭā ceva añña ca “paviṭṭho gahito”ti mahāsaddaṃ karonti.
Taṃ sandhāyetaṃ vuttaṃ. **Asucisukhanti** kāyāsucisannissitattā
kilesāsucisannissitattā ca asucisannissitasukhaṃ. **Nekkhamasukhassāti**
kāmato nikkhamantassa sukhasa. **Pavivekasukhassāti** gaṇasaṅgaṇikato
kilesasaṅgaṇikato ca vigatassa sukhasa. **upasamasukhassāti**
rāgādivūpasamāvahassa sukhasa. **Sambodhasukhanti** maggasaṅkhātassa
sambodhasa niṭṭhappattatthāya sukhaṃ. Sesam suviññeyyameva.

Nāgitasuttavaṇṇanā niṭṭhitā.

Pañcaṅgikavaggavaṇṇanā niṭṭhitā.

4. Sumanavagga

1. Sumanasuttavaṇṇanā

31. Catutthassa paṭhame **satakkakū**ti satasikharo, anekakūṭoti attho. Idaṃ tassa mahāmeghabhāvadassanaṃ. So hi mahāvassaṃ vassati. Tenevāha “**ito cito ca utt̥hitena valāhakakūṭasatena samannāgatoti attho**”ti. **Dassanasampannoti** ettha dassanaṃ nāma sotāpattimaggo. So hi paṭhamarṇ nibbānadassanato “dassanan”ti vuccati. Yadipi taṃ gotrabhu paṭhamatararṇ passati, disvā pana kattabbakiccassa kilesappahānassa akaraṇato na taṃ “dassanan”ti vuccati. Āvajjanaṭṭhāniyarṇ hi taṃ nāṇarṇ. Maggassa nibbānārammaṇatāsāmaññena cetarṇ vuttarṇ, na nibbānappaṭivijjhanena, tasmā dhammacakkhurṇ punappunarṇ nibbattanena bhāvanarṇ appattarṇ dassanaṃ, dhammacakkhuñca pariññādikiccakaraṇena catusaccadhammadassanaṃ tadabhisamayoti natthettha gotrabhussa dassanabhāvāpatti. Sesamettha suviññeyyameva.

Sumanasuttavaṇṇanā niṭṭhitā.

2. Cundīsuttavaṇṇanā

32. Dutiye “ariyakantehi silehi samannāgato”ti-ādīsū¹ ariyakantānīti pañcasīlāni āgatāni. Ariyakantāni hi pañcasīlāni ariyānarṇ kantāni piyāni, bhavantaragatāpi ariyā tāni na vijahanti. Idha pana “yāvata Cunda sīlāni ariyakantāni sīlāni, tesarṇ aggamakkhāyati -pa- agge te paripūrakārino”ti vuttatā maggaphalāni sīlāni adhippetānīti āha “**ariyakantāni sīlānīti maggaphalasampayuttāni sīlānī**”ti.

Cundīsuttavaṇṇanā niṭṭhitā.

1. Am 2. 187 piṭṭhe.

3. Uggahasuttavaṇṇanā

33. Tatiye **sabbapaṭhamam uṭṭhānasilā**ti rattiyā vibhāyanavelāya sāmike parijane seyyāya avuṭṭhite sabbapaṭhamam uṭṭhānasilā. Sāmikam disvā nisinnāsanato aggidaḍḍhā viya paṭhamameva vuṭṭhahantīti vā **pubbuṭṭhāyiniyo**. **Kimkāraṇti** kimkaraṇīyam, kimkaraṇabhāvena pucchitvā kātabbaveyyāvaccanti attho. Tam paṭissuṇantā vicarantīti **kimkārappaṭissāviniyo**. Manāpaṃyeva kiriyaṃ karonti sīlenāti **manāpacāriniyo**. Piyameva vadanti sīlenāti **piyavāḍiniyo**.

Tatrupāyāyāti tatra kamme sādhetabba-upāyabhūtāya vīmaṃsāya. Tenāha “**tasmim unṇākappā sasaṃvidhāne**”ti-ādi. **Alam kātunti** kātum samatthā. **Alam saṃvidhātunti** vicāretum samatthā. Tenāha “**alam kātum alam saṃvidhātunti attanā kātumpi parehi kārapetumpi**”ti-ādi. Sesamettha suviññeyyameva.

Uggahasuttavaṇṇanā niṭṭhitā.

4. Sīhasenāpatisuttādivaṇṇanā

34-35. Catutthe **sandiṭṭhikanti** asamparāyikatāya sāmam daṭṭhabbam, sayam anubhavitabbam attapaccakkham diṭṭhadhammikanti attho. **Na saddhāmattakeneva tiṭṭhatīti** “dānam nāma sādhu sundaram, buddhādīhi paṇḍitehi pasatthan”ti evam saddhāmattakeneva na tiṭṭhati. **Yam dānam detīti** yaṃ deyyadhammam parassa deti. **Tassa pati hutvāti** tabbisayam lobham suṭṭhu abhibhavanto tassa adhipati hutvā deti. Tena anadhibhavanīyattā **na dāso na sahāyoti**. Tattha tadubhayaṃ anvayato byatirekato ca dassetum “**yo hī**”ti-ādi vuttam. **Dāso hutvā deti** taṇhādāsabyassa upagattā. **Sahāyo hutvā deti** tassa piyabhāvāvissajjanato. **Sāmī hutvā deti** tattha taṇhādāsabyato attānam mocetvā abhibhuyya pavattanato. Atha vā yo dānasīlatāya dāyako puggalo, so dāne pavattibhedena dānadāso, dānasahāyo, dānapatīti tippakāro hoti. Tadassa tippakāratam vibhajitvā dassetum “**yo hī**”ti-ādi vuttam. Dātabbaṭṭhena **dānam**, annapānādi.

Tattha yaṃ attanā paribhuñjati, taṇhādhipannatāya tassa vasena vattanato dāso viya hoti. Yaṃ paresaṃ dīyati, tathāpi annapānasāmaññena idaṃ vuttaṃ “**dānasaṅkhātassa deyyadhammassa dāso hutvā**”ti. **Sahāyo hutvā deti** attanā paribhuñjitabbassa paresaṃ dātābba ca samasamaṃ ṭhapanato. **Pati hutvā deti** sayāṃ deyyadhammassa vase avattitvā tassa attano vase vattāpanato. Aparo nayo—yo attanā paṇītaṃ paribhuñjitvā paresaṃ nihīnaṃ deti, so **dānadāso** nāma tannimittanihīnabhāvāpattito. Yo yādisaṃ attanā paribhuñjati, tādisameva paresaṃ deti, so **dānasahāyo** nāma tannimittahīnādhikabhāvavivajjanena sadisabhāvāpattito. Yo attanā nihīnaṃ paribhuñjitvā paresaṃ paṇītaṃ deti, so **dānapati** nāma tannimittaseṭṭhabhāvāpattito.

Nittejabhūto tejahānippattiyā. Saha byati gacchatīti saha byo, sahapavattanako, tassa bhāvo **sahabyatā**, sahapavattīti āha “**sahabhāvaṃ ekībhāvaṃ gatā**”ti. **Asitassāti** vā abandhassa, taṇhābandhanena abandhassāti attho. Pañcamaṃ uttānameva.

Sihasenāpatisuttādivaṇṇanā niṭṭhitā.

6. Kāladānasuttādivaṇṇanā

36-37. Chaṭṭhe **ārāmatoti** phalārāmato. **Paṭhamuppannānīti** sabbapaṭhamāṃ sujātāni. **Bhāsitaññūti** bhikkhū gharadvāre ṭhitā kiñcāpi tuṇhī honti, atthato pana “bhikkhaṃ dethā”ti vadanti nāma ariyāya yācanāya. Vuttaṃ hetāṃ “uddissa ariyā tiṭṭhanti, esā ariyāna yācanā”ti. Tatra ye “mayāṃ pacāma, ime na pacanti, pacamāne patvā alabhantā kuhiṃ labhissantī”ti deyyadhammaṃ samvibhajanti, te **bhāsitaññū** nāma ña tvā kattābba karaṇato. **Yuttappattakāleti** dātum yuttappattakāle. **Appaṭivānacittoti** anivattanacitto. Sattamaṃ uttānameva.

Kāladānasuttādivaṇṇanā niṭṭhitā.

paṭipattiyā”ti-ādi. **Attanā dāyajjārahaṃ karontoti** attānaṃ dāyajjārahaṃ karonto. Mātāpitaro hi attano ovāde avattamāne micchāpaṭipanne dārake vinicchayaṃ gantvā¹ aputte karonti, te dāyajjārahā na honti. Ovāde vattamāne pana kulasantakassa sāmike karonti. **Tatīyadivasato paṭṭhāyāti** matadivasato tatīyadivasato paṭṭhāya. Sesam suviññeyyameva. Dasamaṃ uttānameva.

Puttasuttādivaṇṇanā niṭṭhitā.

Sumanavaggavaṇṇanā niṭṭhitā.

5. Muṇḍarājavagga

1. Ādiyasuttādivaṇṇanā

41-42. Pañcamassa paṭhame **uṭṭhānavīriyādhighatehī**ti vā uṭṭhānena ca vīriyena ca adhighatehī. Tattha **uṭṭhānanti** kāyikaṃ vīriyaṃ. **Vīriyanti** cetasikanti vadanti. **Uṭṭhānanti** vā bhoguppādane yuttappayuttatā. **Vīriyaṃ** tajjo ussāho. **Piṇṭanti** dhātamaṃ sutittamaṃ. Tathābhūto pana yasmā thūlasarīro hoti, tasmā **“thūlaṃ karoti”**ti vuttamaṃ. Dutīyaṃ uttānameva.

Ādiyasuttādivaṇṇanā niṭṭhitā.

3. Iṭṭhasuttavaṇṇanā

43. Tatiye **appamādaṃ pasamsantī**ti “etāni āyu-ādīni patthayantena appamādo kātabbo”ti appamādameva pasamsanti paṇḍitā. Yasmā vā puññakiriyāsu paṇḍitā appamādaṃ pasamsanti, tasmā āyu-ādīni patthayantena appamādova kātabboti attho. Purimasmiṃ atthavikappe “puññakiriyāsū”ti padassa “appamatto”ti iminā sambandho. Yasmā paṇḍitā appamādaṃ pasamsanti, yasmā ca puññakiriyāsu appamatto ubho atthe adhighato hoti, tasmā āyu-ādīni patthayantena

1. Patvā (Ka)

appamādova kātabbo. Dutiyasmiṃ atthavikappe paṇḍitā appamādaṃ pasamsanti. Katthāti? Puññakiriyāsu. Kasmāti ce? Yasmā appamatto ubho atthe adhiggaṇhāti paṇḍito, tasmāti attho. **Atthappaṭilābhenāti** diṭṭhadhammikādihitappaṭilābhena.

Iṭṭhasuttavaṇṇanā niṭṭhitā.

4. Manāpadāyīsuttavaṇṇanā

44. Catutthe jhānāmanena nibbattaṃ **manomayanti** āha “**suddhāvāsesu ekam jhānāmanena nibbattaṃ devakāyan**”ti. Satipi hi sabbasattānaṃ abhisāṅkhāramanasā nibbattabhāve bāhirapaccayehi vinā manasāva nibbattattā “**manomayā**”ti vuccanti rūpāvaccarasattā. Yadi evaṃ kāmabhāve opapātikasattānampi manomayabhāvo āpajjatīti ce? Na, tattha bāhirapaccayehi nibbattetabbatāsaṅkāya eva abhāvato “manasāva nibbattā”ti avadhāraṇāsambhavato. Niruḷho vāyaṃ loke manomayavohāro rūpāvaccarasattesu. Tathā hi “annamayo pāṇamayo manomayo ānandamayo viññānamayo”ti¹ pañcadhā attānaṃ vedavādinopi vadanti ucchedavādinopi vadanti “dibbo rūpī manomayo”ti². **Tīsu vā kulasampattīsūti** brāhmaṇakhattiyavessasaṅkhātesu sampannakulesu. **Chasu vā kāmasaggesūti** chasu kāmāvaccaradevesu.

Manāpadāyīsuttavaṇṇanā niṭṭhitā.

5. Puññābhisandasuttādivaṇṇanā

45-46. Pañcame **asaṅkheyyoti** āḷhakagaṇanāya asaṅkheyyo. Yojanavasena panassa saṅkhā atthi heṭṭhā mahāpathaviyā upari ākāseṇa parisamantato cakkavālapabbatena majjhe tattha tattha ṭhitakehi dīpapabbatapariyantehi paricchinnattā jānantena yojanato saṅkhātuṃ sakkāti katvā. Mahāsarīramacchakumbhīlayakkharakkhasamahānāgadānavādīnaṃ saviññāṇakānaṃ balavāmukhapātālādīnaṃ aviññāṇakānaṃ bheravārammaṇānaṃ vasena

1. Tittirīya-upanisaganthe 2 valliyaṃ 1, 2, 3, 4, 5 anuvāsesu.

2. Dī 1. 31 piṭṭhe.

bahubheravaṃ. Puthūti bahū. Savantīti sandamānā. Upayantīti upagacchanti. Chaṭṭhaṃ uttānameva.

Puññābhisandasuttādivaṇṇanā niṭṭhitā.

7. Dhanasuttādivaṇṇanā

47-48. Sattame **saddhāti** maggenāgatā saddhā. **Sīlañca yassa kalyāṇanti** kalyāṇasīlaṃ nāma ariyasāvakaṃ ariyakantaṃ sīlaṃ vuccati. Tattha kiñcāpi ariyasāvakaṃ ekasīlampi akantaṃ nāma natthi, imasmiṃ panatthe bhavantarepi appahīnaṃ pañcasīlaṃ adhippetāṃ. Aṭṭhamaṃ uttānameva.

Dhanasuttādivaṇṇanā niṭṭhitā.

9. Kosalasuttavaṇṇanā

49. Navame **patitakkhandhoti** sammukhā kiñci oloketuṃ asamatthatāya adhomukho. **Nippaṭibhānoti** sahadhammikaṃ kiñci vattuṃ avisahanato nippaṭibhāno paṭibhānarahito.

Kosalasuttavaṇṇanā niṭṭhitā.

10. Nāradasuttavaṇṇanā

50. Dasame **ajjhomucchitoti** adhimattāya taṇhāmucchāya mucchito, mucchaṃ mohaṃ pamādaṃ āpanno. Tenāha “**gilitvā -pa- atirekamucchāya taṇhāya samannāgato**”ti. **Mahaccāti** mahatiyā. Liṅgavipallāsena cetāṃ vuttaṃ. Tenāha “**mahatā rājānubhāvenā**”ti.

Nāradasuttavaṇṇanā niṭṭhitā.

Muṇḍarājavaggavaṇṇanā niṭṭhitā.

Paṭhamapaṇṇāsako niṭṭhito.

2. Dutiyapaṇṇāsaka

(6) 1. Nīvaraṇavagga

1. Āvaraṇasuttādivaṇṇanā

51-52. Dutiyassa paṭhame āvarantīti **āvaraṇā**, nīvārayantīti **nīvaraṇā**. Ettha ca **āvarantīti** kusalahammupattim ādito parivārenti, **nīvārayantīti** niravasesato vārayantīti attho, tasmā **āvaraṇavasenāti** ādito kusaluppattivāraṇavasena, **nīvaraṇavasenāti** niravasesato vāraṇavasenāti evamettha attho daṭṭhabbo. Yasmā pañca nīvaraṇā uppajjamānā anuppannāya lokiyalokuttarāya paññāya uppajjitum na denti, uppannāpi aṭṭha samāpattiyo pañca vā abhiññā upacchindivā pārenti, tasmā “**paññāya dubbalīkaraṇā**”ti vuccanti. Upacchindanam pātanañcettha tāsam paññānam anuppannānam uppajjitum appadānameva. Iti mahaggatānuttarapaññānam ekaccāya ca parittapaññāya anupattihetubhūtā nīvaraṇadhammā itarāsam samatthataṃ vihanantiyevāti paññāya dubbalīkaraṇā vuttā. Bhāvanāmanasikārena vinā pakatiyā manussehi nibbattetabbo dhammoti **manussadhammo**, manussatbhāvāvaho vā dhammo **manussadhammo**, anuḷāraṃ parittakusalaṃ. Yaṃ asatipi buddhuppāde vattati, yañca sandhāyāha “hīnena brahmacariyena, khattiye upapajjati”ti¹. Alam ariyāya ariyabhāvāyāti alamariyo ariyabhāvāya samatthoti vuttam hoti. Ñāṇadassanameva ñāṇadassanaviseso, alamariyo ca so ñāṇadassanaviseso cāti **alamariyañāṇadassanaviseso**.

Ñāṇadassananti ca dibbacakkhupi vipassanāpi maggopi phalampi paccavekkhaṇañāṇampi sabbaññūtaññāṇampi vuccati. “Appamatto samāno ñāṇadassanaṃ ārādheti”ti² hi ettha dibbacakkhu ñāṇadassanaṃ nāma. “Ñāṇadassanāya cittam abhinīharati abhininnāmeti”ti³ ettha vipassanāñāṇam. “Abhabbā te ñāṇāya dassanāya anuttarāya sambodhāyā”ti⁴ ettha maggo.

1. Khu 5. 183 piṭṭhe. 2. Ma 1. 257 piṭṭhe. 3. Dī 1. 72 piṭṭhe. 4. Am 1. 521 piṭṭhe.

“Ayamañño uttarimanussadhammā alamariyañāṇadassanaviseso adhigato phāsuvihāro”¹ ettha phalaṃ. “Ñāṇaṇca pana me dassanaṃ udapādi, akuppā me vimutti, ayamantimā jāti, natthi dāni punabbhavo”² ettha paccavekkhaṇañāṇaṃ. “Ñāṇaṇca pana me dassanaṃ udapādi ‘sattāhakālakato ālāro kālāmo’³ ettha sabbaññutaññāṇaṃ. Idha pana lokuttaradhammo adhippeto. Ettha ca rūpāyatanam jānāti cakkhuvīññāṇaṃ viya passati cāti **ñāṇadassanaṃ**, dibbacakkhu. Sammasanūpacāre ca dhammalakkhaṇattayaṇca tathā jānāti passati cāti **ñāṇadassanaṃ**, vipassanā. Nibbānaṃ cattāri vā saccāni asammohappaṭivedhato jānāti passati cāti **ñāṇadassanaṃ**, maggo. Phalaṃ pana nibbānavaseneva yojetabbaṃ. Paccavekkhaṇā maggādhigatassa atthassa sabbaso jotanaṭṭhena **ñāṇadassanaṃ**. Sabbaññutā anāvaraṇatāya samantacakkhutāya ca **ñāṇadassanaṃ**. **Byādiṇṇakālo**ti pariyādinnakālo. Dutiyam uttānameva.

Āvaraṇasuttādivaṇṇanā niṭṭhitā.

3. Padhāniyaṅgasuttādivaṇṇanā

53-54. Tatiye padahatīti padahano, bhāvanamanuyutto yovī, tassa bhāvo bhāvanānuyogo **padahanabhāvo**. Padhānamassa atthīti padhāniko, ka-kārassa ya-kāram katvā “**padhāniyo**”¹ti vuttam. “Abhinīhārato paṭṭhāya āgatattā”²ti vuttattā paccakabodhisattasāvakabodhisattānampi paṇidhānato pabhuti āgatasaddhā **āgamanasaddā** eva, ukkaṭṭhaniddesena pana “**sabbaññubodhisattānan**”³ti vuttam. Adhigamato samudāgatattā aggamaggaphalasampayuttā cāpi **adhigamasaddhā nāma**, yā sotāpannassa aṅgabhāvena vuttā. **Acalabhāvenā**ti paṭipakkhena anadhibhavanīyattā niccalabhāvena. **Okappananti** okkhanditvā adhimuccanaṃ, pasāduppattiyā pasādanīyavatthusmiṃ pasādanameva. **Suppaṭividdhanti** suṭṭhu paṭividdham. Yathā tena paṭividdhena sabbaññutaññāṇaṃ hatthagataṃ ahosi, tathā paṭividdham. Yassa buddhasubuddhatāya saddhā acalā asampavedhi, tassa dhammasudhammatāya

1. Ma 1. 268 piṭṭhe.

2. Saṃ 3. 370; Vi 3. 16; Khu 9. 331 piṭṭhesu.

3. Ma 1. 226; Ma 2. 294 piṭṭhesu.

saṅghasuppaṭipannatāya tena paṭivedhena saddhā na tathāti aṭṭhānametaṃ anavakāso. Tenāha bhagavā “yo bhikkhave buddhe pasanno dhamme pasanno saṅghe pasanno”ti-ādi. **Padhānavīriyaṃ ijjhati** “addhā imāya paṭipadāya jarāmaṇato muccissāmi”ti sakkaccaṃ padahanato.

Appa-saddo abhāvattho “appasaddassa -pa- kho panā”ti-ādīsu viyāti āha “**arogo**”ti. **Samavepākiniyāti** yathābhuttamāhāraṃ samākārenea pacanasīlāya. Daḷhaṃ katvā pacantī hi gahaṇī ghorabhāvena pittavikārādivasena rogaṃ janeti, sithilaṃ katvā pacantī mandabhāvena vātavikārādivasena. Tenāha “**nātisītāya nāccuṇhāyā**”ti. Gahaṇitejassa mandapaṭutāvasena sattānaṃ yathākkamaṃ sītuṇhasahatāti āha “**atisītalaggahaṇiko**”ti-ādi. Yathāvato accayadesanā attano āvikaraṇaṃ nāmāti āha “**yathābhūtaṃ attano aguṇaṃ pakāsetā**”ti. **Udayatthagāminiyāti** saṅkhārānaṃ udayaṅca vayaṅca paṭivijjhantiyāti ayamettha atthoti āha “**udayaṅcā**”ti-ādi. **Parisuddhāyāti** nirupakkilesāya. **Nibbijhituṃ samatthāyāti** tadaṅgavasena savisesaṃ pajahituṃ samatthāya. **Tassa dukkhassa khayagāminiyāti** yaṃ dukkhaṃ imasmim̃ ñaṇe anadhigate pavattiraṇaṃ, adhigate na pavatti, taṃ sandhāya vadati tathāhesa yogāvacarō “cūlasotāpanno”ti vuccati. Catutthaṃ uttānameva.

Padhāniyaṅgasuttādivaṇṇanā niṭṭhitā.

5. Mātāputtasuttavaṇṇanā

55. Pañcame **vissāsoti** visacchāyasantāno bhāvo. **Otāroti** tattha cittassa anuppaveso. **Gahetvāti** attano eva okāsaṅgahetvā. **Khepetvāti** kusalavāraṃ khepetvā.

Ghaṭṭeyyāti akkamaṇādivasena bādheyya. **Tīhi pariññāhīti** ñātātiraṇappahānasāṅkhātāhi tīhi pariññāhi. Natthi etesaṃ kutoci bhayanti **akutobhayā**, nibbhayāti attho. Catunnaṃ oghānaṃ, saṃsāramahoghasseva vā pāraṃ pariyantaṃ gatā. Tenāha “**pāraṃ vuccati nibbānaṃ**”ti-ādi.

Mātāputtasuttavaṇṇanā niṭṭhitā.

6. Upajjhāyasuttavaṇṇanā

56. Chaṭṭhe madhurakabhāvo nāma sarīrassa thambhitattam, tam pana garubhāvapubbakanti āha “**sañjātagarubhāvo**”ti. **Na pakkhāyantīti nappakāsenti, nānākāraṇato na upaṭṭhahanti. Tenāha “catasso disā ca anudisā ca mayhaṃ na upaṭṭhahantī”**ti. Sesamettha uttānameva.

Upajjhāyasuttavaṇṇanā niṭṭhitā.

7. Abhiṇhapaccavekkhitabbaṭṭhānasuttavaṇṇanā

57. Sattame **jarādhammoti dhamma-saddo** “asammosadhammo nibbānan”ti-ādīsu¹ viya pakatipariyāyo, tasmā jarāpakatiko jīṇṇasabhāvoti attho. Tenāha “**jarāsabhāvo**”ti-ādi. Sesapadesupi eseva nayo. Kammunā dātabbam ādiyātīti **kammadāyādo**, attanā yathūpacitakammaphalabhāgīti attho. Tam pana dāyajjam kāraṇūpacārena vadanto “**kammaṃ mayhaṃ dāyajjam santakanti attho**”ti āha yathā “kusalānam bhikkhave dhammānam samādānāhetu, evamidam puññaṃ vaḍḍhatī”ti². Yonīhi phalaṃ sabhāvato bhinnampi abhinnaṃ viya missitaṃ hoti. Tenāha “**kammaṃ mayhaṃ yoni kāraṇam**”ti. Mamattavasena bajjhantīti bandhū, nāti sālohito ca, kammaṃ pana ekantasambandhamevāti āha “**kammaṃ mayhaṃ bandhū**”ti. **Paṭiṭṭhāti** avassayo. Kammasadiso hi sattānam avassayo natthi.

Yobbanam ārabha uppannamadoti “mahallakakāle puññaṃ karissāma, daharamha tāvā”ti yobbanam apassāya mānakaraṇam. “Ahaṃ nirogo saṭṭhi vā sattati vā vassāni atikkantāni, na me harītakakhaṇḍampi khāditabbam, ime panaññe ‘asukam no ṭhānam rujjati, bhesajjam khādāmā’ti vicaranti, ko añño mayā sadiso nirogo nāmā”ti evam mānakaraṇam **ārogyamado**. Sabbesampi jīvitam nāma pabhaṅguraṃ dukkhānubandhañca, tadubhayaṃ anoloketvā pabandhaṭṭhitim³ paccayasulabhatañca nissāya “ciraṃ jīvim, ciraṃ jīvāmi, ciraṃ jīvissāmi, sukhaṃ jīvim, sukhaṃ jīvāmi, sukhaṃ jīvissāmi”ti evam mānakaraṇam **jīvitamado**.

1. Khu 1. 396 piṭṭhe.

2. Dī 3. 48 piṭṭhe.

3. Pabandhasīti (Ka)

Upadhirahitanti kāmūpadhirahitaṃ. Cattāro hi upadhī kāmūpadhi khandhūpadhi kilesūpadhi abhisāṅkhārūpadhīti. Kāmāpi “yaṃ pañca kāmagaṇe paṭicca uppajjati sukhaṃ somanassaṃ, ayaṃ kāmānaṃ assādo”¹ti evaṃ vuttassa sukhasa adhiṭṭhānabhāvato “upadhiyati ettha sukhan”²ti iminā vacanatthena “upadhī”²ti vuccanti, khandhāpi khandhamūlakassa dukkhasa adhiṭṭhānabhāvato, kilesāpi apāyadukkhassa adhiṭṭhānabhāvato, abhisāṅkhārāpi bhavadukkhassa adhiṭṭhānabhāvato. Sesāṃ suviññeyyameva.

Abhiṅhapaccavekkhitabbaṭṭhānasuttavaṇṇanā niṭṭhitā.

8. Licchavikumārakasuttādivaṇṇanā

58-60. Aṭṭhame **sāpateyyanti** ettha saṃ vuccati dhanāṃ, tassa paṭīti sapati, dhanasāmiko. Tassa hitāvahattā sāpateyyaṃ, drabyaṃ, dhananti attho. Attano rucivasena gāmakiccaṃ netīti gāmaniyo, gāmaniyoyeva **gāmaṇiko**.

Anvāya upanissāya jīvanasīlā **anujīvinoti** āha “**ye ca etaṃ upanissāya jīvanti**”²ti. Ekaṃ mahākulaṃ nissāya paṇṇāsampi saṭṭhipi kulāni jīvanti, te manusse sandhāyetaṃ vuttaṃ. Sesāṃ suviññeyyameva. Navamādīni uttānatthāneva.

Licchavikumārakasuttādivaṇṇanā niṭṭhitā.

Nīvaraṇavaggavaṇṇanā niṭṭhitā.

(7) 2. Saññāvagga

1. Saññāsuttādivaṇṇanā

61-65. Dutiyassa paṭhame “**mahapphalā mahānisamsā**”²ti ubhayampetaṃ atthato ekaṃ, byañjanaṃ nānanti āha “**mahapphalā**”²ti-ādi. “Pañcime gahapatayo ānisamsā”²ti-ādīsu² ānisamsa-saddo phalapariyāyopi

1. Ma 1. 120 piṭṭhe.

2. Khu 1. 185 piṭṭhe Udāne.

hoti. Mahato lokuttarassa sukhasa paccayā hontīti **mahānisamsā**. **Amatogadhāti** amatabbhantarā amataṃ anuppaviṭṭhā nibbānadiṭṭhattā, tato paraṃ na gacchanti. Tena vuttaṃ “amatapariyosānā”ti. Amataṃ pariyosānaṃ avasānaṃ etāsanti **amatapariyosānā**. **Marāṇasaññāti** marāṇānupassanāñāṇena saññā. **Āhāre paṭikūlasaññāti** āhāraṃ gamanādivasena paṭikūlato pariggaṇhantassa uppannasaññā. **Ukkaṇṭhitassāti** nibbindantassa katthacipi asajjantassa. Dutiyādīni uttānatthāneva.

Saññāsuttādivaṇṇanā niṭṭhitā.

6. Sājīvasuttādivaṇṇanā

66-70. Chaṭṭhe saha ājīvanti etthāti **sājīvo**, pañhassa pucchanaṃ vissajjanañca. Tenāha “**sājīvoti pañhapucchanañceva pañhavissajjanañcā**”ti-ādi. **Abhisankhatanti** citaṃ. Sattamādīni uttānatthāneva.

Sājīvasuttādivaṇṇanā niṭṭhitā.

Saññāvaggavaṇṇanā niṭṭhitā.

(8) 3. Yodhājīvavagga

1. Paṭhamacetovimuttiphalaṣuttādivaṇṇanā

71-72. Tatiyassa paṭhame **avijjāpalighanti** ettha **avijjāti** vaṭṭamūlikā avijjā, ayaṃ pacurajanehi ukkhipituṃ asakkuṇeyyabhāvato dukkhipanaṭṭhena nibbānadvārappavesavibandhanena ca “paligho viyāti paligho”ti vuccati. tenesa tassā ukkhittattā “**ukkhittapaligho**”ti vutto. Punabbhavassa karaṇasīlo, punabbhavaṃ vā phalaṃ arahatīti **ponobhavikā**, punabbhavādāyikāti attho. **Jāṭisamsāro**ti jāyanavasena ceva saṃsaraṇavasena ca evaṃladdhanāmānaṃ punabbhavakkhandhānaṃ paccayo kammābhisaṅkhāro. Jāṭisamsāroti hi phalūpacārena kāraṇaṃ vuttaṃ. Taṃ hi punappunaṃ uppattikāraṇavasena parikkhipitvā ṭhitattā “**parikhā**”ti vuccati

santānassa parikkhipanato. Tenesa tassa saṁkiṇṇattā vikiṇṇattā sabbaso khittattā vināsittattā “**saṁkiṇṇaparikho**”ti vutto.

Taṇhāsankhātanti ettha **taṇhāti** vaṭṭamūlikā taṇhā. Ayam hi gambhīrānugataṭṭhena “**esikā**”ti vuccati. **Luñcivā** uddharitvā. **Orambhāgiyānī** orambhāgajanakāni kāmabhava upapattipaccayāni kāmārāgasamyojanādīni. Etāni hi kavāṭam viya nagaradvāram cittaṁ pidahitvā ṭhitattā “**aggaḷa**”ti vuccanti. Tenesa tesam niggaṭattā bhinnattā “**niraggaḷo**”ti vuttoti. Aggamaggena panno apacito mānaddhajo etassāti **pannaddhajo**. **Pannabhāro**ti khandhabhārakilesabhāra-abhisankhārabhārā oropitā assāti pannabhāro. **Visamyuttoti** catūhi yogehi sabbakilesehi ca visamyutto. **Asmimānoti** rūpe asmīti māno, vedanāya, saññāya, saṅkhāresu, viññāṇe asmimāno. Ettha hi pañcapi khandhe avisesato “**asmī**”ti gahetvā pavattamāno asmimānoti adhippeto.

Nagaradvārassa parissayapaṭibāhanatthañceva sodhanatthañca ubhosu passesu esikāthambhe nikhaṇitvā ṭhabetīti āha “**nagaradvāre ussāpīte esikāthambhe**”ti. Pākāraviddhamsaneneva parikhābhūmisamakaraṇam hotīti āha “**pākāram bhinditvā parikham vitiritvā**”ti. “**Evan**”ti-ādi upamāsamśandanam. Santo saṁvijjamāno kāyo dhammasamūhoti **sakkāyo**, upādānakkhandhapañcakam. **Dvattimsakammakāraṇā** dukkhakkhandhe āgatadukkhāni. Akkhirogasīsarogādayo **aṭṭhanavuti**¹ **rogā**, rājabhayādīni **pañcavīsati mahābhayāni**. Dutiyam uttānameva.

Paṭhamacetovimutti phalasuttādivaṇṇanā niṭṭhitā.

3. Paṭhamadhammavihārīsuttādivaṇṇanā

73-74. Tatiye **niyakajjhatteti** attano santāne. Mettāya upasamharaṇavasena **hitam esantena**. Karuṇāya vasena **anukampamānena**. **Pariggahetvāti** parito gahetvā, pharitvāti attho. **Pariccāti** parito katvā, samantato pharitvā-icceva attho.

1. Channavuti (Ka)

“**Paṭiccā**”tipi pāṭho. **Mā pamajjitthā**ti “jhāyathā”ti vuttasamathavipassanānaṃ ananuyuñjanena aññena vā kenaci pamādakāraṇena mā pamādaṃ āpajjittha. Niyyānikasāsane akattabbakaraṇaṃ viya kattabbākaraṇampi pamādoti. **Vipattikā**leti satta-asappāyādivipattiyutte kāle. Sabbepi sāsane guṇā idheva saṅghaṃ gacchantīti āha “**jhāyatha mā pamādattha -pa- anusāsani**”ti. Catutthe natthi vattabbaṃ.

Paṭhamadhammavihārīsuttādivaṇṇanā niṭṭhitā.

5. Paṭhamayodhājīvasuttavaṇṇanā

75. Pañcame yujjhaṇaṃ yodho, so ājīvo etesanti **yodhājīvā**. Tenāha “**yuddhūpajīvino**”ti. **Santhambhitvā ṭhātuṃ na sakkotī**ti baddho dhitisampanno ṭhātuṃ na sakkoti. **Samāgateti** sampatte. **Byāpajjatī**ti vikāramāpajjati. Tenāha “**pakatibhāvaṃ jahatī**”ti.

Rajaggasminti paccatte bhummavacananti āha “**kiṃ tassa puggalassa rajaggaṃ nāmā**”ti. **Vinibbēthetvā**ti gahitaggahaṇaṃ vissajjāpetvā. **Mocetvā**ti sarīrato apanetvā.

Paṭhamayodhājīvasuttavaṇṇanā niṭṭhitā.

6. Dutiyayodhājīvasuttavaṇṇanā

76. Chaṭṭhe **cammanti** iminā cammamayaṃ cammamiti sibbitaṃ, aññaṃ vā keṭakaphalakādiṃ saṅgaṇhāti. **Dhanukalāpaṃ sannayhitvā**ti dhanuñceva tūṇirañca sannayhitvā sajjetvā. Dhanudaṇḍassa jīyāyattabhāvakaraṇādīpi hi dhanuno sannayhanaṃ. Tenevāha “**dhanuñca sarakalāpañca sannayhitvā**”ti. **Yuddhasannivesena ṭhitanti** dvinnam senānaṃ byūhasaṃvidhānanayena kato yo sanniveso, tassa vasena ṭhitaṃ, senābyūhasaṃvidhānavasena sanniviṭṭhanti vuttaṃ hoti. **Ussāhañca vāyāmañca karotī**ti yujjhanavasena ussāhaṃ vāyāmañca karoti. **Pariyāpādentī**ti maraṇapariyantikaṃ aparaṃ pāpentī. Tenāha “**pariyāpādayanti**”ti, jīvitaṃ pariyāpādayanti maraṇaṃ paṭipajjāpentīti vuttaṃ hoti.

Arakkhiteneva kāyenāti-ādīsu hatthapāde kilāpento gīvaṃ viparivattento kāyaṃ na rakkhati nāma. Nānappakāraṃ duṭṭhullaṃ karonto vācaṃ na rakkhati nāma. Kāmavitakkādayo vitakkento cittaṃ na rakkhati nāma. **Anupaṭṭhitāya satiyā**ti kāyagatāya satiyā anupaṭṭhitāya. **Rāgena anugatoti** rāgena anupahato. **Rāgaparetoti** vā rāgena phuṭṭho phuṭṭhavisena viya sappena.

Anudahanatṭhenāti anupāyappaṭipattiyā. Sampati āyatiṅca **mahābhitāpaṭṭhena**. Anavatthitasabhāvatāya **ittarapaccupaṭṭhānatṭhena**. Muhuttaramaṇīyatāya **tāvakālikatṭhena**. Byattehi abhibhavaṇīyatāya **sabbaṅgapaccaṅgalibhaṅjanaṭṭhena**. Chedanabhedanādi-adhikaraṇabhāvena ugghaṭṭanasadisatāya **adhikuṭṭanatṭhena**. Avaṇe vaṇaṃ uppādetvā anto anupavisanasabhāvatāya **vinivijjhanatṭhena**. Diṭṭhadhammikasamparāyika-anatthanimitatāya **sāsaṅkasappaṭibhayatṭhena**.

Dutiyayodhājīvasuttavaṇṇanā niṭṭhitā.

7. Paṭhama-anāgatabhayasuttādivaṇṇanā

77-78. Sattame **visesassa pattiyā** visesassa pāpuṇanattham. **Vīriyanti** padhānavīriyaṃ. Taṃ pana caṅkamanavasena karaṇe “kāyikan”tipi vattabbaṃ labhatīti āha “**duvidhampī**”ti. **Satthakavātā**ti sandhibandhanāni kattariyā chindantā viya pavattavātā. Tenāha “**sattham viyā**”ti-ādi. **Katakammehī**ti katacorakammehi. Te kira katakammā yaṃ nesaṃ devataṃ āyācitvā kammaṃ nipphannaṃ, tassa upakāratthāya manusse māretvā galalohitāni gaṇhanti. Te “aṅṅesu manussesu māriyamānesu kolāhalaṃ uppajjissati, pabbajitaṃ pariyesanto nāma natthī”ti maṅṅamānā bhikkhū gahetvā mārenti. Taṃ sandhāyetaṃ vuttaṃ. **Akatakammehī**ti aṭavito gāmaṃ āgamanakāle kammanipphattatthaṃ puretaraṃ balikammaṃ kātukāmehi. Tenevāha “**corikaṃ katvā nikkhantā katakammā nāmā**”ti-ādi. Aṭṭhame natthi vattabbaṃ.

Paṭhama-anāgatabhayasuttādivaṇṇanā niṭṭhitā.

9. Tatiya-anāgatabhayasuttavaṇṇanā

79. Navame **pāligambhīrā**¹ pāḷivasena gambhīrā agādhā dukkhogāhā sallasuttasadisā. **Sallasuttam**² hi “animittamanaññātan”ti-ādinā pāḷivasena gambhīraṃ, na atthagambhīraṃ. Tathā hi tattha tā tā gāthā duviññeyyarūpā tiṭṭhanti. Duviññeyyam hi ñāṇena dukkhogāhanti katvā “gambhīran”ti vuccati. Pubbāparampettha kāsañci gāthānaṃ duviññeyyatāya dukkhogāhameva, tasmā pāḷivasena gambhīraṃ. **Atthagambhīrā** atthavasena gambhīrā mahāvedallasuttasadisā, **mahāvedallasuttassa**³ atthavasena gambhīratā pākaṭāyeva. Lokaṃ uttaratīti lokuttaro, so atthabhūto etesaṃ atthīti **lokuttarā**. Tenāha “**lokuttaradhammadīpakā**”ti. **Suññatāpaṭisaṃyuttā**ti sattuññadhammappakāsakā. Tenāha “**khandhadhātu-āyatanapaccayākārappaṭisaṃyuttā**”ti. **Uggahetabbaṃ pariyāpuṇitabbanti** ca liṅgavacanavipallāsena vuttanti āha “**uggahetabbe ceva vaḷaṅjetabbe cā**”ti. Kavino kammaṃ **kavitā**. Yassa pana yaṃ kammaṃ, taṃ tena katanti vuccatīti āha “**kavitāti kavīhi katā**”ti. **Kāveyyanti** kabyaṃ, **kabyanti** ca kavinā vuttanti attho. Tenāha “**tasseva vevacanan**”ti. **Cittakkharā**ti citrākāra-akkharā. Itaraṃ tasseva vevacanaṃ. **Sāsanato bahiddhā ṭhitā**ti na sāsanāvacaṇā. **Bāhira kasāvakehī**ti “buddhā”ti appaññātānaṃ yesaṃ kesañci sāvakehi. **Sussūsissantī**ti akkharacittatāya ceva sarasampattiyā ca attamaṇā hutvā sāmaṇeradahaṃbhikkhumātugāmahāgahapatikādayo “esa dhammakathiko”ti sannipatitvā sotukāmā bhavissanti.

Tatiya-anāgatabhayasuttavaṇṇanā niṭṭhitā.

10. Catuttha-anāgatabhayasuttavaṇṇanā

80. Dasame **pañcavidhena saṃsaggenā**ti “savanasaṃsaggo dassanasaṃsaggo samullāpasasaggo sambhogasaṃsaggo kāyasaṃsaggo”ti evaṃ vuttana pañcavidhena saṃsaggena. Saṃsajjati etenāti saṃsaggo, rāgo. Sāvanahetuko, savanavasena vā pavatto saṃsaggo **savanasaṃsaggo**. Esa

1. Saṃ-Ṭī 2. 190 piṭṭhe passitabbaṃ.

2. Khu 1. 371 piṭṭhe Suttanipāte.

3. Ma 1. 365 piṭṭhe.

nayo sesesupi. **Kāyasaṃsaggo** pana kāyaparāmāso. Tesu parehi vā kathiyamānaṃ rūpādisampattiṃ attanā vā sitalapitagītasaddaṃ suṇantassa sotaviññāṇavīthivasena uppanno rāgo **savanasaṃsaggo** nāma. Visabhāgarūpaṃ olokontassa pana cakkhuviññāṇavīthivasena uppanno rāgo **dassanasaṃsaggo** nāma. Aññaṃañña-ālāpasallāpavasena uppannarāgo **samullāpasaṃsaggo** nāma. Bhikkhuno bhikkhuniyā santakaṃ, bhikkhuniyā bhikkhussa santakaṃ gahetvā paribhogakaraṇavasena uppannarāgo **sambhogasaṃsaggo** nāma. Hatthagghāhādivasena uppanno rāgo **kāyasaṃsaggo** nāma.

Anekavihitanti annasannidhipānasannidhivatthasannidhi-yānasannidhisayanasannidhigandhasannidhi-āmisasannidhivasena anekappakāraṃ. **Sannidhikatassāti** etena “sannidhikāraparibhoganti ettha kāra-saddassa kammatthataṃ dasseti. Yathā vā “ācayaṃ gāmino”ti vattabbe anuñāsikalopena “ācayagāmino”ti¹ niddeso kato, evaṃ “sannidhikāraṃ paribhogaṃ”ti vattabbe anuñāsikalopena “**sannidhikāraparibhogaṃ**”ti vuttaṃ, sannidhiṃ katvā paribhoganti attho.

“Sannidhikatassa paribhogaṃ”ti ettha² pana duvidhā kathā vinayavasena sallekhasasena ca. Vinayavasena tāva yaṃ kiñci annaṃ ajja paṭiggahitaṃ aparajju sannidhikāraṃ hoti, tassa paribhoge pācittiyaṃ. Attanā laddhaṃ pana sāmaṇeraṇaṃ datvā tehi laddhaṃ vā pāpetvā dutiyadivase bhuñjitum vaṭṭati, sallekko pana na hoti. Pānasannidhimhipi eseva nayo. Vatthasannidhimhi anadhiṭṭhitāvikkappitaṃ sannidhi ca hoti, sallekhañca kopeti. Ayaṃ nippariyāyakathā. Pariyāyato pana ticīvarasantuṭṭhena bhavitabbaṃ, catutthaṃ labhitvā aññaṃ dātabbaṃ. Sace yassa kassaci dātuṃ na sakkoti, yassa pana dātukāmo hoti, so uddesatthāya vā paripucchatthāya vā gato, āgatamatte dātabbaṃ, adātuṃ na vaṭṭati. Cīvare pana appahonte, satiyā vā paccāsāya anuññātakālaṃ ṭhapetuṃ vaṭṭati. Sūcisuttacīvarakāraṇaṃ alābhe tatopi vinayakammaṃ katvā ṭhapetuṃ vaṭṭati. “Imasmim̐ jīṇṇe puna īdisaṃ kuto labhissāmī”ti pana ṭhapetuṃ na vaṭṭati, sannidhi ca hoti, sallekhañca kopeti.

1. Abhi 1. 2 piṭṭhe.

2. Dī-Ṭṭha 1. 79 piṭṭhepi passitabbaṃ.

Yānasannidhimhi **yānaṃ** nāma vayhaṃ ratho sakaṭaṃ sandamānikā pāṭaṅkīti. Na panetaṃ pabbajitassa yānaṃ, upāhanaṃ pana yānaṃ. Ekabhikkhussa hi eko araṇṇāvāsathāya, eko dhotapādakatthāyāti ukkaṃsato dve upāhanasaṅghātakā vaṭṭanti, tatiyaṃ labhitvā aññassa dātabbo. “Imasmiṃ jiṇṇe aññaṃ kuto labhissāmi”ti ṭhapetuṃ na vaṭṭati, sannidhi ca hoti, sallekhañca kopeti. Sayanasannidhimhi **sayananti** mañco. Ekassa bhikkhuno eko sayanagabbhe, eko divāṭṭhāneti ukkaṃsato dve mañcā vaṭṭanti. Tato uttariṃ labhitvā aññassa bhikkhuno, gaṇassa vā dātabbo, adātuṃ na vaṭṭati, sannidhi ceva hoti, sallekho ca kuppati. Gandhasannidhimhi bhikkhuno kaṇḍukacchuchavidosaḍi-ābādhe sati gandhā vaṭṭanti. Gandhatthikena gandhañca āharāpetvā tasmim̐ roge vūpasante aññesaṃ vā ābādhikānaṃ dātabbaṃ, dvāre pañcaṅguligharadhūpanādīsu vā upanetaṃ. “Puna roge sati bhavissati”ti ṭhapetuṃ na vaṭṭati, gandhasannidhi ca hoti, sallekhañca kopeti.

Āmisanti vuttāvasesaṃ daṭṭhabbaṃ. Seyyathidaṃ? Idhekacco bhikkhu “tathārūpe kāle upakārāya bhavissanti”ti tilataṇḍulamuggamāsanālikeraloṇamacchasappitelakulālabhājanādīni āharāpetvā ṭhabeti, so vassakāle kālasseva sāmaṇerehi yāguṃ pacāpetvā paribhuñjitvā “sāmaṇera udakakaddame dukkhaṃ gāmaṃ pavisitum̐, gaccha asukakulaṃ gantvā mayhaṃ vihāre nisinnabhāvaṃ ārocehi, asukakulato dadhi-ādīni āharā”ti peseti. Bhikkhūhi “kiṃ bhante gāmaṃ pavissimā”ti vuttepi “duppaveso āvuso idāni gāmo”ti vadati. Te “hotu bhante, acchatha¹ tumhe, mayaṃ bhikkhaṃ pariyesitvā āharissimā”ti gacchanti. Atha sāmaṇero dadhi-ādīni āharitvā bhattañca byañjanañca sampādetvā upaneti, taṃ bhuñjantasseva upaṭṭhākā bhattaṃ pahiṇanti, tatopi manāpamanāpaṃ bhuñjati. Atha bhikkhū piṇḍapātaṃ gahetvā āgacchanti, tatopi manāpamanāpaṃ bhuñjatiyeva. Evaṃ catumāsampi vītināmeti. Ayaṃ vuccati bhikkhu muṇḍakuṭumbikajīvikāṃ jīvati, na samaṇajīvikanti. Evarūpo **āmisasannidhi** nāma hoti. Bhikkhuno pana vasanaṭṭhāne ekā taṇḍulanāli eko

1. Vacchatha (Ka)

guḷapiṇḍo kuḍuvamattam sappīti ettakam nidhetum vaṭṭati akāle sampattacorānam atthāya. Te hi ettakam āmisapaṭisanthāram alabhantā jīvītā voropeyyum, tasmā sace hi ettakam natthi, āharāpetvāpi ṭhapetum vaṭṭati. Aphāsukakāle ca yadettha kappiyam, tam attanāpi paribhuñjitum vaṭṭati. Kappiyakuṭiyam pana bahum ṭhapentassapi sannidhi nāma natthi.

Catuttha-anāgatabhayasuttavaṇṇanā niṭṭhitā.

Yodhājīvavaggavaṇṇanā niṭṭhitā.

(9) 4. Theravagga

1. Rajanīyasuttādivaṇṇanā

81-82. Catutthassa paṭhamam suviññeyyameva. Dutiye guṇamakkhanāya pavattopi attano kārakam gūthena paharantam gūtho viya paṭhamataram makkhetīti makkho, so etassa atthīti **makkhī**. Paḷāsatīti paḷāso parassa guṇe ḍamsitvā viya apānetīti attho. So etassa atthīti **paḷāsī**. Paḷāsī puggalo hi dutiyassa dhuram na deti, sampasāretvā tiṭṭhati. Tenāha “yugaggāhalakkhaṇena paḷāsena samannāgato”ti.

Rajanīyasuttādivaṇṇanā niṭṭhitā.

3. Kuhakasuttavaṇṇanā

83. Tatiye **tīhi kuhanavattūhī**ti sāmanta-jappana-iriyāpathasannissita-paccayappaṭisevanabhedato tippabhedehi kuhanavatthūhi. Tividhena kuhanavatthunā lokam kuhayati vimhāpayati “aho acchariyapuriso”ti attani paresam vimhayam uppādetīti **kuhako**. Lābhasakkārattiko hutvā lapati attānam dāyakam vā ukkhipitvā yathā sokiñci dadāti, evam ukkācetvā kathetīti **lapako**. Nimittam sīlam tassāti **nemittiko**, nimittena vā carati, nimittam vā karotīti **nemittiko**. **Nimittanti** ca paresam paccayadānasaññuppādakam kāyavacīkammaṃ

vuccati. Nippeso sīlamassāti **nippesiko**. Nippisatīti vā nippeso, nippesoyeva **nippesiko**. **Nippesoti** ca saṭhapuriso¹ viya lābhasakkārattham akkosanuppaṇḍanaparapiṭṭhimamsikatādi.

Kuhakasuttavaṇṇanā niṭṭhitā.

6. Paṭisambhidāppattasuttādivaṇṇanā

86-87. Chaṭṭhe paṭisambhidāsu yaṃ vattabbaṃ, taṃ teṭṭhā vuttameva. **Uccāvacānī**ti uccanīcāni. tenāha “**mahantakhuddakānī**”ti. **Kirīkaraṇīyānī**ti “kiṃ karomī”ti evaṃ vatvā kattabbakammāni. Tattha **uccakammāni** nāma cīvarassa karaṇaṃ, rajanaṃ, cetiye sudhākammaṃ, uposathāgāracetiyagharabodhigharesu kattabbakammanti evamādi. **Avacakammaṃ** nāma pādadhovanamakkhanādi khuddakakammaṃ. **Tatrupāyāyāti** tatrupagamaniyā, tatra tatra mahante khuddake ca kamme sādhanavasena upagacchantiyāti attho, tassa tassa kammaṃsa nipphādane samatthāyāti vuttaṃ hoti. **Tatrupāyāyāti** vā tatra tatra kamme sādhetabbe upāyabhūtāya. **Alaṃ kātunti** kātuṃ samattho hoti. **Alaṃ samvidhātunti** vicāretuṃ samattho. Sattamaṃ uttānameva.

Paṭisambhidāppattasuttādivaṇṇanā niṭṭhitā.

8. Therasuttavaṇṇanā

88. Aṭṭhame **thirabhāvappattoti** sāsane thirabhāvaṃ anivattikāvaṃ patto. Pabbajito hutvā bahū rattiyo jānātīti **rattaññū**. Tenāha “**pabbajitadivasato paṭṭhāyā**”ti-ādi. **Pākaṭoti** ayathābhūtaguṇehi ceva yathābhūtaguṇehi ca samuggato. Yaso etassa atthīti **yasassī**, yasaṃ sito nissito vā **yasassī**. Tenāha “**yasaniṣṣito**”ti. Asataṃ asādhūnaṃ dhammā **asaddhammā**, asantā vā asundarā gārayhā lāmakā dhammāti **asaddhammā**. Vipariyāyena **saddhammā** veditabbā.

Therasuttavaṇṇanā niṭṭhitā.

1. Bhadrapuriso (Ka) Dī-Ṭī 1. 129 piṭṭhe passitabbaṃ.

9. Paṭhamasekhasuttavaṇṇanā

89. Navame āramitabbaṭṭhena kammaṃ ārāmo etassāti kammārāmo, tassa bhāvo **kāmmārāmatā**. Tattha **kammanti** itikattabbaṃ kammaṃ vuccati. Seyyathidaṃ? Cīvaravicāraṇaṃ cīvarakammakaraṇaṃ upatthambhanaṃ pattatthavika-aṃsabaddhakakāyabandhanadhammakaraṇa-ādhārapādakathalika sammajjani-ādīnaṃ karaṇanti. Ekacco hi etāni karonto sakaladivasāṃ etāneva karoti, taṃ sandhāyesa paṭikkhepo. Yo pana etesaṃ karaṇavelāyameva tāni karoti, uddesavelāya uddesaṃ gaṇhāti, sajjhāyavelāya sajjhāyati, cetiyaṅgaṇavattavelāya cetiyaṅgaṇavattaṃ karoti, manasikāraavelāya manasikāraṃ karoti, na so kammārāmo nāma.

Bhassārāmatāti ettha yo itthivaṇṇapurisavaṇṇādivasena ālāpasallāpaṃ karontoyeva divasañca rattiñca vītināmeti, evarūpo bhasse pariyantakārī na hoti, ayaṃ bhassārāmo nāma. Yo pana rattimpi divasampi dhammaṃ katheti, pañhaṃ vissajjeti, ayaṃ appabhasso bhasse pariyantakārīyeva. Kasmā? “Sannipatitānaṃ vo bhikkhave dvayaṃ karaṇīyaṃ dhammī vā kathā, ariyo vā tuṇhībhāvo”¹ ti¹ vuttatā.

Niddārāmatāti ettha yo gacchantopi nisinnopi nipannopi thinamiddhābhibhūto niddāyatiyeva, ayaṃ niddārāmo nāma. Yassa pana karajakāye gelaññena cittaṃ bhavaṅge otarati, nāyaṃ niddārāmo. Tenevāha “abhijānāmi kho paṇāhaṃ aggivessana gimhānaṃ pacchime māse pacchābhattaṃ piṇḍapātappaṭikkanto catugguṇaṃ saṅghātiṃ paññāpetvā dakkhiṇena passena sato sampajāno niddaṃ okkamitā”² ti².

Saṅgaṇikārāmatāti ettha yo ekassa dutiyo, dvinnaṃ tatiyo, tiṇṇaṃ catutthoti evaṃ saṃsaṭṭhova viharati, ekako assādaṃ na labhati, ayaṃ saṅgaṇikārāmo. Yo pana catūsu iriyāpathesu ekakova assādaṃ labhati, nāyaṃ saṅgaṇikārāmo veditabbo. Sekhānaṃ paṭiladdhaguṇassa parihaṇāsambhavato “**upariguṇehī**”³ ti-ādi vuttaṃ.

Paṭhamasekhasuttavaṇṇanā niṭṭhā.

1. Ma 1. 217; Khu 1. 89, 113, 114 piṭṭhesu.

2. Ma 1. 316 piṭṭhe.

10. Dutiyasekhasuttavaṇṇanā

90. Dasame **atipātovā**ti sabbarattim niddāyitvā balavapaccūse koṭisammuñjaniyā thokaṃ sammajjitvā mukhaṃ dhovitvā yāgubhikkhatthāya pātova pavisati. **Taṃ atikkamitvā**ti gihisaṃsaggavasena kālaṃ vītināmento majjhanhikasamayaṃ atikkamitvā pakkamati. Pātoyeva hi gāmaṃ pavisitvā yāguṃ ādāya āsanasālaṃ gantvā pivitvā ekasmiṃ ṭhāne nipanno niddāyitvā manussānaṃ bhojanavelāya “paṇītabhikkhaṃ labhissāmī”ti upakaṭṭhe majjhanhike utṭhāya dhammakaraṇena udakaṃ gahetvā akkhīni puñchitvā piṇḍāya caritvā yāvadatthaṃ bhuñjitvā gihisaṃsaṭṭho kālaṃ vītināmetvā majjhanhe vītivatte paṭikkamati.

Appicchakathāti “āvuso atricchatā pāpicchatāti ime dhammā pahātabbā”ti tesu ādīnaṃ dassetvā “evarūpaṃ appicchataṃ samādāya vattitabban”ti-ādīnayaṃ pappattā kathā. **Tīhi vivekehī**ti kāyaviveko cittaviveko upadhivivekoti imehi tīhi vivekehi. Tattha eko gacchati, eko tiṭṭhati, eko nisīdati, eko seyyaṃ kappeti, eko gāmaṃ piṇḍāya pavisati, eko paṭikkamati, eko caṅkamaṃ adhiṭṭhāti, eko carati, eko viharatīti ayaṃ **kāyaviveko** nāma. Aṭṭha samāpattiyo pana **cittaviveko** nāma. Nibbānaṃ **upadhiviveko** nāma. Vuttampi hetuṃ “kāyaviveko ca vivekaṭṭhakāyānaṃ¹ nekkhammābhiraṭānaṃ, cittaviveko ca parisuddhacittānaṃ paramavodānappattānaṃ, upadhiviveko ca nirupadhīnaṃ puggalānaṃ visaṅkhāragatānaṃ”ti². **Duvidhaṃ vīriyanti** kāyikaṃ cetasaṅkaṅca vīriyaṃ. **Sīlanti** catupārisuddhisīlaṃ. **Samādhinti** vipassanāpādakā aṭṭhasamāpattiyo. **Vimuttikathā**ti vā ariyaphalaṃ ārabha pavattā kathā. Sesāṃ uttānameva.

Dutiyasekhasuttavaṇṇanā niṭṭhitā.

Theravaggavaṇṇanā niṭṭhitā.

1. Vipakaṭṭhakāyānaṃ (Ka)

2. Khu 4. 122 piṭṭhe.

(10) 5. Kakudhavagga

1. Paṭhamasampadāsuttādivaṇṇanā

91-100. Pañcamassa paṭhame dutiye ca natthi vattabbaṃ. Tatiye ājānanato **aññā**, uparimaggapaññā heṭṭhimamaggena ñātapariññāya eva jānanato. Tassā pana phalabhāvato maggaphalapaññā taṃsahagatā sammāsankappādayo ca idha “aññā”ti vuttā. Aññāya byākaraṇāni **aññābyākaraṇāni**. Tenevāha “**aññābyākaraṇānīti arahattabyākaraṇānī**”ti. **Adhigatamānenā**ti appatte pattasaññī, anadhigate adhigatasaññī hutvā adhigataṃ mayāti mānena. Catutthādīni uttānatthāneva.

Paṭhamasampadāsuttādivaṇṇanā niṭṭhitā.

Kakudhavaggavaṇṇanā niṭṭhitā.

Dutiyapaṇṇāsako niṭṭhito.

3. Tatiyapaṇṇāsaka

(11) 1. Phāsuvihāravagga

1. Sārajjasuttādivaṇṇanā

101-4. Tatiyassa paṭhame natthi vattabbaṃ. Dutiye piṇḍapātādi-atthāya upasaṅkamitum yuttatṭhānam gocarō, vesiyā gocarō assāti **vesiyāgocarō**, mittasanthavavasena upasaṅkamitabbaṭṭhānanti attho. Vesiyā nāma rūpūpajīviniyo, tā mittasanthavavasena na upasaṅkamitabbā samaṇabhāvassa antarāyakarattā, parisuddhāsayaṣṣāpi garahāhetuto, tasmā dakkhiṇādānavasena satim upaṭṭhapetvā upasaṅkamitabbaṃ. **Vidhavā** vuccanti matapatikā, pavutthapatikā vā. **Thullakumāriyoti** mahallikā anividdhā kumāriyo. **Paṇḍakāti** napuṃsakā. Te hi ussannakilesā avūpasantaparilāhā lokāmisaniṣṣitakathābahulā, tasmā na upasaṅkamitabbā. **Bhikkhuniyo** nāma ussannabrahmacariyā. Tathā **bhikkhūpi**. Aññamaññaṃ visabhāgavatthubhāvato santhavavasena upasaṅkamane katipāheneva brahmacariyantarāyo siyā, tasmā na upasaṅkamitabbā, gilānapucchanādivasena upasaṅkamane satokārinā bhavitabbaṃ. Tatiyacatutthāni uttānatthāneva.

Sārajjasuttādivaṇṇanā niṭṭhitā.

5. Phāsuvihārasuttavaṇṇanā

105. Pañcame mettā etassa atthīti mettam, taṃsamuṭṭhānam kāyakammaṃ **mettam kāyakammaṃ**. Esa nayo sesadvayepi. **Āvīti** pakāsanam. Pakāsaḥavo cettha yaṃ uddissa taṃ kāyakammaṃ karīyati, tassa sammukhabhāvatoti āha “**sammukhā**”ti. **Rahoti** appakāsaṃ. Appakāsatā ca yaṃ uddissa taṃ kāyakammaṃ karīyati, tassa apaccakkhabhāvatoti āha “**parammukhā**”ti. Imāni mettakāyakammādīni bhikkhūnam vasena āgatāni tesam seṭṭhapaṇṇasābhāvatoti, gihīsipi labbhantiyeva. Bhikkhūnam hi mettacittena ābhisamācārikapūraṇam mettam kāyakammaṃ

nāma, gihīnaṃ cetiyavandanatthāya bodhivandanatthāya saṃghanimantanatthāya gamanaṃ gāmaṃ piṇḍāya pavitṭhe bhikkhū disvā paccuggamaṃ pattappaṭiggahaṇaṃ āsanapaññāpanaṃ anugamananti evamādikāṃ mettaṃ kāyakammaṃ nāma. Bhikkhūnaṃ mettacittena ācārapaññattisikkhāpanaṃ kammatṭhānakathanaṃ dhammadesanā teṭṭakampi buddhavacanaṃ mettaṃ vacīkammaṃ nāma, gihīnaṃ “cetiavandanāya gacchāma, bodhivandanāya gacchāma, dhammassavanaṃ karissāma, dīpamālaṃ pupphapūjaṃ karissāma, tīṇi sucaritāni samādāya vattissāma, salākabhattādīni dassāma, vassāvāsikaṃ dassāma, ajja saṃghassa cattāro paccaye dassāma, saṃghaṃ nimantetvā khādanīyādīni saṃvidahatha, āsanāni paññapetha, pānīyaṃ upatṭhapetha, saṃghaṃ paccuggantvā ānetha, paññattāsane nisīdāpetha, chandajātā ussāhajātā veyyāvaccāni karoṭhā”ti-ādīkathanakāle mettaṃ vacīkammaṃ nāma. Bhikkhūnaṃ pātova uṭṭhāya sarīrappaṭijaggaṇaṃ katvā cetiyaṅgaṇaṃ gantvā vattādīni katvā vivittasenāsane nisīditvā “imasmiṃ vihāre bhikkhū sukhī hontu averā abyāpajjā”ti cintanaṃ mettaṃ manokammaṃ nāma, gihīnaṃ “ayyā sukhī hontu averā abyāpajjā”ti cintanaṃ mettaṃ manokammaṃ nāma.

Tattha navakānaṃ cīvarakammādisu sahāyabhāvagamaṇaṃ sammukhā kāyakammaṃ nāma, therānaṃ pana pādadhovanasiñcanabījanadānādibhedampi sabbaṃ sāmīcikammaṃ sammukhā kāyakammaṃ nāma, ubhayehipi dunnikkhittānaṃ dārubhaṇḍādīnaṃ tesu avaññaṃ akatvā attanā dunnikkhittānaṃ viya paṭisāmanaṃ parammukhā mettaṃ kāyakammaṃ nāma. “Devatthero tissatthero”ti vuttaṃ evaṃ paggayhavacanaṃ sammukhā mettaṃ vacīkammaṃ nāma, vihāre asantaṃ pana paṭipucchantassa “kuhiṃ amhākaṃ devatthero, kuhiṃ amhākaṃ tissatthero, kadā nu kho āgamissatī”ti evaṃ piyavacanaṃ parammukhā mettaṃ vacīkammaṃ nāma. Mettāsinehasiniddhāni pana nayanāni ummīletvā pasannena mukhena olokanaṃ sammukhā mettaṃ manokammaṃ nāma, “devatthero tissatthero arogo hotu abyāpajjo”ti samannāharaṇaṃ parammukhā mettaṃ manokammaṃ nāma. Kāmañcetha mettāsinehasiniddhānaṃ nayanānaṃ ummīlanaṃ, pasannena mukhena olokanañca mettaṃ kāyakammameva, yassa pana cittassa vasena nayanānaṃ mettāsinehasiniddhatā, mukhassa ca pasannatā, taṃ sandhāya vuttaṃ “mettaṃ manokammaṃ nāmā”ti. Samādhisamvattanappayojanāni **samādhisamvattanikāni**.

Samānasīlatam gatoti tesu tesu disābhāgesu viharantehi bhikkhūhi saddhim samānasīlatam gato. **Yāyanti** yā ayam mayhañceva tumhākañca paccakkhabhūtā. **Diṭṭhīti** sammādiṭṭhi. **Ariyāti** niddosā. **Niyyātīti** vaṭṭadukkhato nissarati niggacchati. Sayam niyyantīyeva hi taṃsamaṅgipuggalam vaṭṭadukkhato niyyāpetīti vuccati. Yā satthu anusīṭṭhi, tam karotīti **takkaro**, tassa, yathānusīṭṭham paṭipajjakassāti attho. **Dukkhakkhayāyāti** sabbadukkhakkhayattham. **Diṭṭhisāmaññagatoti** samānadiṭṭhibhāvam upagato.

Phāsuvihārasuttavaṇṇanā niṭṭhatā.

6. Ānandasuttādivaṇṇanā

106-110. Chaṭṭhe **adhisīleti** nimittatthe bhummam, sīlanimittam na upavadati na nindatīti attho. Attani kamme ca anu anu pekkhati sīlenāti **attānupekkhī**. Sattamādīni uttānatthāneva.

Ānandasuttādivaṇṇanā niṭṭhitā.

Phāsuvihāravaggavaṇṇanā niṭṭhitā.

(12) 2. Andhakavindavagga

1. Kulūpakasuttādivaṇṇanā

111-114. Dutiyassa paṭhame asanthavesu kulesu vissāso etassāti **asanthavavissāsī**. Anissaro hutvā vikappeti samvidahati sīlenāti **anissaravikappī**. Vissaṭṭhāni visum khittāni bhedenā avatthitāni kulāni ghaṭanattāya upasevati sīlenāti **vissaṭṭhupasevī**. Dutiyādīni uttānatthāneva.

Kulūpakasuttādivaṇṇanā niṭṭhitā.

5. Maccharinīsuttādivaṇṇanā

115-123. Pañcame āvāsamacchariyādīni pañca idha bhikkhuniyā vasena āgatāni, bhikkhussa vasenapi tāni veditabbāni. Āvāsamacchariyena hi samannāgato bhikkhu āgantukam disvā “ettha cetiyassa vā saṅghassa vā parikkhāro ṭhapito”ti-ādīni vatvā saṅghika-āvāsam na deti. Kulamacchariyena samannāgato bhikkhu tehi tehi kāraṇehi ādīnavam dassetvā attano upaṭṭhāke kule aññesaṃ pavesampi nivāreti. Lābhamacchariyena samannāgato saṅghikampi lābham maccharāyanto yathā aññe na labhanti, evaṃ karoti attanā visamanissitatāya balavanissitatāya ca. Vaṇṇamacchariyena samannāgato attano vaṇṇam vaṇṇeti, pasesaṃ vaṇṇe “kimvaṇṇo eso”ti taṃ taṃ dosaṃ vadati. **Vaṇṇoti** cettha sarīravaṇṇopi guṇavaṇṇopi veditabbo.

Dhammacchariyena samannāgato “imaṃ dhammaṃ pariyāpuṇitvā eso maṃ abhibhavissatī”ti aññassa na deti. Yo pana “ayaṃ imaṃ dhammaṃ uggahetvā aññathā atthaṃ viparivattetvā nāsessatī”ti dhammānuggahena vā “ayaṃ imaṃ dhammaṃ uggahetvā uddhato unnaḷo avūpasantacitto apuññaṃ pasavissatī”ti puggalānuggahena vā na deti, na taṃ macchariyaṃ.

Dhammoti cettha pariyattidhammo adhippeto. Paṭivedhadhammo hi ariyānaṃyeva hoti, te ca naṃ na maccharāyanti macchariyassa sabbaso pahīnattāti tassa asambhavo eva. Tattha āvāsamacchariyena lohagehe paccati, yakkho vā peto vā hutvā tasseva āvāsassa saṅkāraṃ sīsena ukkhipitvā carati. Kulamacchariyena appabhogo hoti. Lābhamacchariyena gūthaniraye nibbattati, saṅghassa vā gaṇassa vā lābham maccharāyitvā puggalikaparibhogena vā paribhuñjitvā yakkho vā peto vā mahā-ajagaro vā hutvā nibbattati. Vaṇṇamacchariyena bhavesu nibbattassa vaṇṇo nāma na hoti. Dhammacchariyena kukkuḷaniraye nibbattati. Chaṭṭhādīni uttā natthāneva.

Maccharinīsuttādivaṇṇanā niṭṭhitā.

Andhakavindavaggavaṇṇanā niṭṭhitā.

(13) 3. Gilānavagga

124-130. Tatiyo vaggo uttānatthoyeva.

(14) 4. Rājavagga

1. Paṭhamacakkānuvattanasuttavaṇṇanā

131. Catutthassa paṭhame **atthaññūti** hitaññū. Hitapariyāyo hettha attha-saddo “attattho parattho”¹ti-ādīsu¹ viya. Yasmā cesa paresaṃ hitaṃ jānanto te attani rañjeti, tasmā vuttaṃ “**rañjituṃ jānāti**”²ti. **Daṇḍeti** aparādhānurūpe daṇḍane. **Balamhīti** balakāye. **Pañca attheti** attattho parattho ubhayattho diṭṭhadhammiko attho samparāyiko atthoti parattho ubhayattho diṭṭhadhammiko attho samparāyiko atthoti evaṃ pañcappabhede atthe. **Cattāro dhammeti** catusaccadhamme, kāmarūpārūpalokuttarabhede vā cattāro dhamme. Paṭiggahaṇaparibhogamattaññutāya eva pariyesanavissajjanamattaññutāpi bodhitā hontīti “**paṭiggahaṇaparibhogamattaṃ jānāti**” icceva vuttaṃ.

Uttarati atikkamati, abhibhavatīti vā uttaraṃ, natthi ettha uttaranti **anuttaraṃ**. Anatisayaṃ, appaṭibhāgaṃ vā anekāsu devamanussaparisāsu anekasatakkhattuṃ tesaṃ ariyasaccappaṭivedhasampādanavasena pavattā bhagavato dhammadesanā **dhammacakkaṃ**. Apica sabbapaṭhamāṃ aññātaḥkoṇḍaññappamukhāya aṭṭhārasaparisagaṇāya brahmakoṭiyā catusaccassa paṭivedhavidhāyini yā dhammadesanā, tassā sātisayā dhammacakkasamaññā. Tattha satipaṭṭhānādiddhammo eva pavattanaṭṭhena cakkanti **dhammacakkaṃ**. **Cakkanti** vā āṇā dhammato anapetattā, dhammañca taṃ cakkañcāti **dhammacakkaṃ**. Dhammena ñāyena cakkantipi **dhammacakkaṃ**. Yathāha “dhammañca pavatteti cakkañcāti dhammacakkaṃ, cakkañca pavatteti dhammañcāti dhammacakkaṃ, dhammena pavattetīti dhammacakkaṃ”²ti-ādī². **Appaṭivattiyanti** dhammissarassa bhagavato sammāsambuddhassa dhammacakkassa anuttarabhāvato appaṭisedhanīyaṃ. Kehi pana appaṭivattiyanti āha **samaṇena vā**²ti-ādī. Tattha **samaṇenāti** pabbajjaṃ upagatena. **Brāhmaṇenāti** jātibrāhmaṇena. Sāsanaparamatthasamaṇabrāhmaṇānaṃ hi paṭilomacittaṃyeva natthi. **Devenāti** kāmāvacaradevena. **Kenacīti**

1. Khu 7. 138; Khu 8. 175; Khu 9. 375 piṭṭhesu.

2. Khu 9. 345, 346 piṭṭhesu.

yena kenaci avasiṭṭhapārisajjena. Ettāvatā aṭṭhannampi parisānaṃ anavasesapariyādānaṃ daṭṭhabbaṃ. **Lokasminti** sattaloke.

Paṭhamacakkānuvattanasuttavaṇṇanā niṭṭhitā.

2. Dutiyacakkānuvattanasuttavaṇṇanā

132. Dutiye **cakkavattivattanti** dasavidhaṃ, dvādasavidhaṃ vā cakkavattibhāvāvahaṃ vattaṃ. Tattha antojanasmiṃ balakāye dhammikāyeva rakkhāvaraṇaguttiyā saṃvidhānaṃ, khattiyesu, anuyantesu, brāhmaṇagahapatikesu, negamaajānapadesu, samaṇabrāhmaṇesu, migapakkhīsu, adhammikapaṭikkhepo, adhanānaṃ dhanānuppādānaṃ, samaṇabrāhmaṇe upasaṅkamtivā pañhapucchananti idaṃ dasavidhaṃ cakkavattivattaṃ. Idameva ca gahapatike pakkhijāte ca visuṃ katvā gahaṇavasena dvādasavidhaṃ. **Pitarā pavattitameva anuppavatteti** dasavidhaṃ vā dvādasavidhaṃ vā cakkavattivattaṃ pūretvā nisinnassa puttassa aññaṃ pātubhavati, so taṃ pavatteti. Ratanamayattā pana sadisaṭṭhena tadevetanti katvā “pitarā pavattitan”ti vuttaṃ. Yasmā vā so “apossukko tvaṃ deva hohi, ahamanusāsissāmī”ti āha, tasmā pitarā pavattitaṃ āṇācakkāṃ anuppavatteti nāmāti evamettha attho daṭṭhabbo. Yañhi attano puññānubhāvasiddhaṃ cakkaratanaṃ, taṃ nippariyāyato tena pavattitaṃ nāma, netaranti paṭhamanayo vutto. Yasmā pavattitasseva anuvattanaṃ, paṭhamanayo ca taṃsadise tabbohāravasena vuttoti taṃ anādiyitvā dutiyanayo vutto.

Dutiyacakkānuvattanasuttavaṇṇanā niṭṭhitā.

4. Yassaṃdisaṃsuttavaṇṇanā

134. Catutthe “**ubhato sujāto**”ti ettake vutte yehi kehici dvīhi bhāgehi sujātataṃ paññāpeyya, sujāta-saddo ca “sujāto cārudassano”ti-ādīsu¹ ārohasampattipariyāyoti

1. Ma 2. 351; Khu 1. 367; Khu 2. 330 piṭṭhesu.

jātivāsena sujātataṃ vibhāvetuṃ **“mātito ca pitito cā”**ti vuttaṃ. Anorasaputtavasēnapi loke mātipitusamaññā dissati, idha pana sā orasaputtavasēna icchitāti dassetuṃ **“saṃsuddhaggahaṇiko”**ti vuttaṃ. Gabbhaṃ gaṇhāti dhāretīti **gahaṇī**, gabbhāsayaasaññito mātukucchippadeso. Tenāha **“saṃsuddhāya mātukucchiyā samannāgato”**ti. Yathābhuttassa āhārassa vipācandavasēna gaṇhanato achaddānato **gahaṇī**, tejodhātu. Pitā ca mātā ca pitaro. Pitūnaṃ pitaro pitāmahā. Tesāṃ yugo pitāmahayugo, tasmā **yāva sattamā pitāmahayugā**, pitāmahadvandāti evamettha attho daṭṭhabbo. Evaṃ hi pitāmahaggahaṇēna mātāmahopi gahitoti so aṭṭhakathāyaṃ visuṃ na uddhato. Yuga-saddo cettha ekasesanayena daṭṭhabbo “yugo ca yugo ca yugo”ti. Evaṃ hi tattha tattha dvinnaṃ gahitameva hoti. Tenāha **“tato uddhaṃ sabbepi pubbapurisā pitāmahaggahaṇēna gahitā”**ti. Purisaggahaṇaṃ cettha ukkaṭṭhaniddesavasēna katanti daṭṭhabbaṃ. Evaṃ hi “mātito”ti pālīvacanaṃ samatthitaṃ hoti.

Akkhittoti appattakkhepo. **Anavakkhittoti** sampattavivādādāsi na avakkhitto na chaddito. Jātivādenāti hetumhi karaṇavacananti dassetuṃ **“kena kāraṇēnā”**ti-ādi vuttaṃ. Ettha ca “ubhato -pa- pitāmahayugā”ti etena khattiyassa yonidosābhāvo dassito saṃsuddhaggahaṇikabhāvakittanato. “Akkhitto”ti iminā kiriyāparādhābhāvo. Kiriyāparādhena hi sattā khepaṃ pāpuṇanti. “Anupakkuṭṭho”ti iminā ayuttasaṃsaggābhāvo. Ayuttasaṃsaggaṃ hi paṭicca sattā akkosāṃ labhanti.

Aḍḍhatā nāma vibhavasampannatā, sā taṃ taṃ upādāyupādāya vuccatīti āha **“yo koci attano santakena vibhavana aḍḍho hoti”**ti. Tathā mahaddhanatāpīti taṃ ukkaṃsagataṃ dassetuṃ **“mahatā aparimāṇasaṅkhena dhanena samannāgato”**ti vuttaṃ. Bhuñjitabbato paribhuñjitabbato visesato kāmā bhogā nāmāti āha **“pañcakāmaguṇavasēnā”**ti. Koṭṭhaṃ vuccati dhaññassa āvasanaṭṭhānaṃ, koṭṭhabhūtaṃ agāraṃ **koṭṭhāgāraṃ**. Tenāha **“dhaññēna ca paripuṇṇakoṭṭhāgāro”**ti. Evaṃ sārāgabbhaṃ koso, dhaññapariṭṭhapanatṭhānañca koṭṭhāgāraṃti dassetvā idāni tato aññathā taṃ dassetuṃ **“atha vā”**ti-ādi vuttaṃ. Tattha yathā asino

tikkhabhāvaparihārako paṭicchado “koso”ti vuccati, evaṃ
raññotikkhabhāvaparihāraṃ katvā caturaṅginī senā kosoti āha “**catubbidho
koso hatthī assā rathā patti**”ti. Vatthakoṭṭhāgāraggahaṇeneva sabbassapi
bhaṇḍaṭṭhapanatṭhānassa gahitattā “**tividham kottṭhāgāran**”ti vuttam.

Yassā paññāya vasena puriso “paṇḍito”ti vuccati, taṃ paṇḍiccanti āha
“**paṇḍiccena samannāgato**”ti. Taṃtamitikattabbatāsu chekabhāvo
byattabhāvo **veyyattiyam**. Sammohaṃ himsati vidhamatīti medhā, sā etassa
atthīti **medhāvī**. Ṭhāne ṭhāne uppatti etissā atthīti **ṭhānuppatti**, ṭhānaso
uppajjanapaññā. **Vaḍḍhi-attheti** vaḍḍhisankhāte atthe.

Yassamdisamsuttavaṇṇanā niṭṭhitā.

5. Patthanāsuttādivaṇṇanā

135-9. Pañcame **hatthisminti** hatthisippe. Hatthīti hi
hatthivisayatthāhatthisannissitattā ca hatthisippaṃ gahitaṃ. Sesapadesupi
eseva nayo. Vayatīti vayo, sobhanesu katthaci apakkhalanto avitthāyanto
tāni sandhāretuṃ sakkotīti attho. Na vayo avayo, tāni atthato saddato ca
sandhāretuṃ na sakkoti. Avayo na hotīti **anavayo**. Dve paṭisedhā pakatim
gamentīti āha “**anavayoti samattho**”ti. Chaṭṭhādīni uttānatthāneva.

Patthanāsuttādivaṇṇanā niṭṭhitā.

10. Sotasuttavaṇṇanā

140. Dasame **tibbānanti** tikkhānaṃ. **Kharānanti** kakkasānaṃ.
Kaṭukānanti dāruṇānaṃ. **Asātānanti** nasātānaṃ appiyānaṃ. Na tāsū mano
appeti, na tā manam appāyanti vaḍḍhentīti **amanāpā**.

Sotasuttavaṇṇanā niṭṭhitā.

Rājavaggavaṇṇanā niṭṭhitā.

(15) 5. Tikaṇḍakīvagga

1. Avajānātisuttavaṇṇanā

141. Pañcamassa paṭhame **datvā avajānātī**ti ettha eko bhikkhu mahāpuñño catupaccayalābhī hoti, so cīvarādīni labhitvā aññaṃ appapuññaṃ āpucchati. Sopi tasmim punappunam āpucchantepi gaṇhātiyeva. Athassa itaro thokaṃ kupito hutvā maṅkubhāvaṃ uppādetukāmo vadati “ayaṃ attano dhammatāya cīvarādīni na labhati, amhe nissāya labhatī”ti. Evampi **datvā avajānāti** nāma. Eko pana ekena saddhim dve tiṇi vassāni vasanto pubbe taṃ puggalaṃ garuṃ katvā gacchante gacchante kāle cittikāraṃ na karoti, āsananiṣinnaṭṭhānampi na gacchati. Ayampi puggalo **sarivāsena avajānāti** nāma. **Ādheyyamukho**ti ādito dheyyamukho, paṭhamavacanasmimyeva ṭhapitamukhoti attho. Tatthāyaṃ nayo—eko puggalo sāruppaṃyeva bhikkhuṃ “asāruppo eso”ti katheti. Taṃ sutvā esa niṭṭhaṃ gacchati, puna aññaṃ sabhāgena bhikkhunā “sāruppo ayan”ti vuttepi tassa vacanaṃ na gaṇhāti. Asukena nāma “asāruppo ayan”ti amhākaṃ kathitanti purimabhikkhunova kathaṃ gaṇhāti. Aparopissa dussīlaṃ “sīlavā”ti katheti. Tassa vacanaṃ saddahitvā puna aññaṃ “asāruppo eso bhikkhu, nāyaṃ tumhākaṃ santikaṃ upasaṅkamuṃ yutto”ti vuttepi tassa vacanaṃ aggahetvā purimaṃyeva kathaṃ gaṇhāti. Aparo vaṇṇampi kathitaṃ gaṇhāti, avaṇṇampi kathitaṃ gaṇhātiyeva. Ayampi **ādheyyamukho** yeva nāma ādhātābbamukho, yaṃ yaṃ suṇāti, tattha tattha ṭhapitamukhoti attho.

Loloti saddhādīnaṃ ittarakālappatitattā assaddhiyādihi lulitabhāvena lolo. **Ittarabhattī**ti-ādīsu punappunam bhajanena saddhāva bhattipemaṃ. Saddhāpemaṃpi gehassitapemaṃpi vaṭṭati, pasādo saddhāpasādo. **Evam puggalo lolo hotī**ti evaṃ ittarasaddhādītāya puggalo lolo nāma hoti. Haliddirāgo viya, thusarāsimhi koṭṭitakhānuko viya, assapiṭṭhiyaṃ ṭhapitakumbhaṇḍaṃ viya ca anibaddhaṭṭhāne muhuttena kuppati. **Mando momū**hoti aññaṃabhāvena mando, avisayatāya momūho, mahāmūḷhoti attho.

Avajānātisuttavaṇṇanā niṭṭhitā.

2. Ārabhatisuttādivaṇṇanā

142-3. Dutiye **ārabhatīti** ettha **ārambha**-saddo kammakiriyahimsanavīriyakopanāpattivītikkamesu vattati. Tathā hesa “yaṃ kiñci dukkhaṃ sambhoti, sabbaṃ ārambhapaccayā”¹ kamme āgato. “Mahārambhā mahāyaññā, na te honti mahapphalā”² kiriyāya. “Samaṇaṃ gotamaṃ uddissa pāṇaṃ ārabhanti”³ himsane. “Ārambhatha nikkhamatha, yuñjatha buddhasāsane”⁴ vīriye. “Bijagāmahūtagāmasamārambhā paṭivirato hoti”⁵ kopane. “Ārabhati ca vippaṭisārī ca hoti”⁶ ayaṃ pana āpattivītikkame āgato, tasmā āpattivītikkamavasena ārabhati ceva, tappaccayā ca vippaṭisārī hotīti ayamettha attho. **Yathābhūtaṃ nappajānātīti** anadhigatattā yathāsabhāvato na jānāti. **Yatthassāti** yasmim̐ assa, yaṃ ṭhānaṃ patvā etassa puggalassa uppannā pāpakā akusalā dhammā aparisesā nirujjhantīti attho. Kim̐ pana patvā te nirujjhantīti? Arahattamaggam̐, phalappattassa pana niruddhā nāma honti. Evaṃ santepi idha maggakiccavasena pana phalameva vuttanti veditabbaṃ.

Ārabhati na vippaṭisārī hotīti āpattim̐ āpajjati, taṃ panesa desetum sabbhāgapuggalaṃ pariyesati, tasmā na vippaṭisārī hoti. **Na ārabhati vippaṭisārī hotīti** āpattim̐ na āpajjati, vinayapaññattiyam̐ pana akovidattā anāpattiyā āpattisaññī hutvā vippaṭisārī hotīti evamettha attho daṭṭhabbo. “**Na ārabhati na vippaṭisārī hoti**”⁷ ti yo vutto, kataro so puggalo? Ossaṭṭhavīriyapuggalo. So hi “kim̐ me imasmim̐ kāle parinibbānena, anāgate metteyyasammāsambuddhakāle parinibbāyissāmī”⁸ ti visuddhasīlopi paṭipattim̐ na pūreti. So hi “kimatthaṃ āyasmā pamatto viharati, puthujjanassa nāma gati anibaddhā, tasmā hi metteyyasammāsambuddhassa sammukhībhāvaṃ labheyyāsi, arahattatthāya vipassanaṃ bhāvehi”⁹ ti ovaditabbova.

1. Khu 1. 394 piṭṭhe.

2. Saṃ 1. 76; Aṃ 1. 351 piṭṭhesu.

3. Ma 2. 32 piṭṭhe.

4. Saṃ 1. 158; Khu 10. 35, 217; Khu 11. 238 piṭṭhesu.

5. Dī 1. 5, 61; Ma 1. 237 piṭṭhesu.

6. Aṃ 2. 146; Abhi 3. 173 piṭṭhesu.

Sādhūti āyācanatthe nipāto. Idaṃ vuttaṃ hoti—yāva aparaddhaṃ vata āyasmatā, evaṃ santepi mayaṃ āyasmantaṃ yācāma, desetabbayuttakassa desanāya, vuṭṭhātabbayuttakassa vuṭṭhānena, āvikātabbayuttakassa āvikiriyāya ārambhaje āsave pahāya suddhante ʘhitabhāvapaccavekkhaṇena vippaṭisāraje āsave paṭivinodetvā nīharitvā vipassanācittañceva vipassanāpaññaṅca vaḍḍhetūti. **Amunā pañcamena puggalenāti** etena pañcamena khīṇāsavapuggalena. **Samasamo bhavissatīti** lokuttaraguṇehi samabhāveneva samo bhavissatīti evaṃ khīṇāsavena ovaditabboti attho. Tatiyaṃ uttānameva.

Ārabhatisuttādivaṇṇanā niṭṭhitā.

4. Tikaṇḍakīsuttādivaṇṇanā

144-6. Catutthe **paṭikūleti** amanuññe aniṭṭhe. **Appaṭikūlasaññīti** iṭṭhākārenea pavattacitto. **Iṭṭhasmiṃ vatthusmiṃ asubhāya vā pharati, aniccato vā upasaṃharati** upaneti pavatteti. **Aniṭṭhasmiṃ vatthusminti** aniṭṭhe sattasaññite ārammaṇe. **Mettāya vā pharatīti** mettaṃ hitesitaṃ upasaṃharanto sabbatthakameva vā tattha pharati. **Dhātuto vā upasaṃharatīti** dhammasabhāvacintanena dhātuto paccavekkhaṇāya dhātumanasikāraṃ vā tattha pavatteti. **Tadubhayaṃ abhinivajjetvāti** sabhāvato ānubhāvato ca upatiṭṭhantaṃ ārammaṇe paṭikūlabhāvaṃ appaṭikūlabhāvañcāti taṃ ubhayaṃ pahāya aggahetvā, sabbasmiṃ pana tasmīṃ majjhatto hutvāti vuttaṃ hoti. Majjhatto hutvā viharitukāmo pana kiṃ karotīti? Iṭṭhāniṭṭhesu āpāthaṃ gatesu neva somanassito hoti, na domanassito hoti. **Upakkhako vihareyyāti** iṭṭhe arajjanto aniṭṭhe adussanto yathā aññe asamapekkhanena moham uppādenti, evaṃ anuppādento chasu ārammaṇesu chaḷaṅupekkhāya upekkhako vihareyya. Tenevāha “**chaḷaṅupekkhāvasena pañcamo**”ti. Iṭṭhāniṭṭhachaḷārammaṇāpāthe parisuddhapakatibhāvāvijahanalakkhaṇāya chasu dvāresu pavattanato “**chaḷaṅupekkhā**”ti laddhanāmāya tatramajjhātupekkhāya vasena pañcamo vāro vuttoti attho. Pañcamaṃ chaṭṭhaṅca uttānameva.

Tikaṇḍakīsuttādivaṇṇanā niṭṭhitā.

7. Asappurisdānasuttādivaṇṇanā

147-150. Sattame **asakkaccanti** anādaram katvā. Deyyadhammassa asakkaccakaraṇam nāma asampannam karotīti āha “**na sakkaritvā sucim katvā detī**”ti, uttaṇḍulādidosavirahitam sucisampannam katvā na detīti attho. **Acittikatvā**ti na citte katvā, na pūjetvāti attho. Pūjento hi pūjetabbavatthum citte ṭhapeti, na tato bahi karoti. Cittam vā acchariyam katvā paṭipattivikaraṇam sambhāvanakiriyā, tappatikkhepako **acittikaraṇam** asambhāvanakiriyā. **Agāravena detī**ti puggale agarum karonto nisīdanaṭṭhāne asammajjitvā yattha vā tattha vā nisīdāpetvā yaṃ vā taṃ vā ādhāraṇam ṭhapetvā dānam deti. **Asahatthā**ti na attano hatthena deti, dāsakammakarādīhi dāpeti. **Apaviddham detī**ti antarā apaviddham vicchedam katvā deti. Tenāha “**na nirantaram detī**”ti. Atha vā **apaviddhamdetī**ti ucchiṭṭhādichaddanīyadhammam viya avakkhittakam katvā deti. Tenāha “**chaddetukāmo viya detī**”ti. “Addhā imassa dānassa phalameva āgacchatī”ti evaṃ yassa kammassakatādiṭṭhi atthi, so āgamanadiṭṭhiko, ayam pana na tādisoti **anāgamanadiṭṭhiko**. Tenāha “**katassa nāma phalam āgamissatī**”ti-ādi. Atṭhamādīsu natthi vattabbam.

Asappurisdānasuttādivaṇṇanā niṭṭhitā.

Tikaṇḍakīvaggavaṇṇanā niṭṭhitā.

Tatīyapaṇṇāsako niṭṭhito.

4. Catutthapaṇṇāsaka

(16) 1. Saddhammavagga

151-160. Paṭhamo vaggo uttānatthoyeva.

(17) 2. Āghātavagga

1. Paṭhama-āghātaṭṭhapaṭivāyasaṭṭhādivaṇṇanā

161-165. Dutiyassa paṭhame natthi vattabbaṃ. Dutīye āghāto ṭṭhapaṭivāyati ettha, etehīti vā āghātaṭṭhapaṭivāyā. Tenāha “āghāto etehi ṭṭhapaṭivāyasetabbo”ti-ādi.

Nantakanti anantakam, antavirahitam vatthakhaṇḍam. Yadi hi tassa anto bhavēyya, “pilotikā”ti saṅkham na gaccheyya.

Sevālenāti bījakaṇṇikakesarādibhedena sevālena. **Udakapappaṭakenāti** nīlamaṇḍūkapiṭṭhivaṇṇena udakapiṭṭhim chādetvā nibbattena udakapiṭṭhikena¹. **Ghammena anugatoti** ghammena puṭṭho abhibhūto. **Cittuppādanti** ṭṭhigaṭṭhapaṭivāyasaṭṭhādivaṇṇanā.

Visabhāgavedanuppattiyā kakaceneva iriyāpathapavattinivāraṇena chindanto ābādhati pīṭetīti ābādho, so assa atthīti **ābādhiko**. Taṃsamuṭṭhānena **dukkhito** saṅjātaḍḍakko. **Bāḷhagilānoti** adhimattagilāno. **Gāmantanāyakassāti** gāmantasampāpakassa.

Pasannabhāvena udakassa acchabhāvo veditabboti āha “**acchodakāti pasannodakā**”ti. Sādurasatāya sātātīti āha “**madhurodakā**”ti. Tanukameva salilam visesato sītalam, na bahalāti āha “**tanusītasalilā**”ti. **Setakāti** nikkaddamā. Sacikkhallādivasena hi udakassa vivaṇṇatā. Sabhāvato pana tam setavaṇṇameva. Tatiyādīni uttānatthāneva.

Paṭhama-āghātaṭṭhapaṭivāyasaṭṭhādivaṇṇanā niṭṭhitā.

1. Udakapicchillena (Ka)

6. Nirodhasuttavaṇṇanā

166. Chaṭṭhe **amarisanattheti** asahanatthe. **Anāgatavacanam katanti** anāgatasaddappayogo kato, attho pana vattamānakālikova. Akkharacintakā¹ hi idisesu thānesu anokappanāmarisanatthavasena atthisadde upapade vattamānakālepi anāgatavacanam karonti.

Nirodhasuttavaṇṇanā niṭṭhitā.

7. Codanāsuttādivaṇṇanā

167-9. Sattame **vatthusandassanāti** yasmim vatthusmim āpatti, tassa sarūpato dassanam. **Āpattisandassanāti** yam āpattim so āpanno, tassā dassanam. **Samvāsappaṭikkhepoti** uposathappavāraṇādisamvāsassa paṭikkhipanam akaraṇam. **Sāmīcippaṭikkhepoti** abhivādanādisāmīcikiriyaā akaraṇam. **Codayamānenāti** codentena. **Cuditakassa kāloti** cuditakassa codetabbakālo. **Puggalanti** codetabbapuggalam. **Upaparikkhitvāti** “ayam cuditakalakkhaṇe tiṭṭhati, na tiṭṭhati”ti vīmaṁsitvā. **Ayasam āropetīti** “ime mam abhūtena abbhācikkhantā ayasam byasanam uppādetī”ti bhikkhūnam ayasam uppādeti. Aṭṭhamanavamāni uttānatthāneva.

Codanāsuttādivaṇṇanā niṭṭhitā.

10. Bhaddajisuttavaṇṇanā

170. Dasame **abhibhavitvā thito** ime satteti adhippāyo. Yasmā pana so “pāsaṁsabhāvena uttamabhāvena ca te satte abhibhavitvā thito”ti attānam maññati, tasmā vuttam “**jetṭhako**”ti. **Aññadatthu dasoti** dassane antarāyābhāvavacanena

1. Pāṇinī 3. 3. 145-146 suttāni passitabbāni.

ñeyyavisesapariggāhikabhāvena ca anāvarenaḍassāvitam paṭijānātīti āha
“sabbam passatīti adhippāyo”ti.

Bhaddajisuttavaṇṇanā niṭṭhitā.

Āghātavaggavaṇṇanā niṭṭhitā.

(18) 3. Upāsakavagga

1. Sārajjasuttādivaṇṇanā

171-176. Tatiyassa paṭhamadutiyatatiyacatutthe natthi vattabham.
Pañcime **upāsakapacchimakoti** upāsakanihīno. “Iminā diṭṭhādinā idam nāma
maṅgalam bhavissatī”ti evam bālajanaparikappitakotūhalasaṅkhātena
diṭṭhasutamutamaṅgalena samannāgato **kotūhalamaṅgaliko**. Tenāha “**iminā
idam bhavissatī**”ti-ādi. **Maṅgalam paccetīti** diṭṭhamaṅgalādibhedam
maṅgalameva patthiyāyati. **No kammanti** kammassakataṃ no patthiyāyati.
Imamhā sāsanaṭi ito sabbaññubuddhasāsanaḍo. **Bahiddhāti** bāhirakasamaye.
Dakkhiṇeyyam pariyesatīti “duppaṭipannā dakkhiṇeyyā”ti saññī gavesatī.
Ettha dakkhiṇapariyesanapubbakāre ekaṃ katvā pañca dhammā veditabbā.
Chaṭṭham uttānameva.

Sārajjasuttādivaṇṇanā niṭṭhitā.

7. Vaṇijjāsuttādivaṇṇanā

177-8. Sattame **satthavaṇijjāti** āvudhabhaṇḍam katvā vā kāretvā vā
kataṃ vā paṭilabhitvā tassa vikkayo. **Āvudhabhaṇḍam kāretvā tassa
vikkayoti** idam pana nidassanamattam. **Sūkaramigādayo posetvā tesam
vikkayoti** sūkaramigādayo posetvā tesam maṃsam sampādetvā vikkayo.
Ettha ca satthavaṇijjā paroparādhanimittatāya akaraṇīyā vuttā, sattavaṇijjā
abhujissabhāvakaraṇato, maṃsavisavaṇijjā vadhahetuto, majjavaṇijjā
pamādaṭṭhānato. Aṭṭhamam uttānameva.

Vaṇijjāsuttādivaṇṇanā niṭṭhitā.

9. Gihisuttavaṇṇanā

179. Navame **ābhicetasikānanti abhicetoti** abhikkantaṃ visuddhacittaṃ vuccati adhiccitaṃ vā, abhicetasi jātāni ābhicetasikāni, abhiceto sannissitānīti vā ābhicetasikāni. Tenevāha “**uttamacittanissitānan**”ti.

Diṭṭhadhammasukhavihārānanti diṭṭhadhamme sukhavihārānaṃ.

Diṭṭhādhammoti paccakkho attabhāvo vuccati, tattha sukhavihārānanti attho. Rūpāvacarajjhānānametaṃ adhivacanaṃ. Tāni hi appētvā nisinnā jhāyino imasmiṃyeva attabhāve asaṅkiliṭṭhaṃ nekkhammasukhaṃ vindanti, tasmā “diṭṭhadhammasukhavihārānī”ti vuccanti.

Catubbidhamerayanti pupphāsavo phalāsavo guḷāsavo madhvāsavoti evaṃ catuppabhedāṃ merayaṃ. **Pañcavidhañca suranti** pūvasurā piṭṭhasurā odanasurā kiṇṇapakkhittā sambhārasaṃyuttāti evaṃ pañcappabhedāṃ suraṃ. Puññaṃ attho etassāti **puññattho**. Yasmā panesa puññaena atthiko nāma hoti, tasmā vuttaṃ “**puññaena atthikassā**”ti. Sesamettha uttānameva.

Gihisuttavaṇṇanā niṭṭhitā.

10. Gavesīsuttavaṇṇanā

180. Dasame **sukāraṇanti** bodhiparipācanassa ekantikaṃ sundaraṃ kāraṇaṃ. **Mandahasitanti** īsakaṃ hasitaṃ. **Kahaṃ kahanti** hāsasaddassa anukaraṇametaṃ. **Haṭṭhappahaṭṭhākāramattanti** haṭṭhassa pahaṭṭhākāramattaṃ. Yathā gahitasāṅketā “pahaṭṭho bhagavā”ti sañjānanti, evaṃ ākāranidassanamattaṃ.

Idāni iminā pasaṅgena hāsasamuṭṭhānaṃ vibhāgato dassetuṃ “**hasitañca nāmetan**”ti-ādi āradhaṃ. Tattha ajjupekkhanavasēnapi hāso na sambhavati, pageva domanassavasēnāti āha “**terasahi somanassasahagatacittēhī**”ti. Nanu ca keci kodhavasēnapi hasantīti? Na, te sampiyanti kodhavatthuraṃ tattha “mayāṃ dāni yathākāmakāritam āpajjissāmā”ti duviññeyyantarena somanassacitteneva hāsassa uppajjanato.

Tesūti pañcasu somanassasahagatakiriyacittesu. **Balavārammaṇeti** uḷāratame ārammaṇe yamakapāṭihāriyasadise. **Dubbalārammaṇeti** anulāra-ārammaṇe.

“**Imasmim̐ pana ṭhāne -pa- uppādeti**”ti idaṃ porāṇaṭṭhakathāyaṃ tathā āgatattā vuttaṃ, na sahetukasomanassasahagatacittetehi bhagavato sitaṃ na hotīti dassanattamaṃ. **Abhidhammaṭṭikāyaṃ**¹ pana “atītaṃsādisu appaṭihataṃ ṇāṇaṃ vatvā ‘imehi dhammehi samannāgatassa buddhassa bhagavato sabbaṃ kāyakammaṃ ṇāṇapubbaṅgamaṃ ṇāṇānuparivattī’²ti ādivacanato ‘bhagavato idaṃ cittaṃ uppajjati’³ti vuttavacanaṃ vicāretabban”⁴ti vuttaṃ. Tattha iminā hasituppādacittena pavattiyamānampi bhagavato sitakaraṇaṃ pubbenivāsa-anāgataṃsasabbaññutaññāṇaṃ anuvattakattā ṇāṇānuparivattiyevāti evaṃ pana ṇāṇānuparivattibhāve sati na koci pāli-aṭṭhakathānaṃ virodho. Tathā hi **abhidhammaṭṭhakathāyaṃ**³ “tesaṃ ṇāṇānaṃ ciṇṇapariyante idaṃ cittaṃ uppajjati”³ti vuttaṃ. Avassaṃ cetāṃ evaṃ icchitabbaṃ, aññathā āvajjanacittassapi bhagavato tathārūpe kāle na yujjeyya. Tassapi hi viññattisamuṭṭhāpakabhāvassa nicchitattā. Tathā hi vuttaṃ “evaṃca katvā manodvārāvajjanassapi viññattisamuṭṭhāpakattaṃ upapannaṃ hoti”⁴ti, na ca viññattisamuṭṭhāpakatte taṃsamuṭṭhānakāyaviññattiyā kāyakammādibhāvaṃ āpajjanabhāvo vissajjati.

Hasitanti sitameva sandhāya vadati. Tenāha “**evaṃ appamattakampī**”⁵ti. **Samosaritā vijjulatā.** Sā hi itaravijjulatā viya khaṇaṭṭhitiyā sīghanirodhā ca na hoti, apica kho dandhanirodhā, na ca sabbakālikā. Dīdhiti pāvakamahāmeghato vā cātuddīpikamahāmeghato vā niccharati. Tenāha “**cātuddīpikamahāmeghamukhato**”⁵ti. Ayaṃ kira tāsāṃ rasmīnaṃ dhammatā, yadidaṃ tikkhattum sīsāṃ padakkhiṇaṃ katvā **dāṭhaggesuyeva**⁵**antaradhānaṃ.** Sesamettha suviññeyyameva.

Gavesīsuttavaṇṇanā niṭṭhitā.

Upāsakavaggavaṇṇanā niṭṭhitā.

1. Mūlaṭī 1. 137 piṭṭhe. 2. Khu 7. 278; Khu 9. 376 piṭṭhesu. (Atthato samānaṃ)
3. Abhi-Ṭṭha 1. 333 piṭṭhe. 4. Mūlaṭī 1. 72 piṭṭhe. 5. Dantaggesuyeva (Ka)

(19) 4. Araññavagga

1. Āraññikasuttavaṇṇanā

181. Catutthassa paṭhame **appicchataṃyeva nissāyāti**-ādīsu “iti appiccho bhavissāmī”ti idaṃ me āraññikaṅgaṃ appicchatāya saṃvattissati, “iti santuṭṭho bhavissāmī”ti idaṃ me āraññikaṅgaṃ santuṭṭhiyā saṃvattissati, “iti kilese sallikhissāmī”ti idaṃ me āraññikaṅgaṃ kilesasallikhanatthāya saṃvattissatīti āraññiko hoti. **Aggoti** jeṭṭhako. Sesāni tasseva vevacanāni.

Gavā khīranti gāvito khīraṃ nāma hoti, na gāviyā dadhi. **Khīramhā dadhīti**-ādīsupi eseva nayo. **Evamevanti** yathā etesu pañcasu gorasesu sappimaṇḍo aggo, evamevaṃ imesu pañcasu āraññikesu yo ayaṃ appicchatādīni nissāya āraññiko hoti, ayaṃ aggo ceva seṭṭho ca mokkho ca pavaro ca, imesu āraññikesu jāti-āraññikā veditabbā, na āraññikanāmamattena āraññikāti veditabbā. **Pamsukūlikā**dīsupi eseva nayo.

Āraññikasuttavaṇṇanā niṭṭhitā.

Araññavaggavaṇṇanā niṭṭhitā.

(20) 5. Brāhmaṇavagga

1. Soṇasuttavaṇṇanā

191. Pañcamassa paṭhame **sampiyenevāti** aññamaññapemeneva kāyena ca cittena ca missībhūtā saṃghaṭṭitā saṃsaṭṭhā hutvā saṃvāsarṃ vattenti, na appiyena niggahena vāti vuttarṃ hoti. Tenāha “**piyan**”ti-ādi. Udaraṃ avadihati upacinoti pūretīti **udarāvadehakaṃ**. Bhāvanapuṃsakañcetaṃ, udarāvadehakaṃ katvā udaraṃ pūretvāti attho. Tenāha “**udaraṃ avadihitvā**”ti-ādi.

Soṇasuttavaṇṇanā niṭṭhitā.

2. Doṇabrāhmaṇasuttavaṇṇanā

192. Dutiye **pavattāro**¹ pāvacaṇabhāvena vattāro. yasmā te tesam mantānaṃ pavattanakā, tasmā āha “**pavattayitāro**”ti. Sudde bahi katvā rahobhāsitaḥṭṭhena mantā eva taṃtamathappaṭipattihetutāya **mantapadaṃ**. Anupanītāsādhāraṇatāya rahassabhāvena vattabbakiriyāya adhigamūpāyaṃ. **Sajjhāyitanti** gāyanavasena sajjhāyitaṃ. Taṃ pana udattānudattādīnaṃ² sarānaṃ sampadāvaseneva icchitanti āha “**sarasampattivasenā**”ti. **Aññesaṃ vuttanti** pāvacaṇabhāvena aññesaṃ vuttaṃ. **Samupabyūḥhanti** saṅgahetvā uparūpari saññūḥhaṃ. **Rāsikatanti** iruvedaya juvedasā mavedādivasena, tatthāpi paccekaṃ mantabrahmādivasena, ajjhāyānuvākādivasena ca rāsikataṃ. **Tesanti** mantānaṃ kattūnaṃ. **Dibbena cakkhunā oloketvā** dibbacakkhupariḥṭṭhena yathākammūpagaññaṇena sattānaṃ kammassakatādīnaṃ, paccakkhato dassanaḥṭṭhena dibbacakkhusadisena pubbenivāsāññaṇena atītakappe brāhmaṇānaṃ mantajjhenavidhiṇca oloketvā. **Pāvacaṇena saha saṃsandetvā** kassapasammāsambuddhassa yaṃ vacanaṃ vaṭṭasannissitaṃ, tena saha aviruddhaṃ katvā. Na hi tesam vivaṭṭasannissito attho paccakkho hoti. **Aparāpareti** aṭṭhakādīhi aparāpare pacchimaṃ okkākarājakālādīsu uppannā. **Pakkhipitvā**ti aṭṭhakādīhi³ ganthitamantapadesu kilesasannissitapadānaṃ tattha tattha pade pakkhipanaṃ katvā. **Viruddhe akaṃsūti brāhmaṇadhammikasuttādīsu**⁴ āgatanayena saṃkilesatthadīpanato paccanīkabhūte akaṃsu.

Usūnaṃ asanakammaṃ issatthaṃ, dhanusippena jīvikā. Idha pana issatthaṃ viyāti **issatthaṃ**, sabba-āvudhajīvikāti āha “**yodhājīvakammenā**”ti, āvudhaṃ gahetvā upaṭṭhānakammenāti attho. **Rājaporisaṃ** nāma vinā āvudhena poroheccāmaccakkammādirājakkammaṃ katvā rājupaṭṭhānaṃ. **Sippaññātarenāti** gahitāvasesena hatthi-assasippādīnā. Kumārabhāvato pabhuti caraṇena **komārabrahmacariyaṃ**.

Udakaṃ pātetvā dentīti dvāre ṭhitasseva brāhmaṇassa hatthe udakaṃ āsiṅcantā “idaṃ te brāhmaṇa bhariyaṃ posāpanatthāya demā”ti

1. Dī-Ṭī 1. 308 piṭṭhepi passitabbaṃ.

3. Vaṭṭakārīhi (Ka)

2. Udātānudattādīnaṃ (Ka)

4. Khu 1. 322 piṭṭhe Suttanipāte.

vatvā denti. Kasmā pana te evaṃ brahmacariyaṃ caritvāpi dāraṃ pariyesanti, na yāvajīvaṃ brahmacārino hontīti? Micchādiṭṭhivasena. Tesam hi evaṃ diṭṭhi hoti “yo puttaṃ na uppādeti, so kulavaṃsacchedakaro hoti, tato niraye paccatī”ti. Cattāro kira abhāyitabbaṃ bhāyanti gaṇḍuppadako kikī kontinī brāhmaṇoti. Gaṇḍuppadā kira mahāpathaviyā khayanaabhayena mattabhojanā honti, na bahuṃ mattikaṃ khādanti. kikī sakuṇikā ākāsapatanabhayena aṇḍassa upari uttānā seti. Kontinī sakuṇī pathavīkampanabhayena pādehi bhūmiṃ na suṭṭhu akkamati. Brāhmaṇā kulavaṃsūpacchedabhayena dāraṃ pariyesanti. Āhu cettha—

“Gaṇḍuppadō kikī ceva, kontī brāhmaṇadhammiko.
Ete abhayaṃ bhāyanti, sammūḷhā caturo janā”ti¹.

Sesamettha uttānameva.

Doṇabrāhmaṇasuttavaṇṇanā niṭṭhitā.

3. Saṅgāravasuttavaṇṇanā

193. Tatiye² **paṭhamaññevā**ti puretaraṃyeva, asajjhāyakatānaṃ mantānaṃ appaṭibhānaṃ pageva paṭhamāṃyeva siddhaṃ, tattha vattabbameva natthīti adhippāyo. Pariyuṭṭhānaṃ nāma abhibhavo gahaṇanti āha “**kāmarāgapariyuṭṭhitenāti kāmarāgaggahitenā**”ti. Vikkhambheti apanetīti vikkhambhanaṃ, paṭipakkha to nissarati etenāti nissaraṇaṃ. Vikkhambhanañca taṃ nissaraṇañcāti **vikkhambhananissaraṇaṃ**. Tenāha “**tatthā**”ti-ādi. Sesapadadvayepi eseva nayo. Attanā araṇīyo pattabbo attho **attattho**. Tathā **parattho** vedītabbo.

“Aniccato anupassanto niccasaññaṃ pajahatī”ti-ādīsu³ byāpādādīnaṃ anāgatattā byāpādavāre tadaṅganissaraṇaṃ na gahitaṃ. Kiñcāpi na gahitaṃ, paṭisaṅkhānavasena tassa vinodetabbatāya tadaṅganissaraṇampi labbhatevāti sakkā viññātum. **Ālokasaññā** upacārappattā vā

1. Suttanipāta-Ṭṭha 2. 52 piṭṭhepi.

2. Saṃ-Ṭṭi 2 447 piṭṭhepi passitabbaṃ.

3. Khu 9. 55 piṭṭhe Paṭisambhidāmagge.

appanāpattā vā. Yo koci kaṣiṇajjhānādibhedo **samatho**.

Dhammavavatthānaṃ upacārappanāpattavasena gahetabbaṃ.

Kudhitoti tatto. **Ussūrakajātoti**¹ tasseva kudhitabhāvassa ussūrakaṃ accuṅhataṃ patto. Tenāha “**usumakajāto**”ti. **Tilabījakādibhedenāti** tilabījakaṇṇikakesarādibhedena sevālena. **Paṇakenāti** udakapicchillena. **Appasanno** ākulatāya. **Asannisinno** kalaluppattiyā. **Anālokaṭṭhāneti** ālokarahite ṭhāne.

Saṅgāravasuttavaṇṇanā niṭṭhitā.

4. Kāraṇapālīsuttavaṇṇanā

194. Catutthe **paṇḍito maññeti** ettha **maññeti** idaṃ “maññatī”ti iminā samānattham nipātapadam. Tassa iti-saddam ānetvā attham dassento “**paṇḍitoti maññati**”ti-āha. Anumatipucchāvasena cetam vuttam. Tenevāha “**udāhu no**”ti. “Tam kim maññati bhavam piṅgiyānī samaṇassa gotamassa paññāveyyattiyam”ti vuttamevattham puna gaṇhanto “paṇḍito maññe”ti āha, tasmā vuttam “**bhavam piṅgiyānī samaṇam gotamam paṇḍitoti maññati udāhu no**”ti, yathā te khomeyya, tathā nam kathehīti adhippāyo. **Aham ko nāma**, mama avisayo esoti dasseti. **Ko cāti** hetunissakke paccattavacananti āha “**kuto cā**”ti. Tathā cāha “**kena kāraṇena jānissāmī**”ti, yena kāraṇena samaṇassa gotamassa paññāveyyattiyam jāneyyam, tam kāraṇam mayi natthīti adhippāyo. **Buddhoyeva bhaveyya** abuddhassa sabbathā buddhañāṇānubhavam jānitum asakkuṇeyyattāti. Vuttam hetam “appamattakam panetam bhikkhave oramattakam sīlamattakam, yena puthujjano tathāgatassa vaṇṇam vadamāno vadeyya². Atthi bhikkhave aññeva dhammā gambhīrā duddasā duranubodhā -pa- yehi tathāgatassa yathābhūtam vaṇṇam sammā vadamāno vadeyyā”ti³ ca. **Etthāti** “sopi nūnassa tādiso”ti etasmiṃ pade.

1. Ussadakajāto (Pāliyam aṭṭhakathāyañca)

2. Dī 1. 3 piṭṭhe.

3. Dī 1. 11 piṭṭhe.

Pasatthappasatthoti pasatthehi pāsaṃsehi attano guṇeheva so pasattho, na tassa kittinā, pasāṃsāsabhāgeneva pāsaṃsoti attho. Tenāha “**sabbaguṇānan**”ti-ādi. **Maṇiratananti** cakkavattino maṇiratanam.

Sadevake pāsaṃsānampi pāsaṃsoti dassetuṃ “**pasatthehi vā**”ti dutiyavikappo gahito. Araṇīyato attho, so eva vasatīti vasoti **atthavaso**. Tassa tassa payogassa ānisaṃsabhūtaṃ phalanti āha “**atthavasanti atthānisaṃsan**”ti. Attho vā phalaṃ tadadhīnavuttitāya vaso etassāti **atthavaso**, kāraṇam.

Khuddakamadhūti khuddakamakkhikāhi katadaṇḍakamadhu. **Aneḷakanti** niddosaṃ apagatamakkhikaṇḍakam.

Udāharīyati ubbegapītivasenāti **udānam**, tathā vā udāharaṇam **udānam**. Tenāha “**udāharam udāhari**”ti. Yathā pana taṃ vacanam udānanti vuccati, taṃ dassetuṃ “**yathā hī**”ti-ādi vuttaṃ. Sesam suviññeyyameva.

Kāraṇapālīsuttavaṇṇanā niṭṭhitā.

5. Piṅgiyānīsuttavaṇṇanā

195. Pañcame **sabbasaṅgāhikanti** sarīragatassa ceva vatthālaṅkāragatassa cāti sabbassa nīlabhāvassa saṅgāhakavacanam. **Tassevāti** nīlādisabbasaṅgāhikavasena vutta-atthasseva. **Vibhāgadassananti** pabhedadassanam. Yathā te licchavirājāno apītādivaṇṇā eva, keci keci vilepanavasena pītādivaṇṇā khāyimsu, evam anīlādivaṇṇā eva keci vilepanavasena nīlādivaṇṇā khāyimsu. Te kira suvaṇṇavicittehi maṇi-obhāsehi ekanīlā viya khāyanti.

Kokanadanti vā padumavisesanam yathā “**kokāsakan**”ti. Taṃ kira bahupattam vaṇṇasampannam ativiya sugandhañca hoti. Ayam hettha attho—

yathā kokanadasaṅkhātāṃ padumaṃ pāto sūriyuggamanavelāya phullaṃ
vikasitaṃ avītagandhaṃ siyā virocamaṇaṃ, evaṃ sarīragandhena
guṇagandhena ca sugandhaṃ, saradakāle antalikkhe ādiccamiva attano
tejasā tapantaṃ, aṅgehi niccharantaḥjutitāya aṅgīrasaṃ sambuddhaṃ passāti.

Piṅgiyānīsuttavaṇṇanā niṭṭhitā.

6. Mahāsupinasuttavaṇṇanā

196. Chaṭṭhe **dhātukkhobhakarapaṇṇāpaccayo**¹ nāma
visabhāgabhesajjasenāsanāhārādipaccayo. **Atthakāmatāya vā
anattakāmatāya vāti** pasannā atthakāmatāya, kuddhā anattakāmatāya.
Atthāya vā anattāya vāti sabhāvato bhavitabbāya atthāya vā anattāya vā.
Upasaṃharantīti attano devānubhāvena upanenti. **Bodhisattamātā viya
puttapaṭilābhanimittanti** tadā kira pure puṇṇamāya sattamadivasato paṭṭhāya
vigatasurāpānaṃ mālāgandhādivibhūṭisampannaṃ nakkhattakīlaṃ
anubhavamaṇā bodhisattamātā sattame divase pātova uṭṭhāya gandhodakena
nahāyitvā sabbālaṅkārabhūṣitā varabhojanaṃ bhuñjitvā uposathaṅgāni
adhiṭṭhāya sirigabbhaṃ pavisitvā sirisayane nipannāniddaṃ okkamamaṇā
imaṃ supinaṃ addasa—cattāro kira naṃ mahārājāno sayaneneva saddhiṃ
ukkipitvā anottadahaṃ netvā nahāpetvā dibbavatthaṃ nivāsetvā
dibbagandhehi vilimpetvā dibbapupphāni piḷandhetvā tato avidūre
rajatapabbato, tassa anto kanakavimānaṃ atthi, tasmim pācīnato sīsaṃ katvā
nipajjāpesuṃ. Atha bodhisatto setavaravāraṇo hutvā tato avidūre eko
suvaṇṇapabbato, tattha caritvā tato oruyha rajatapabbataṃ āruhitvā
kanakavimānaṃ pavisitvā mātaraṃ padakkhiṇaṃ katvā dakkhiṇapassaṃ
phāletvā kucchiṃ paviṭṭhasadiso ahoṣi. Imaṃ supinaṃ sandhāya etaṃ
vuttaṃ “bodhisattamātā viya puttapaṭilābhanimittanti”ti.

1. Sārattha-Ṭī 2. 302 piṭṭhādīsupi passitabbaṃ.

Kosalarājā viya soḷasa supineti—

“Usabhā rukkhā gāviyo gavā ca,
 Asso kaṁso siṅgālī ca kumbho.
 Pokkharāṇī ca apākacandanāṁ,
 Lābūni sīdanti silā plavanti.

Maṇḍūkiyo kaṇhasappe gilanti,
 Kākaṁ suvaṇṇā parivārayanti.
 Tasā vakā eḷakānaṁ bhayā hī”ti¹—

ime soḷasa supine passanto kosalarājā viya.

1. Ekadivasaṁ kira kosalamahārājā rattim niddūpagato pacchimayāme soḷasa mahāsupine passi². Tattha cattāro añjanavaṇṇā kāḷa-usabhā “yujjhissāmā”ti catūhi disāhi rājaṅgaṇaṁ āgantvā “usabhayuddhaṁ passissāmā”ti mahājane sannipatite yujjhanākāraṁ dassetvā naditvā gajjitvā ayujjihvāva paṭikkantā. Imaṁ paṭhamāṁ supinaṁ addasa.

2. Khuddakā rukkhā ceva gacchā ca pathaviṁ bhinditvā vidatthimattampi ratanamattampi anuggantvāva pupphanti ceva phalanti ca. Imaṁ dutiyaṁ addasa.

3. Gāviyo tadahujātānaṁ vacchānaṁ khīraṁ pivantiyo addasa. Ayaṁ tatiyo supino.

4. Dhuravāhe ārohapariṇāhasampanne mahāgoṇe yugaparamparāya ayojetvā taruṇe godamme dhure yojente addasa. Te dhuraṁ vahituṁ asakkontā chaḍḍetvā aṭṭhaṁsu, sakaṭāni nappavattiṁsu. Ayaṁ catuttho supino.

5. Ekaṁ ubhatomukhaṁ assaṁ addasa, tassa ubhosu passesu yavasāṁ³ denti, so dvīhiṇi mukhehi khādāti. Ayaṁ pañcamaṁ supino.

1. Khu 5. 18 piṭṭhe Jātake.

2. Jātaka-Ṭṭha 1. 355 piṭṭhādīsupi passitabbaṁ.

3. Yavasassaṁ (Ka)

6. Mahājano sataśahassagghanikaṃ suvaṇṇapātim sammajjitvā “idha passāvaṃ karohi”ti ekassa jarasiṅgālassa upanāmesi, taṃ tattha passāvaṃ karontaṃ addasa. Ayaṃ chaṭṭho supino.

7. Eko puriso rajjuṃ vaṭṭetvā pādamūle nikkhipati, tena nisinnapīṭhassa heṭṭhā sayitā chātasiṅgālī tassa ajānantasseva taṃ khādati. Imāṃ sattamaṃ supinaṃ addasa.

8. Rājadvāre bahūhi tucchakumbhehi parivāretvā ṭhapitaṃ ekaṃ mahantaṃ pūritakumbhaṃ addasa. Cattāropi pana vaṇṇā catūhi disāhi catūhi anudisāhi ca ghaṭehi udakaṃ ānetvā pūritakumbhameva pūrenti, pūritaṃ pūritaṃ udakaṃ uttaritvā palāyati, tepi punappunaṃ tattheva udakaṃ āsiṅcanti, tucchakumbhe oloketāpi natthi. Ayaṃ aṭṭhamo supino.

9. Ekaṃ pañcapadumasañchannaṃ gambhīraṃ sabbatotitthaṃ pokkharāṇiṃ addasa, samantato dvīpadacatuppadā otaritvā tattha pānīyaṃ pivanti, tassa majjhe gambhīraṭṭhāne udakaṃ āvilaṃ, tīrappadeso dvīpadacatuppadānaṃ akkamaṇaṭṭhāne acchaṃ vippasannaṃ āvilaṃ. Ayaṃ navamo supino.

10. Ekissāyeva kumbhiyā paccamānaṃ odanaṃ apākaṃ addasa. “Apākaṃ”ti vicāretvā vibhajitvā ṭhapitaṃ viya tūhākārehi paccamānaṃ ekasmiṃ passe atikilino hoti, ekasmiṃ uttaṇḍulo, ekasmiṃ supakkoti. Ayaṃ dasamo supino.

11. Sataśahassagghanakaṃ candanasāraṃ pūtitakkena vikkiṇante addasa. Ayaṃ ekādasamo supino.

12. Tucchalābūni udake sīdantāni addasa. Ayaṃ dvādasamo supino.

13. Mahantamahantā kūṭāgārappamāṇā ghanasilā nāvā viya udake plavamānā addasa. Ayaṃ terasamo supino.

14. Khuddakamadhapupphappamāṇā maṇḍūkiyo mahante kaṇhasappe vegena anubandhitvā uppalaṇḍe viya chinditvā maṃsaṃ khāditvā gilantiyo addasa. Ayaṃ cūddasamo supino.

15. Dasahi asaddhammehi samannāgataṃ gāmagocaraṃ kākaṃ kañcanaṇṇavaṇṇatāya “suvanṇa”ti laddhanāme suvaṇṇarājahaṃse parivārente addasa. Ayaṃ pannarasamo supino.

16. Pubbe dīpino eḷake khādanti, te pana eḷake dīpino anubandhitvā muramurāti khādante addasa, athaññe tasā vakā eḷake dūratova disvā tasitā tāsappattā hutvā eḷakānaṃ bhayā palāyitvā gumbagahanāni pavisitvā nilīyimsu. Ayaṃ soḷasamo supino.

1. Tattha adhammikānaṃ rājūnaṃ, adhammikānañca manussānaṃ kāle loke viparivattamāne kusale osanne akusale ussanne lokassa parihānakāle devo na sammā vassissati, meghapādā pacchijjissanti, sassāni milāyissanti, dubbhikkhaṃ bhavissati, vassitukāmā viya catūhi disāhi meghā uṭṭhahitvā itthikāhi ātape patthaṭānaṃ vīhi-ādīnaṃ temanabhayena antopavesitakāle purisesu kudālapīṭake ādāya āḷibandhanatthāya nikkhantesu vassanākāraṃ dassetvā gajjitvā vijjulātā nicchāretvā usabhā viya ayujjhitvā avassitvāva palāyissanti. Ayaṃ paṭhamassa vipāko.

2. Lokassa parihānakāle manussānaṃ parittāyukakāle sattā tibbarāgā bhavissanti, asampattavayāva kumāriyo purisantaraṃ gantvā utuniyo ceva gabbhiniyo ca hutvā puttadhītāhi vaḍḍhissanti. Khuddakarukkhānaṃ pupphaṃ viya hi tāsāṃ utunibhāvo, phalaṃ viya ca puttadhītaro bhavissanti. Ayaṃ dutiyassa vipāko.

3. Manussānaṃ jeṭṭhāpacāyikakammaṃsa natṭhakāle sattā mātāpitūsu vā sassusasuresu vā lajjaṃ anupaṭṭhapetvā sayameva kuṭumbaṃ saṃvidahantāva ghāsacchādanamattampi mahallakānaṃ dātukāmā dassanti, adātukāmā na dassanti. Mahallakā anāthā hutvā asayaṃvasī dārake ārādhentvā jīvissanti tadahujātānaṃ vacchakānaṃ khīraṃ pivantiyo mahāgāviyo viya. Ayaṃ tatiyassa vipāko.

4. Adhammīkarājūnaṃ kāle adhammīkarājāno paṇḍitānaṃ pavenīkusalānaṃ kammanittharaṇasamatthānaṃ mahāmatthānaṃ yasaṃ na dassanti, dhammasabhāyaṃ vinicchayaṭṭhānēpi paṇḍite vohāraḥkusale mahallake amacce na ṭhapessanti, tabbiparītānaṃ pana taruṇataruṇānaṃ yasaṃ dassanti, tathārūpe eva ca vinicchayaṭṭhāne ṭhapessanti. Te rājakammāni ceva yuttāyuttaṅca ajānantā neva taṃ yasaṃ ukkhipitum sakkhissanti, na rājakammāni nittharitum. Te asakkontā kammadhuraṃ chaḍḍessanti, mahallakāpi paṇḍitāmaccā yasaṃ alabhantā kiccāni nittharitum samatthāpi “kiṃ amhākaṃ etehi, mayaṃ bāhirakā jātā, abbhantarikā taruṇadārakā jānissanti”ti uppannāni kammāni na karissanti. Evaṃ sabbathāpi tesāṃ rājūnaṃ hāniyeva bhavissati, dhuraṃ vahitum asamatthānaṃ vacchadammānaṃ dhure yojitakālo viya dhuravāhānaṅca mahāgoṇānaṃ yugaparamparāya ayojitakālo viya bhavissati. Ayaṃ catutthassa vipāko.

5. Adhammīkarājākāleyeva adhammīkabālarājāno adhammīke lolamanusse vinicchaye ṭhapessanti, te pāpapuññesu anādarā bālā sabhāyaṃ nisīditvā vinicchayaṃ dentā ubhinnaṃpi atthapaccatthikānaṃ hatthato lañjaṃ gahetvā khādissanti asso viya dvīhi mukhehi yavasāṃ¹. Ayaṃ pañcamassa vipāko.

6. Adhammīkāyeva vijātirājāno jātisampannānaṃ kulaputtānaṃ āsaṅkāya yasaṃ na dassanti, akulīnānaṃyeva dassanti. Evaṃ mahākulāni duggatāni bhavissanti, lāmakakulāni issarāni. Te ca kulīnapurisā jīvitum asakkontā “ime nissāya jīvissāmā”ti akulīnānaṃ dhītaro dassanti, iti tāsāṃ kuladhītānaṃ akulīnehi saddhim samvāso jarasiṅgālassa suvaṇṇapātiyaṃ passāvakaraṇasadiṣo bhavissati. Ayaṃ chaṭṭhassa vipāko.

7. Gacchante gacchante kāle itthiyo purisalolā surālolā alaṅkāralolā visikhālolā āmisalolā bhavissanti dussilā durācārā. Tā sāmikehi kasigorakkhādīni kammāni katvā

1. Yavasassaṃ (Ka)

kicchena kasirena sambhataṃ dhanam jārehi saddhim suram pivantiyo mālāgandhavilepanam dhārayamānā antogehe accāyikampi kiccaṃ anoloketvā gehaparikkhepassa uparibhāgenapi chiddaṭṭhānehipi jāre upadhārayamānā sve vapitabbayuttakam bījampi koṭṭetvā yāgubhattakhajjakāni pacitvā khādamānā vilumpissanti heṭṭhāpīṭhake nipannachātasiṅgālī viya vaṭṭetvā vaṭṭetvā pādamūle nikkhitarajjum. Ayam sattamassa vipāko.

8. Gacchante gacchante kāle loko parihāyissati, raṭṭham nirojam bhavissati, rājāno duggatā kapaṇā bhavissanti. Yo issaro bhavissati, tassa bhaṇḍāgāre satahassamattā bhavissanti. Te evaṃduggatā sabbe jānapade attanova kammaṃ kāressanti, upaddutā manussā sake kammante chaḍḍetvā rājūnamyeva atthāya pubbaṇṇāparaṇṇāni vapantā rakkhantā lāyantā maddantā pavesentā ucchukkhetāni karontā yantāni vāhentā phāṇitādīni pacantā pupphārāme phalārāme ca karontā tattha tattha nipphannāni pubbaṇṇādīni āharitvā rañño koṭṭhāgārameva pūressanti. Attano gehesu tucchakoṭṭhe oloketāpi na bhavissanti, tucchakumbhe anoloketvā pūritakumbhapūraṇasadisameva bhavissati. Ayam aṭṭhamassa vipāko.

9. Gacchante gacchante kāle rājāno adhammikā bhavissanti, chandādivasena agatiṃ gacchantā rajjam kāressanti, dhammena vinicchayam nāma na dassanti, lañjavittakā bhavissanti dhanalolā, raṭṭhavāsikesu tesam khantimettānuddayā nāma na bhavissanti, kakkhaḷā pharusā ucchuyante ucchubhaṇḍikā viya manusse piḷentā nānappakāram balim¹ uppādetvā dhanam gaṇhissanti. Manussā balipiḷitā kiñci dātum asakkontā gāmanigamādayo chaḍḍetvā paccantam gantvā vāsam kappessanti, majjhimanapado suñño bhavissati, paccanto ghanavāso seyyathāpi pokkharāṇiyā majjhe udakam āvilam pariyante vippasannaṃ. Ayam navamassa vipāko.

10. Gacchante gacchante kāle rājāno adhammikā bhavissanti, tesu adhammikesu rājayuttāpi brāhmaṇagahapatikāpi negama jānapadāpīti

1. Piḷam (Ka)

samaṇabrāhmaṇe upādāya sabbe manussā adhammikā bhavissanti. Tato tesam ārakkhadevatā balipaṭṭiggāhikadevatā rukkhadevatā ākāsaṭṭhadevatāti evaṃ devatāpi adhammikā bhavissanti, adhammikaṛājūnaṃ rajje vātā visamā kharā vāyissanti, te ākāsaṭṭhakavimānāni kampessanti. Tesu kampitesu devatā kupitā devaṃ vassituṃ na dassanti. Vassamānopi sakalapaṭṭhe ekappaḥāreṇeva na vassissati, vassamānopi sabbattha kasikkammaṃ vā vappakammaṃ vā upakāro hutvā na vassissati. Yathā ca paṭṭhe, evaṃ janapadehi gāmehi ekataḷākasarehi ekappaḥāreṇa na vassissati, taḷākaṃ uparibhāge vassanto heṭṭhābhāge na vassissati, heṭṭhā vassanto upari na vassissati. Ekasmiṃ bhāge sassaṃ ativassena vassissati, ekasmiṃ avassanaṃ milāyissati, ekasmiṃ sammāvassamāno sampādessati. Evaṃ ekassa rañño rajje vuttasassaṃ tippakārā bhavissanti ekakumbhiyā odano viya. Ayaṃ dasammaṃ vipāko.

11. Gacchante gacchanteyeva kāle sāsane pariḥāyante paccayalolā alajjikā bahū bhikkhū bhavissanti, te bhagavatā paccayaloluppaṃ nimmathetvā kathitadhammadesanaṃ cīvarādicatupaccayahetu paresaṃ desessanti. Paccayehi mucchitvā nittharaṇapakke ṭhitā nibbānābhikkhū katvā desetuṃ na sakkhissanti. Kevalaṃ “padabyañjanasampattiñceva madhurasaddaṅca sutvā mahagghāni cīvarādīni dassanti” iccevaṃ desessanti. Apare antaravīthicatukkarājadvārādīsu nisīditvā kahāpaṇa-aḍḍhakahāpaṇapādamaśakarūpādīni nissāya desessanti. Iti bhagavatā nibbānagghanaṃ katvā desitaṃ dhammaṃ catupaccayatthāya ceva kahāpaṇādi-atthāya ca vikkīṇitvā desentā sataśaḥṣaḥṣaḥṣaḥṣaḥ candanaśaraṃ pūtitakkena vikkīṇantā viya bhavissanti. Ayaṃ ekādasammaṃ vipāko.

12. Adhammikaṛājakāle loke viparivattanteyeva rājāno jātisampannaṃ kulaputtānaṃ yasaṃ na dassanti, akulīnānaññeva dassanti. Te issarā bhavissanti, itarā daliddā. Rājasammukhehi rājadvārehi amaccasammukhehi vinicchayaṭṭhānehi tuccalābusadisānaṃ akulīnānaṃyeva kathā osīditvā ṭhitā viya niccalā suppatiṭṭhitā bhavissati. Saṃghasannipātehi

saṅghakammagaṇakammaṭṭhānesu ceva
pattacīvarapariveṇādivinicchayaṭṭhānesu ca dussīlānaṃ
pāpapuggalānaṃyeva kathā niyyānikā bhavissati, na lajjibhikkhūnanti evaṃ
sabbatthāpi tucchalābūnaṃ sīdanakālo viya bhavissati. Ayaṃ dvādasamassa
vipāko.

13. Tādiseyeva kāle adhammikaṛājāno akulīnānaṃ yasaṃ dassanti. Te
issarā bhavissanti, kulīnā duggatā. Tesu na keci gāraṃ karissanti,
itaresuyeva karissanti. Rājasammukhe vā amaccasammukhe vā
vinicchayaṭṭhāne vā vinicchayakusalānaṃ ghanasilāsadisānaṃ kulaputtānaṃ
kathā na ogāhitvā patiṭṭhahissati. Tesu kathentesu “kiṃ ime kathenti”ti itare
parihāsameva karissanti. Bhikkhusannipātepi vuttappakāresu ṭhānesu neva
pesale bhikkhū garukātabbe maññissanti nāpi nesaṃ kathā pariyogāhitvā
patiṭṭhahissati, silānaṃ plavanakālo viya bhavissati. Ayaṃ terasamassa
vipāko.

14. Loke parihāyanteyeva manussā tibbarāgādijātikā kilesānuvattakā
hutvā taruṇānaṃ attano bhariyānaṃ vase vattissanti. Gehe
dāsakammakārādayopi gomahiṃsādayopi hiraññasuvaṇṇampi sabbam
tāsaṃyeva āyattaṃ bhavissati. “Asukaṃ hiraññasuvaṇṇaṃ vā
paricchadādi jātaṃ vā kahaṃ”ti vutte “yattha vā tattha vā hotu, kiṃ
tuyhiminā byāpārena, tvaṃ mayhaṃ ghare santaṃ vā asantaṃ vā
jānitukāmo jāto”ti vatvā nānappakārehi akkositvā mukhasattīhi koṭṭetvā
dāsaceṭake viya vase katvā attano issariyaṃ pavattessanti. Evaṃ
madhukapupphappamāṇānaṃ maṇḍūkīnaṃ āsivise kaṇhasappe gilanakālo
viya bhavissati. Ayaṃ cuddasamassa vipāko.

15. Dubbalarājakāle pana rājāno hatthisippādīsu akusalāyuddhesu
avisārādā bhavissanti, te attano rājādhipaccaṃ āsaṅkamānā
samānajātikānaṃ kulaputtānaṃ issariyaṃ adatvā attano
pādamūlikanahāpanakappakādīnaṃ dassanti. Jātigottasampannā kulaputtā
rājakule patiṭṭhaṃ alabhamānā jīvikaṃ kappetuṃ asamatthā hutvā issariye
ṭhite jātigottahīne akulīne upaṭṭhahantā vicarissanti, suvaṇṇarājahaṃsehi
kākassa parivāritakālo viya bhavissati. Ayaṃ pannarasamassa vipāko.

16. Adhammikaṛājakāleyeva ca akulīnāva rājavallabhā issarā bhavissanti, kulīnā apaññātā duggatā. Te rājānaṃ attano kathāṃ gāhāpetvā vinicchayaṭṭhānādīsu balavanto hutvā dubbalānaṃ paveṇi-āgatāni khettavatthādīni “amhākaṃ santakāni”ti abhiyūñjitvā te “na tumhākaṃ, amhākaṃ”ti āgantvā vinicchayaṭṭhānādīsu vivadante vettalatādīhi paharāpetvā gīvāyaṃ gahetvā apakaḍḍhāpetvā “attano pamāṇaṃ na jānātha, amhehi saddhiṃ vivadatha, idāni vo rañño kathetvā hatthapādacchedādīni kāressāmā”ti santajjessanti. Te tesāṃ bhayena attano santakāni vatthūni “tumhākaṃyeva tāni, gaṇhathā”ti niyyātetvā attano gehāni pavisitvā bhītā nipajjissanti. Pāpabhikkhūpi pesale bhikkhū yathāruci viheṭhessanti, pesalā bhikkhū paṭisaraṇaṃ alabhamānā araññaṃ pavisitvā gahanaṭṭhānesu nilīyissanti. Evaṃ hīnājacchehi ceva pāpabhikkhūhi ca upaddutānaṃ jātimantakulaputtānañceva pesalabhikkhūnañca eḷakānaṃ bhayena tasavakānaṃ palāyanakālo viya bhavissati. Ayaṃ soḷasamassa vipāko. Evaṃ tassa tassa anathassa pubbanimittabhūte soḷasa mahāsupine passi. Tena vuttaṃ “kosalarājā viya soḷasa supine”ti. Ettha ca pubbanimittato attano atthānatthanimittaṃ supinaṃ passanto attano kammānubhāvena passati. Kosalarājā viya lokassa atthānatthanimittaṃ supinaṃ passanto pana sabbasattasādhāraṇakammānubhāvena passatīti vedītabbāni.

Kuddhā hi devatāti mahānāgavīhāre mahātherassa kuddhā devatā viya. Rohaṇe kira mahānāgavīhāre mahāthero bhikkhusaṃghaṃ anapaloketvāva ekaṃ nāgarukkhaṃ chindāpesi. Rukkhe adhivatthā devatā therassa kuddhā paṭhamameva naṃ saccasupinena palobhetvā pacchā “ito te sattadivasamatthake upaṭṭhāko rājā marissatī”ti supine ārocesi. Thero taṃ kathāṃ āharitvā rājorodhānaṃ ācikkhi. Tā ekappahāreneva mahāvīraṃ viravīmsu. Rājā “kiṃ etan”ti pucchi. Tā “evaṃ therena vuttan”ti ārocayīmsu. Rājā divasaṃ gaṇāpetvā sattāhe vīvatte therassa hatthapāde chindāpesi. **Ekantaṃ saccameva hotīti** phalassa saccabhāvato vuttaṃ,

dassanaṃ pana vipallatthameva. Teneva pahīnavipallāsā pubbanimittabhūtampi supinaṃ na passanti. Dvīhi tīhipi kāraṇehi kadāci supinaṃ passatīti āha “**saṃsaggabhedato**”ti. “Asekhā na passanti pahīnavipallāsattā”ti vacanato catunnampi kāraṇānaṃ vipallāsā eva mūlakāraṇanti daṭṭhabbaṃ.

Tanti supinakāle pavattaṃ bhavaṅgacittaṃ. **Rupanimittādi-ārammaṇanti** kammakammanimittagatinimittato aññaṃ rūpanimittādi-ārammaṇaṃ na hoti. **Īdisānīti** paccakkhato anubhūtapubbaparikkappitarūpādi-ārammaṇāni ceva rāgādisampayuttāni ca. **Sabbohārikacittenāti** pakaticcittena.

Dvīhi antehi muttoti kusalākusalasaṅkhātehi dvīhi antehi mutto. **Āvajjanatadārammaṇakkhaṇeti** idaṃ yāva tadārammaṇuppatti, tāva pavattacittavāraṃ sandhāya vuttaṃ. “Supineneva diṭṭhaṃ viya me, suttaṃ viya me ti kathanakāle pana abyākatoyeva āvajjanamattasseva uppajjanato”ti vadanti. Evaṃ vadantehi pañcadvāre dutiyamoghavāre viya manodvārepi āvajjanaṃ dvattikkhattuṃ uppajjitvā javanaṭṭhāne ṭhatvā bhavaṅgaṃ otaratīti adhippetanti daṭṭhabbaṃ ekacittakkhaṇikassa āvajjanassa uppattiyāṃ “diṭṭhaṃ viya me, suttaṃ viya me”ti kappanāya asambhavato. Ettha ca “supinantepi tadārammaṇavacanato paccuppannavasena atītavasena vā sabhāvadhammā supinante ārammaṇaṃ hontī”ti vadanti. “Yadipi supinante vibhūtaṃ hutvā upaṭṭhite rūpādivatthumhi tadārammaṇaṃ vuttaṃ, tathāpi supinante upaṭṭhitanimittassa parikkappavasena gahetabbatāya dubbalabhāvato dubbalavatthukattāti vuttaṃ”ti vadanti. Keci pana “karajakāyassa nirussāhasantabhāvappattito tannissitahadayavatthu na suppasannaṃ hoti, tato tannissitāpi cittappavatti na suppasannā asuppasannaṃ upaṭṭhinissitadīpappabhā viya, tasmā **dubbalavatthukattāti** ettha dubbalahadayavatthukattā”ti atthaṃ vadanti. Vīmaṃsitvā yuttataraṃ gahetabbāṃ.

Supinantacetanāti manodvārikajavanavasena pavattā supinanta cetanā. Supinaṃ hi passanto manodvārikeneva javanena passati, na pañcadvārikena. Paṭibujjhanto ca manodvārikeneva paṭibujjhanti, na pañcadvārikena. Niddāyantassa hi mahāvaṭṭiṃ jāletvā dīpe cakkhusamīpaṃ upanīte paṭhamāṃ cakkhudvārikāṃ āvajjanaṃ bhavaṅgaṃ na āvaṭṭeti, manodvārikameva āvaṭṭeti. Atha javanaṃ javitvā bhavaṅgaṃ otarati. Dutiyavāre cakkhuddhārika-āvajjanaṃ bhavaṅgaṃ

āvaṭṭeti, tato cakkhuviññāṇādīni javanapariyosānāni pavattanti, tadanantaram bhavaṅgam pavattati. Tatiyavāre manodvārika-āvajjanena bhavaṅge āvaṭṭite manodvārikajavanam javati. Tena cittena “kiṃ ayam imasmim ṭhāne āloko”ti jānāti. Tathā niddāyantassa kaṇṇasamīpe tūriyesu paggahitesu, ghānasamīpe sugandhesu vā duggandhesu vā pupphesu upanītesu, mukhe sappimhi vā phāṇite vā pakkhitte, piṭṭhiyam pāṇinā pahāre dinne paṭhamam sotadvārikādīni āvajjanāni bhavaṅgam na āvaṭṭenti, manodvārikameva āvaṭṭeti, atha javanam javitvā bhavaṅgam otarati. Dutiyavāre sotadvārikādīni āvajjanāni bhavaṅgam āvaṭṭenti, tato sotaghānajivhākāyaviññāṇādīni javanapariyosānāni, pavattanti, tadanantaram bhavaṅgam vattati. Tatiyavāre manodvārika-āvajjanena bhavaṅge āvaṭṭite manodvārikajavanam javati, tena cittena ṇatvā “kiṃ ayam imasmim ṭhāne saddo, saṅkhasaddo bherisaddo”ti vā “kiṃ ayam imasmim ṭhāne gandho, mūlagandho”ti vā “kiṃ idam mayham mukham pakkhittam, sappīti vā phāṇitan”ti vā “kenamhi piṭṭhiyam pahaṭo, atibaddho me pahāro”ti vā vattā hoti. Evam manodvārikajavaneneva paṭibujjhati, na pañcadvārikena. Supinampi teneva passati, na pañcadvārikena. Sesametha suviññeyyameva.

Mahāsupinasuttavaṇṇanā niṭṭhitā.

7. Vassasuttavaṇṇanā

197. Sattame **utusamutṭhānanti** vassike cattāro māse uppannam. **Akālepīti** cittavesākhamāsesupi. Vassavalāhakadevaputtānam hi attano ratiyā kīṭitukāmatācitte uppanne akālepi devo vassati. Tatridam vatthu—eko kira vassavalāhakadevaputto vākarakuṭakavāsikhīṇāsavattherassa santikam gantvā vanditvā aṭṭhāsi. Thero “kosi tvan”ti pucchi. Aham bhante vassavalāhakadevaputtoti. Tumhākam kira cittena devo vassatīti. Āma bhanteti. Passitukāmā mayanti. Temissatha bhanteti. Meghasīsam vā gajjitam vā na paññāyati, katham temissāmāti. Bhante amhākam cittena devo vassati, tumhe paṇṇasālam pavisathāti. “Sādhu devaputtā”ti pāde dhovivā

paññasālam pāvīsi. Devaputto tasmim pavisanteyeva ekaṃ gītaṃ gāyitvā hatthaṃ ukkhipi, samantā tiyojanaṭṭhānaṃ ekameghaṃ ahoṣi. Thero addhatinto paññasālam pavīṭṭhoti.

Vassasuttavaṇṇanā niṭṭhitā.

8. Vācāsuttādivaṇṇanā

198-9. Aṭṭhame **aṅgehī**ti kāraṇehi. Aṅgīyanti hetubhāvena nāyantīti **aṅgāni**, kāraṇāni. Kāraṇatthe ca aṅga-saddo. **Pañcahī**ti hetumhi nissakkavacanaṃ. **Samannāgatāti samanū-āgatā pavattā yuttā ca**¹. **Vācā**ti samullapanavācā. Yā “vācā girā byapatho”ti² ca, “nelā kaṇṇasukhā”ti³ ca āgacchati. Yā pana “vācāya ce kataṃ kamman”ti⁴ evaṃ viññatti ca, “yā catūhi vacīduccaritehi āraṭi -pa- ayaṃ vuccati sammāvācā”ti⁵ evaṃ virati ca, “pharusavācā bhikkhave āsevītā bhāvītā bahulikatā nirayasamvattanikā hoti”ti⁶ evaṃ cetanā ca vācāti āgatā, na sā idha adhippetā. Kasmā? Abhāsitabbato. “Subhāsītā hoti, no dubbhāsītā”ti hi vuttaṃ. **Subhāsītā**ti suṭṭhu bhāsītā. Tenassā atthāvahataṃ dīpeti. **Anavajjāti** rāgādi-avajjarahitā. Imināssa kāraṇasuddhiṃ agatigamanādippavattadosābhāvaṅca dīpeti. Rāgadosādivimuttaṃ hi yaṃ bhāsato anurodhavivajjanato agatigamaṇaṃ durasamussitamevāti. **Ananuvajjāti** anuvādavimuttā. Imināssā sabbākārasampattiṃ dīpeti. Sati hi sabbākārasampattiyāṃ ananuvajjātāti. **Viññūnanti** paṇḍitānaṃ. Tena nindāpasāmsāsu bālā appamāṇāti dīpeti.

Imehi khoti-ādīni tāni aṅgāni paccakkhato dassento taṃ vācaṃ nigameti. Yaṅca aññe paṭiññādīhi avayavehi, nāmādīhi padehi, liṅgavacanavibhattikālakārasampattihi ca samannāgataṃ musāvādādivācāpi subhāsītanti maññanti, taṃ paṭisedheti. Avayavādisamannāgatāpi hi

1. Sampannaṃ āgatā pavattā (Ka) Saṃ-Ṭṭha 1. 249 piṭṭhe passitabbaṃ.

2. Abhi 1. 168 piṭṭhe.

3. Dī 1. 4, 60 piṭṭhesu.

4. Abhi-Ṭṭha 1. 127 piṭṭhe.

5. Abhi 1. 76 piṭṭhe.

6. Am 3. 78 piṭṭhe.

tathārūpī vācā dubbhāsītāva hoti attano ca paresañca anattāhāvahattā. Imehi pana pañcahaṅgehi samannāgatā sacepi milakkhubhāsāpariyāpannā ghaṭaceṭṭikāgītīkapariyāpannāpi hoti, tathāpi subhāsītāva lokiyalokuttarahitasukhāvahattā. Tathā hi maggapasse sassam rakkhantiyā sīhaḷaceṭṭikāya sīhaḷakeneva jātijarāmarañayuttam gītīkam gāyantiyā saddam sutvā maggam gacchantā saṭṭhimattā vipassakabhikkhū arahattam pāpuṇimsu.

Tathā tisso nāma āraddhavipassako bhikkhu padumassarasamīpena gacchanto padumassare padumāni bhañjivā—

“Pātova phullitakokanadam,
Sūriyālokena bhijjiate.
Evaṃ manussattam gatā sattā,
Jarābhivegena maddiyanti”¹—

imam gītam gāyantiyā ceṭṭikāya sutvā arahattam patto.

Buddhantarepi aññataro puriso sattahi puttehi saddhim aṭavito āgamma aññatarāya itthiyā musalena taṇḍule koṭṭentiya—

“Jarāya parimadditam etam, milātacammanissitam.
Maraṇena bhijjati etam, maccussa ghāsamāmisam.
Kimīnam ālayam etam, nānākuṇapena pūritam.
Asucibhājanam etam, kadalikkhandhasamam idan”²—

imam gītam sutvā paccavekkhanto saha puttehi paccakabodhim patto. Evaṃ imehi pañcahi aṅgehi samannāgatā vācā sacepi milakkhubhāsāya pariyāpannā ghaṭaceṭṭikāgītīkapariyāpannā vācā hoti, tathāpi subhāsītāti veditabbā. Subhāsītā eva anavajjā ananuvajjā ca viññūnam atthattikānam kulaputtānam atthappaṭisaraṇānam, no byañjanappaṭisaraṇānantī. Navamam uttānameva.

Vācāsuttādivaṇṇanā niṭṭhitā.

1. Sam-Ṭṭha 1. 250; Suttanipāta-Ṭṭha 2. 124 piṭṭhesupī.

2. Sam-Ṭṭha 1. 251; Suttanipāta-Ṭṭha 2. 125 piṭṭhesupī.

10. Nissāraṇīyasuttavaṇṇanā

200. Dasame nissarantīti nissaraṇīyāti vattabbe dīghaṃ katvā niddeso. Kattari hesa anīya-saddo yathā “niyyāniyā”ti. Tenāha “**nissaṭā**”ti. Kuto pana nissaṭā? Yathāsakaṃ paṭipakkhato. Nijjīvaṭṭhena dhātuyoti āha “**attasuññasabhāvā**”ti. Atthato pana dhammadhātumanoviññādhātuviseso. Tādisassa bhikkhuno kilesavasena kāmesu manasikāro natthīti āha “**vīmaṃsanatthan**”ti, “nekkhammaniyataṃ idāni me cittaṃ, kiṃ nu kho kāmavitakkopi uppajjissatī”ti vīmaṃsantassāti attho. **Pakkhandanaṃ** nāma anuppaveso. So pana tattha natthīti āha “**nappavisatī**”ti. **Pasīdanaṃ** nāma abhiruci. **Santiṭṭhanaṃ** paṭiṭṭhānaṃ. **Vimuccanaṃ** adhimuccananti. Taṃ sabbhaṃ paṭikkhipanto vadati “**pasādaṃ nāpajjati**”ti-ādi. Evambhūtaṃ panassa cittaṃ tassa kathāṃ tiṭṭhatīti āha “**yathā**”ti-ādi.

Tanti paṭhamajjhānaṃ. **Assāti** bhikkhuno. **Cittaṃ pakkhandatīti** parikammacittena saddhiṃ jhānacittaṃ ekattavasena ekajjhaṃ katvā vadati. **Gocare gatattāti** attano ārammaṇe eva pavattattā. **Ahānabhāgiyattāti** ṭhitibhāgiyattā. **Suṭṭhu vimuttanti** vikkhambhanavimuttiyā sammadeva vimuttaṃ. Cittassa ca kāyassa ca vihananato **vighāto**. Dukkhaṃ paridahanato **pariḷāho**. **Kāmavedanaṃ na vediyati** anuppajjanato. Nissaranti tatoti **nissaraṇaṃ**. Ke nissaranti? Kāmā. Evañca **kāmānanti** kattusāmivacanaṃ suṭṭhu yujjati. Yadaggena kāmā tato nissaṭāti vuccanti, tadaggena jhānampi kāmato nissaṭanti vattabbataṃ labhatīti vuttaṃ “**kāmehi nissaṭatthā**”ti. Evaṃ vikkhambhanavasena kāmanissaraṇaṃ vatvā idāni samucchadavasena accantato nissaraṇaṃ dassetuṃ “**yo panā**”ti-ādi vuttaṃ. **Sesapadesūti** sesakoṭṭhāsesu.

Ayaṃ pana visesoti visesaṃ vadantena taṃ jhānaṃ pādakaṃ katvāti-ādiko avisesoti katvā dutiyatatiyavāresu sabbaso anāmaṭṭho, catutthavāre pana ayampi visesoti dassetuṃ “**accantanissaraṇaṇicettha arahattaphalaṃ yojetabban**”ti vuttaṃ. Yasmā¹

1. Kasmā (Ka)

5. Pañcamapaṇṇāsaka

(21) 1. Kimilavagga

1. Kimilasuttādivaṇṇanā

201-4. Pañcamassa paṭhamadutiyaṇi uttānatthāneva. Tatiye adhivāsanam khamanam, paresam dukkaṭam duruttañca paṭivirodhākaraṇena attano upari āropetvā vāsanam adhivāsanam, tadeva khantīti **adhivāsanakkhanti**. Subhe ratoti sūrato, suṭṭhu vā pāpato orato virato sorato, tassa bhāvo **soraccam**. Tenāha “**soraccenāti sucisīlatāyā**”ti. Sā hi sobhanakammaratātā, suṭṭhu vā pāpato oratabhāvo viratātā. Catutthe natthi vattabbari.

Kimilasuttādivaṇṇanā niṭṭhitā.

5. Cetokhilasuttavaṇṇanā

205. Pañcame **cetokhilā** nāma atthato vicikicchā kodho ca. Te pana yasmim santāne uppajjanti, tassa kharabhāvo kakkhaḷabhāvo hutvā upatiṭṭhanti, pageva attanā sampayuttacittassāti āha “**cittassa thaddhabhāvā**”ti. Yathā lakkhaṇapāripūriyā gahitāya sabbā satthu rūpakāyasirī gahitā eva nāma hoti evam sabbaññutāya sabbadhammakāyasirī gahitā eva nāma hotīti tadubhayavatthukameva kaṅkham dassetto “**sarīre kaṅkhamāno**”ti-ādimāha. **Vicinantoti** dhammasabhāvam vīmaṇsanto. **Kicchatīti** kilamati. **Vinicchetuṃ na sakkotīti** sanniṭṭhātuṃ na sakkoti. Ātapati kileseti **ātappam**, sammāvāyāmoti āha “**ātappāyāti** **kilesasantāpanavīriyakaraṇatthāyā**”ti. **Punappunam yogāyāti** bhāvanam punappunam yuñjanāya. **Satatakiriyaṇāyāti** bhāvanāya nīrantarappayogāya.

Paṭivedhadhamme kaṅkhamānoti ettha katham lokuttaradhamme kaṅkhāpavattīti? Na ārammaṇakaraṇavasena, anussutākāraparivitakkaladdhe parikappitarūpe

kaṅkhā pavattatīti dassento āha “**vipassanā -pa- vadanti, taṃ atthi nu kho natthīti kaṅkhatī**”ti. **Sikkhā**ti cetha pubbhāgasikkhā veditabbā. Kāmaṃ cetha visesuppattiyā mahāsāvajjatāya ceva saṃvāsanimittam ghaṭanāhetu abhiṅhuppattikatāya ca sabrahmacārīsūti kopassa visayo visesetvā vutto, aññatthāpi kopo na cetokhiloti na sakkā viññātunti keci. Yadi evaṃ vicikicchāyapi ayaṃ nayo āpajjati, tasmā yathārutavasena gahetabbaṃ.

Cetokhilasuttavaṇṇanā niṭṭhitā.

6. Vinibandhasuttādivaṇṇanā

206-8. Chaṭṭhe pavattitum appadānavasena kusalacittam vinibandhantīti **cetaso vinibandhā**. Tam pana vinibandhantā muṭṭhiggāham gaṇhantā viya hontīti āha “**cittam vinibandhitvā**”ti-ādi. Kāmagiddho puggalo vatthukāmepe kilesakāmepe assādeti abhinandaṭīti vuttam “**vatthukāmepe kilesakāmepe**”ti. **Attano kāyete** attano nāmakāye, attabhāve vā. **Bahiddhārūpeti** paresam kāye anindriyabaddharūpe ca. Udaram avadihati upacinoti pūreṭīti **udarāvadehakam**. **Seyyasukhanti** seyyāya sayanavasena uppajjanakasukham. **Samparivattakanti** samparivattitvā. **Paṇidhāyati** taṇhāvaseneva paṇidahitvā. Iti pañcavidhopi lobhaviseso eva “cetovinibandho”ti vuttoti veditabbo. Sattamaṭṭhamesu natthi vattabbaṃ.

Vinibandhasuttādivaṇṇanā niṭṭhitā.

9. Gītassarasuttādivaṇṇanā

209-210. Navame āyatako nāma gītassaro tam tam vattam bhinditvā akkharāni vināsetvā pavattoti āha “**āyatakenā**”ti-ādi. Dhammehi suttavattam nāma atthi, gāthāvattam nāma atthi, tam vināsetvā atidigham katum na vaṭṭati. Dhammam hi bhāsantena caturassena vattena

parimaṇḍalāni padabyañjanāni dassetabbāni. “Anujānāmi bhikkhave sarabhaññan”¹ti ca vacanato sarena dhammaṃ bhaṇitum vaṭṭati. Sarabhaññe kira taraṅgavattadhotakavattabhāgaggahakavattādīni dvattimsa vattāni atthi. Tesu yaṃ icchati, taṃ kātum labhatīti. Dasame natthi vattabbaṃ.

Gītassarasuttādivaṇṇanā niṭṭhitā.

Kimilavaggavaṇṇanā niṭṭhitā.

(22) 2. Akkosakavagga

1. Akkosakasuttādivaṇṇanā

211-2. Dutiyaṃ paṭhame **dasahi akkosavattthūhi akkosakoti** “bālosi, mūḷhosi, oṭṭhosi, goṇosi, gadrabhosi”²ti-ādinā dasahi akkosavattthūhi akkosako. “Hotu muṇḍakasamaṇa adaṇḍo ahanti karosi, idāni te rājakulaṃ gantvā daṇḍaṃ āropessāmi”³ti-ādīni vadanto paribhāsako nāmāti āha “**bhayadassanena paribhāsako**”³ti. Lokuttaradhammā apāyamaggassa paripanthabhāvato **paripantho** nāmāti āha “**lokuttaraparipanthassa chinnattā**”³ti, lokuttarasāṅkhātassa apāyamaggaparipanthassa chinnattāti attho. Dutiye natthi vattabbaṃ.

Akkosakasuttādivaṇṇanā niṭṭhitā.

3. Sīlasuttādivaṇṇanā

213-220. Tatiye² **dussīloti** ettha **du**-saddo abhāvatto “duppañño”²ti-ādīsu³ viya, na garahaṇatthoti āha “**asīlo nissīlo**”²ti. **Bhinnasamvaroti** ettha samādinnaṃ kenaci kāraṇena sīlabhedam patta, so tāva bhinnasamvaro hotu. Yo pana sabbena sabbam asamādinnaṃ ācārahīno, so katham bhinnasamvaro nāma

1. Vi 4. 243 piṭṭhe.

2. Dī-Ṭī 2. 137 piṭṭhepi passitabbaṃ.

3. Ma 1. 366 piṭṭhe.

hotīti? Sopi sādhusamācārassa pariharaṇīyassa bheditattā bhinnasamvaro eva nāma. Vinaṭṭhasamvaro samvararahitoti hi vuttam hoti. **Tam tam** sippaṭṭhānam. **Māghātakāleti** “mā ghāthetha paṇīnan”ti evam māghātaghosanam ghoṣitadivase. **Abbhuggacchati** pāpako kittisaddo. **Ajjhāsayena maṅku hotiyeva** vippaṭṭisāribhāvato.

Tassāti dussīlassa. **Samādāya vattitaṭṭhānanti** uṭṭhāya samuṭṭhāya katakāraṇam. **Āpātham āgacchati**ti tam manaso upaṭṭhāti. **Ummīletvā idhalokanti** ummīlanakāle attano puttadārādivasena idhalokam passati. **Nimīletvā paralokanti** nimīlanakāle gatinimittupaṭṭhānavasena paralokam passati. Tenāha “**cattāro apāyā**”ti-ādi. **Pañcamapadanti** “kāyassa bheda”ti-ādinā vutto pañcamo ādīnavakoṭṭhāso. **Vuttavipariyāyenāti** vuttatthāya ādīnagakathāya vipariyāyena “appamatto tam tam kasivaṇijjādim yathākālam sampādetum sakkoti”ti-ādinā. Pāsamsam sīlamassa atthīti **sīlavā**. **Sīlasampannoti** sīlena samannāgato sampannasīloti evamādīkam pana atthavacanam sukaranti anāmaṭṭham. Catutthādīni uttānatthāneva.

Sīlasuttādivaṇṇanā niṭṭhitā.

Akkosakavaggavaṇṇanā niṭṭhitā.

(23) 3. Dīghacārikavagga

1. Paṭhamadīghacārikasuttādivaṇṇanā

221-230. Tatiyassa paṭhamādīni suviññeyyāni. Pañcame **raho nisajjāya āpajjati**ti “yo pana bhikkhu mātuḡāmena saddhim eko ekāya raho nisajjam kappeyya, pācittiyam”ti imasmim **sikkhāpade**¹ vuttam āpattim āpajjati. **Paṭicchanne āsane āpajjati**ti “yo pana bhikkhu mātuḡāmena raho paṭicchanne āsane nisajjam kappeyya, pācittiyam”ti imasmim vuttam āpattim āpajjati. **Mātuḡamassa uttari chappañca vācāhi dhammam**

1. Vi 2. 130 piṭṭhe.

desento āpajjati “yo pana bhikkhu mātugāmassa uttari chappañca vācāhi dhammaṃ deseyya aññatra viññunā purisaviggahenā”¹ti evaṃ vuttaṃ āpattiṃ āpajjati. Tenāha “**tesaṃ tesaṃ sikkhāpadānaṃ vasena veditabbāni**”ti. Chaṭṭhādīni uttānatthāni.

Paṭhamadīghacārikasuttādivaṇṇanā niṭṭhitā.

Dīghacārikavaggavaṇṇanā niṭṭhitā.

231-302. Catutthavaggādīni uttānatthāni.

**Iti manorathapūraṇiyā aṅguttaranikāyaṭṭhakathāya
Pañcakanipātavaṇṇanāya anuttānatthadīpanā samattā.**

Chakkanipāta

1. Paṭhamapaṇṇāsaka

1. Āhuneyyavagga

1. Paṭhama-āhuneyyasuttavaṇṇanā

1. Chakkanipātassa paṭhame **cakkhunā rūpaṃ disvā**ti nissayavohārena vuttaṃ. Sasambhāraṇiddeṣoṇaṃ yathā “dhanunā vijjhatī”ti, tasmā nissayasīseṇa nissitassa gahaṇaṃ daṭṭhabbaṃ. Tenāyamattho “cakkhudvāre rūpārammaṇe āpāthagate taṃ rūpaṃ cakkhuvīññāṇena disvā”ti. **Neva sumano hotī**ti javanakkhaṇe iṭṭhe ārammaṇe rāgaṃ anuppādentō neva sumano hoti gehassitapemavasenaṇi maggena sabbaso rāgassa samucchinnatā. **Na dummanoti** aniṭṭhe adussanto na dummano. Pasādaññathattavasenaṇi iṭṭhepi aniṭṭhepi majjhattepi ārammaṇe na samaṃ sammā ayoniso gahaṇaṃ **asamapekkhanaṃ**. Ayañcassa paṭipatti sativepullappattiyā paññāvepullappattiyā cāti āha “**sato sampajāno hutvā**”ti. Satiyā yuttatā **sato**. Sampajāññena yuttatā **sampajāno**. Ñānuppattipaccayarahitakālepi pavattibhedanato “**satatavihāro kathito**”ti vuttaṃ. **Satatavihāro**ti khīṇāsavassa niccavihāro sabbadā pavattanakavihāro. Ṭhapetvā hi samāpattivelāṃ bhavaṅgavelaṅca khīṇāsavā imināva chaḷaṅgupekkhāvihārena viharanti.

Ettha ca “chaso dvāresupi upekkhako viharatī”ti iminā chaḷaṅgupekkhā kathitā, “sampajāno”ti vacanato pana cattāri ñāṇasampayuttacittāni labbhanti tehi vinā sampajānatāya asambhavato. Satatavihārabhāvato aṭṭha mahākiriyaṇcittāni labbhanti. “Neva sumano na dummano”ti vacanato aṭṭha mahākiriyaṇcittāni, hasituppādo, voṭṭhabbanañcāti dasa cittāni labbhanti. Rāgadosasahajātānaṃ somanassadomanassānaṃ abhāvo tesampi sādharmaṇoti chaḷaṅgupekkhāvasena āgatānaṃ imesaṃ satatavihārānaṃ somanassaṃ kathaṃ labbhatīti ce? Āsevanato.

Kiñcāpi khīṇāsavo iṭṭhāniṭṭhepi ārammaṇe majjhatto viya bahulaṃ upekkhako viharati attano parisuddhapakatibhāvāvijahanato, kadāci pana tathā cetobhisaṅkhārābhāve yaṃ taṃ¹ sabhāvato iṭṭhaṃ ārammaṇaṃ, tassa yāthāvasabhāvaggahaṇavasena arahato cittaṃ pubbāsevanavasena somanassasahagataṃ hutvā pavattateva.

Paṭhama-āhuneyyasuttavaṇṇanā niṭṭhitā.

2. Dutiya-āhuneyyasuttādivaṇṇanā

2-7. Dutīye² **anekavihitanti** anekavidhaṃ nānappakāraṃ. **Iddhividhanti** iddhikoṭṭhāsaṃ. **Paccanubhotīti** paccanubhavati, phusati sacchikaroti pāpuṇātīti attho. Idānissa anekavihitabhāvaṃ dassento “**ekopi hutvā**”ti-ādimāha. Tattha “ekopi hutvā”ti iminā karaṇato pubbeva pakatiyā ekopi hutvā. **Bahudhā hotīti** bahūnaṃ santike caṅkamtukāmo vā sajjhāyaṃ kātukāmo vā pañhaṃ pucchitukāmo vā hutvā satampi sahasampi hoti. **Āvibhāvaṃ tirobhāvanti** ettha āvibhāvaṃ karoti, tirobhāvaṃ karotīti ayamattho. Idameva hi sandhāya **paṭisambhidāyaṃ**³ vuttaṃ “āvibhāvanti kenaci anāvutaṃ hoti appaṭicchannaṃ vivaṭaṃ, tirobhāvanti kenaci āvutaṃ hoti paṭicchannaṃ pihitaṃ paṭikujjitaṃ”ti. **Tirokuṭṭaṃ tiropākāraṃ tiropabbataṃ asajjamāno gacchati seyyathāpi ākāseti** ettha tirokuṭṭanti parakuṭṭaṃ, kuṭṭassa parabhāganti vuttaṃ hoti. Esa nayo itaresu. **Kuṭṭoti** ca gehabhittiyā etaṃ adhivacanaṃ. **Pākāroti** gehavīhāragāmādīnaṃ parikkhepapakāro. **Pabbatoti** paṃsupabbato vā pāsāṇapabbato vā. **Asajjamānoti** alaggamāno seyyathāpi ākāse viya.

Ummujjanimujjanti ettha ummujjanti uṭṭhānaṃ vuccati. **Nimujjanti** saṃsīdanaṃ. Ummujjañca nimujjañca **ummujjanimujjaṃ**. **Udakepi abhijjamāneti** ettha yaṃ udakaṃ akkamitvā saṃsīdati, taṃ bhijjamānanti vuccati, viparītaṃ **abhijjamānaṃ**. **Pallaṅkena** gacchati.

1. Santaṃ (Ka) 2. Visuddhi 2. 12 piṭṭhādīsupi passitabbaṃ. 3. Khu 9. 386 piṭṭhe.

Pakkhī sakuṇoti pakkhehi yuttasakuṇo. **Imepi candimasūriye evaṁmahiddhike evaṁmahānubhāve pāṇinā parāmasatīti** ettha candimasūriyānaṁ dvācattālīsayojanasahassassa upari caraṇena mahiddhikatā, tīsu dīpesu ekakkhaṇe ālokakaraṇena mahānubhāvātā veditabbā. Evaṁ uparicaraṇa-ālokakaraṇehi mahiddhike mahānubhāve. **Parāmasatīti** gaṇhāti, ekadese vā chupati. **Parimajjati**ti samantato ādāsatalā viya parimajjati. **Yāva brahmalokāpīti** brahmalokampi paricchedaṁ katvā. **Kāyena vasaṁ vatteti**ti tatra brahmaloke kāyena attano vasaṁ vatteti.

Dibbāya sotadhātuyāti ettha dibbasadisattā **dibbā**. Devatānaṁ hi sucaritakammanibbattā pittasemharuhirādīhi apalibuddhā upakkilesavimuttatāya dūrepi āramaṇasampaṭicchanasamattā dibbā pasādasotadhātu hoti. Ayañcāpi imassa bhikkhuno vīriyabhāvanābalena nibbattā nāṇasotadhātu tādisāyevāti dibbasadisattā dibbā. Apica dibbavihārasena paṭiladdhattā attanā ca dibbavihārasannissitattāpi **dibbā**. Savanaṭṭhena nijjivattṭhena ca sotadhātu. Sotadhātukiccakaraṇena sotadhātu viyātipi sotadhātu. Tāya **sotadhātuyā**. **Visuddhāyāti** suddhāya nirupakkilesāya. **Atikkantamānusikāyāti** manussūpacāraṁ atikkamitvā saddasavane mānusikaṁ māṁsasotadhātuṁ atikkantāya vītivattetvā ṭhitāya. **Ubho sadde suṇātīti** dve sadde suṇāti. Katame dve? **Dibbe ca mānuse ca**, devānañca manussānañca saddeti vuttaṁ hoti. Etena padesapariyādānaṁ veditabbaṁ. **Ye dūre santike cāti** ye saddā dūre paracakkavāḷepi, ye ca santike antamaso sadehasannissitapāṇakasaddāpi, te suṇātīti vuttaṁ hoti. Etena nippadesapariyādānaṁ veditabbaṁ.

Parasattānanti attānaṁ ṭhapetvā sesasattānaṁ. **Parapuggalānanti** idampi iminā ekatthameva. Veneyyavasena pana desanāvilāsena ca byañjananānattaṁ kataṁ. **Cetasā cetoti** attano cittaṁ tesaṁ cittaṁ. **Pariccāti** paricchinditvā. **Pajānāti**ti sarāgādivasena nānappakārato jānāti. **Sarāgaṁ vā cittanti**-ādīsu pana aṭṭha lobhasahagatacittaṁ sarāgaṁ cittanti veditabbaṁ. Avasesaṁ cātubhūmakāṁ kusalābyākatacittaṁ **vītarāgaṁ**.

Dve domanassacittāni, dve vicikicchuddhaccacittānī imāni pana cattāri cittāni imasmim̄ duke saṅgahaṃ na gacchanti. Keci pana therā tānipi saṅgaṇhanti. Duvidhaṃ pana domanassacittaṃ **sadosaṃ cittaṃ** nāma. Sabbampi cātubhūmakāṃ kusalābyākatacittaṃ **vītadosaṃ**. Sesāni dasa akusalacittāni imasmim̄ duke saṅgahaṃ na gacchanti. Keci pana therā tānipi saṅgaṇhanti. **Samohaṃ vītamohanti** ettha pana pāṭipuggalikanayena vicikicchuddhaccasahagatadvayameva samohaṃ. Mohassa pana sabbākusalesu sambhavato dvādasavidhampi akusalacittaṃ **samohaṃ cittaṃ** veditabbaṃ. Avasesaṃ **vītamohaṃ**. Thinamiddhānugataṃ pana **saṃkhittaṃ**, uddhaccānugataṃ **vikkhittaṃ**. Rūpāvacarārūpāvacaraṃ **mahaggataṃ**, avasesaṃ **amahaggataṃ**. Sabbampi tebhūmakāṃ **sa-uttaraṃ**, lokuttaraṃ **anuttaraṃ**. Upacārapattaṃ appanāpattañca **samāhitaṃ**, ubhayampattaṃ **asamāhitaṃ**. Tadaṅgavikkhambhanasamucchedappaṭippassaddhinissaraṇavimuttiṃ pattaṃ pañcavidhampi etaṃ **vimuttaṃ**, vimuttimpattaṃ vā **avimuttanti** veditabbaṃ.

Anekavihitanti¹ anekavidhaṃ, anekehi vā pakārehi pavattitaṃ saṃvaṇṇitanti attho. **Pubbenivāsanti** samanantarātītabhavaṃ ādim̄ katvā tattha tattha nivutthasantānaṃ. **Anussaratīti** khandhapaṭipāṭivasena, cutipaṭisandhivasena vā anugantvā anugantvā sarati. Seyyathidaṃ? **ekampi jātiṃ -pa- pubbenivāsaṃ anussaratīti**. Tattha **ekampi jātinti** ekampi paṭisandhimūlaṃ cutipariyosānaṃ ekabhavapariyāpannaṃ khandhasantānaṃ. Esa nayo **dvepi jātiyoti-ādīsupi**. **Anekepi saṃvaṭṭakappeti-ādīsu** pana parihāyamāno kappo **saṃvaṭṭakappo**, vadḍhamāno **vivaṭṭakappoti** veditabbo. Tattha saṃvaṭṭena saṃvaṭṭatṭhāyī gahito hoti taṃmūlakattā, vivaṭṭena vivaṭṭatṭhāyī. Evaṃ hi sati yāni tāni “cattārimāni bhikkhave kappassa asaṅkhyeyyāni. Katamāni cattāri? Saṃvaṭṭo saṃvaṭṭatṭhāyī vivaṭṭo vivaṭṭatṭhāyī”² vuttāni, tāni pariggahitāni honti.

Amutrāsinti amumhi saṃvaṭṭakappe ahaṃ amumhi bhava vā yoniyā vā gatiyā vā viññāṇaṭṭhitiyā vā sattāvāse vā sattanikāye vā āsīm̄. **Evaṃnāmoti** tisso vā phusso vā. **Evaṃgottoti** gotamo vā kaccāyano vā kassapo vā. Idamassa atītabhave attano nāmagottānussaraṇavasena vuttaṃ. Sace pana tasmim̄ kāle attano

1. Vi-Ṭṭha 1. 128 piṭṭhādīsupi passitabbaṃ.

2. Am̄ 1. 460 piṭṭhe.

vaṇṇasampattilūkhapaṇītajīvikabhāvaṃ sukhadukkkhabahulataṃ
 appāyukadīghāyukabhāvaṃ vā anussaritukāmo hoti, tampi anussaratiyeva.
 Tenāha “**evaṃvaṇṇo -pa- evamāyupariyanto**”ti. Tattha **Evaṃvaṇṇoti** odāto
 vā sāmo vā. **Evamāhāro**ti sālīmaṃsodanāhāro vā pavattaphalabhojano vā.
Evamāsukhadukkhapaṭisaṃvedīti anena pakārena kāyikacetasikānaṃ
 sāmisanirāmisādippabhedānaṃ sukhadukkhānaṃ paṭisaṃvedī.
Evamāyupariyantoti evaṃ vassasataparimāṇāyupariyanto vā
 caturāsītikappasahassāyupariyanto vā. **So tato cuto amutra udapādinti** so
 ahaṃ tato bhavato yonito gatito viññāṇaṭṭhitito sattāvāsato sattanikāyato vā
 cuto puna amukasmim nāma bhava yoniyā gatiyā viññāṇaṭṭhitiyā sattāvāse
 sattanikāye vā udapādīm. **Tatrāpāsinti** tatrāpi bhava yoniyā gatiyā
 viññāṇaṭṭhitiyā sattāvāse sattanikāye vā puna ahoṣim. **Evaṃnāmoti**-ādi
 vuttanayameva.

Apica **amutrāsinti** idaṃ anupubbena ārohantassa yāvadicchakaṃ
 anussaraṇaṃ. **So tatoti** paṭinivattantassa paccavekkhaṇaṃ, tasmā
 “**idhūpapanno**”ti imissā idhūpapattiyā anantameva uppattiṭṭhānaṃ
 sandhāya “amutra udapādin”ti idaṃ vuttanti veditabbaṃ. **Tatrāpāsinti**
 evamādi panassa tatrāpi imissā upapattiyā antare upapattiṭṭhāne
 nāmagottādīnaṃ anussaraṇadassanattamaṃ vuttaṃ. **So tato cuto**
idhūpapannoti svāhaṃ tato anantaruppattiṭṭhānato cuto idha amukasmim
 nāma khattiyakule vā brāhmaṇakule vā nibbattoti. **Itīti** evaṃ. **Sākāraṃ sa-**
uddesanti nāmagottavasena sa-uddesaṃ, vaṇṇādivasena sākāraṃ.
 Nāmagottena hi satto “tisso kassapo”ti uddisīyati, vaṇṇādihi “sāmo odāto”ti
 nānattato paññāyati, tasmā nāmagottaṃ uddeso, itaro ākāro.

Dibbenāti-ādīsu dibbasadisattā dibbaṃ. Devatānaṃ hi
 sucaritakammanibbattaṃ pittasemharuhirādīhi apalibuddhaṃ
 upakkilesavimuttatāya dūrepi ārammaṇasampaṭicchanasamatthaṃ dibbaṃ
 pasādacakkhu hoti. Idañcāpi vīriyabhāvanābalena nibbattaṃ nāṇacakkhu
 tādīsamevāti dibbasadisattā dibbaṃ. Dibbavihārasena paṭiladdhattā attano
 ca dibbavihārasannissitattāpi dibbaṃ. Ālokapariggahena

mahājutikattāpi dibbaṃ. Tirokuṭṭādigatarūpadassanena mahāgatikattāpi **dibbaṃ**. Taṃ sabbaṃ saddasatthānusārena veditabbaṃ. Dassanaṭṭhena cakkhu. Cakkhukiccarāṇena cakkhumivātipi cakkhu. Cutūpapātadassanena diṭṭhivisuddhihetuttā visuddhaṃ. Yo hi cutimeva passati, na upapātaṃ, so ucchedadiṭṭhiṃ gaṇhāti. Yo upapātameva passati, na cutiṃ, so navasattapātubhāvadiṭṭhiṃ gaṇhāti. Yo pana tadubhayaṃ passati, so yasmā duvidhampi taṃ diṭṭhigataṃ ativattati, tasmā taṃ dassanaṃ diṭṭhivisuddhihetu hoti. Ubhayampi cetam buddhaputtā passanti. Tena vuttaṃ “cutūpapātadassanena diṭṭhivisuddhihetuttā visuddhaṃ”ti. Manussūpacāraṃ atikkamitvā rūpadassanena atikkantamānusakaṃ, mānusaṃ vā mānsacakkhum atikkantattā atikkantamānusakanti veditabbaṃ. Tena **dibbena cakkhunā visuddhena atikkantamānusakena**.

Satte passatīti manussānaṃ mānsacakkhunā viya satte oloketi.

Cavamāne upapajjamāneti ettha cutikkhaṇe vā upapattikkhaṇe vā dibbacakkhunā daṭṭhum na sakkā. Ye pana āsannacutikā idāni cavissanti, te cavamānāti, ye ca gahitappaṭisandhikā sampatinibbattā ca, te upapajjamānāti adhippetā. Te evarūpe cavamāne upapajjamāne ca passatīti dasseti. **Hīneti** mohanissandayuttattā hīnānaṃ jātikulabhogādīnaṃ vasena hīṇite uññāte. **Paṇītetī** amohanissandayuttattā tabbiparīte. **Suvaṇṇeti** adosanissandayuttattā iṭṭhakantamanāpavaṇṇayutte. **Dubbaṇṇeti** dosanissandayuttattā aniṭṭhākantāmanāpavaṇṇayutte, virūpavirūpetipi attho. **Sugateti** sugatigate, alobhanissandayuttattā vā aḍḍhe mahaddhane. **Duggateti** duggatigate, lobhanissandayuttattā vā dalidde appannaṇāne.

Yathākammūpageti yaṃ yaṃ kammaṃ upacitaṃ, tena tena upagate.

Kāyaduccaritenāti -ādīsu duṭṭhu caritaṃ kilesapūtikattāti duccaritaṃ. Kāyena duccaritaṃ, kāyato vā uppannaṃ duccaritanti **kāyaduccaritaṃ**. Itaresupi eseva nayo. **Samannāgatāti** samaṅgibhūtā. **Ariyānaṃ upavādakāti** buddhapaccekaḥbuddhasāvakaṇānaṃ ariyānaṃ antamaso gihisotāpannānampi anattakāmā hutvā antimavatthunā vā guṇaparidhamāsanena vā upavādakā, akkosakā garahakāti vuttaṃ hoti. **Micchādiṭṭhikāti**

viparītaḍḍassanā. **Micchādiṭṭhikammasamādānā**ti micchādiṭṭhivasena samāḍinnanānāvīdhakammā, yepi micchādiṭṭhimūlakesu kāyakammāḍisu aññepi samāḍāpentī.

Kāyassa bhedāti upāḍinnakkhandhapariccāgā. **Param̐ maraṇā**ti tadanantaram̐ abhinibbattakkhandhaggahaṇā. Atha vā **kāyassa bhedā**ti jīvitindriyassūpacchedā. **Param̐ maraṇā**ti cuticittato uddham̐. **Apāyanti** evamāḍi sabbam̐ nirayavevacanameva. Nirayo hi saggamokkhaḍetubhūtā puññasammataḍ ayā apētattā, sukhānam̐ vā āyassa abhāvā **apāyo**. Dukkhasa gati paṭisaraṇanti **duggati**, dosabahulatāya vā duṭṭhena kammēna nibbattā gatīti **duggati**. Vivasā nipatanti tattha duggatakārinoti **vinipāto**, vinassantā vā ettha patanti sambhijjamānaṅgapaccaṅgāti **vinipāto**. Natthi ettha assāḍasaññito ayoti **nirayo**.

Atha vā **apāy**aggahaṇēna tiracchānāyonim̐ ḍīpeti. Tiracchānāyoni hi apāyo sugatito apētattā, na duggati mahesakkhānam̐ nāgarājāḍīnam̐ sambhavato. **Duggati**ggahaṇēna pettivisayaṅca. So hi apāyo ceva duggati ca sugatito apētattā dukkhasa ca gatibhūtattā, na tu vinipāto asurasāḍisam̐ avinipatitattā. **Vinipāta**ggahaṇēna asurakāyam̐. So hi yathāvuttēna atthēna apāyo ceva duggati ca sabbasamussayēhi vinipatitattā vinipātoti vuccati. **Niray**aggahaṇēna avīci-āḍikamanekappakāram̐ nirayamevāti. **Upapannā**ti upagatā, tattha abhinibbattāti adhippāyo. Vuttavipariyāyēna sukkapakkho veditabbo. Ayam̐ pana viseso—tattha **sugati**ggahaṇēna manussagatipi saṅgayhati, **sagg**aggahaṇēna devagatiyēva. Tattha suḍarā gatīti **sugati**. Rūpāḍīhi visayēhi suṭṭhu aggoti **saggo**. So sabbopi lujjanappalujjanaṭṭhēna lokoti ayamētha saṅkhepo, vitthāro pana sabbākāreṇa **visuddhimaggasamvaṇṇanāto**¹ gahetabbo. Tatiyāḍīni uttānatthāni.

Dutiya-āhuneyyasuttāḍivaṇṇanā niṭṭhitā.

1. Visuddhi-Ṭī 2. 56 piṭṭhe.

8. Anuttariyasuttavaṇṇanā

8. Aṭṭhame natthi etesaṃ uttarāni visiṭṭhānīti anuttarāni, anuttarāni eva **anuttariyāni** yathā “anantameva anantariyan”ti āha “**niruttarāni**”ti. **Dassanānuttariyam nāma** phalavisesāvahattā. Esa nayo sesesupi. **Sattavidhāriyadhanalābhoti** sattavidhasaddhādilokuttaradhanalābho. **Sikkhāttayassa pūraṇanti** adhisīlasikkhādīnam tissanam sikkhānam pūraṇam. Tattha pūraṇam nippariyāyato asekkhānam vasena veditabbam. Kalyāṇaputhujjanato paṭṭhāya hi satta sekhā tisso sikkhā pūrenti nāma, arahā paripuṇṇasikkhoti. Iti imāni anuttariyāni lokiyalokuttarāni kathitāni.

Anuttariyasuttavaṇṇanā niṭṭhitā.

9. Anussatiṭṭhānasuttavaṇṇanā

9. Navame anussatiyo eva diṭṭhadhammikasamparāyikādihitasukhānam kāraṇabhāvato ṭhānānīti **anussatiṭṭhānāni**. **Buddhaguṇārammaṇā satīti** yathā buddhānussati visesādhigamassa ṭhānam hoti, evam “itipi so bhagavā”ti-ādinā buddhaguṇe ārabba uppannā sati. Evam anussarato hi pīti uppajjati, so taṃ pītiṃ khayato vayato paṭṭhapetvā arahattam pāpuṇāti. Upācārakammaṭṭhānam nāmetam gihīnampi labbhati. **Upācārakammaṭṭhānanti** ca paccakkhato upacārajjhānāvaham kammaṭṭhānaparamparāya sammasanam yāva arahattā lokiyalokuttaravisesāvaham. Esa nayo sabbattha.

Anussatiṭṭhānasuttavaṇṇanā niṭṭhitā.

10. Mahānāmasuttavaṇṇanā

10. Dasame **tasmim samayeti** buddhāguṇānussaraṇasamaye. **Rāgapariyuṭṭhitanti** rāgena pariyuṭṭhitam. Pariyuṭṭhānappattipi, rāgena vā samhitaṃ

cittaṃ araṇṇamiva corehi tena pariyuṭṭhitanti vuttaṃ, tassa pariyuṭṭhānaṭṭhānabhāvatoṇi pariyuṭṭhitarāganti attho. Byañjanaṃ pana anādiyitvā atthamattaṃ dassento “**uppajjamānena rāgena uṭṭhahitvā gāhitaṃ**”ti āha. **Ujukamevāti** pageva kāyavaṅkādināṃ apanītattā cittaṃ ca anujubhāvakarānaṃ mānādīnaṃ abhāvato, rāgādipariyuṭṭhānābhāvena vā oṇati-unṇativirahato ujubhāvameva gataṃ. Atha vā **ujukamevāti** kammaṭṭhānassa thinaṃ middhaṃ otiṇṇatāya līnuddhaccavigamato majjhimasamathanimittappaṭipattiyā ujubhāvameva gataṃ. **Aṭṭhakathaṃ nissāyāti** bhavajāti-ādīnaṃ padānaṃ atthaṃ nissāya. **Atthavedanti** vā hetuphalaṃ paṭicca uppannaṃ tuṭṭhimāha. **Dhammavedanti** hetuṃ paṭicca uppannaṃ tuṭṭhiṃ. “Ārakattā arahānaṃ”ti anussarantassa hi yadidaṃ bhagavato kilesehi ārakattaṃ, so hetu. Ñāpako cettha hetu adhippeto, na kārako sampāpako. Tatonena ñāyamāno arahattattho phalaṃ. Iminā nayena sesapadesupi hetuso phalavipāko veditabbo. **Dhammānussati**-ādīsipi hi ādimajjhapariyosānakalyāṇatādayo suppaṭipatti-ādayo ca tattha tattha hetubhāvena niddiṭṭhāyeva. **Dhammūpasamhitanti** yathāvuttahetuphalasaṅkhāttaguṇūpasamhitāṃ.

Mahānāmasuttavaṇṇanā niṭṭhitā.

Āhuneyyavaggavaṇṇanā niṭṭhitā.

2. Sāraṇīyavagga

1. Paṭhamasāraṇīyasuttavaṇṇanā

11. Dutiyassa paṭhame **saritabbayuttakāti** anussaraṇārahā. Mijjati siniyhati etāyāti mettā, mittabhāvo. Mettā etassa atthīti **mettaṃ**, kāyakammaṃ. Taṃ pana yasmā mettāsahagatacittasamuṭṭhānaṃ, tasmā vuttaṃ “**mettena cittaṃ kātappaṃ kāyakammaṃ**”ti. Esa nayo sesadvayepi. **Imānīti** mettakāyakammādīni. **Bhikkhūnaṃ vasena āgatāni** tesāṃ seṭṭhaparisaṃbhāvato. Yathā pana bhikkhūnaṃ supi labbhanti, evaṃ gihīsipi labbhanti catuparisaṃsādhāraṇattāti taṃ dassento “**bhikkhūnaṃhi**”ti-ādīmāha.

Bhikkhuno sabbampi anavajjakāyakammaṃ
 ābhisamācārikakammantogadhamevāti āha “**mettena cittena -pa-
 kāyakammaṃ nāmā**”ti. Bhattivasena pavattiyamānā cetiyabodhīnaṃ
 vandanā mettāsiddhāti katvā tadatthāya gamanaṃ “mettaṃ kāyakammaṃ”ti
 vuttaṃ. **Ādi**-saddena cetiyabodhibhikkhūsu vuttāvasesāpacāyanādivasena
 pavattametāvāsena pavattaṃ kāyikaṃ kiriyaṃ saṅgaṇhāti.

Tepiṭakampi buddhavacanaṃ kathiyamānanti adhippāyo. Tepiṭakampi
 buddhavacanaṃ paripucchana-atthakathanavasena pavattiyamānameva
mettaṃ vacīkammaṃ nāmahitajjhāsayena pavattitabbato. **Tiṇi sucaritānī**
 kāyavacīmano sucaritāni. **Cintananti** evaṃ cintanamattampi manokammaṃ,
 pageva paṭipannā bhāvanāti dasseti.

Āvīti pakāsaṃ. Pakāsabhāvo cettha yaṃ uddissa taṃ kāyakammaṃ
 karīyati, tassa sammukhabhāvatoti āha “**sammukhā**”ti. **Rahoti** appakāsaṃ.
 Appakāsata ca yaṃ uddissa taṃ kāyakammaṃ karīyati, tassa
 apaccakkhabhāvatoti āha “**parammukhā**”ti. **Sahāyabhāvagamanaṃ** tesam
 purato¹. Tesu karontesuyeva hi sahāyabhāvagamanaṃ sammukhā
 kāyakammaṃ nāma hoti. **ubhayehīti** navakehi therehi ca. **Paggayhāti**
 paggaṇhitvā uddham katvā kevalaṃ “devo”ti avatvā guṇehi
 thirabhāvajotanaṃ “devatthero”ti vacanaṃ paggayha vacanaṃ.
 Mamattabodhanaṃ vacanaṃ **mamāyanavacanaṃ**. Ekantaparammukhassa
 manokammassa sammukhatā nāma viññattisamuṭṭhāpanavasena hoti, tañca
 kho loka kāyakammanti pākaṭaṃ paññātaṃ. Hatthavikārādīni anāmasitvā
 eva dassento “**nayanāni ummīletvā**”ti-ādimāha. Kāmaṃ
 mettāsinehasiniddhānaṃ nayanānaṃ ummīlanā pasannena mukhena
 olokanañca mettaṃ kāyakammameva, yassa pana cittassa vasena
 nayanānaṃ mettāsinehasiniddhatā mukhassa ca pasannatā, taṃ sandhāya
 vuttaṃ “**mettaṃ manokammaṃ nāmā**”ti.

Lābha-saddo kammaśādhano “lābhā vata bho laddho”ti-ādīsu viya. So
 cettha “dhammaladdhā”ti vacanato atītakālikoti āha “**cīvarādayo
 laddhapaccayā**”ti. Dhammato āgatāti **dhammikā**, parisuddhagamaṇā
 paccayā. Tenāha “dhammaladdhā”ti. Imameva hi atthaṃ dassetuṃ

1. Parato (Ka) Dī-Ṭī 2. 131 piṭṭhe passitabbaṃ.

“**kuhanādi**”ti-ādi vuttaṃ. Na sammā gayhamānā hi dhammaladdhā nāma na hontīti tappaṭisedhanattham pāḷiyam “dhammaladdhā”ti vuttaṃ. Deyyam dakkhiṇeyyañca appaṭivibhattam katvā bhuñjatīti **appaṭivibhattabhogī** nāma hoti. Tenāha “**dve paṭivibhattāni nāmā**”ti-ādi. **Cittena vibhajananti** etena cittuppādamattenapi vibhajanam paṭivibhattam nāma, pageva payogatoti dasseti. Cittena vibhajanapubbakam vā kāyena vibhajananti mūlameva dassetuṃ “**evam cittena vibhajanam**”ti vuttaṃ. Tena cittuppādamattena paṭivibhāgo kātabboti dasseti. **Appaṭivibhattanti** bhāvanapuṃsakaniddeso, appaṭivibhattam lābham bhuñjatīti kammaniddeso vā. **Tam neva gihīnam deti** attano ājīvasodhanattham. **Na attanā paribhuñjati** “mayham asādhāraṇabhogitā mā hotū”ti. **Paṭiggaṇhanto ca -pa- passatīti** iminā āgamanato paṭṭhāya sādharmaṇabuddhim upaṭṭhāpeti. Evam hissa sādharmaṇabhogitā sukarā, sāraṇīyadhammo cassa pūro hoti.

Atha vā **paṭiggaṇhanto ca -pa- passatīti** iminā tassa lābhassa tīsu kālesu sāmāraṇato ṭhapanam dassitam. **Paṭiggaṇhanto ca saṃghena sādharmaṇam hotūti** iminā paṭiggahaṇakālo dassito. **Gahetvā -pa- passatīti** iminā paṭiggahitakālo. Tadubhayam pana tādisena pubbhāgena vinā na hotīti atthasiddho purimakālo. Tayidam paṭiggahaṇato pubbevassa hoti “saṃghena sādharmaṇam hotūti paṭiggaṇhissāmī”ti, paṭiggaṇhantassa hoti “saṃghena sādharmaṇam hotūti paṭiggaṇhāmī”ti, paṭiggahetvā hoti “saṃghena sādharmaṇam hotūti hi paṭiggahitam mayā”ti. Evam tilakkaṇasampannam katvā laddham lābham osāraṇalakkhaṇam avikopetvā paribhuñjanto sādharmaṇabhogī appaṭivibhattabhogī ca hoti.

Imam pana sāraṇīyadhammanti imam catuttham saritabbayuttadhammam. **Na hi -pa- gaṇhanti**, tasmā sādharmaṇabhogitā dussīlassa natthīti ārambhopi tāva na sambhavati, kuto pūraṇanti adhippāyo. **Parisuddhasīloti** iminā lābhassa dhammikabhāvaṃ dasseti. **Vattam akhaṇḍentoti** iminā appaṭivibhattabhogitam sādharmaṇabhogitañca dasseti. Sati pana tadubhaye sāraṇīyadhammo pūrito eva hotīti āha “**pūreti**”ti. **Odissakam katvāti** etena anodissakam katvā pituno, ācariyupajjhāyādīnam

vā therāsanato paṭṭhāya dentassa sāraṇīyadhammoyeva hotīti dasseti. **Dātabbanti** avassam dātabbam. **Sāraṇīyadhammo panassa na hoti** paṭijaggaṭṭhāne odissakam katvā dinnattā. Tenāha “**palibodhajagganam nāma hoti**”ti. **Muttapalibodhassa vaṭṭati** amuttapalibodhassa pūretum asakkuṇeyyattā. Yadi evam sabbena sabbam sāraṇīyadhammam pūrentassa odissakadānam vaṭṭati, na vaṭṭatīti? No na vaṭṭati yuttaṭṭhāneti dassento “**tena panā**”ti-ādimāha. Iminā odissakadānam panassa na sabbattha vāritanti dasseti. Gilānādīnam hi odissakam katvā dānam appaṭivibhāgapakkhikam “asukassa na dassāmī”ti paṭikkhepassa abhāvato. Byatirekappadhāno hi paṭibhāgo. Tenāha “**avasesan**”ti-ādi. **Adātumpīti pi**-saddena dātumpi vaṭṭatīti dasseti. Tañca kho karuṇāyanavasena, na vattaparipūraṇavasena, tasmā dussīlassapi atthikassa sati sambhave dātabbam. Dānam hi nāma na kassaci nivāritam.

Susikkhitāyāti sāraṇīyapūraṇavidhimhi susikkhitāya, sukusalāyāti attho. Idāni tassa kosallam dassetum “**susikkhitāya hī**”ti-ādi vuttam. **Dvādasahi vassehi pūreti, na tato oranti** iminā tassa duppūratam dasseti. Tathā hi so mahapphalo mahānisamso diṭṭhadhammikehipi tāvagarutarehi phalānisamsehi anugatoti taṃsamāngī ca puggalo visesalābhī ariyapuggalo viya loke acchariyabbhutadhammasamannāgato hoti. Tathā hi so duppajahadānamayassa sīlamayassa puññassa paṭipakkhadhammam sudūre vikkhambhitam katvā visuddhena cetasā loke pākaṭo paññāto hutvā viharati. Tassimamatham byatirekato anvayato ca vibhāvetum “**sace hī**”ti-ādi vuttam. Tam suviññeyyameva.

Idānissa samparāyike diṭṭhadhammike ca ānisamse dassetum “**evam pūritasāraṇīyadhammassā**”ti-ādi vuttam. **Neva issā na macchariyam hoti** cirakālabhāvanāya vidhutabhāvato. **Manussānam piyo hoti** pariccāgasīlatāya vissutattā¹. Tenāha “**dadam piyo hoti bhajantinam bahū**”ti-ādi². **Sulabhapaccayo hoti** dānavasena uḷārajjhāsayanam paccayalābhassa idhānisamsasabhāvato dānassa. **Pattagatamassa**

1. Visuddhattā (Dī-Ṭī 2. 133 piṭṭhe.)

2. Aṃ 2. 34 piṭṭhe.

diyyamānaṃ na khīyati pattagatasseva dvādasavassikassa mahāvattassa avicchedena pūritattā. **Aggabhaṇḍaṃ labhati** devasikaṃ dakkhiṇeyyānaṃ aggato paṭṭhāya dānassa dinnattā. **Bhaye vā -pa- āpajjanti** deyyappaṭiggāhakavikkappaṃ akatvā attani nirapekkhacittena cirakālaṃ dānassa pūritatāya pasāritacittattā.

Tatrāti tesu ānisaṃsesu vibhāvetabbesu. **Imāni** phalāni **vatthūni** kāraṇāni. **Mahāgiriḡāmo**¹ nāma nāgadīpapasse eko gāmo. **Alabhantāpīti** appapuññatāya alābhino samānāpi. **Bhikkhācāramaggasabhāganti** sabhāgaṃ tabbhāgiyaṃ bhikkhācāramaggaṃ jānanti. Anuttarimanussadhammattā therānaṃ saṃsayavinodanattaṃsa “**sāraṇīyadhammo me bhante pūrito**”ti āha. Tathā hi dutiyavattusmimpi therena attā pakāsito. Daharakāle evaṃ kira sāraṇīyadhammapūraako ahoṣi. Manussānaṃ piyatāya sulabhapaccayatāyapi idaṃ vatthumeva. Pattagatākhīyanassa pana viṣesaṃ vibhāvanato “**idaṃ tāva -pa- ettha vatthū**”ti vuttaṃ.

Giribhaṇḍamahāpūjāyāti cetiyagirimhi sakalalaṅkādīpe yojanappamaṇe samudde ca nāvāsaṅghāḍīke ṭhapetvā dīpapupphagandhādīhi kariyamānāya mahāpūjāya. Tassā ca paṭipattiyā avaṅjhabhāvavibhāvanatthaṃ”**ete mayhaṃ pāpuṇissanti**”ti āha. **Pariyāyenapi** lesenapi. **Anucchavikanti** “sāraṇīyadhammapūraako”ti yathābhūtapavedanaṃ tumhākaṃ anucchavikanti attho.

Anārocetvāva palāyimsu corabhayena. “Attano dujjīvikāyā”tipi vadanti. Ahaṃ sāraṇīyadhammapūrikā, mama pattapariyāpannenapi sabbāpimā bhikkhuniyo yāpessanti āha “**mā tumhe tesāṃ gatabhāvaṃ cintayitthā**”ti. **Vatṭissatīti** kappissati. **Therī sāraṇīyadhammapūrikā ahoṣi**, therassa pana sīlatejēneva devatā ussukkaṃ āpajji.

Natthi etesaṃ khaṇḍanti akhaṇḍāni. Taṃ pana nesaṃ khaṇḍaṃ dassetuṃ “**yassā**”ti-ādi vuttaṃ. Tattha upasampannasīlānaṃ uddesakkamena ādi-antā veditabbā. Tenāha “**sattasū**”ti-ādi. Na hi añño koci

1. Mahātiragāmo (Ka)

āpattikkhandhānaṃ anukkamo atthi, anupasampannasīlānaṃ samādānakkamenapi ādi-antā labbhanti. **Pariyante chinnaṣāṭako viyāti** tatrante¹ dasante vā chinnavatthaṃ viya. Visadisudāharaṇaṅcetaṃ “akhaṇḍānī”ti imassa adhiakatattā. Evaṃ sesānampi udāharaṇāni. Khaṇḍikatā bhinnatā khaṇḍaṃ, taṃ etassa atthīti **khaṇḍaṃ**, sīlaṃ. **Chiddanti**-ādisupi eseva nayo. **Vemajjhe bhinnaṃ**vinivijjhanavasena. Visabhāgavaṇṇena gāvī viyāti sambandho. Visabhāgavaṇṇena upaḍḍhaṃ tatiyabhāgagataṃ sambhinnavaṇṇaṃ **sabalaṃ**, visabhāgavaṇṇeheva bindūhi antarantarāhi vimissaṃ **kammāsaṃ**. Ayaṃ imesaṃ viseso. Sabalarahitāni **asabalāni**, tathā **akammāsāni**. Sīlassa taṇhādāsabyato mocanaṃ vivaṭṭūpanissayabhāvāpādanaṃ, tasmā taṇhādāsabyato mocanavacanena tesāṃ sīlānaṃ vivaṭṭūpanissayatamaḥa. **Bhujissabhāvakarāṇatoti** iminā bhujissakarāni **bhujissānī**ti uttarapadalopenāyaṃ niddesoti dasseti. Yasmā vā taṃsamaṅgipuggalo serī sayamaṃvasī bhujisso nāma hoti, tasmāpi **bhujissāni**. Aviññūnaṃ appamāṇatāya “**viññūppasatthānī**”ti vuttaṃ. Suparisuddhabhāvena vā sampannattā viññūhi pasatthānīti **viññūppasatthāni**.

Taṇhādittihī aparāmaṭṭhattāti “imināhaṃ sīlena devo vā bhavissāmi devaṅnataro vā”ti taṇhāparāmaṣena, “imināhaṃ sīlena devo hutvā tattha nicco dhuvo sassato bhavissāmi”ti diṭṭhiparāmaṣena ca aparāmaṭṭhattā. **Parāmaṭṭhanti** “ayaṃ te sīlesu doso”ti catūsu vipattīsu yāya kāyaci vipattiyā dassanena parāmaṭṭhumaṃ, anuddhamsetumaṃ codetunti attho. Sīlaṃ nāma avippaṭṭisārādīpārampariyena² yāvadeva samādhisampādanatthanti āha “**samādhisaṃvattanikānī**”ti. Samādhisaṃvattanappayojanāni **samādhisaṃvattanikāni**.

Samānabhāvo sāmāññaṃ, paripuṇṇacatupārisuddhibhāvena majjhe bhinnasuvaṇṇassa viya bhedaḥbhāvato sīlena sāmāññaṃ sīlasāmāññaṃ, taṃ gato upagatoti **sīlasāmāññagato**. Tenāha “**samānabhāvūpagatasīlo**”ti, sīlasampattiyā samānabhāvaṃ upagatasīlo sabhāgavuttikoti attho. Kāmaṃ puthujjanānampi catupārisuddhisīle nānattaṃ na siyā, taṃ pana na ekantikam, idaṃ ekantikam niyatabhāvatoti āha

1. Vatthante (Dī-Ṭī 2. 134 piṭṭhe.)

2. Pāripūriyena (Ka)

“**natthi maggasīle nānattan**”ti. **Taṃ sandhāyetaṃ vuttanti** maggasīlaṃ sandhāya taṃ “yāni tāni silāni”ti-ādi vuttaṃ.

Yāyanti yā ayaṃ mayhañceva tumhākañca paccakkhabhūtā. **Diṭṭhīti** maggasammādiṭṭhi. **Niddosāti** niddhutadosā, samucchinnarāgādīpāpadhammāti attho. **Niyyāṭīti** vaṭṭadukkhato nissarati niggacchati. Sayāṃ niyyantīyeva hi taṃsamaṅgipuggalaṃ vaṭṭadukkhato niyyāpetīti vuccati. Yā satthu anusīṭṭhi, taṃ karotīti **takkaro**, tassa yathānusiṭṭhaṃ paṭipajjantassāti attho. **Samānadiṭṭhibhāvanti** sadisadiṭṭhibhāvaṃ saccasampañivedhena abhinnadiṭṭhibhāvaṃ.

Paṭhamasāraṇīyasuttavaṇṇanā niṭṭhitā.

2. Dutiyasāraṇīyasuttavaṇṇanā

12. Dutiye **sabrahmacārīnanti** sahadhammikānaṃ. Piyāṃ piyāyitabbakāṃ karontīti **piyakaraṇā**. Garuṃ garuṭṭhāniyaṃ karontīti **garukaraṇā**. **Saṅgaṇhanatthāyāti** saṅgahavatthuvisesabhāvato sabrahmacārīnaṃ saṅgahaṇāya saṃvattantīti sambandho. **Avivadanatthāyāti** saṅgahavatthubhāvato eva na vivadanatthāya. Sati ca avivadanahetubhūtasāṅgahakatte tesaṃ vasena sabrahmacārīnaṃ samaggabhāvo bhedābhāvo siddhoyevāti āha “**sāmaggiyā**”ti-ādi.

Dutiyasāraṇīyasuttavaṇṇanā niṭṭhitā.

3. Nissāraṇīyasuttavaṇṇanā

13. Tatiye **vaḍḍhitāti** bhāvanāpāripūrivaseṇa paribrūhitā. **Punappunaṃ katāti** bhāvanāya bahulīkaraṇeṇa aparāparaṃ pavattitā. **Yuttayānasadisā katāti** yathā yuttamajāññāyānaṃ chekena sārathinā adhiṭṭhitaṃ yathārucci pavattati, evaṃ yathārucci pavattiraṃ gamitā. **Vatthukatāti** vā adhiṭṭhānaṭṭhena vatthu viya katā, sabbaso upakkilesavisodhanena iddhivisesatāya pavattiṭṭhānabhāvato suvisodhitaparissayavatthu viya katāti vuttaṃ hoti. **Adhiṭṭhitāti**

paṭipakkhadūrībhāvato subhāvitabhāvena taṃtamadhiṭṭhānayogyatāya ṭhapitā. **Samantato citāti** sabbabhāgena bhāvanūpacayam gamitā. Tenāha “**upacitā**”ti. **Suṭṭhu samāradhāti** iddhibhāvanāsikhāppattiyā sammadeva sambhāvitā. **Abhūtabyākaraṇam byākarotīti** “mettā hi kho me cetovimutti bhāvitā”ti-ādinā attani avijjamānaguṇābhibyāhāram byāharati. Cetovimuttisaddam apekkhitvā “**nissaṭṭā**”ti vuttam. **Puna byāpādo natthīti** idāni mama byāpādo nāma sabbaso natthīti ña tvā.

Balavavipassanāti bhayatupaṭṭhāne ñāṇam, ādinavānupassane ñāṇam, mucchitukamyatāñāṇam, bhaṅgañāṇanti catunnam ñāṇānam adhivacanam. Yesam nimittānam abhāvena arahattaphalasangāhāpattiyā animittatā, tam dassetum “**sā hī**”ti-ādi vuttam. Tattha rāgassa nimittam, rāgo eva vā nimittam **rāganimittam**. **Ādi**-saddena dosanimittādīnam saṅgaho daṭṭhabbo. Rūpavedanādisaṅkhāranimittam **rūpanimittādi**. Tesamyeva niccādivasena upaṭṭhānam **niccanimittādi**. Tayidam nimittam yasmā sabbena sabbam arahattaphale natthi, tasmā vuttam “sā hi -pa- animittā”ti. Nimittam anussarati anugacchati ārabha pavattati silenāti **nimittānusārī**. Tenāha “**vuttappabhedam nimittam anusaraṇasabhāvan**”ti.

Asmimānoti “asmī”ti pavatto attavisayo māno. **Ayam nāma ahamasmīti** rūpalakkhaṇo vedanādīsu vā aññataralakkhaṇo ayam nāma attā aham asmīti. Asmimāno samugghātīyati etenāti **asmimānasamugghāto**, arahattamaggo. **Puna asmimāno natthīti** tassa anuppattidhammatāpādanam kittento samugghātattameva vibhāveti.

Nissāraṇīyasuttavaṇṇanā niṭṭhitā.

4. Bhaddakasuttādivaṇṇanā

14-15. Catutthe āramitabbaṭṭhena vā kammam ārāmo etassāti **kammārāmo**. Kamme rato na ganthadhure vipassanādhure vāti **kammārato**. **Punappunam yuttoti** tapparabhāvena anu anu yutto pasuto. **Ālāpasallāpoti** itthivaṇṇapurisavaṇṇādivasena punappunam lapanam. Pañcame natthi vuttabbam.

Bhaddakasuttādivaṇṇanā niṭṭhitā.

6. Nakulapitusuttavaṇṇanā

16. Chaṭṭhe visabhāgavedanuppattiyā kakaceneva catu-iriyāpathaṃ chindanto ābādhayatī ābādhō, so yassa atthīti **ābādhiko**. Tamsamuṭṭhānadukkhena **dukkhito**. **Adhimattagilānoti** dhātusankhayena parikkhīṇasarīro.

Sappaṭibhayakantārasadisā soḷasavattukā aṭṭhavattukā ca vicikicchā tiṇṇā imāyāti **tiṇṇavicikicchā**. Vigatā samucchinnā pavatti-ādīsu “evaṃ nu kho na nu kho”ti evaṃ pavattikā kathamkathā assāti **vigatakathamkathā**. Sārajjakarānaṃ pāpadhammānaṃ pahīnattā rāgavikkhepesu sīlādiguṇesu ca tiṭṭhakattā vesārajjaṃ, visāradabhāvaṃ veyyattiyāṃ pattāti **vesārajjappattā**. Attanā eva paccakkhato diṭṭhattā na paraṃ pacceti, nassa paro paccetabbo atthīti **aparappaccayā**.

Gilānā vuṭṭhitoti gilānabhāvato vuṭṭhāya ṭhito. Bhāvappadhāno hi ayaṃ niddeho. **Gilāno hutvā vuṭṭhitoti** idaṃ pana atthamattanidassanaṃ.

Nakulapitusuttavaṇṇanā niṭṭhitā.

7. Soppasuttavaṇṇanā

17. Sattame **paṭisallānā vuṭṭhitoti** ettha **paṭisallānanti** tehi tehi saddhivihārika-antevāsika-upāsakādisattehi ceva rūpārammaṇādisaṅkhārehi ca paṭinivattitvā apasakkivā nilīyanaṃ vivecanaṃ. Kāyacittehi tato vivitto ekībhāvo pavivekoti āha “**ekībhāvāyā**”ti-ādi. **Ekībhāvatoti** ca iminā kāyavivekato vuṭṭhānamāha. **Dhammanijjhānakkhantitoti**-ādinā cittavivekato. **Vuṭṭhitoti** tato duvidhavivekato bhavaṅguppattiyā sabrahmacārīhi samāgamena upeto.

Soppasuttavaṇṇanā niṭṭhitā.

8. Macchabandhasuttavaṇṇanā

18. Aṭṭhame **macchaghātakanti** macchabandhaṃ kevaṭṭaṃ.
Orabbhikādīsu urabbhā vuccanti eḷakā, urabbhe hantīti **orabbhiko**.
Sūkarikādīsopi eseva nayo.

Macchabandhasuttavaṇṇanā niṭṭhitā.

9. Paṭhamamaraṇassatisuttavaṇṇanā

19. Navame **evaṃnāmake gāmeti** nātikānāmakam gāmaṃ nissāya.
 Dvinnam cūḷapitimahāpitiputtānaṃ dve gāmā, tesu ekasmiṃ gāme. Ñātīnaṃ
 hi nivāsaṭṭhānabhūto gāmo ñātiko, ñātikoyeva **nātiko** ña-kārassa na-
 kārādeso “animittā na nāyare”ti-ādīsu¹ viya. So kira gāmo yesaṃ tadā tesam
 pubbapurisena attano ñātīnaṃ sādharmaṇabhāvena nivasito, tena ñātikoti
 paññāyittha. Atha pacchā dvīhi dāyādehi dvidhā vibhajitvā paribhutto.
 Giṅjakā vuccati iṭṭhakā, giṅjakāhiyeva kato āvasathoti **giṅjakāvasatho**. So hi
 āvāso yathā sudhāparikkamma payojanaṃ natthi, evaṃ iṭṭhakāhi eva
 cinitvā chādetvā kato. Tasmim kira padese mattikā
 sakkharamarumpavālukādīhi asammissā kathinā saṅhasukhumā, tāya katāni
 kulālabhājanānīpi silāmayāni viya daḷhāni, tasmā te upāsakā tāya mattikāya
 dīghaputhū iṭṭhakā kāretvā ṭhapetvā ṭhapetvā dvāravātapānakavāṭatūlāyo
 sabbaṃ dabbasambhārena vinā tāhi iṭṭhakāhiyeva pāsādam kāresum. Tena
 vuttaṃ “**iṭṭhakāmaye pāsāde**”ti.

Rattindivanti ekarattidivaṃ. **Bhagavato sāsanti**
 ariyamaggappaṭivedhāvahaṃ satthu ovādam. **Bahu vata me kataṃ assāti**
 bahu vata mayā attahitaṃ pabbajitakiccaṃ kataṃ bhaveyya.

Tadantaranti tattakam velam. **Ekapiṇḍapātanti** ekam divasaṃ
 yāpanappahonakam piṇḍapātam. **Yāva anto pavitṭhavāto bahi nikkhamati,**
bahi

1. Visuddhi 1. 228; Sam-Ṭṭha 1. 39; Jātaka-Ṭṭha 2. 52 piṭṭhesu.

nikkhantavāto vā anto pavisaṭīti ekasseva pavesanikkhamo viya vuttaṃ, taṃ nāsikāvātabhāvasāmaññenāti daṭṭhabbāṃ.

Paṭhamamaṇassatisuttavaṇṇanā niṭṭhitā.

10. Dutiyamaṇassatisuttavaṇṇanā

20. Dasame **nikkhanteti** vītivatte. **Patigatāyāti**¹ paccāgatāya, sampattāyāti attho. Tenāha “**paṭipannāyā**”ti. **So mamassa antarāyoti** yathāvuttā na kevalaṃ kālakiriyaṃ, mama atidullabhaṃ khaṇaṃ labhitvā tassa satthusāsanamanasikārassa ceva jīvitassa ca saggamokkhānaṃca antarāyo assa, bhaveyyāti attho. Tenāha “**tividho antarāyo**”ti-ādi. **Vipajjeyyāti** vipattiṃ gaccheyya. Satthakena viya aṅgapaccāṅgānaṃ kantanakārakā kāye sandhibandhanacchedakavātā **satthakavātā**. **Kattukamyatāchando**ti niyyānāvaho kattukamyatākusalacchando. **Payogavīriyanti** bhāvanānuyogavīriyaṃ. Na paṭivāti na paṭinivattatīti **appaṭivānī**, antarā vosānānāpajjanavīriyaṃ. Tenāha “**anukkaṇṭhānā appaṭisaṅgharaṇā**”ti.

Dutiyamaṇassatisuttavaṇṇanā niṭṭhitā.

Sāraṇīyavaggavaṇṇanā niṭṭhitā.

3. Anuttariyavagga

1. Sāmakasuttādivaṇṇanā

21-22. Tatiyassa paṭhame **kevalakappanti** ettha **kevala**-saddo anavasesattho, **kappa**-saddo samantabhāvattho, tasmā kevalakappaṃ pokkharāṇiyanti evamattho daṭṭhabbo. Anavasesaṃ pharituṃ samatthassapi obhāsassa kenaci kāraṇena ekadesapharaṇampi siyā, ayaṃ pana sabbasova pharatiṭṭi dassetuṃ samantattho kappa-saddo gahito. **Attano obhāsena pharivāti** vatthālaṅkārasarīrasamuṭṭhitena obhāsena pharivā,

1. Patiyitāya (Pāliyaṃ)

candimā viya ekobhāsaṃ ekapajjotaṃ karitvāti attho. **Samanuññoti** sammadeva katamanuñño. Tenāha “**samānacitto**”ti, samānajjhāsayoti attho. Dukkhaṃ vaco etasminti dubbaco, tasā kammaṃ dovacassaṃ, tassa puggalassa anādariyavasena pavattā cetanā, tassa bhāvo atthitā **dovacassatā**. Atha vā dovacassameva **dovacassatā**. Sā atthato saṅkhārakkhandho hoti. Cetanāpadhāno hi saṅkhārakkhandho. Catunnaṃ vā khandhānaṃ apadakkhiṇaggāhitākārena pavattānaṃ etaṃ adhivacananti vadanti. Pāpā assaddhādayo puggalā etassa mittāti pāpamitto, tassa bhāvo **pāpamittatā**. Sāpi atthato dovacassatā viya datṭhabbā. Yāya hi cetanāya puggalo pāpamitto pāpasampavaṅko nāma hoti, sā cetanā pāpamittatā. Cattāropi vā arūpino khandhā tadākārappavattā pāpamittatā. Dutiyaṃ uttānameva.

Sāmakasuttādivaṇṇanā niṭṭhitā.

3. Bhayasuttavaṇṇanā

23. Tatiye sambhavati jātimaraṇaṃ etenāti **sambhavo**, upādānanti āha “**jātiyā ca maraṇassa ca sambhave paccayabhūte**”ti. **Anupādāti** anupādāya. Tenāha “**anupādiyivā**”ti. Jātimaraṇāni sammā khīyanti etthāti **jātimaraṇasaṅkhayo**, nibbānanti āha “**jātimaraṇānaṃ saṅkhaya saṅkhāte nibbāne**”ti. **Sabbadukkhaṃ upaccagunti** sakalampi vaṭṭadukkhaṃ atikkantā carimacittanirodhena vaṭṭadukkhalessapi asambhavato.

Bhayasuttavaṇṇanā niṭṭhitā.

4. Himavantasuttavaṇṇanā

24. Catutthe **samāpattikusalo hotīti** samāpajjanakusalo hoti. Tenāha “**samāpajjitum kusalo**”ti. Tattha antogatahetu-attho ṭhiti-saddo, tasmā ṭhapanakusaloti atthoti āha “**samādhim ṭhāpetum sakkotīti attho**”ti. Tattha **ṭhāpetum sakkotīti**

sattaṭṭha-accharāmatam khaṇam jhānam ṭhapetum sakkoti adhiṭṭhānavasibhāvassa nipphāditattā. **Yathāparicchedenāti** yathāparicchinnakālena. **Vuṭṭhātum sakkoti** vuṭṭhāna vasibhāvassa nipphāditattā. Kallam sañjātam assāti kallitam, tasmim kallite kallitabhāve kusalo **kallitakusalo**. **Hāsetum** tosetum sampahamsetum. **Kallam kātunti** samādhānassa paṭipakkhadhammānam dūrikaraṇena sahakārikāraṇānañca samappadhānena samāpajjane cittam samattham kātum. **Samādhissa gocarakusaloti** samādhismim nipphādetabbe tassa gocarē kammaṭṭhānasaññite pavattiṭṭhāne bhikkhācāragocare satisampajaññayogato kusalo cheko. Tenāha “**samādhissa asappāye anupakārake dhamme vajjetvā**”ti-ādi. **Paṭhamajjhānādisamādhim abhinīharitunti** paṭhamajjhānādisamādhim visesabhāgiyatāya abhinīharitum upanetum.

Himavantasuttavaṇṇanā niṭṭhitā.

5. Anussatiṭṭhānasuttavaṇṇanā

25. Pañcame **anussatikāraṇānīti** anussatiyo eva diṭṭhadhammikasamparāyikādihitasukhānam hetubhāvato kāraṇāni. **Nikkhantanti** nissaṭam. **Muttanti** vissatṭham. **Vuṭṭhitanti** apetaṃ. Sabbametaṃ vikkhambhanameva sandhāya vadati. **Gedhamhāti** pañcakāmaguṇato. **Idampīti** buddhānussativasena laddham upacārajjhānamāha. **Ārammaṇam karitvāti** paccayam karitvā, pādakam katvāti attho.

Anussatiṭṭhānasuttavaṇṇanā niṭṭhitā.

6. Mahākaccānasuttavaṇṇanā

26. Chaṭṭhe **sambādheti** vā taṇhāsamkilesādīnam sampīle saṅkare gharāvāse. **Okāsā vuccantīti** maggaphalasukhādhigamāya okāsabhāvato okāsāti vuccanti. **Okāsādhigamoti** lokuttaradhammassa adhigamāya adhigantabba-okāso. **Visujjhanatthāyāti** rāgādīhi malehi

abhijjhāvisamalobhādīhi ca upakkiliṭṭhacittānaṃ visuddhatthāya. Sā panāyaṃ cittassa visuddhi sijjhamānā yasmā sokādīnaṃ anupādāya saṃvattati, tasmā vuttam “**sokaparidevānaṃ samatikkamāyā**”ti-ādi. Tattha socanaṃ ñātibyasanādinimittam cetaso santāpo antotāpo antonijjhānaṃ **soko**, ñātibyasanādinimittameva socikatā. “Kham ekaputtakā”ti-ādina¹ paridevanavasena lapanam **paridevo**. **Samatikkamanatthāyāti** pahānāya. Āyatiṃ anuppajjanaṃ hi idha samatikkamo. **Dukkhadomanassānaṃ atthaṅgamāyāti** kāyikadukkhassa ca cetasikadomanassassa cāti imesaṃ dvinnam atthaṅgamāya, nirodhāyāti attho. Nāyati nicchayena kamati nibbānaṃ, tam vā nāyati paṭivijjhati etenāti **ñāyo**, ariyamaggo. Idha pana saha pubbhāgena ariyamaggo gahitoti āha “**sahavipassanakassa maggassa adhigamanatthāyā**”ti. **Apaccayaparinibbānassāti** anupādisesanibbānaṃ sandhāya vadati. Paccayavasena anuppannaṃ asaṅkhataṃ amatadhātumeva. Sesamettha uttānameva.

Mahākaccānasuttavaṇṇanā niṭṭhitā.

7. Paṭhamasamayasuttavaṇṇanā

27. Sattame **vaḍḍhetī**ti manaso vivaṭṭanissitam vaḍḍhiṃ āvahati. **Manobhāvanīyoti** vā manasā bhāvito sambhāvito. Yañca āvajjato manasi karoto cittaṃ vinīvaraṇaṃ hoti. Imasmiṃ pakkhe kammaśādhano sambhāvanattho bhāvanīya-saddo. “**Thinamiddhavinodanakammaṭṭhānan**”ti vatvā tadeva vibhāvento “**ālokasaññaṃ vā**”ti-ādimāha. **Vīriyārambhavatthu-ādīnaṃ vāti** ettha **ādi**-saddena idha avuttānaṃ atibhojane nimittaggāhādīnaṃ saṅgaho daṭṭhabbo. Vuttam hetam “cha dhammā thinamiddhassa pahānāya saṃvattanti atibhojane nimittaggāho, iriyāpathasamparivattanatā, ālokasaññāmanasikāro, abbhokāsavāso, kalyāṇamittatā, sappāyakathā”ti². Antarāyasaddapariyāyo idha **antarā**-saddoti āha “**anantarāyena**”ti.

Paṭhamasamayasuttavaṇṇanā niṭṭhitā.

1. Ma 2. 309, 310; Saṃ 1. 323 piṭṭhesu.

2. Itivuttaka-Ṭṭha 341 piṭṭhe.

8. Dutiyasamayasuttavaṇṇanā

28. Aṭṭhame maṇḍalasaṅṭhānamāḷasaṅkhepena katā bhojanasālā maṇḍalamāḷāti adhippetāti āha “**bhojanasālāyā**”ti. Sesamettha suviññeyyameva.

Dutiyasamayasuttavaṇṇanā niṭṭhitā.

9. Udāyīsuttavaṇṇanā

29. Navame diṭṭhadhammo vuccati paccakkho attabhāvoti āha”**imasmirīyeva attabhāve**”ti. **Sukhavihāratthāyāti** nikkilesatāya nirāmisena sukkena vihāratthāya. **Ālokasaññaṃ manasi karotīti** sūriyacandapajjotamaṇi-ukkāvijju-ādīnam āloko divā rattīṇca upaladdho, yathāladdhavaseneva ālokaṃ manasi karoti, citte ṭhapeti. Tathā ca naṃ manasi karoti, yathāssa subhāvitālokakasiṇassa viya kasiṇāloko yathicchakaṃ yāvadicchakaṅca so āloko rattiyāṃ upatiṭṭhati. Yena tatha divāsaññaṃ ṭhapeti, divāriya vigatathinamiddho hoti. Tenāha “**yathā divā tathā rattin**”ti. **Divāti saññaṃ ṭhapetīti** vuttanayena manasi katvā divāriya saññaṃ uppādeti. **Yathānena divā -pa- tatheva taṃ manasi karotīti** yathānena divā upaladdho sūriyāloko, evaṃ rattimpi divā diṭṭhākāreṇeva taṃ ālokaṃ manasi karoti. **Yathā canena rattim -pa- manasi karotīti** yathā rattiyāṃ candāloko¹ upaladdho, evaṃ divāpi rattim diṭṭhākāreṇeva taṃ ālokaṃ manasi karoti, citte ṭhapeti. **Vivaṭenāti** thinamiddhena apihitattā vivaṭena. **Anonaddhenāti** asaṅchādītēna. **Sahobhāsakanti** saññāṇobhāsaṃ. Dibbacakkhuññaṃ rūpagatassa dibbassa itarassa ca dassanaṭṭhena idha ñāṇadassananti adhippetanti āha “**dibbacakkhusaṅkhātassā**”ti-ādi.

Uddham jīvitapariyādānāti jīvitakkhayato upari maraṇato paraṃ. **Samuggatenāti** uṭṭhitena. **Dhumātattāti** uddham uddham dhumātattā

1. Candālokādi-āloko (Ka)

sūnattā. Setarattehi viparibhinnaṃ vimissitaṃ nīlaṃ,
 purimavaṇṇavipariṇāmaabhūtaṃ vā nīlaṃ vinīlaṃ, vinīlameva **vinīlakanti** ka-
 kārena padavaḍḍhanamāha anattantarato yathā “pītakaṃ lohitakan”ti.
Paṭikūlattāti jigucchaniyattā. Kucchitaṃ vinīlaṃ **vinīlakanti** kucchanattho vā
 ayaṃ ka-kāroti dassetuṃ vuttaṃ yathā “pāpako kittisaddo
 abbhuggacchatī”ti¹. **Paribhinnaṭṭhānehi** kākadhaṅkādihi. **Vissandaṃānaṃ**
pubbanti vissavanta pubbam, taṃ taṃ paggharantapubbanti attho.
Tathābhāvanti vissandaṃānapubbataṃ.

So bhikkhūti yo “passeyya sarīraṃ sīvathikāya chaḍḍhitan”ti vutto, so
 bhikkhu. **Upasaṃharati** sadisataṃ. **Ayampi khoti-**ādi
 upasaṃharaṇākāradassanaṃ. **Āyūti** rūpajīvitindriyaṃ. Arūpajīvitindriyaṃ
 panettha viññāṇagatikameva. **Usmāti** kammajatejo. **Evampūtikasabhāvoti**
 evaṃ ativiya pūtisabhāvo āyu-ādivigame viyāti adhippāyo. Ediso
 bhavissatīti evambhāvīti āha “**evamevaṃ uddhumātādibhedo bhavissatī**”ti.

Luñcitvā luñcitvāti uppāṭetvā uppāṭetvā. **Sesāvasesamaṃsalohitayuttanti**
 sabbaso akkhāditattā taṃ taṃ sesena appāvasesena maṃsalohitena
 yuttam. **Aññena hatthaṭṭhikanti** avisesena hatthaṭṭhikānaṃ vippakiṇṇatā
 jotitāti anavasesato tesam vippakiṇṇataṃ dassento “**catusaṭṭhibhedampī**”ti-
 ādimāha. **Terovassikānīti** tirovassagatāni. Tāni pana saṃvaccharaṃ
 vītivattāni hontīti āha “**atikkantaṃvaccharānī**”ti. Purāṇatāya
 ghanabhāvavigameṇa vicuṇṇatā idha pūtibhāvo. So yathā hoti, taṃ dassento
 “**abbhokāse**”ti-ādimāha. **Anekadhātūnanti** cakkhudhātu-ādīnaṃ, kāmadhātu-
 ādīnaṃ vā. **Satiyā ca ñāṇassa ca atthāyāti** “abhikkante paṭikkante
 sampajānakārī hotī”ti-ādīna² vuttāya sattaṭṭhānikāya satiyā ceva
 taṃsampayuttañāṇassa ca atthāya.

Udāyīsuttavaṇṇanā niṭṭhitā.

1. Dī 3. 196; Am 2. 221 piṭṭhesu.

2. Dī 1. 67; Dī 2. 233; Ma 1. 72 piṭṭhesu.

10. Anuttariyasuttavaṇṇanā

30. Dasame **nihīnanti** lāmakam, kiliṭṭham vā. **Gāmvāsikānanti** bālānam. Puthujjanānam idanti **pothujjanikam**. Tenāha “**puthujjanānam santakan**”ti, puthujjanehi sevitabbattā tesam santakanti vuttam hoti. **Anariyanti** na niddosam. Niddosaṭṭho hi ariyaṭṭho. Tenāha “**na uttamam na parisuddhan**”ti. Ariyehi vā na sevitabbanti **anariyam**. **Anatthasamhitanti** diṭṭhadhammikasamparāyikādivividhaviṭṭhānatthasahitam. Tādisañca atthasannissitam na hotīti āha “**na atthasannissitan**”ti. **Na vaṭṭe nibbindanattahāyāti** catusaccakammaṭṭhānābhāvato. Asati pana vaṭṭe nibbidāya virāgādīnam asambhavoyevāti āha “**na virāgāyā**”ti-ādi.

Anuttamam **anuttariyanti** āha “**etam anuttaran**”ti. **Hatthisminti** nimittatthe bhumanti āha “**hatthinimittam sikkhitabban**”ti. Hatthivisayattā hatthisannissitattā ca hatthisippam “hatthī”ti gahetvā “hatthisimipi sikkhatī”ti vuttam, tasmā hatthisippe sikkhatīti evamettha attho daṭṭhabbo. Sesapadesupi eseva nayo.

Liṅgabyattayena vibhattibyattayena **pāricariyeti** vuttanti āha “**pāricariyāya paccupaṭṭhitā**”ti. Sesamettha suviññeyyameva.

Anuttariyasuttavaṇṇanā niṭṭhitā.

Anuttariyavaggavaṇṇanā niṭṭhitā.

4. Devatāvagga

1. Sekhasuttādivaṇṇanā

31-34. Catutthassa paṭhame sekhānam paṭiladdhaguṇassa parihāni nāma natthīti āha “**uparūpariguṇaparihānāyā**”ti, uparūpariladdhabbānam maggaphalānam parihānāya anuppādāyāti attho. Tatiyādīni uttānatthāneva.

Sekhasuttādivaṇṇanā niṭṭhitā.

5. Vijjābhāgiyasuttavaṇṇanā

35. Pañcame sampayogavasena vijjam bhajanti, saha-jāta-aññamaññanissayasampayutta-atthi-avigatādipaccayavasena tāya saha ekībhāvaṃ gacchantīti **vijjābhāgiyā**. Atha vā vijjābhāge vijjakoṭṭhāse vattanti vijjāsabhāgatāya tadekadese vijjakoṭṭhāse pavattantīti **vijjā bhāgiyā**. Tattha vipassanāñāṇaṃ, manomayiddhi, cha abhiññāti aṭṭha vijjā. Purimena atthana tāhi sampayuttadhammā vijjābhāgiyā. Pacchimena atthena tāsu yā kāci ekāva vijjā vijjā, sesā vijjābhāgiyā, evaṃ vijjāpi vijjāya sampayuttadhammāpi “vijjābhāgiyā”tveva veditabbā. Idha pana vipassanāñāṇasampayuttā saññāva vijjābhāgiyāti āgatā, saññāsīsena sesasampayuttadhammāpi vuttā evāti daṭṭhabbāṃ. **Aniccānupassanāñāṇeti** aniccānupassanāñāṇe nissayapaccayabhūte uppannasaññā, tena saha-gatāti attho. Sesesupi eseva nayo.

Vijjābhāgiyasuttavaṇṇanā niṭṭhitā.

6. Vivādamūlasuttavaṇṇanā

36. Chaṭṭhe **kodhanoti** kujjhanasīlo. Yasmā so appahīnakodhatāya adhigatakodho nāma hoti, tasmā “**kodhena samannāgato**”ti-āha. Upanāho etassa atthīti **upanāhī**, upanayhanasīloti vā **upanāhī**. Vivādo nāma uppajjamāno yebhuyyena paṭhamāṃ dvinnāṃ vasena uppajjatīti vuttāṃ “**dvinnāṃ bhikkhūnaṃ vivādo**”ti. So pana yathā bahūnaṃ anattābhāvo hoti, taṃ nidassanamukhena nidassento “**kathan**”ti-ādimāha. **Abbhantaraparisāyāti** parisabbhantare.

Guṇamakkhanāya pavattopi attano kāraṇaṃ gūthena paharantīṃ gūtho viya paṭhamataraṃ makkhetīti makkho, so etassa atthīti **makkhī**. Paḷāsātīti paḷāso, parassa guṇe ḍamsitvā viya apanetīti attho. So etassa atthīti **paḷāsī**. Paḷāsī puggalo hi dutiyassa dhuraṃ na deti, samaṃ haritvā ativadati. Tenāha “**yugaggāhalakkhaṇena paḷāsena sapannāgato**”ti. Issatīti **issukī**. Maccharāyatīti maccharaṃ, taṃ etassa

atthīti **maccharī**. Saṭhayati na sammā bhāsatīti **saṭho** aññathā santam attānam aññathā pavedanato. Māyā etassa atthī **māyāvī**. Micchā pāpikā viññugarahitā etassa diṭṭhīti **micchādiṭṭhi**, kammaopathapariyāpannāya “natthi dinnan”ti-ādivatthukāya micchattapariyāpannāya aniyyānikāya diṭṭhiyā samannāgatoti attho. Tenāha “**natthikavādi**”ti-ādi.

Sam attano diṭṭhim, sayam vā attanā yathāgahitam parāmasati, sabhāvaṃ atikkamitvā parato āmasatīti **sandiṭṭhiparāmāsī**. Ādhānam daḥham gaṇhātīti **ādhānaggāhī**, daḥhaggāhī, “idameva saccan”ti thiraggāhīti attho. Yuttam kāraṇam disvāva laddhim paṭinissajjātīti paṭinissaggī, dukkhena kicchena kasirena bahumpi kāraṇam dassetvā na sakkā paṭinissaggaṃ kātunti **duppaṭinissaggī**. Yo attano uppannadiṭṭhim “idameva saccan”ti daḥham gaṇhitvā api buddhādīhi kāraṇam dassetvā vuccamāno na paṭinissajjati, tassetam adhivacanam. Tādiso hi puggalo yaṃ yadeva dhammam vā adhammam vā suṇāti, tam sabbam “evam amhākaṃ ācariyehi kathitam, evam amhehi sutan”ti kummova aṅgāni sake kapāle antoyeva samodahati. Yathā hi kacchapo attano hatthapādādike aṅge kenaci ghaṭite sabbāni aṅgāni attano kapāleyeva samodahati, na bahi nīharati, evamayampi “na sundaro tava gāho, chaḍḍehi nan”ti vutto tam na vissajjati, antoyeva attano hadaye eva ṭhapetvā vicarati, kumbhīlaggāham gaṇhāti. Yathā susumārā gahitam na paṭinissajjanti, evam gaṇhāti.

Vivādamūlasuttavaṇṇanā niṭṭhitā.

7. Chaḷaṅgadānasuttavaṇṇanā

37. Sattame dakkhanti vaḍḍhanti etāyāti **dakkhinā**, pariccāgamayaṃ puññam, tassūpakaraṇabhūto deyyadhammo ca. Idha pana deyyadhammo adhippeto. Tenevāha “**dakkhinam patitṭhāpeti**”ti. Ito **utṭhitenāti** ito khettato uppanna. Rāgo vinayati etenāti **rāgavinayo**, rāgassa samucchedikā paṭipadā. Tenāha “**rāgavinayapaṭipadam paṭipannā**”ti.

“Pubbeva dānā sumano”ti-ādigāthāya pubbeva dānā muñcacetanāya pubbe dānūpakaraṇasambharaṇato paṭṭhāya sumano “sampattīnam nidānam

anugāmikadānaṃ dassāmī”ti somanassito bhaveyya. **Dadaṃ cittaṃ pasādayeti** dadanto deyyadhammaṃ dakkhiṇeyyahatthe paṭiṭṭhāpento “asārato dhanato sārādānaṃ karomī”ti attano cittaṃ pasādeyya. **Datvā attamano hotīti** dakkhiṇeyyānaṃ deyyadhammaṃ pariccajivā “paṇḍitapaññattaṃ nāma mayā anuṭṭhitaṃ, aho sādhu suṭṭhū”ti attamano pamudito pītisomanassajāto hoti. **Esāti yā** ayaṃ pubbacetanā muñcacetanā aparacetanāti imāsaṃ kammaphalānaṃ saddhānugataṇaṃ somanassapariggahitānaṃ tividhānaṃ cetaṇānaṃ pāripūrī, esā.

Sīlasaññamenāti kāyikavācasikasamvarena. **Hatthapādeti** dakkhiṇeyyānaṃ hatthapāde. **Mukhaṃ vikkhāletvāti** tesamyeva mukhaṃ vikkhāletvā, attanāva mukhodakaṃ datvāti adhippāyo.

Chaḷaṅgadānasuttavaṇṇanā niṭṭhitā.

8. Attakārīsuttādivaṇṇanā

38-41. Aṭṭhame kusalakiriyāya ādi-ārambhābhāvena pavattavīriyaṃ ṭhitasabhāvatāya sabhāvadhāraṇaṭṭhena dhātūti vuttanti āha “**ārambhadhātūti ārabhanavasena pavattavīriyaṃ**”ti. Laddhāsevanaṃ vīriyaṃ balappattaṃ hutvā paṭipakkhe vidhamatīti āha “**nikkamadhātūti kosajjato nikkhamanasabhāvaṃ vīriyaṃ**”ti. **Parakkamanasabhāvoti** adhimattatarānaṃ paṭipakkhadhammānaṃ vidhamanasamatthatāya paṭupaṭutarabhāvena paraṃ paraṃ¹ ṭhānaṃ akkamanasabhāvo. Navamādīsu natthi vattabbaṃ.

Attakārīsuttādivaṇṇanā niṭṭhitā.

12. Nāgitasuttavaṇṇanā

42. Dvādasame **māhaṃ nāgita yasena samāgamanti** mā ahaṃ yasena samāgamaṇaṃ patthemī. **Mā ca mayā yasoti** yaso ca mayā mā

1. Paṭupaṭutarāti paraṃ paraṃ (Ka)

samāgacchatūti attho. Iminā attano lābhasakkārena anattikataṃ vibhāveti. **Pañcahi vimuttīhīti** tadaṅgavimutti-ādīhi pañcahi vimuttīhi. Sesamettha uttānameva.

Nāgitasuttavaṇṇanā niṭṭhitā.

Devatāvaggavaṇṇanā niṭṭhitā.

5. Dhammikavagga

1. Nāgasuttavaṇṇanā

43. Pañcamassa paṭhame **parisiñcītuntī**¹ yo cuṇṇamattikādīhi gattāni ubbaṭṭento mallakamuṭṭhādīhi vā ghaṃsanto nahāyati, so “nahāyati”ti vuccati. Yo tathā akatvā pakatīyāva nahāyati, so “parisiñcatī”ti vuccati. Bhagavato ca sarīre tathā haritabbaṃ rajojallaṃ nāma nupalimpati acchachavibhāvato, utuggahaṇattham pana bhagavā kevalaṃ uduke otarati. Tenāha “**gattāni parisiñcītun**”ti.

Pubbakoṭṭhakoti pācīnakoṭṭhako. Sāvattīyaṃ kira jetavanavihāro kadāci mahā, kadāci khuddako. Tathā hi so vipassissa bhagavato kāle yojaniko ahoṣi, sikhissa tigāvuto, vessabhussa aḍḍhajojaniko, kakusandhassa gāvutappamāṇo, koṇāgamanassa aḍḍhagāvutappamāṇo, kassapassa vīsati-usabhappamāṇo, amhākaṃ bhagavato kāle aṭṭhakarīsappamāṇo jāto. Tampi nagaraṃ tassa vihārassa kadāci pācīnato hoti, kadāci dakkhiṇato, kadāci pacchimoto, kadāci uttarato. Jetavanagandhakuṭṭīyaṃ pana catunnaṃ mañcapādānaṃ patiṭṭhitaṭṭhānaṃ acalameva. Cattāri hi acalacetiyatṭhānāni nāma mahābodhipallaṅkatṭhānaṃ, isipatane dhammacakkappavattanatṭhānaṃ, saṅkassanagare devorohanakāle sopānassa patiṭṭhānatṭhānaṃ, mañcapādatṭhānanti. Ayaṃ pana pubbakoṭṭhako kassapadasabalassa vīsati-usabhavihārakāle pācīnadvārakoṭṭhako ahoṣi, so idāni “pubbakoṭṭhako”tveva paññāyati.

1. Ma-Ṭṭha 2. 71 piṭṭhādīsūpi passitabbaṃ.

Kassapadasabalassa kāle aciravatī nagaram parikkhipitvā sandamānā pubbakoṭṭhakaṃ patvā udakena bhinditvā mahantaṃ udakarahadaṃ māpesi samatittikaṃ anupubbagambhīraṃ. Tattha ekaṃ rañño nhānatitthaṃ, ekaṃ nāgarānaṃ, ekaṃ bhikkhu saṃghassa, ekaṃ buddhānanti evaṃ pāṭi-ekkāni nhānatitthāni honti ramaṇīyāvikiṇṇarajatapaṭṭasadisavālukāni. Iti bhagavatā āyasmatā ānandena saddhiṃ yena ayaṃ evarūpo pubbakoṭṭhako, tenupasaṅkami gattāni parisiñcituṃ. Athāyasmā ānando udakasāṭikaṃ upanāmesi. Bhagavā surattadupaṭṭaṃ apanetvā udakasāṭikaṃ nivāsesi. Thero dupaṭṭena saddhiṃ mahācīvaram attano hatthagataṃ akāsi. Bhagavā udakaṃ otari, sahotaraṇenevassa udake macchakacchapā sabbe suvaṇṇavaṇṇā ahesuṃ, yantanāḷikāhi suvaṇṇarasadhārāni siñcanakālo viya suvaṇṇapaṭappasāraṇakālo viya ca ahoṣi. Atha bhagavato nahānavattaṃ dassetvā paccuttiṇṇassa thero surattadupaṭṭaṃ upanāmesi. Bhagavā taṃ nivāsetvā vijjullatāsadisāṃ kāyabandhanaṃ bandhitvā mahācīvaram antantena saṃharitvā padumagabbhasadisāṃ katvā upanītaṃ dvīsu kaṇṇesu gahetvā aṭṭhāsi. Tena vuttaṃ “**pubbakoṭṭhake gattāni parisiñcivā ekacīvaro aṭṭhāsi**”ti.

Evaṃ ṭhitassa pana bhagavato sarīraṃ vikasitapadumapupphasadisāṃ sabbapāliphullaṃ pāricchattaṃ, tārāmarīcivikasitañca gaganatalaṃ siriya avahasamānaṃ viya virocittha, byāmapabhāparikkhepavilāsiniṃ cassa dvattimsavaralakkhaṇamālā ganthitvā ṭhapitā dvattimsa candimā viya, dvattimsa sūriyā viya, paṭipāṭiyā ṭhapitadvattimsacakkavattidvattimsadevarājadvattimsamahābrahmāno viya ca ativiya virocittha. Yasmā ca bhagavato sarīraṃ sudhantacāmīkarasamānavaṇṇaṃ suparisodhitapavālaruciroraṇaṃ suvisuddhanīlaratanāvalisadisakesatanuruhaṃ, tasmā taṃ taṃ viniggatasujātajātihiṅgulakarasūpasobhitaṃ upari satamegharatanāvalisucchāditaṃ jaṅgamamiva kanakagirisikharaṃ virocittha. Tasmim ca samaye dasabalassa sarīrato nikkhamitvā chabbaṇarasmiyo samantato asītihatthappamāṇe padese ādhāvanti vidhāvanti ratanāvaliratanadāmaratanacuṇṇavippakiṇṇaṃ viya pasāritaratanacittakañcanaṇapaṭṭamiva āsiñcamānalākhārasadhārācittamiva ukkāsataniṇṇapātasamākulamiva nirantaravippakiṇṇakaṇikāraṇiṅkiṇikapupphamiva

vāyuvegasamuddhatacinapiṭṭhacunṇarañjitamiva indadhanuvijjullatāvitānasantha tamiva ca gaganatalaṃ, taṃ ṭhānaṃ pavanañca sammā pharanti. Vaṇṇabhūmi nāmesā, evarūpesu ṭhānesu buddhānaṃ sarīravaṇṇaṃ vā guṇavaṇṇaṃ vā cunṇiyapadehi vā gāthāhi vā atthañca upamāyo ca kāraṇāni ca āharitvā paṭibalena dhammakathikena pūretvā kathetum vaṭṭati. Evarūpesu hi ṭhānesu dhammakathikassa thāmo veditabbo. **Pubbasadisāni kurumānoti** nirudakāni kurumāno, sukkhāpayamānoti attho. Sodake gatte cīvaraṃ pārupantassa hi cīvare kaṇṇikāni utṭhahanti, parikkhārabhaṇḍaṃ dussati, buddhānaṃ pana sarīre rajojallaṃ na upalimpati, padumapatte ukkhitta-udakabindu viya udakaṃ vinivaṭṭetvā gacchati. Evaṃ santepi sikkhāgāravatāya bhagavā “pabbajitavattaṃ nāmetan”¹ti mahācīvaraṃ ubhosu kaṇṇesu gahetvā purato kāyaṃ paṭicchādetvā aṭṭhāsi.

Tāḷitañca vāditañca tāḷitavāditaṃ, tūriyānaṃ tāḷitavāditaṃ tūriyatāḷihavāditaṃ, mahantañca taṃ tūriyatāḷitavāditañcāti **mahātūriyatāḷitavāditaṃ**. Tenāha “**mahantenā**”¹ti-ādi. Atha vā bherimudīṅgapaṇavādītūriyānaṃ tāḷitaṃ vīṇaveḷugomukhi-ādīnaṃ vāditañca **tūriyatāḷitavāditaṃ**ti vā evamettha attho daṭṭhabbo.

Abhiññāpāraṃ gatoti **abhiññāpāragū**. Evaṃ sesesupi. So hi bhagavā sabbadhamme abhijānanto gatoti **abhiññāpāragū**. Tesu pañcupādānakkhandhe pari jānanto gatoti **pariññāpāragū**. Sabbakilese pajahanto gatoti **pahānapāragū**. Cattāro magge bhāvento gatoti **bhāvanāpāragū**. Nirodhaṃ sacchikaronto gatoti **sacchikiriyāpāragū**. Sabbasamāpattim samāpajjanto gatoti **samāpattipāragū**. **Subrahmadevaputtādayoti** ettha so kira devaputto accharāsaṅghaparivuto nandanakīḷitaṃ katvā pāricchattakamūle paññattāsane nisīdi. Taṃ pañcasatā parivāretvā nisinnā, pañcasatā rukkhaṃ abhiruhitvā madhurassarena gāyitvā pupphāni pātentī. Tāni gahetvā itarā ekatovaṇṭikamālāva¹ ganthenti. Atha rukkhaṃ abhiruḷhā upacchedakavasena ekappahāreneva kālaṃ katvā avīcimhi nibbattā mahādukkhaṃ anubhavanti. Atha kāle gacchante devaputto “imāsaṃ neva saddo

1. Ekatovaṇṭikamālāvasena (Ka)

suyyati, na pupphāni pāṭenti, kahaṃ nu kho gatā”ti āvajjento niraye nibbattabhāvaṃ disvā piyavatthukasokena ruppamāno cintesi “etā tāva yathākammaṃ gatā, mayhaṃ āyusaṅkhāro kittako”ti. So “sattame divase mayāpi avasesāhi pañcasatāhi saddhim kālaṃ katvā tattheva nibbattitabban”ti disvā balavatarena sokena samappito “imaṃ mayhaṃ sokam sadevake loke aññatra tathāgatā nibbāpetum samattho natthi”ti cintetvā satthu santikaṃ gantvā vanditvā ekamantaṃ ṭhito—

“Niccaṃ utrastamidaṃ cittaṃ, niccaṃ ubbiggamidaṃ mano.
Anuppannesu kicchesu¹, atho uppatitesu ca.
Sace atthi anutrastaṃ, taṃ me akkhāhi pucchito”ti²—

imaṃ gāthamabhāsi. Bhagavāpissa—

“Nāññatra bojjhā tapasā, nāññatrindriyasamvarā.
Nāññatra sabbanissaggā, sotthim passāmi paṇinan”ti²—

dhammaṃ desesi. So desanāpariyosāne vigatasoko pañcahi accharāsatehi saddhim sotāpattiṭṭhāya bhagavantaṃ namassamāno aṭṭhāsi. Taṃ sandhāyetaṃ vuttaṃ “**dukkhappattā subrahmadevaputtādayo**”ti. **Ādi-**saddena candasūriyadevaputtādayo saṅgaṇhāti. **Catūhi kāraṇehīti** ārakattā, arīnaṃ arānañca hatattā, paccayādīnaṃ arahattā, pāpakaraṇe rahābhāvāti imehi catūhi kāraṇehi.

Dasavidhasamyojanānīti orambhāgiyuddhambhāgiyabhedato dasavidhasamyojanāni. **Sabbe accarucīti** sabbasatte atikkamitvā pavattaruci. **Aṭṭhamakanti** sotāpattimaggaṭṭhaṃ sandhāya vadati. **Sotāpannoti** phalaṭṭho gahito.

Soraccanti “tattha katamaṃ soraccaṃ? Yo kāyiko avītikkamo vācasiko avītikkamo kāyikavācasiko avītikkamo, idaṃ vuccati soraccaṃ, sabbopi sīlasamvaro soraccan”ti³ vacanato sucisīlam “soraccan”ti vuttaṃ. **Karuṇāti** karuṇābrahmavihāramāha. **Karuṇāpubbabhāgoti** tassa pubbabhāgaṃ upacārajjhānaṃ vadati.

1. Kiccesu (Ka)

2. Saṃ 1. 52 piṭṭhe.

3. Abhi 1. 260 piṭṭhe.

Duvidhena jhānenāti ārammaṇūpaniḥhānalakkhaṇūpaniḥhānabhedato duvidhena jhānāmanena. **Pañcavidhamicchājīvavasenā**ti kuhanālapanānemittikatānippesikatālābhena lābhamaññijigīsanatāsāṅkhātapañca vidhamicchājīvavasena. **Na lippatī**ti na allīyati anusayato ārammaṇakaraṇato vā taṇhādīṭṭhi-abhinivesābhāvato. Sesamettha uttānameva.

Nāgasuttavaṇṇanā niṭṭhitā.

2. Migasālāsuttavaṇṇanā

44. Dutiye **samasamagatiyā**ti ka-kārassa ya-kāravasena niddesoti āha “**samabhāveneva samagatikā**”ti. **Bhavissantī**ti atītatthe anāgatavacanamaññi katanti āha “**bhavissantī jātā**”ti. Purāṇassa hi isidattassa ca samagatikamaññi sandhāya sā evamāha.

Ammakāti mātugāmo. Upacāravacanamaññi hetamaññi, itthīsu yadidaññi ammakā mātugāmo janamaññi janikāti. Tenāha “**itthī hutvā itthisaṅgāya eva samannāgatā**”ti.

Ditṭhiyā paṭivijjhitabbaññi appaṭividdhaññi hotīti atthato kāraṇato ca paṇṇāya paṭivijjhitabbaññi appaṭividdhaññi hoti, niḥḥaṇṇamaññi niggumbaññi katvā yāthāvato aviditaññi hoti. Samaye samaye kilesehi vimuccanaññi pītipāmojjaññi idha **sāmāyikaññi** ma-kāre a-kārassa dīghamaññi katvā. Tenāha “**sāmāyikampi vimuttiññi na labhatī kālānukālaññi dhammassavanaññi nissāya pītipāmojjaññi na labhatī**”ti. **Pamaññantī**ti ettha ārambhattho pa-saddoti āha “**tuletumaññi ārabhantī**”ti. **Paṇī**toti visiṭṭho.

Tadantaranti vacanavipallāseṇa upayogathe sāmivacanamaññi katanti āha “**taññi antaraññi taññi kāraṇa**”ti. Lobhassa aparāparuppattiyā bahuvacanaññi sēna “**lobhadhammā**”ti vuttā. **Sīlena vīsē**ti ahoṣi methunadhammaviratīyā samannāgatattā.

Migasālāsuttavaṇṇanā niṭṭhitā.

3. Inasuttādivaṇṇanā

45-48. Tatiye daliddo nāma duggato, tassa bhāvo **dāliddiyam**. Na etassa sakaṃ sāpateyyanti **assako**, asāpateyyo. Tenāha “**attano santakena rahito**”ti. “Buddho dhammo saṅgho”ti vutte “sammāsambuddho bhagavā, svākkhāto dhammo, suppaṭipanno saṅgho”ti kenaci akampiyabhāvena okappanaṃ ratanattayagūṇe ogāhetvā kappanaṃ **okappanasaddhā** nāma. “Idaṃ akusalaṃ kammaṃ no sakaṃ, idaṃ pana kammaṃ sakan”ti evaṃ byatirekato anvayato ca kammassakatajānanapaññā **kammassakatapaññā**. Tividhaṃ hi duccharitaṃ attanā katampi sakakammaṃ nāma na hoti atthabhañjanato. Sucaritaṃ sakakammaṃ nāma atthajananato. **Inādānasminti** paccattavacanatthe etaṃ bhummanti āha “**iṇaggahaṇaṃ vadāmi**”ti.

Kaṭaggāhoti kataṃ sabbaso siddhameva katvā gahaṇaṃ. So pana vijayalābho hotīti āha “**jayaggāho**”ti. Hirimano etassāti **hirimanoti** āha “**hirisampayuttacitto**”ti, pāpajigucchana lakkhaṇāya hiriyā sampayuttacittoti attho. Ottappatti ubbijjati bhāyati sīlenāti **ottappī**, ottappena samannāgato. **Nirāmisam** sukhanti tatiyajjhānasukhaṃ dūrasamussāritakāmāmisattā. **Upekkhanti** catutthajjhānupekkhaṃ, na yaṃ kiñci upekkhavedananti āha “**catutthajjhānupekkhan**”ti. **Āraddhavīriyoti** paggahitaparipuṇṇakāyikacetasikavīriyoti attho. Yo gaṇasaṅgaṇikaṃ vinodetvā catūsu iriyāpathesu aṭṭha-ārambhavatthuvaseṇa ekako hoti, tassa kāyikaṃ vīriyaṃ āraddhaṃ nāma hoti. Cittasaṅgaṇikaṃ vinodetvā aṭṭhasamāpattivasena ekako hoti, gamane uppannakilesassa ṭhānaṃ pāpuṇitum na deti, ṭhāne uppannakilesassa nisajjaṃ nisajjāya uppannakilesassa sayanaṃ pāpuṇitum na deti, uppannaṭṭhāneyeva kilese niggaṇhāti, ayaṃ cetasikaṃ vīriyaṃ āraddhaṃ nāma hoti. Paṭipakkhadūrībhāvena seṭṭhatṭhena ca eko udetīti ekodi, ekaggatā. Tassa yogato ekaggacitto idha **ekodi**. Paṭipakkhato attānaṃ nipāti, taṃ vā nipayati visosetīti **nipako**. Aññataraṃ kāyādibhedam ārammaṇaṃ sātisaṃyāya satiyā saratīti **sato**. Tenāha “**ekaggacitto**”ti-ādi.

Akuppā me vimuttīti mayhaṃ arahattaphalavimutti akuppatāya akuppārammaṇatāya ca akuppā. Sā hi rāgādīhi na kuppātīti akuppatāyapi

akuppā. Akuppaṃ nibbānamassā ārammaṇanti akuppārammaṇatāyapi akuppā. Tenevāha “**akuppārammaṇattā**”ti-ādi. **Bhavasamyojanānanti** kāmarāgapatiḥhamānadiṭṭhivicikicchāsīlabbataparāmāsabhavarāga-issāmacchariya- avijjāsāṅkhātānaṃ dasannaṃ samyojanānaṃ. Imāni hi satte bhavesu samyojenti upanibandhanti bhavābhavena samyojenti, tasmā bhavasamyojanānīti vuccanti. **Khīṇāsavo uttama-aṇaṇo** kilesa-iṇānaṃ abhāvato. Aññe hi sattā yāva na kilesā pahīyanti, tāva sa-iṇā nāma aserivihārabhāvato. Catutthādīni uttānatthāni.

Iṇasuttādivaṇṇanā niṭṭhitā.

7. Khemasuttavaṇṇanā

49. Sattame **vuttabrahmacariyavāso**ti nivutthabrahmacariyavāso. **Katakaraṇīyoti** ettha **karaṇīyanti** pariññāpahānabhāvanāsacchi kiriyamāha. Tam pana yasmā catūhi maggehi paccekaṃ catūsu saccesu kattabbattā soḷasavidhaṃ veditabbaṃ. Tenāha “**catūhi maggehi kattabban**”ti. Khandhakilesa-abhisāṅkhārasāṅkhātā tayo osīdāpanaṭṭhena bhārā viyāti bhārā, te ohitā oropitā nikkhittā pātītā etenāti **ohitabhāro**. Tenāha “**khandhabhāraṃ -pa- otāretvā ṭhito**”ti. Anuppatto sadatthanti **anuppattasadattho**. **Sadatthoti** ca sakatthamāha ka-kārassa da-kāraṃ katvā. Ettha hi arahattaṃ attano yonisomanasikārāyattattā attūpanibandhaṭṭhena sasantānapariyāpanattā attānaṃ avijahanaṭṭhena attano uttamattena ca attano atthattā “sakattho”ti vuccati. Tenāha “**sadattho vuccati arahattan**”ti. **Sammadaññā vimuttoti** sammā aññāya vimutto, acchinnabhūtāya maggapaññāya sammā yathābhūtaṃ dukkhādīsu yo yathā jānitabbo, tathā jānitvā vimuttoti attho. Tenāha “**sammā hetunā**”ti-ādi. **Vimuttoti** ca dve vimuttiyo sabbassa cittasaṃkilesassa maggo nibbānādhimutti ca. Nibbāne adhimuccanaṃ tatha ninnapoṇapabbhāratāya. Arahā sabbakilesehi vimuttacittattā cittavimuttiyā vimutto, nibbānaṃ adhimuttattā nibbāne vimutto. Sesamettha uttānameva.

Khemasuttavaṇṇanā niṭṭhitā.

8. Indriyaśaṃvarasuttavaṇṇanā

50. Aṭṭhame upanisīdati phalaṃ etthāti kāraṇaṃ **upanisā**. **Yathā bhūtañāṇadassananti** yathāsabhāvajānanasaṅkhātāṃ dassanaṃ. Etena taruṇa vipassanaṃ dasseti. Taruṇavipassanā hi balavavipassanāya paccayo hoti. **Taruṇavipassanā**ti nāmarūpapariggahe ñāṇaṃ paccayapariggahe ñāṇaṃ sammasane ñāṇaṃ maggāmagge vavatthapetvā ṭhitañāṇanti catunnaṃ ñāṇānaṃ adhivacanaṃ. Nibbindati etāyāti **nibbidā**. **Balavavipassanā**ti bhayatupaṭṭhāne ñāṇaṃ ādīnavānupassane ñāṇaṃ muccitukamyatāñāṇaṃ saṅkhārupekkhāñāṇanti catunnaṃ ñāṇānaṃ adhivacanaṃ. Paṭisaṅkhānupassanā pana muccitukamyatāpakkhikā eva. “Yāva maggāmaggañāṇadassanavisuddhi, tāva taruṇavipassanā”ti hi vacanato upakkilesavimutta udayabbayañāṇato balavavipassanā. Virajjati ariyo saṅkhārato etenāti **virāgo**, ariyamaggo. **Arahattaphalanti** ukkaṭṭhaniddesato vuttaṃ. Indriyaśaṃvarassa sīlarakkhaṇahetuttā vuttaṃ “**sīlānurakkhaṇa-indriyaśaṃvaro kathito**”ti.

Indriyaśaṃvarasuttavaṇṇanā niṭṭhitā.

9. Ānandasuttavaṇṇanā

51. Navame **therā bhikkhū viharanti bahussutā āgatāgamā**ti-
 ādipāḷipadesu imināva nayena attho daṭṭhabbo—sīlādiguṇānaṃ
 thirabhāvappattiyā **therā**. Suttageyyādi bahu sutāṃ etesanti **bahussutā**.
 Vācuggatadhāraṇena sammadeva garūnaṃ santike āgamitabhāvena āgato
 pariyaṭṭidhammasaṅkhāto āgamo etesanti **āgatāgamā**.
 Suttābhidhammasaṅkhātassa dhammassa dhāraṇena **dhammadharā**.
 Vinayadhāraṇena **vinayadharā**. Tesāmyeva dhammavinayānaṃ mātikāya
 dhāraṇena **mātikādharā**. Tattha tattha dhammaparipucchāya **paripucchati**.
 Taṃ atthaparipucchāya **paripaṇḥati** vīmaṃsati vicāreti. **Idaṃ bhante**
kathaṃ, imassa kvatthoti paripucchanapaṇḥanākāradassanaṃ. **Avivaṭaṇḍeva**
 pāḷiyā atthaṃ padesantarapāḷidassanena āgamato **vivaranti**. **Anuttānīkātāṇica**
 yuttivibhāvanena **uttānīkaronti**. **Kaṅkhāṭṭhānīyesu dhammesu**

saṃsayuppattiyā hetuyā gaṇṭhiṭṭhānabhūtesu pālipadesu yāthāvato
vinicchayadānena **kaṅkhaṃ paṭivindenti**.

Ānandasuttavaṇṇanā niṭṭhitā.

10. Khattiyasuttavaṇṇanā

52. Dasame bhoge adhippāyo etesanti **bhogādhippāyā**. Paññatthāya etesaṃ mano upavicaratīti **paññūpavicārā**. Pathaviyā dāyatthāya vā cittaṃ abhiniveso etesanti **pathavībhinivesā**. Mantā adhiṭṭhānaṃ patiṭṭhā etesanti **mantādhiṭṭhānā**. Iminā nayena sesapadānīpi veditabbāni. Sesāṃ uttānameva.

Khattiyasuttavaṇṇanā niṭṭhitā.

11. Appamādasuttavaṇṇanā

53. Ekādasame **jaṅgalānanti** ettha yo nipicchalo na anūponirudakatāya thaddhalūkho bhūmippadeso, so “jaṅgalo”ti vuccati. Tabbahulatāya pana idha sabbo bhūmippadeso jaṅgalo. Tasmim jaṅgale jātā bhavāti vā jaṅgalā, tesāṃ **jaṅgalānaṃ**. Evaṃ hi nadicarānampi hatthīnaṃ saṅgaho kato hoti samodhātābānaṃ viya samodhāyakānampi idha jaṅgalaggahaṇena gahetabbato. **Pathavītalacārīnanti** iminā jalacārino ca nivatteti adissamānapādattā. “**Pāṇānaṃ**”ti sādharāṇavacanampi “**padajātānī**”ti saddantarāsannidhānena visesaniviṭṭhameva hotīti āha “**sapādakapāṇānaṃ**”ti. “Muttagatan”ti-ādīsu¹ gata-saddo viya idha **jāta**-saddo anantantaroti āha “**padajātānīti padānī**”ti. **Samodhānanti** samavarodhaṃ, antogadhaṃ vā. Tenāha “**odhānaṃ upanikkhepaṃ gacchantī**”ti. **Kūṭaṅgamāti** pārimantena kūṭaṃ upagacchanti. **Kūṭaninnāti** kūṭacchiddamagge pavisanavasena kūṭe ninnā. **Kūṭasamosaraṇāti** chidde anupavisanavasena ca āhacca avatthānena ca kūṭe samodahitvā ṭhitā.

1. Ma 2. 87; Am 3. 181 piṭṭhesu.

Vaṇṭe patamāne sabbāni bhūmiyaṃ patantīti āha “**vaṇṭānuvattakāni bhavanti**”ti.

Appamādasuttavaṇṇanā niṭṭhitā.

12. Dhammikasuttavaṇṇanā

54. Dvādasame **jātibhūmiyanti** ettha jananaṃ jāti, jātiyā bhūmi **jātibhūmi**, jātaṭṭhānaṃ. Taṃ kho panetaṃ neva kosalamahārājādīnaṃ, na caṅkibrāhmaṇādīnaṃ, na sakkasuyāmasantusitādīnaṃ, na asītimahāsāvakanānaṃ, na aññesaṃ sattānaṃ “jātibhūmi”ti vuccati. Yassa pana jātadivase dasasahassī lokadhātu ekaddhajamālāvippakiṇṇakusumavāsacuṇṇagaṇasugandhā¹ sabbapāliphullamiva nandanavanaṃ virocamaṇā paduminipaṇṇe udakabindu viya akampittha, jaccandhādīnaṃca rūpadassanādīni anekāni pāṭihāriyāni pavattiṃsu, tassa sabbaññubodhisattassa jātaṭṭhānaṃ, sātisayassa pana janakakapilavatthusannissayo “jātibhūmi”ti vuccati. **Jātibhūmakā upāsakāti** jātibhūmivāsino upāsakā. Santanetvā sabbaso tanetvā pattharivā ṭhitamūlāni **mūlasantānakāni**. Tāni pana atthato mūlāniyevāti āha “**mūlasantānakānanti mūlāna**”ti.

Jātadivase āvudhānaṃ jotitattā, rañño aparimitassa ca sattakāyassa anattato paripālanasamatthatāya ca “jotipālo”ti laddhanāmattā vuttaṃ **nāmena jotipālo**”ti. **Govindoti** govindiyābhisekena abhisitto, govindassa ṭhāne ṭhapanābhisekena abhisittoti attho. Taṃ kira tassa brāhmaṇassa kulaparamparāgataṃ ṭhānantaraṃ. Tenāha “**ṭhānena mahāgovindo**”ti. Gavaṃ paññaṃca vindati paṭilabhatīti govindo, mahanto govindoti **mahāgovindo**. **Goti** hi paññāyetaṃ adhivacanaṃ “gacchati atthe bujjhatī”ti katvā. Mahāgovindo ca amhākaṃ bodhisattoyeva. So kira disampatissa nāma rañño purohitassa govindabrāhmaṇassa putto hutvā attano pitussa ca rañño ca accayena tassa putto reṇu,

1. Ekakampena vippakiṇṇa... (Ka) Ma-Ṭṭha 2. 41 passitabbaṃ.

sahāyā cassa Sattabhū, Brahmadatto, Vessabhū, Bharato, dve Dhataratṭhāti ime satta rājāno yathā aññamaññaṃ na vivadanti, evaṃ rajje patiṭṭhāpetvā tesam atthadhamme anusāsanto Jambudīpatale sabbesam rājāva raññaṃ, brahmāva brāhmaṇānaṃ, devova gahapatikānaṃ sakkato garukato mānito pūjito apacito uttamagāraṇatṭhānaṃ ahoṣi. Tena vuttam **“reṇu-ādīnaṃ sattannaṃ purohito”**ti. Imeva satta bhāradhārā¹ mahārājāno. Vuttam hetam—

“Sattabhū brahmadatto ca, vessabhū bharato saha.
Reṇu dve ca dhataratṭhā, tadāsum satta bhāradhā”ti².

Rañño diṭṭhadhammikasamparāyikatthānaṃ puro vidhānato pure samvidhānato **purohito**. **Kodhāmagandhenā**ti kodhasaṅkhātena pūṭigandhena. Karuṇā assa atthīti **karuṇanti** sapubbabhāgakarūṇajjhānaṃ vuttanti āha **“karuṇāya ca karuṇāpubbabhāge ca ṭhitā”**ti. Yakāro sandhivasena āgatoti āha **“yeteti ete”**ti. **Arahattako paṭṭhāya sattamoti** sakadāgāmī. **Sakadāgāmim upādāyā**ti sakadāgāmibhāvaṃ paṭicca. Sakadāgāmiṣṣa hi pañcindriyāni sakadāgāmibhāvaṃ paṭicca mudūni nāma honti. Sesamettha suviññeyyameva.

Dhammikasuttavaṇṇanā niṭṭhitā.

Dhammikavaggavaṇṇanā niṭṭhitā.

Paṭhamapaṇṇāsako niṭṭhito.

1. Bhāradhā (Ka)

2. Dī-Ṭṭha 2. 255 piṭṭhe.

2. Dutiyapaṇṇāsaka

6. Mahāvagga

1. Soṇasuttavaṇṇanā

55. Chaṭṭhassa paṭhame **nisīdi bhagavā paññatte āsaneti** ettha kim taṃ āsanam paṭhamameva paññattam, udāhu bhagavantam disvā paññattanti ce? Bhagavato dharamānakāle padhānikabhikkhūnam vattametam, yadidaṃ attano vasanaṭṭhāne buddhāsanam paññapetvāva nisīdananti dassento āha “**padhānikabhikkhū**”ti-ādi. buddhakāle kira yattha yattha ekopi bhikkhu viharati, sabbattha buddhāsanam paññattameva hoti. Kasmā? Bhagavā hi attano santike kammaṭṭhānam gahetvā phāsukaṭṭhāne viharante manasi karoti “asuko mayham santike kammaṭṭhānam gahetvā gato, asakkhī nu kho pisesam nibbattetum, no”ti. Atha nam passati kammaṭṭhānam vissajjetvā akusalavitakkaṃ vitakkayamānam, tato “katham hi nāma mādisassa satthu santike kammaṭṭhānam gahetvā viharantam imam kulaputtam akusalavitakkā adhibhavitvā anamatagge vaṭṭadukkhe saṃsāressanti”ti tassa anuggahattham tattheva attānam dassetvā tam kulaputtam ovaditvā ākāsam uppatitvā puna attano vasanaṭṭhānameva gacchati. Athevam ovadiyamānā te bhikkhū cintayimsu “satthā amhākam manam jānitvā āgantvā amhākam samīpe ṭhitamyeva attānam dasseti, tasmim khaṇe ‘bhante idha nisīdatha nisīdathā’ti āsanapariyesanam nāma bhāro”ti. Te āsanam paññapetvāva viharanti. Yassa pīṭham atthi, so tam paññapeti. Yassa natthi, so mañcam vā phalakaṃ vā pāsāṇam vā vālikāpuñjam vā paññapeti. Tam alabhamānā purāṇapaṇṇānīpi samkaḍḍhitvā tattha paṃsukūlam pattharivā ṭhapenti.

Satta sarāti chajjo usabho gandhāro majjhimo pañcama dhevato nisīdoti ete satta sarā. **Tayo gāmā**ti chajjagāmo majjhimagāmo sādharmaṇagāmoti tayo gāmā, samūhāti attho. Manussaloke vīṇāvādanā ekekassa sarassa vasena tayo tayo mucchanāti katvā **ekavīsati mucchanā**. Devaloke vīṇāvādanā pana samapaññāsa mucchanāti vadanti. Tattha hi ekekassa sarassa vasena

satta satta mucchanā, antarassa sarassa ca ekāti samapaññāsa mucchanā. Teneva **sakkapañhasuttasaṃvaṇṇanāyaṃ**¹ “samapaññāya mucchanā mucchetvā”ti pañcasikhassa vīṇāvādanam dassentena vuttam. **Ṭhānā ekūnapaññāsāti** ekekasessa sarassa satta satta ṭhānabhedā, yato sarassa maṇḍalatāvavattḥānam hoti. Ekūnapaññāsaṭṭhānaviseso tisso duve catasso catasso tisso duve catassoti dvāvīsati sutibhedā ca icchitā.

Atigālham āraddhanti thinamiddhachambhi tattānam vūpasamattham ativiya āraddham. Sabbattha niyuttā **sabbatthikā**. Sabbena vā līnuddhaccapakkhiyena atthetabbā **sabbatthikā**. Samathoyeva **samathanimittam**. Evam sesesupi. **Khayā rāgassa vītarāgattāti** ettha yasmā bāhirako kāmesu vītarāgo na khayā rāgassa vītarāgo sabbaso avippahīnarāgattā. Vikkhambhitarāgo hi so. Arahā pana khayā eva, tasmā vuttam “khayā rāgassa vītarāgattā”ti. Esa nayo dosamohesupi.

Lābhasakkārasilokam nikāmayamānoti ettha labbhati pāpuṇiyatīti **lābho**, catunnam paccayānametaṃ adhivacanam. Sakkaccam kātabboti **sakkāro**. Paccayā eva hi paṇītapāṇītā sundarasundarā abhisankharitvā katā “sakkāro”ti vuccati, yā ca parehi attano gāravakiriya, pupphādīhi vā pūjā. **Silokoti** vaṇṇabhaṇanam. Tam lābhañca sakkārañca silokañca nikāmayamāno pavattayamānoti attho. Tenevāha “**catupaccayalābhañca -patthayamāno**”ti.

Thūṇanti pasūnam bandhanatthāya nikhātattambhasaṅkhātam thūṇam. Sesam suviññeyyameva.

Soṇasuttavaṇṇanā niṭṭhitā.

2. Phaggunasuttavaṇṇanā

56. Dutiye **samadhosīti** samantato adhosi. Sabbabhāgena pariphandanacalanākārena apacitīm dasseti. Vattam kiretam bāḷhagilānenapi

1. Dī-Ṭṭha 2. 292 piṭṭhe.

vuddhatarāmaṃ disvā uṭṭhitākārena apaciti dassetabbā, tena pana “mā cali mā cali”ti vattabbo, taṃ pana calanaṃ uṭṭhānākāradassanaṃ hotīti āha “**uṭṭhānākāraṃ dasseti**”ti. **Santimāni āsanāni**ti paṭhamameva paññattāsanānaṃ sandhāya vadati. Buddhakālasmiṃ hi ekassapi bhikkhuno vasanaṭṭhāne “sace satthā āgacchissati, āsanaṃ paññattameva hotū”ti antamaso phalakamattampi paṇṇasanthāramattampi paññattameva. **Khamanīyaṃ yāpanīyanti** kacci dukkhaṃ khamituṃ, iriyāpathaṃ vā yāpetuṃ sakkāti pucchati. **Sīsavedanā**ti kutoci nikkhamituṃ alabhamānehi vātehi samuṭṭhāpitā balavatiyo sīsavedanā honti.

Phaggunasuttavaṇṇanā niṭṭhitā.

3. Chaḷabhijātisuttavaṇṇanā

57. Tatiye **abhijātiyoti** ettha **abhi**-saddo upasaggamattaṃ, na atthavisesajotakoti āha “**cha jātiyo**”ti. **Abhijāyatīti** etthāpi eseva nayo.

Urabbhe hanantīti **orabbhikā**. Evaṃ **sūkarikā**dayo veditabbā. Rodenti kururakammantatāya sappaṭibaddhe satte assūni mocentīti ruddā te eva **luddā** ra-kārassa la-kāraṃ katvā. Iminā aññepi ye keci māgavikā nesādā vuttā, te pāpakammappasutatāya “**kaṇhābhijātī**”ti vadati.

Bhikkhūti ca bddhasāsane bhikkhū. Te kira sacchandarāgena paribhuñjantīti adhippāyena catūsu paccayesu kaṇṭake pakkhipitvā khādantīti “kaṇṭakavuttikā”ti vadati. Kasmāti ce? Yasmā te paṇīte paccaye paṭise vantīti tassa micchāgāho. Nāyaladdhepi paccaye bhuñjamānā ājīvakasamayassa vilomaggāhitāya paccayesu kaṇṭake pakkhipitvā khādanti nāmāti vadatīti. Atha vā **kaṇṭakavuttikā** evaṃnāmakā eke pabbajitā, ye savisesaṃ attakilamathānuyogaṃ anuyuttā. Tathā hi te kaṇṭake vattantā viya hontīti “kaṇṭakavuttikā”ti vuttā. Imameva ca atthavikappaṃ sandhāyāha “**kaṇṭakavuttikāti samaṇā nāmete**”ti.

Lohitābhijāti nāma nigaṇṭhā ekasāṭakāti vuttā. Te kira ṭhatvā bhuñjananahānappaṭikkhepādivatasamāyogena purimehi dvīhi paṇḍaratarā.

Acelakasāvakāti ājīvakasāvake vadati. Te kira ājīvakaladdhiyā suvisuddhacittatāya nigaṇṭhehipi paṇḍaratarā. Evañca katvā attano paccayadāyake nigaṇṭhehipi jeṭṭhakatare karoti.

Ājīvakā ājīvakiniyo “**sukkābhijāti**”ti vuttā. Te kira purimehi catūhi paṇḍaratarā. Nandādayo hi tathārūpaṃ ājīvakappaṭipattiṃ ukkaṃsaṃ pāpetvā ṭhitā, tasmā nigaṇṭhehi ājīvakasāvakehi ca paṇḍaratarāti “**paramasukkābhijāti**”ti vuttā.

Bilaṃ olaggeyyunti maṃsabhāgaṃ nhārunā vā kenaci vā ganthivā purisassa hatthe vā kese vā olambanavasena bandheyyuṃ. Iminā satthadhammaṃ nāma dasseti. Satthavāho kira mahākantāraṃ paṭipanno antarāmagge goṇe mate maṃsaṃ gahetvā sabbesaṃ satthikānaṃ “idaṃ khāditvā ettakaṃ mūlaṃ dātabban”ti koṭṭhāsaṃ olambati. Goṇamaṃsaṃ nāma khādantāpi atthi, akhādantāpi atthi, khādantāpi mūlaṃ dātum sakkontāpi asakkontāpi. Satthavāho yena mūlena goṇo gahito, taṃ mūlaṃ satthikehi dhāraṇatthaṃ sabbesaṃ balakkārena koṭṭhāsaṃ datvā mūlaṃ gaṇhāti. Ayaṃ satthadhammo.

Kaṇhābhijātiyo samānoti kaṇhe nīcakule jāto hutvā. **Kaṇhadhammanti** paccatte upayogavacananti āha “**kaṇhasabhāvo hutvā abhijāyati**”ti, taṃ antogadhahetu-atthaṃ padaṃ, uppādetīti attho. Tasmā **kaṇhaṃ dhammaṃ abhijāyatīti** kāḷakaṃ dasadussīlyadhammaṃ uppādeti. **Sukkaṃ dhammaṃ abhijāyatīti** etthāpi iminā nayena attho veditabbo. So hi “ahaṃ pubbepi puññānaṃ akatattā nīcakule nibbatto, idāni puññaṃ karissāmī”ti puññaṣaṅkhātaṃ paṇḍaradhammaṃ karoti.

Akaṇhaṃ asukkaṃ nibbānanti sace kaṇhaṃ bhavyeṃ, kaṇhavipākaṃ dadeyya yathā dasavidhaṃ dussīlyadhammaṃ. Sace sukkaṃ, sukkavipākaṃ dadeyya yathā dānasīlādikusalakammaṃ. Dvinnampi appadānato “akaṇhaṃ asukkan”ti vuttaṃ. Nibbānañca nāma imasmim atthe arahattaṃ adhippetam “abhijāyati”ti

vacanato. Tam hi kilesanibbānante jātattā nibbānaṃ nāma yathā “rāgādīnaṃ khayante jātattā rāgakkhayo dosakkhayo mohakkhayo”ti.

Paṭippassambhanavasena vā kilesānaṃ nibbāpanato nibbānaṃ, tam esa abhijāyati pasavati. Idhāpi hi antogadhahetu-atthaṃ “jāyati”ti padaṃ. Aṭṭhakathāyaṃ pana “jāyati”ti imassa pāpuṇātīti atthaṃ gahetvāva “**nibbānaṃ pāpuṇāti**”ti vuttaṃ. **Sukkābhijātiyo samānoti** sukke uccakule jāto hutvā. Sesamettha suviññeyyameva.

Chaḷabhijātisuttavaṇṇanā niṭṭhitā.

4. Āsavasuttavaṇṇanā

58. Catutthe **saṃvarenāti** saṃvarena hetubhūtena vā. **Idhāti** ayaṃ idha-saddo sabbākārato indriyasamvarasamvutassa puggalassa sannissayabhūtasāsanaparidīpano, aññassa tathābhāvappaṭisedhano vāti vuttaṃ “**idhāti imasmim sāsane**”ti. **Paṭisaṅkhāti** paṭisaṅkhāya. **Saṅkhā**-saddo ñāṇakoṭṭhāsapaññattigaṇanādīsu dissati “saṅkhāyekaṃ paṭisevatī”ti-ādīsu¹ hi ñāṇe dissati. “Papañcasaññāsaṅkhā samudācarantī”ti-ādīsu² koṭṭhāse. “Tesaṃ tesaṃ dhammānaṃ saṅkhā samaññā”ti-ādīsu³ paññattiyāṃ. “Na sukaraṃ saṅkhātun”ti-ādīsu⁴ gaṇanāya. Idha pana ñāṇe daṭṭhabbo. Tenevāha “**paṭisañjānitvā paccavekkhitvāti attho**”ti. Ādīnavapaccavekkhaṇā ādīnavapaṭisaṅkhāti yojanā. **Sampalimatṭhanti** ghaṃsitāṃ. **Anubyañjanasoti** hatthapādasita-ālokitavilokitādippakārabhāgaso. Tam hi ayonisomanasikaroto kilesānaṃ anubyañjanato “anubyañjanan”ti vuccati. **Nimittaggāhoti** itthipurisanimittassa subhanimittādikassa vā kilesavatthubhūtassa nimittassa gāho. **Ādittapariyāyenāti ādittapariyāye**⁵ āgatanayena veditabbo.

Yathā itthiyā indriyaṃ itthindriyaṃ, na evamidam, idam pana cakkhumeva indriyanti **cakkhundriyaṃ**. Tenāha “**cakkhumeva indriyan**”ti. Yathā āvāṇe niyataṭṭhitiko kacchapo “āvāṇakacchapo”ti vuccati, evaṃ tappaṭibaddhavuttitāya

1. Ma 2. 127 piṭṭhe. 2. Ma 1. 156, 159 piṭṭhesu. 3. Abhi 1. 256 piṭṭhe.

4. Saṃ 1. 389 piṭṭhe.

5. Saṃ 2. 251; Vi 3. 44 piṭṭhesu.

tamñhāno saṁvaro cakkhundriyasamvaro. Tenāha “**cakkhundriye saṁvaro cakkhundriyasamvaro**”ti. Nanu ca cakkhundriye saṁvaro vā asaṁvaro vā natthi. Na hi cakkhupasādaṁ nissāya sati vā muṭṭhassaccaṁ vā uppajjati. Apica yadā rūpārammaṇaṁ cakkhussa āpāthaṁ āgacchati, tadā bhavaṅge dvikkhattuṁ uppajjitvā niruddhe kiriyamanodhātu āvajjanakiccaṁ sadhayamānā uppajjitvā nirujjhati, tato cakkhuviññāṇaṁ dassanakiccaṁ, tato vipākamanodhātu sampaṭicchana-kiccaṁ, tato vipākamanoviññāṇadhātu santīraṇakiccaṁ, tato kiriyāhetukamanoviññāṇadhātu voṭṭhabbanakiccaṁ sādhayamānā uppajjitvā nirujjhati, tadanantaraṁ javanaṁ javati. Tatthāpi neva bhavaṅgasamaye, na āvajjanādīnaṁ aññatarasamaye ca saṁvaro vā asaṁvaro vā atthi, javanakkhaṇe pana sace dussīlyaṁ vā muṭṭhassaccaṁ vā aññāṇaṁ vā akkhanti vā kosajjaṁ vā uppajjati, asaṁvaro hoti. Tasmaṁ pana sīlādīsu uppannesu saṁvaro hoti, tasmā “cakkhundriye saṁvaro”ti kasmā vuttanti āha “**javane uppajjamānopi hesa -pa-cakkhundriyasamvaroti vuccatī**”ti.

Idaṁ vuttaṁ hoti—yathā nagare catūsu dvāresu asaṁvutesu kiñcāpi antogharadvārakoṭṭhakagabbhādayo susaṁvutā, tathāpi antonagare sabbaṁ bhaṇḍaṁ arakkhitaṁ agopitameva hoti. Nagaradvārena hi pavisitvā corā yadicchakaṁ kareyyuṁ, evamevaṁ javane dussīlyādīsu uppannesu tasmim asaṁvare sati dvārampi aguttaṁ hoti bhavaṅgampi āvajjanādīni vīthiccittānīpi. Yathā pana nagaradvāresu saṁvutesu kiñcāpi antogharādayo asaṁvutā, tathāpi antonagare sabbaṁ bhaṇḍaṁ surakkhitaṁ sugopitameva hoti. Nagaradvāresu hi pihitesu corānaṁ paveso natthi, evamevaṁ javane sīlādīsu uppannesu dvārampi suguttaṁ hoti bhavaṅgampi āvajjanādīni vīthiccittānīpi, tasmā javanakkhaṇe uppajjamānopi cakkhundriyasamvaroti vuttoti.

Saṁvarena samannāgato puggalo saṁvutoti āha “**upeto**”ti. **Ayamevettha attho sundarataroti** upari pāliyaṁ sandissanato vuttaṁ. Tenāha “**tathā hī**”ti-ādi.

Yanti ādesoti iminā līṅgavipallāseṇa saddhīm vacanavipallāso katoti dasseti, nipātapadaṁ vā etaṁ puthuvacanattham. **Vighātakarāti**

cittaviḡhātakarā, kāyacittadukkhaniḡhattakā vā. Yathāvuttakilesahetukā dāhānubandhā vipākā eva **vipākaparilāhā**. Yathā panettha āsavā aññe ca viḡhātakarā kilesaparilāhā sambhavanti, taṃ dassetuṃ

“**cakkhudvārasmiñhī**”ti-ādi vuttaṃ. Taṃ suviññeyyameva. Ettha ca saṃvaraṇūpāyo, saṃvaritabbaṃ, saṃvaro, yato so saṃvaro, yattha saṃvaro, yathā saṃvaro, yañca saṃvaraphalanti ayaṃ viḡhāgo veditabbo. Kathaṃ? “Paṭisaṅkhā yoniso”ti hi **saṃvaraṇūpāyo**. Cakkhundriyaṃ **saṃvaritabbaṃ**. Saṃvaraggahaṇena gahitā sati **saṃvaro**. “Asaṃvutassā”ti **saṃvaraṇāvadhī**. Asaṃvarato hi saṃvaraṇaṃ. Saṃvaritabbaggaṇasiddho idha **saṃvaravisayo**. Cakkhundriyaṃ hi saṃvaraṇaṃ ñāṇaṃ rūpārammaṇe saṃvarayatīti avuttasiddhoyamattho. Āsavatannimittakilesaparilāhābhāvo **phalaṃ**. Evaṃ sotadvārādisu yojetabbaṃ. **Sabbatthevāti** manodvāre pañcadvāre cāti sabbasmim dvāre.

Paṭisaṅkhā yoniso cīvaranti-ādīsu “sītassa paṭiḡhātāyā”ti-ādinā paccavekkhaṇameva yoniso paṭisaṅkhā. **Īdisanti** evarūpaṃ iṭṭhārammaṇaṃ. **Bhavapatthanāya assādayatoti** bhavapatthanāmukhena bhāvitam ārammaṇaṃ assādentassa. **Cīvaranti** nivāsanādi yaṃ kiñci cīvaraṃ. **Paṭisevatīti** nivāsanādivasena paribhuñjati. **Yāvadevāti** payoḡjanaparimāṇaniyamaṃ. Sītappaṭiḡhātādiyeva hi yogino cīvarappaṭisevanappayoḡjanaṃ. **Sītassāti** sītadhātukkabhato vā utupariṇāmato vā uppannassa sītassa. **Paṭiḡhātāyāti** paṭiḡhātanatthaṃ tappaccayassa vikārasa vinodanatthaṃ. **Uṇhassāti** aggisantāpato uppannassa uṇhassa. **Ḍaṃsādayo** pākaṭāyeva. Puna **yāvadevāti** niyatappayoḡjanaparimāṇaniyamaṃ. Niyataṃ hi payoḡjanaṃ cīvaraṃ paṭisevantassa hirikoṇinappaṭicchādanam, itaraṃ kadāci. **Hirikoṇinanti** sambādhaṭṭhānaṃ. Yasmiṃ hi aṅge vivaṭe hirī kuppati vinassati, taṃ hiriyā kopaṇato hirikoṇinaṃ, taṃpaṭicchādanatthaṃ cīvaraṃ paṭisevati.

Piṇḡapātanti yaṃ kiñci āhāraṃ. So hi piṇḡolyena bhikkhuno patte patanaṇo, tattha tattha laddhabhikkhāpiṇḡānaṃ pāto sannipātoti vā “piṇḡapāto”ti vuccati. **Neva davāyāti** na kīlanāya. **Na madāyāti** na balamadamaṇamadapurisamadatthaṃ. **Na maṇḡanāyāti** na aṅgapaccāṅgānaṃ piṇanabhāvatthaṃ. **Na viḡhūsanāyāti** na tesameva sobhatthaṃ, chavisampatti-atthanti

attho. Imāni yathākkamaṃ
 mohadosasaṅṭhānavaṇṇarāgūpanissayappahānatthāni veditabbāni. Purimaṃ
 vā dvayaṃ attano sakilesuppattinisedhanattham¹, itaraṃ parassapi. Cattāripi
 kāmasukhallikānuyogassa pahānattham vuttānīti veditabbāni. **Kāyassāti**
 rūpakāyassa. **Ṭhitiyā yāpanāyāti** pabandhaṭṭhitatthañceva pavattiyā
 avicchedanatthañca, cirakālaṭṭhitattham jīvitindriyassa pavattāpanattham.
Vihimsūparatiyāti jighacchādukkhassa uparamattham.
Brahmacariyānuggahāyāti sāsanamaggabrahmacariyānam
 anuggaṇhanattham. **Itīti** evaṃ iminā upāyena. **Purāṇaṇca vedanam**
paṭihaṅkhāmīti purāṇam abhuttapaccayā uppajjanakavedanam paṭihanissāmi.
Navaṇca vedanam na uppādessāmīti navaṃ abhuttapaccayā
 uppajjanakavedanam na uppādessāmi. tassā hi anuppajjanatthameva āhāraṃ
 paribhuñjati. Ettha abhuttapaccayā uppajjanakavedanā nāma
 yathāvutta²jighacchānimittā vedanā. Sā hi abhuñjantassa
 bhīyopavaḍḍhanavasena uppajjati, bhuttapaccayā anuppajjanakavedanāpi
 khudānimittāva aṅgadāhasūlādivedanā appavattā. Sā hi bhuttapaccayā
 anuppannāva na uppajjissati. Vihimsānimittatā cetāsam vihimśāya viseso.

Yātrā ca me bhavissatīti yāpanā ca me catunnam iriyāpathānam
 bhavissati. “Yāpanāyā”ti iminā jīvitindriyayāpanā vuttā, idha catunnam
 iriyāpathānam avicchedasaṅkhātā yāpanāti ayametāsam viseso. **Anavajjatā**
ca phāsuvihāro cāti ayuttapariyesanappaṭiggahaṇaparibhogaparivajjanena
 anavajjatā, parimitaparibhogena phāsuvihāro.
 Asappāyāparimitabhojanapaccayā aratitandīvijambhi
 tāviñṇugarahādidosābhāvena vā anavajjatā, sappāyaparimitabhojanapaccayā
 kāyabalasambhāvena phāsuvihāro. Yāvadattham
 udarāvadehakabhojanaparivajjanena vā
 seyyasukhapassasukhamiddhasukhādīnam abhāvato anavajjatā,
 catupañcālopamatta-ūnabhojanena catu-iriyāpathayogyatāpādanato
 phāsuvihāro. Vuttam hetam—

“Cattāro pañca ālope, abhutvā udakam pive.

Alam phāsuvihārāya, pahitattassa bhikkhuno”ti³.

1. Saṃkilesasampattisedhanattham (Ka) 2. Yathāpavattā (Visuddhi-Ṭī 1. 60 piṭṭhe.)
 3. Khu 2. 343; Khu 11. 392 piṭṭhesu.

Ettāvata ca payoanapariggaho, majjhimā ca paṭipadā dīpitā hoti. **Yātrā ca me bhavissatī**ti payoanapariggahadīpanā. Yātrāhi nam āhārūpayogaṃ payojeti. Dhammika sukhāpariccāgahetuko **phāsuvihāro** majjhimā paṭipadā antadvayaparivajjanato.

Senāsananti senaṅca āsanaṅca. Yattha vihārādike seti nipajjati āsati nisīdati, taṃ senāsanam. **Utuparissayavinodanappaṭisallānārāmatthanti** utuyeva parisahanatṭhena parissayo sarirābādhacittavikkhepakaro, tassa vinodanattham, anuppanassa anuppādanattham, uppanassa vūpasamanatthañcāti attho. Atha vā yathāvutto utu ca sīhabyagghādīpākāṭaparissayo ca rāgadosādīpaṭicchannaparissayo ca utuparissayo, tassa vinodanatthañceva ekībhāvaphāsukatthaṅca. Cīvarappaṭisevane hirikopīnappaṭicchādanam viya taṃ niyatapayojananti puna “**yāvadevā**”ti vuttam.

Gilānapaccayabhesajjaparikkhāranti rogassa paccanīkappavattiyā gilānapaccayo, tato eva bhisakkassa anuññātavattutāya bhesajjam, jīvitassa parivārasambhārabhāvehi parikkhāro cāti gilānapaccayabhesajjaparikkhāro, tam. **Veyyābādhikānanti** veyyābādhato dhātukkabhato ca taṃnibbattakuṭṭhagaṇḍapīlakādirogato uppanānam. **Vedanānanti** dukkhavedanānam. **Abyābajjhaparamatāyāti** niddukkhaparamabhāvāya. Yāva taṃ dukkham sabbam pahīnam hoti, tāva paṭisevāmīti yojanā. Evamettha saṅkhepeva pālivaṇṇanā veditabbā. **Navavedanuppādatopīti** na kevalam āyatim eva vipākpariḷhā, atha kho atibhojanapaccayā alaṃsāṭakādīnam viya navavedanuppādatopi veditabbā.

Kammaṭṭhānikassa calanam nāma kammaṭṭhānapariccāgoti āha “**calati kampati kammaṭṭhānam vijahati**”ti. “Khamo hoti sītassa uṇhassā”ti ettha ca lomasanāgattherassa vattu kathetabbam. Thero kira cetiyapabbate piyaṅguguhāya padhānaghare viharanto antaraṭṭhake himapātasamaye lokantarikanirayam paccavekkhitvā kammaṭṭhānam avijahantova abbhokāse vītināmesi. Gimhasamaye ca pacchābhattam bahicaṅkame kammaṭṭhānam manasikaroto sedāpissa kacchehi muccanti. Atha nam antevāsiko āha “idha bhante nisīdatha, sītalo okāso”ti. Thero “uṇhabhayenevamhi āvuso idha nisinnō”ti avīcimahānirayam

paccavekkhitvā nisīdiyeva. **Uṇhanti** cettha aggisantāpova veditabbo sūriyasantāpassa parato vuccamānattā. Sūriyasantāpavasena panetaṃ vatthu vuttaṃ.

Yo ca dve tayo vāre bhattaṃ vā pāṇiyāṃ vā alabhamānopi anamatagge saṃsāre attano pettivisayūpapattim paccavekkhitvā avedhanto kammaṭṭhānaṃ na vijahatiyeva. Ḍaṃsamakasavātātapasamphassehi phuṭṭho cepi tiracchānūpapattim paccavekkhitvā avedhanto kammaṭṭhānaṃ na vijahatiyeva. Sarīsapasamphassena phuṭṭho cāpi anamatagge saṃsāre sīhabyagghādikumhesu anekavāraṃ parivattitapubbabhāvaṃ paccavekkhitvā avedhanto kammaṭṭhānaṃ na vijahatiyeva **padhāniyatthero** viya, ayaṃ “**khamo jighacchāya -pa- sarīsapasamphassānaṃ**”ti veditabbo. Therāṃ kira khaṇḍacelavihāre kaṇikārapadhāniyaghare ariyavaṃsadhammaṃ suṇantaññeva ghoraviso sappo ḍaṃsi. Thero jānitvāpi pasannacitto¹ nisinno dhammaṃyeva suṇāti, visavego thaddho ahosi. Thero upasampadamālaṃ ādim katvā sīlaṃ paccavekkhitvā “visuddhasīlomhi”ti pītim uppādesi, saha pītuppādā visāṃ nivattitvā pathaviṃ pāvīsi. Thero tattheva cittekaggataṃ labhitvā vipassanaṃ vaḍḍhetvā arahattaṃ pāpuṇi.

Yo pana akkosavasena durutte duruttattāyeva ca durāgate api antimavatthusaññite vacanapathe sutvā khantiguṇaṃyeva paccavekkhitvā na vedhati **dīghabhāṇaka-abhayatthero** viya, ayaṃ “**khamo duruttānaṃ durāgatānaṃ vacanapathānaṃ**”ti veditabbo. Thero kira paccayasantosabhāvanārāmatāya mahā-ariyavaṃsappaṭipadaṃ kathesi, sabbo mahāgāmo āgacchati, therassa mahāsakkāro uppajji. Taṃ aññataro mahāthero adhvāsetuṃ asakkonto “dīghabhāṇako ‘ariyavaṃsaṃ kathamī’ti sabbarattim kālāhalaṃ karotī”ti-ādīhi akkosi. Ubhopi ca attano attano vihāraṃ gacchantā gāvutamattaṃ ekapathena agamaṃsu. Sakalagāvutampi so taṃ akkosiyeva. Tato yattha dvinnaṃ vihārānaṃ maggo bhijjati, tattha ṭhatvā dīghabhāṇakatthero taṃ vanditvā “eso bhante tumhākaṃ maggo”ti āha. So

1. Vipassannacitto (Ka)

assuṇanto viya agamāsi. Theropi vihāraṃ gantvā pāde pakkhāletvā nisīdi. Tamenam̐ antevāsiko “kiṃ bhante sakalagāvutaṃ paribhāsantaṃ na kiñci avocutthā”ti āha. Thero “khantiyevāvuso mayham̐ bhāro, na akkhanti, ekapaduddhārepi kammaṭṭhānaviyogaṃ na passāmī”ti āha.

Vacanameva tadattham̐ nāpetukāmānañca patho upāyoti āha “**vacanameva vacanapatho**”ti. Asukhaṭṭhena vā **tibbā**. Yam̐ hi na sukham̐, tam̐ aniṭṭham̐ tibbanti vuccati. **Adhivāsakajātiko hotīti** yathāvuttavedanānam̐ adhivāsakasabhāvo hoti. Cittalapabbate padhāniyattherassa kira rattim̐ padhānena vītināmetvā ṭhitassa udaravāto uppajjati, so tam̐ adhivāsetum̐ asakkonto āvattati parivattati. Tamenam̐ caṅkamanapasse ṭhito piṇḍapātiyatthero āha “āvuso pabbajito nāma adhivāsanasīlo hotī”ti. So “sādhu bhante”ti adhivāsetvā niccalo sayi. Vāto nābhito yāva hadayam̐ phālesi. Thero vedanam̐ vikkhambhetvā vipassanto muhuttana anāgāmī hutvā parinibbāyi. **Evam̐ sabbatthāti** “uṇhena phuṭṭhassa sītam̐ patthayato”ti-ādinā sabbattha uṇhādinimittam̐ kāmāsavuppatti veditabbā. **Natthi sugatibhave sītam̐ vā uṇham̐ vāti** aniṭṭham̐ sītam̐ vā uṇham̐ vā natthīti adhippāyo. Attaggāhe sati attaniyaggāhoti āha “**mayham̐ sītam̐ uṇhanti gāho diṭṭhāsavo**”ti.

Aham̐ samaṇoti “aham̐ samaṇo, kiṃ mama jīvitena vā maraṇena vā”ti evam̐ cintetvāti adhippāyo. **Paccavekkhitvāti** gāmapavesappayojanādiñca paccavekkhitvā. **Paṭikkamatīti** hatthi-ādīnam̐ samīpagamanato apakkamati. Ṭhāyanti¹ etthāti ṭhānam̐², kaṇṭakānam̐ ṭhānam̐² **kaṇṭakaṭṭhānam̐**³, yattha kaṇṭakāni santi, tam̐ okāsanti vuttam̐ hoti. **Amanussaduṭṭhānīti**-amanussasañcārena dūsītāni, sapaṛissayānīti attho. **Aniyatavatthubhūtanti** aniyatasikkhāpadassa kāraṇabhūtam̐. **Vesiyādibhedatoti** vesiyāvidhavāthullakumārīkāpaṇḍakapānāgārahikkhunibhedato. **Samānanti** samam̐, avisamanti attho. **Akāsi vāti** tādisam̐ anācāram̐ akāsi vā. **Sīlasam̐varasañkhātenāti** katham̐ parivajjanam̐ sīlam̐? Anāsanaparivajjanena

1. Dhāyanti (?)

2. Dhānam̐ (?)

3. Kaṇṭakadhānam̐ (?)

hi anācāraparivajjanam vuttam. Anācārāgocaraparivajjanam cārittasīlatāya sīlasamvaro. Tathā hi bhagavatā “pātimokkhasamvarasamvuto viharatī”¹ti sīlasamvaravibhajane ācāragocarasampattim dassentena “atthi anācāro, atthi agocarō”ti-ādinā¹ ācāragocarā vibhajitvā dassitā. “Caṇḍam hatthim parivajjetī”ti vacanato hatthi-ādiparivajjanampi bhagavato vacanānuṭṭhānanti katvā ācārasīlamevāti veditabbam.

Itipīti imināpi kāraṇena ayonisomanasikārasamuṭṭhitattāpi lobhādisahagattāpi kusalappaṭipakkhatopīti-ādīhi kāraṇehi ayam vitakko akusaloti attho. Iminā nayena **sāvajjoti**-ādīsipi attho veditabbo. Ettha ca **akusaloti**-ādinā diṭṭhadhammikam kāmavitakkassa ādīnavam dasseti, **dukkhavipākoti** iminā samparāyikam. **Attabyābādhāya samvattatī**-ādīsipi imināva nayena ādīnavavibhāvanā veditabbā. Uppannassa kāmavitakkassa anadhivāsanam nāma puna tādīsassa anuppādanam. Tam panassa pahānam vinodanam byantikaraṇam anabhāvagamananti ca vuttam vaṭṭatīti pāḷiyam “uppannam kāmavitakkam nādhivāsetī”ti vatvā “pajahatī”ti-ādi vuttanti tamattham dassento “**anadhivāseto kim karotī**”ti-ādīmāha. Pahānañcetta vikkhambhanameva, na samucchodoti dassetuṃ “**vinodetī**”ti-ādi vuttanti vikkhambhanavaseneva attho dassito. **Uppannuppanneti** tesam pāpavitakkānam uppādāvattahāgahaṇam vā katam siyā anavasesaggahaṇam vā. Tesu paṭhamam sandhāyāha “**uppannamatte**”ti, sampatijātetī attho. Anavasesaggahaṇam byāpanicchāyam hotīti dassetuṃ “**satakkhattumpi uppannuppanne**”ti vuttam.

Ñātivitakkoti “amhākam nātayo sukhañjīvino sampattiyuttā”ti-ādinā gehassitapemavasena nātake ārabba uppannavitakko. **Janapadavitakkoti** “amhākam janapado subhikkho sampannasasso ramaṇīyo”ti-ādinā gehassitapemavasena janapadam ārabba uppannavitakko. Ukkuṭṭikappadhānādīhi dukkhe nijjīṇṇe samparāye sattā sukhī honti amarātī dukkarakārikāya paṭisamyutto amaratthāya vitakko, tam vā ārabba amarāvikkhepadiṭṭhisahagato amaro ca so vitakko

1. Abhi 2. 253, 255 piṭṭhesu.

cāti **amarāvitaḅko**. **Parānuddayatāpaṭisaṁyuttoti** paresu upaṭṭhākādīsu sahananditādivasena pavatto anuddayatāpatirūpako gehassitapemappaṭisaṁyutto vitaḅko. **Lābhasakkārasilokappaṭisaṁyuttoti** cīvarādīlābhena ca sakkārena ca kittisaddena ca ārammaṇakaraṇavasena paṭisaṁyutto. **Anavaññattippaṭisaṁyuttoti** “aho vaka maṁ pare na avajāneyyūṁ, na heṭṭhā katvā maññeyyūṁ, pāsāṇacchattaṁ viya garuṁ kareyyun”ti uppannavitaḅko.

Kāmaṁvitaḅko kāmasaṅkappanasabhāvato kāmasavappattiyā sātisaṁyattā ca kāmaṅkāroṭi āha “**kāmaṁvitaḅko panettha kāmasavo**”ti. **Tabbisesoti** kāmasavaviseso bhavasabhāvattāti adhippāyo. Kāmaṁvitaḅkādike vinodeti attano santānato nīharati etenāti **vinodanaṁ**, vīriyanti āha “**vīriyaṁvarasaṅkhātena vinodanena**”ti.

“Satta bojjaṅgā bhāvitā bahulīkatā vijjāvimuttiyo paripūrenti”ti vacanato vijjāvimuttīnaṁ anadhigamo tato ca sakalavaṭṭadukkhānativatti **abhāvanāya ādīnavo**. Vuttavipariyāyena bhagavato orasaputtabhāvādivasena ca **bhāvanāya ānisaṁso** veditabbo. **Tho mentoti** āsavapahānassa dukkarattā tāya eva dukkarakiriyāya taṁ abhitthavanto. **Samvareneva pahīnāti** samvarena pahīnā eva. Tena vuttaṁ “**na appahīnesuyeva pahīnasaññī**”ti.

Āsavasuttavaṇṇanā niṭṭhitā.

5. Dārukammikasuttavaṇṇanā

59. Pañcame **puttasambādhasayananti** puttehi sambādhasayanaṁ. Ettha puttāsīsenā dārapariggahaṁ puttadāresu uppilo viya. Tena tesāṁ rogādihetu sokābhibhavana ca cittassa saṅkiliṭṭhataṁ dasseti, **kāmabhogināti** iminā pana rāgābhibhavanti. Ubhayenapi vikkhittacittataṁ dasseti. **Kāsikacandananti** ujjalacandaṁ. Taṁ kira vaṇṇavisesasamujjalamhoti pabhassaraṁ, tadatthameva naṁ saṅhataraṁ karonti. Tenevāha

“saṅhacandanā”ti, kāsikavatthañca candanañcāti attho.

Mālāgandhavilepananti vaṇṇasobhatthañceva sugandhabhāvattthañca mālaṃ, sugandhabhāvattthāya gandhaṃ, chavirāgakaraṇattthañceva subhatthañca vilepanaṃ dhārentena. **Jātarūparajātanti** suvaṇṇañceva avasiṭṭhadhanañca sādiyantena. Sabbenapi kāmesu abhigiddhabhāvameva pakāseti.

Dārukammikasuttavaṇṇanā niṭṭhitā.

6. Hatthisāriputtasuttavaṇṇanā

60. Chaṭṭhe hatthiṃ sāretīti hatthisārī, tassa puttoti **hattisāriputto**. So kira sāvattthiyaṃ hatthi-ācariyassa putto bhagavato santike pabbajitvā tīṇi piṭakāni uggahetvā sukhumesu khandhadhātu-āyatanādīsu atthantaresu kusalo ahosi. Tena vuttam **“therānaṃ bhikkhūnaṃ abhidhammakathaṃ kathentānaṃ antarantarā kathaṃ opātetī”**ti. Tatta **antarantarā kathaṃ opātetī**ti therehi vuccamānassa kathāpabandhassa antare antare attano kathaṃ pavesetīti attho. **Pañcahi saṃsaggehi**ti savanasaṃsaggo dassanasaṃsaggo samullāpasasaggo sambhogasaṃsaggo kāyasaṃsaggoti imehi pañcahi saṃsaggehi. **Kitṭhakhādakoti** kiṭṭhaṭṭhāne uppannasassaṃ hi kiṭṭhanti vuttam kāraṇūpacārena. **Sippiyo** suttīyo. **Sambukāti** saṅkhamāha.

Gihibhāve vaṇṇaṃ kathesī¹ kssapasammāsambuddhassa kira sāsane dve saḥāyakā ahesuṃ, aññamaññaṃ samaggā ekatova sajjhāyanti. Tesu eko anabhirato gihibhāve cittaṃ uppādetvā itarassa ārocesi, so gihibhāve ādīnavaṃ, pabbajjāya ānisaṃsaṃ dassetvā ovadi. So taṃ sutvā abhiramitvā puna ekadivasam tādise citte uppanne taṃ etadavoca “mayhaṃ āvuso evarūpaṃ cittaṃ uppajjati, imāhaṃ pattacīvaraṃ tuyhaṃ dassāmi”ti. So pattacīvaralobhena tassa gihibhāve ānisaṃsaṃ dassetvā pabbajjāya ādīnavaṃ kathesi. Tassa taṃ sutvāva gihibhāvato cittaṃ nivattetvā pabbajjāyameva abhirami. Evamesa tadā sīlavantassa bhikkhuno

1. Dī-Ṭṭha 1. 312 piṭṭhepi passitabbaṃ.

gihibhāve ānisaṃsakathāya kathitattā idāni cha vāre vibbhamitvā sattamavāre pabbajitvā mahāmogallānassa mahākoṭṭhikattherassa ca abhidhammakatham kathentānam antarantarā katham opātesi. Atha nam mahākoṭṭhikatthero apasādesi. So mahāsāvakaṃ kathite patiṭṭhātum asakkonto vibbhamitvā gihi jāto. Poṭṭhapādassa panāyam gihiṣahāyako ahoṣi, tasmā vibbhamitvā dvīhatīhaccayena poṭṭhapādassa santikaṃ gato. Atha nam so disvā “samma kiṃ tayā kataṃ, evarūpassa nāma satthu sāsanaṃ apasakkantosi, ehi pabbajitum dāni te vaṭṭatī”ti taṃ gahetvā bhagavato santikaṃ agamāsi. Tasmīṃ ṭhāne pabbajitvā arahattaṃ pāpuṇi. Tena vuttaṃ “sattame vāre pabbajitvā arahattaṃ pāpuṇi”ti.

Hatthisāriputtasuttavaṇṇanā niṭṭhitā.

7. Majjhesuttavaṇṇanā

61. Sattame **mantāti** ya-kāralopena niddeso, karaṇatthe vā etaṃ paccattavacanam. Tenāha “**tāya ubho ante viditvā**”ti. **Phassavasena nibbattattāti** dvayadvayasamāpattiyam aññamaññam samphassavasena nibbattattā, “phassapaccayā taṇhā, taṇhāpaccayā upādānam, upādānapaccayā bhavo, bhavapaccayā jāti”ti iminā cānukkamena phassasamuṭṭhānattā imassa kāyassa phassavasena nibbattattāti vuttaṃ. **Eko antoti** ettha ayam **anta**-saddo anta-abbhantaramariyādalāmaka-abhāvakoṭṭhāsapadapūraṇasamīpādīsu dissati. “Antapūro udarapūro”ti-ādīsu¹ hi ante antasaddo. “Caranti loke parivārachannā anto asuddhā, bahi sobhamānā”ti-ādīsu² abbhantare. “Kāyabandhanassa anto jīrati³ sā haritantaṃ vā panthantaṃ vā selantaṃ vā udakantaṃ vā”ti-ādīsu⁴ mariyādāyam. “Antamidaṃ bhikkhave jīvikānan”ti-ādīsu⁵ lāmake. “Esevanto dukkhassā”ti-ādīsu⁶ abhāve. Sabbapaccayasaṅkhayo hi dukkhassa

1. Khu 1. 308 piṭṭhe Suttanipāte.

3. Vi 4. 277 piṭṭhe.

5. Saṃ 2. 76; Khu 1. 255 piṭṭhesu.

2. Saṃ 1. 79 piṭṭhe.

4. Ma 1. 246 piṭṭhe.

6. Ma 3. 310; Saṃ 1. 311 piṭṭhesu.

abhāvo koṭṭipi vuccati. “Tayo antā”ti-ādīsu¹ koṭṭhāse. “Ingha tāva suttantaṃ vā gāthāyo vā abhidhammaṃ vā pariyāpuṇassu, suttante okāsaṃ kārapetvā”ti² ca ādīsu padapūraṇe. “Gāmantaṃ vā oṣaṭṭo³ gāmantasenāsanā”ti-ādīsu⁴ samīpe. Svāyamidha koṭṭhāse vattatīti **ayameko koṭṭhāsoti**.

Santo paramatthato vijjamāno dhammasamūhoti **sakkāyo**, pañcupādānakkhandhā. Tenāha “**tebhūmakavaṭṭan**”ti. Sesametha suviññeyyameva.

Majjhēsuttavaṇṇanā niṭṭhitā.

8. Purisindriyañāṇasuttavaṇṇanā

62. Aṭṭhame nibbattivasena apāyasaṃvattaniyena vā kammunā apāyesu niyuttoti **āpāyiko**. **Nerayikoti** etthāpi eseva nayo. Avīcimhi uppajjitvā tattha āyukappasaññitaṃ antarakappaṃ tiṭṭhatīti **kappaṭṭho**.

Nirayūpapattipariharaṇavasena tikicchitum asakkuṇeyyoti **atekiccho**. **Akhaṇḍānī**ti ekadesenapi akhaṇḍitāni. Bhinnakālato paṭṭhāya bījaṃ bījatthāya na upakappati. **Apūtīnī**ti udakatemanaena apūtīkāni. Pūtīkaṃ hi bījaṃ bījatthāya na upakappati. **Avātātapahatānī**ti vātena ca ātapena ca na hatāni nirojatanā na pāpitāni. Nirojanā hi kasaṭṭaṃ bījaṃ bījatthāya na upakappati. “Sārādānī”ti vattabbe ā-kārassa rassattaṃ katvā pāḷiyāṃ “**sārādānī**”ti vuttanti āha “**sārādānī**”ti. Taṇḍulasārassa ādānato **sārādānī**, gahitasārāni patiṭṭhitasārāni. Nissāraṃ hi bījaṃ bījatthāya na upakappati. **Sukhasayitānī**ti cattāro māse koṭṭhe pakkhittaniyāmeneva sukhasayitāni suṭṭhu sannicitāni. **Maṇḍakhetteti** ūsakhārādīdosehi aviddhaste sārakkhette. **Abhidoti** abhi-saddena samānatthanipātapadanti āha “**abhi-aḍḍharattan**”ti. Natthi etassa bhīdāti vā **abhido**. “Abhidaṃ aḍḍharattan”ti vattabbe upayogatthe paccattavacanāṃ. **Aḍḍharattanti** ca accantasāmyogavacanāṃ, bhūmatthe vā. Tasmā **abhido**

1. Dī 3. 181 piṭṭhe.

3. Vi 1. 263, 264; Vi 4. 359, 360 piṭṭhesu.

2. Vi 2. 189 piṭṭhe.

4. Vi-Ṭṭha 2. 188 piṭṭhe.

aḍḍharattanti abhinne aḍḍharattasamayeti attho. Puṇṇamāsiyaṃ hi gaganamajjhassa purato vā pacchato vā cande ṭhite aḍḍharattasamayo bhinno nāma hoti, majjhe eva pana ṭhite abhinno nāma.

Suppabuddhasunakkhattādayoti ettha¹ suppabuddho kira “sākiyo mama dhītaraṃ chaḍḍetvā nikkhanto, mama puttāṃ pabbājetvā tassa veriṭṭhāne ṭhito cā”ti imehi dvīhi kāraṇehi satthari āghātaṃ bandhitvā ekadivasāṃ “na dāni nimantitaṭṭhānaṃ gantvā bhuñjituṃ dassāmi”ti gamanamaggaṃ pidahitvā antaravīthiyaṃ suraṃ pivanto nisīdi. Athassa satthari bhikkhusaṃghaparivute taṃ ṭhānaṃ āgate “satthā āgato”ti ārocesāṃ. So āha “purato gacchāti tassa vadetha, nāyaṃ mayā mahallakataro, nāssa maggaṃ dassāmi”ti. Punappunaṃ vuccamānopi tatheva nisīdi. Satthā mātulassa santikā maggaṃ alabhitvā tatova nivatti. Sopi carapurisaṃ pesesi “gaccha tassa kathaṃ sutvā ehī”ti. Satthāpi nivattanto sitaṃ katvā ānandattherena “ko nu kho bhante sitapātukamme paccayo”ti puṭṭho āha “passasi ānanda suppabuddhan”ti. Passāmi bhante. Bhāriyaṃ tena kammaṃ kataṃ mādisassa buddhassa maggaṃ adentena, ito sattame divase heṭṭhāpāsāde pāsādamūle pathaviyā pavisissatī”ti ācikkhi.

Sunakkhattopi² pubbe bhagavantaṃ upasaṅkamitvā dibbacakkhuparikammaṃ pucchi. Athassa bhagavā kathesi. So dibbacakkhuṃ nibbattetvā ālokaṃ vaḍḍhetvā olokento devaloke nandanavanacittalatāvanaphārusakavanamissakavanesu dibbasampattiṃ anubhavamāne devaputte ca devadhītaro ca disvā “etesāṃ evarūpāya attabhāvasampattiyā ṭhitānaṃ kira madhuro nu kho saddo bhavissatī”ti saddaṃ sotukāmo hutvā dasabalaṃ upasaṅkamitvā dibbasotadhātuparikammaṃ pucchi. Bhagavā panassa “dibbasotadhātussa upanissayo natthī”ti ñatvā parikammaṃ na kathesi. Na hi buddhā yaṃ na bhavissati, tassa parikammaṃ kathenti. So bhagavati āghātaṃ bandhitvā cintesi “ahaṃ samaṇaṃ gotamaṃ paṭhamaṃdibbacakkhuparikammaṃ pucchim, so mayhaṃ ‘sampajjatu vā mā vā sampajjatū’ti kathesi. Ahaṃ pana paccattapurisakārena taṃ nibbattetvā dibbasotadhātuparikammaṃ pucchim, taṃ me na kathesi. Addhā

1. Dhammapada-Ṭṭha 2. 28 piṭṭhepi passitabbaṃ.

2. Ma-Ṭṭha 1. 330 piṭṭhepi passitabbaṃ.

evam hoti ‘ayaṃ rājabbajito dibbacakkhuññaṃ nibbattetvā
dibbasotaññaṃ nibbattetvā cetopariyakammaññaṃ nibbattetvā āsavānaṃ
khaye ñāṇaṃ nibbattetvā mayā samasamo bhavissatī’ti
issāmacchariyavasena mayhaṃ na kathetī”ti bhīyoso āghātaṃ bandhitvā
kāśāyāni chaḍḍetvā gihibhāvaṃ patvāpi na tuṅhibhūto vihāsi. Dasabalaṃ
pana asatā tucchena abbhācikkhitvā apāyūpago ahoṣi. Tampi bhagavā
byākāsi. Vuttaṃ hetam “evampi kho bhaggava sunakkhatto licchaviputto
mayā vuccamāno apakkameva imasmā dhammavinayā, yathā taṃ
āpāyiko”ti¹. Tena vuttaṃ “**aparepi suppubuddhasunakkhattādayo bhagavatā
ñātāvā**”ti. Ādi-saddena Kokālikādīnaṃ saṅgaho daṭṭhabbo.

Susīmo paribbājakoti² evaṃnāmako vedaṅgesu kusalo paṇḍito
paribbājako. Aññatitthiyā hi parihīnalābhasakkārasilokā “samaṇo gotamo na
jātigottādīni ārabha lābhaggappatto jāto, kaviseṭṭho³ panesa uttamakavitāya
sāvakānaṃ bandhaṃ bandhitvā deti. Te taṃ uggaṇhitvā upaṭṭhākānaṃ
upanisinnakathampi anumodanampi sarabhaññampīti evamādīni kathenti. Te
tesaṃ pasannānaṃ lābhaṃ upasaṃharanti. Sace mayaṃ yaṃ samaṇo
gotamo jānāti, tato thokaṃ jāneyyāma, attano samayaṃ tattha pakkipitvā
mayampi upaṭṭhākānaṃ katheyyāma. Tato etehi lābhitarā bhaveyyāma. Ko
nu kho samaṇassa gotamassa santike pabbajitvā khippameva uggaṇhituṃ
sakkhissatī”ti evaṃ cintetvā “susīmo paṭibalo”ti disvā upasaṅkamtivā
evamāhaṃsu “ehi tvaṃ āvuso susīma, samaṇe gotame brahmacariyaṃ cara,
tvaṃ dhammaṃ pariyāpuṇitvā amhe vāceyyāsi, taṃ mayaṃ dhammaṃ
pariyāpuṇitvā gihīnaṃ bhāsissāma, evaṃ mayampi sakkatā bhavissāma
garukatā mānitā pūjitā lābhino
cīvarapiṇḍapātasenāsanagilānapaccayabhesajjaparikkhārānaṃ”ti⁴.

Atha susīmo paribbājako tesaṃ vacanaṃ sampaṭicchitvā yenānando
tenupasaṅkami, upasaṅkamtivā pabbajjaṃ yāci. Thero ca taṃ ādāya

1. Dī 3. 4 piṭṭhe.

3. Visiṭṭho (Ka)

2. Saṃ-Tṭha 2. 115 piṭṭhepi passitabbaṃ.

4. Saṃ 1. 341 piṭṭhe.

bhagavantam upasaṅkamtivā etamattham ārocesi. Bhagavā pana cintesi “ayam paribbājako tithiyasamaye ‘aham pāṭi-ekko satthā’ ti paṭijānamāno carati, ‘idheva maggabrahmacariyam caritum icchāmī’ ti kira vadati, kim nu kho mayi pasanno, udāhu mayham vā mama sāvakānam dhammakathāya pasanno” ti. Athassa ekaṭṭhānepi pasādābhavam ṇatvā “ayam mama sāsane ‘dhammam thenessāmī’ ti pabbajati, itissa āgamanam aparissuddham, nipphatti nu kho kīdisā” ti olokento “kiñcāpi ‘dhammam thenessāmī’ ti pabbajati, katipāheneva pana ghaṭetvā arahattam gaṇhissatī” ti ṇatvā “tenahānanda susīmam pabbājethā” ti āha. Tam sandhāyetaṃ vuttam “**evam bhagavatā ko ṇāto? Susīmo paribbājako**” ti.

Santatihāmattoti¹ so kira ekasmiṃ kāle rañño pasenadissa paccantaṃ kupitaṃ vūpasamtvā āgato. Athassa rājā tuṭṭho satta divasāni rajjam datvā ekaṃ naccagītakusalam itthim adāsi. So satta divasāni surāmadamatto hutvā sattame divase sabbālaṅkārappaṭimaṇḍito hatthikkhandhavaragato nahānatittham gacchanto satthāram piṇḍāya pavisantaṃ dvārantare disvā hatthikkhandhavaragatova sīsam cāletvā vandi. Satthā sitam katvā “ko nu kho bhante sitapātukaraṇe hetū” ti ānandattherena puṭṭho sitakāraṇam ācikkhanto āha “passasi ānanda santatihāmattaṃ, ajjeva sabbābharaṇappaṭimaṇḍito mama santikam āgantvā cātuppadikagāthāvasāne arahattam patvā parinibbāyissatī” ti. Tena vuttam “**evam ko ṇāto bhagavatāti? santatihāmatto**” ti.

Purisindriyañāṇasuttavaṇṇanā niṭṭhitā.

9. Nibbedhikasuttavaṇṇanā

63. Navame parihāyati attano phalam pariggahetvā vattati, tassa vā kāraṇabhāvam upagacchatīti **pariyāyoti** idha kāraṇam vuttanti āha “**nibbijjhanakāraṇan**” ti.

1. Dhammapada-Ṭṭha 2. 49 piṭṭhepi passitabbam.

“Anujānāmi bhikkhave ahatānaṃ vatthānaṃ diguṇaṃ saṃghāṭin”¹ ettha hi paṭalaṭṭho guṇaṭṭho. “Accenti kālā tarayanti rattiyo, vayoguṇā anupubbaṃ jahantī”² ettha rāsaṭṭho guṇaṭṭho. “Sataguṇā dakkhiṇā pāṭikaṅkhitabbā”³ ettha ānisaṃsaṭṭho. “Antaṃ antaguṇaṃ⁴, kayirā mālāguṇe bahū”⁵ ettha bandhanaṭṭho guṇaṭṭho. Idhāpi esova adhippetoti āha “**bandhanaṭṭhena guṇā**”^{ti}. Kāmarāgassa saṃyojanassa paccayabhāvena vatthukāmesupi bandhanaṭṭho rāsaṭṭho vā guṇaṭṭho daṭṭhabbo.

Cakkhuvīññeyyāti vā cakkhuvīññānātaṃdvārikavīññāṇehi jānitabbā. **Sotavīññeyyāti**-ādīsupi eseva nayo. **Iṭṭhārammaṇabhūtāti** sabhāveneva iṭṭhārammaṇajātikā, iṭṭhārammaṇabhāvaṃ vā pattā. **Kamanīyāti** kāmetabbā. **Manavaḍḍhanakāti** manoharā. Etena parikkappanatopi iṭṭhārammaṇabhāvaṃ saṅgaṇhāti. **Piyajātikāti** piyāyitabbasabhāvā. **Kāmūpasañhitāti** kāmarāgena upecca sambandhanīyā sambandhā kātabbā. Tenāha “**ārammaṇaṃ katvā**”^{ti}-ādi. **Saṅkapparāgoti** vā subhādivasena saṅkappitavatthumhi uppannārāgo. Evamettha vatthukāmaṃ paṭikkhipitvā kilesakāmo vutto tasseva vasena tesampi kāmabhāvasiddhito, kilesakāmassapi iṭṭhavedanā dīṭṭhādisampayogabhedena pavatti-ākārabhedena ca atthi vicittakāti tato visesetum “**citra vicitrārammaṇāni**”^{ti} āha, nānappakārāni rūpādi-ārammaṇāni attho.

Athettha dhīrā vinayanti chandanti atha etesu ārammaṇesu dhitisampannā paṇḍitā chandarāgaṃ vinayanti.

Tajjātikanti tamsabhāvaṃ, atthato pana tassa kāmassa anurūpanti vuttaṃ hoti. Puññassa bhāgo puññabhāgo, puññakoṭṭhāso. Tena nibbatto, tattha vā bhavoti **puññabhāgiyo**. **Apuññabhāgiyoti** etthāpi eseva nayo. Vipākoyeva **vepakkanti** āha “**vohāravipākaṃ**”^{ti}.

Sabbasaṅgāhikāti kusalākusalasādhāraṇā. **Saṃvidahanacetanāti** sampayuttadhammesu saṃvidahanalakkhaṇā cetanā. **Urattālīnti** uraṃ

1. Vi 3. 304 piṭṭhe.

2. Saṃ 1. 3 piṭṭhe.

3. Ma 3. 298 piṭṭhe.

4. Dī 2. 233; Ma 1. 72; Khu 1. 2 piṭṭhādisu.

5. Khu 1. 21 piṭṭhe Dhammapade.

tāletvā. **Ekapadanti** ekapadacitaṃ mantāṃ. Tenāha “**ekapadamantaṃ vā**”ti-
ādi.

Nibbedhikasuttavaṇṇanā niṭṭhitā.

10. Sihanādasuttavaṇṇanā

64. Dasame **tathāgatabalānī**ti aññehi asādhāraṇāni tathāgatasseva balāni. Nanu cetāni sāvakānampi ekaccāni uppajjantīti? Kāmaṃ uppajjanti, yādisāni pana buddhānaṃ ṭhānāṭṭhānaññādīni, na tādisāni tadaññesaṃ kadāci uppajjantīti aññehi asādhāraṇāni. Imameva hi yathāvuttaṃ lesaṃ apekkhitvā sādharmaṇabhāvato āsayānusayaññādīsu eva asādhāraṇasamaññā niruḷhā. Yathā pubbabuddhānaṃ balāni puññassa sampattiyā āgatāni, tathā āgatabalānīti vā **tathāgatabalāni**. Usabhassa idaṃ **āsabham**, seṭṭhatṭhānaṃ, **pamukhanādanti** seṭṭhanādaṃ. **Paṭivedhaññañceva desanāññañcā**ti ettha paññāya pabhāvitāṃ attano ariyaphalāvahaṃ paṭivedhaññaṃ. Karuṇāya pabhāvitāṃ sāvakānaṃ ariyaphalāvahaṃ desanāññaṃ. Tattha paṭivedhaññaṃ uppajjamānaṃ uppannanti duvidhaṃ. Taṃ hi abhinikkhamaṇato yāva arahattamaggā uppajjamānaṃ, phalakkhaṇe uppannaṃ nāma. Tusitabhavanato yāva mahābodhipallaṅke arahattamaggā uppajjamānaṃ, phalakkhaṇe uppannaṃ nāma. Dīpaṅkarato paṭṭhāya yāva arahattamaggā uppajjamānaṃ, phalakkhaṇe uppannaṃ nāma. Desanāññaṃampi pavattamānaṃ pavattanti duvidhaṃ. Taṃ hi yāva aññātaḥkoṇḍaññassa sotāpattimaggā pavattamānaṃ, phalakkhaṇe pavattaṃ nāma. Tesu paṭivedhaññaṃ lokuttaraṃ, desanāññaṃ lokiyaṃ. Ubhayampi panetaṃ aññehi asādhāraṇaṃ, buddhānaññeva orasaññaṃ.

Ṭhānañca ṭhānato pajānāti kāraṇaṃca kāraṇato pajānāti. Yasmā tattha phalaṃ tiṭṭhati tadāyattavuttitāya uppajjati ceva pavattati ca, tasmā ṭhānanti vuccati. Bhagavā “ye ye dhammā yesaṃ yesaṃ dhammānaṃ hetū paccayā uppādāya, taṃ taṃ ṭhānaṃ, ye ye dhammā yesaṃ yesaṃ dhammānaṃ na hetū na paccayā uppādāya, taṃ taṃ aṭṭhānaṃ”ti pajānanto ṭhānato aṭṭhānato yathābhūtaṃ pajānāti.

Samādiyantīti **samādānāni**, tāni pana samādiyitvā katāni hontīti āha “**samādiyitvā katānan**”ti. **Kammameva vā kammamādānanti** etena “samādānan”ti saddassa apubbathābhāvaṃ dasseti muttagatasadde gatasaddassa viya. **Gatīti** nirayādigatiyo. **Upadhīti** attabhāvo. **Kālōti** kammassa vipaccanārahakālo. **Payogoti** vipākuppattiyā paccayabhūtā kiriyā.

Catunnaṃ jhānānanti paccanīkajjhāpanaṭṭhena ārammaṇūpanijjhānaṭṭhena ca catunnaṃ rūpāvacarajjhānānaṃ. Catukkanayena hetam vuttam. **Aṭṭhannaṃ vimokkhānanti** “rūpī rūpāni passatī”ti-ādīnā¹ aṭṭhannaṃ vimokkhānaṃ. **Tiṇṇaṃ samādhīnanti** savitakkasavicārādīnaṃ tiṇṇaṃ samādhīnaṃ. **Navannaṃ anupubbasaṃpattīnanti** paṭhamajjhānasamāpatti-ādīnaṃ navannaṃ anupubbasaṃpattīnaṃ. Ettha ca paṭipāṭiyā aṭṭhannaṃ samādhītipi nāmaṃ, samāpattītipi cittekaggatāsabbhāvato, nirodhasamāpattiyā tadabhāvato na samādhīti nāmaṃ. **Hānabhāgiyaṃ dhammanti** appaṇṇehi paṭhamajjhānādīhi vuṭṭhitassa saññāmanasikārānaṃ kāmātipakkhandanaṃ. **Visesabhāgiyaṃ dhammanti** paṇṇehi paṭhamajjhānādīhi vuṭṭhitassa saññāmanasikārānaṃ dutiyajjhānādīpakkhandanaṃ. Iti saññāmanasikārānaṃ kāmādidutiyajjhānādīpakkhandanāni hānabhāviyavisesabhāgiyadhammāti dassitāni. Tehi pana jhānānaṃ taṃsabhāvataṃ dhammasaddena vuttā. **Tasmāti** vuttamevatthaṃ hetubhāvena paccāmasati. **Vodānanti** paṇṇatāsānkhātaṃ vodānaṃ. Tañhi paṭhamajjhānādīhi vuṭṭhahitvā dutiyajjhānādīnaṃ adhigamassa paccayattā “**vuṭṭhānan**”ti vuttam. Ye pana “nirodhato phalasaṃpattiyā vuṭṭhānanti pāḷi natthī”ti vadanti, te “nirodhā vuṭṭhahantassa nevasaññānāsaññāyatanam phalasaṃpattiyā anantarapaccayena paccayo”ti imāya **pāḷiyaṃ**² paṭisedhetabbā.

Sihanādasuttavaṇṇanā niṭṭhitā.

Mahāvaggavaṇṇanā niṭṭhitā.

1. Ma 2. 205; Ma 3. 264; Abhi 1. 65; Khu 9. 231 piṭṭhesu.

7. Devatāvagga

1. Anāgāmiphalasuttādivaṇṇanā

65-67. Sattamassa paṭhamādīni uttānatthāni. Tatiye abhisamācāre uttamasamācāre bhavaṃ **ābhisamācārikam**, vattappaṭipattivattam. Tenāha “**uttamasamācārabhūtan**”ti-ādi. **Sekhapaṇṇattisīlanti** sekhiyavasena paññattasīlam.

Anāgāmiphalasuttādivaṇṇanā niṭṭhitā.

4. Saṅgaṇikārāmasuttādivaṇṇanā

68-69. Catutthe gaṇena saṅgaṇaṃ samodhānaṃ gaṇasaṅgaṇikā, sā āramitabbaṭṭhena ārāmo etassāti **gaṇasaṅgaṇikārāmo**. **Saṅgaṇikā**ti vā sakaparisasamodhānaṃ. **Gaṇoti** nānājanasamodhānaṃ. Sesamettha suviññeyyameva. Pañcamaṃ uttānatthameva.

Saṅgaṇikārāmasuttādivaṇṇanā niṭṭhitā.

6. Samādhisuttavaṇṇanā

70. Chaṭṭhe paṭippassambhanaṃ paṭippassaddhīti atthato ekanti āha “**na paṭippassaddhiladdhenāti kilesappaṭippassaddhiyā aladdhenā**”ti. Sukkapakkhe **santenā**ti-ādīsu aṅgasantatāya ārammaṇasantatāya sabbakilesasantatāya ca santena, atappaniyaṭṭhena **pañītena**, kilesappaṭippassaddhiyā laddhattā, kilesappaṭippassaddhibhāvaṃ vā laddhattā **paṭippassaddhiladdhena**, passaddhikilesena vā arahatā laddhattā **paṭippassaddhiladdhena**, ekodibhāvena adhigatattā **ekodibhāvādhigatenāti** evamattho daṭṭhabbo.

Samādhisuttavaṇṇanā niṭṭhitā.

7. Sakkhibhabbasuttādivaṇṇanā

71-74. Sattame **tasmim tasmim viseseti** tasmim tasmim sacchikātabbe visese. Sakkhibhāvāya paccakkhakāritāya bhabbo sakkhibhabbo, tassa bhāvo sakkhittabbatā. Tam **sakkhibhabbatam. Sati sati-āyataneti** sati satikāraṇe. Kiñcetha kāraṇam? Abhiññā vā abhiññāpādakajjhānam vā, avasāne pana chaṭṭhābhiññāya arahattam vā kāraṇam, arahattassa vipassanā vāti veditabbam. Yam hi tam tatra tatra sakkhibhabbatāsankhātam iddhidhapaccanubhavanādi, tassa abhiññā kāraṇam. Atha iddhidhapaccanubhavanādi-abhiññā, evam sati abhiññāpādakajjhānam kāraṇam. Arahattampi “kudāssu nāmāham tadāyatanam upasampajja viharissāmī”ti anuttaresu vimokkhesu piham upaṭṭhapetvā chaṭṭhābhiññam nibbattentassa kāraṇam. Idañca sabbasādhāraṇam na hoti, sādharāṇavasena pana arahattassa vipassanā kāraṇam. Atha pā **sati āyataneti** tassa tassa visesādhigamassa upanissayasankhāte kāraṇe satīti evamettha attho daṭṭhabbo.

Hānabhāgiyādīsu “paṭhamajjhānassa lābhim kāmasahagatā saññāmanasikārā samudācaranti, hānabhāgiyo samādhī. Tadanudhammatā sati santiṭṭhati, ṭhitibhāgiyo samādhī. Avitakkasahagatā saññāmanasikārā samudācaranti, visesabhāgiyo samādhī. Nibbidāsahagatā saññāmanasikārā samudācaranti virāgūpasamhitā, nibbedhabhāgiyo samādhī”ti¹ iminā nayena sabbasamāpattiyo vitthāretvā hānabhāgiyādi-attho veditabbo. Tattha² **paṭhamajjhānassalābhinti** yvāyam appaṇṇassa paṭhamassa jhānassa lābhī, tam. **Kāmasahagatā saññāmanasikārā samudācarantīti** tato vuṭṭhitam ārammaṇavasena kāmasahagatā hutvā saññāmanasikārā samudācaranti tudanti, tassa kāmānatītassa kāmānupakkhandānam saññāmanasikārānam vasena so paṭhamajjhānasamādhī hāyati parihāyati, tasmā **hānabhāgiyo** vutto. **Tadanudhammatāti** tadanurūpasabhāvo. **Sati santiṭṭhatīti** idam micchāsatiṃ sandhāya vuttam. Yassa hi paṭhamajjhānānurūpasabhāvā paṭhamajjhānam santato paṇītato disvā assādayamānā abhinandamānā nikanti hoti, tassa nikantivasena so paṭhamajjhānasamādhī neva hāyati na vaḍḍhati, ṭhitiḷḷāsiko hoti. Tena

1. Abhi 2. 343 piṭṭhe.

2. Abhi-Ṭṭha 2. 400 piṭṭhepi passitabbam.

vuttaṃ “**ṭhitibhāgiyo samādhi**”ti. **Avitakkasahagatā**ti avitakkaṃ dutiyajjhānaṃ santato paṇītato manasikaroto ārammaṇavasena avitakkasahagatā. **Saññāmanasikārā samudācarantī**ti paguṇapaṭhamajjhānato vuṭṭhitam dutiyajjhānādhighamatthāya codenti tudanti. Tassa uparidutiyajjhānānupakkhandānaṃ saññāmanasikārānaṃ vasena so paṭhamajjhānasamādhi visesabhūtaṃ dutiyajjhānassa uppattipadaṭṭhānatāya “**visesabhāgiyo**”ti vutto.

Nibbidāsahagatāti tameva paṭhamajjhānalābhiṃ jhānato vuṭṭhitam nibbidāsaṅkhātena vipassanāñāṇena sahaḡabhā. Vipassanāñāṇam hi jhānaṅgesu pabhedena upaṭṭhahantesu nibbindati ukkaṇṭhati, tasmā “**nibbidā**”ti vuccati. **Samudācarantī**ti nibbānasacchikiriyatthāya codenti tudanti. **Virāgūpasamhitā**ti virāgasāṅkhātena nibbānena upasamhitā. Vipassanāñāṇam hi sakkā iminā maggena virāgam nibbānam sacchikātunti pavattito “virāgūpasamhitam”ti vuccati. Taṃsampayuttā saññāmanasikārā virāgūpasamhitā eva nāma. Tassa tesam saññāmanasikārānaṃ vasena paṭhamajjhānasamādhi ariyamaggappaṭivedhassa padaṭṭhānatāya “**nibbebhogiyō**”ti vutto. Hānaṃ bhajantīti **hānabhāgiyā**, hānabhāgo vā etesaṃ atthīti **hānabhāgiyā**, parihānakoṭṭhāsikāti attho. Iminā nayena **ṭhitibhāgiyo** veditabbo. Aṭṭhamādīni uttānatthāneva.

Sakkhibhabbasuttādivaṇṇanā niṭṭhitā.

Devatāvaggavaṇṇanā niṭṭhitā.

8. Arahattavagga

1. Dukkhasuttādivaṇṇanā

75-77. Aṭṭhamassa paṭhamādīsū natthi vattabbaṃ. Tatiye **tividham kuhanavatthuntī** paccayappaṭisevanasāmantajappana-iriyāpathappavattanasāṅkhātāṃ tividham kuhanavatthunī. **Ukkhipitvā**ti “mahākuṭumbiko mahānāviko mahādānapatī”ti-ādinā paggaṇhitvā lapanam. **Avakkhipitvā**ti “kim imassa jīvitam, bījabhojano nāmāyan”ti hīletvā lapanam.

Dukkhasuttādivaṇṇanā niṭṭhitā.

4. Sukhasomanassasuttavaṇṇanā

78. Catutthe yathāvuttadhammādīsu tassa kilesanimittam dukkham anavassananti¹ “sukhasomanassabahulo viharatī”ti vuttam. Kāyikasukhañceva cetasikasomanassañca bahulam assāti **sukhasomanassabahulo**. Yavati tena phalam missitam viya hotīti **yoni**, ekantikam kāraṇam. **Assāti** yathāvuttassa bhikkhuno. **Paripuṇṇanti** avikalam anavasesam.

Sukhasomanassasuttavaṇṇanā niṭṭhitā.

5. Adhigamasuttavaṇṇanā

79. Pañcame āgacchanti etena kusalā vā akusalā vāti āgamanam, kusalākusalānam uppattikāraṇam, tattha kusaloti **āgamanakusalo**. Evaṃ dhamme manasikaroto kusalā vā akusalā vā dhammā abhivaḍḍhantīti evam jānanto. Apagacchanti kusalā vā akusalā vā etenāti apagamanam, tesam eva anuppattikāraṇam, tattha kusaloti **apagamanakusalo**. Evaṃ dhamme manasikaroto kusalā vā akusalā vā dhammā nābhivaḍḍhantīti evam jānanto. **Upāyakusaloti** ṭhānuppattikapaññāsamannāgato. Idañca accāyikakicce vā bhaye vā uppanne tassa tikicchanattham ṭhānuppattiyā kāraṇajānanavasena veditabbam.

Adhigamasuttavaṇṇanā niṭṭhitā.

6. Mahantattasuttādivaṇṇanā

80-81. Chaṭṭhe **sampatteti** kilese sampatte. Sattamam uttānameva.

Mahantattasuttādivaṇṇanā niṭṭhitā.

1. Anavadassananti (Ka)

8. Dutyanirayasuttādivaṇṇanā

82-84. Aṭṭhame **kāyapāgabbhiyādīhīti ādi**-saddena vacīpāgabbhiyaṃ manopāgabbhiyañca saṅgaṇhāti. Navamādīni uttānatthāneva.

Dutyanirayasuttādivaṇṇanā niṭṭhitā.

Arahattavaggavaṇṇanā niṭṭhitā.

9. Sītivagga

1. Sītibhāvasuttavaṇṇanā

85. Navamassa paṭhame **sītibhāvanti** nibbānaṃ, kilesavūpasamaṃ vā. **Niggaṇhātīti** accāraddhavīriyatādīhi uddhataṃ cittaṃ uddhaccapakkhato rakkhaṇavasena niggaṇhāti. **Paggaṇhātīti** atisithilavīriyatādīhi līnaṃ cittaṃ kosajjapātato rakkhaṇavasena paggaṇhāti. **Sampahaṃsetīti** samappavattacittaṃ tathāpavattiyaṃ paññāya toseti uttejeti vā. Yadā vā paññāpayogamandatāya upasamasukhānadhigamena vā nirassādaṃ cittaṃ bhāvanāya na pakkhandati, tadā jāti-ādīni samvegavatthūni paccavekkhitvā sampahaṃseti samuttejeti. **Ajjhupekkhatīti** yadā pana cittaṃ alīnaṃ anuddhataṃ anirassādaṃ ārammaṇe samappavattaṃ sammadeva bhāvanāvīthim¹ otiṇṇaṃ hoti, tadā paggahaniggahasampahaṃsanesu kiñci byāpāraṃ akatvā samappavattesu assesu sārathī viya ajjupekkhati, upekkhakova hoti. **Paṇītādhimuttikoti** paṇīte uttame maggaphale adhimutto ninnapoṇapabbhāro.

Sītibhāvasuttavaṇṇanā niṭṭhitā.

2. Āvaraṇasuttādivaṇṇanā

86-95. Dutīye **acchandikoti** kattu kamyatākusalacchandarāhito. Uttarakurukā manussā acchandiḱaṭṭhānaṃ pavīṭṭhā. **Duppaññoti** bhavaṅgapaññāya

1. Bhāvanāvīdhim (Ka)

parihīno. Bhavaṅgapaññāya pana paripuṇṇāyapi yassa bhavaṅgaṃ lokuttarassa paccayo na hoti, sopi duppañño eva nāma. **Abhabbo niyāmaṃ okkamituṃ kusalesu dhammesu sammattanti** kusalesu dhammesu sammattaniyāmasaṅkhātāṃ ariyamaggaṃ okkamituṃ adhigantuṃ abhabbo. **Na kammāvaraṇatāyāti**-ādīsu abhabbavipariyāyena attho veditabbo. Catutthādīni uttānatthāni.

Āvaraṇasuttādivaṇṇanā niṭṭhitā.

Sītivaggavaṇṇanā niṭṭhitā.

10. Ānisaṃsavagga

1. Pātubhāvasuttādivaṇṇanā

96-106. Dasamassa paṭhamādīsu natthi vattabbaṃ. Aṭṭhame mettā etassa atthīti mettāvā, tassa bhāvo **mettāvata**, mettāpaṭipatti, tāya. Sā pana mettāvata mettāvasena pāricariyāti āha “**mettāyuttāya pāricariyāyā**”ti. **Paricaranti** vippakatabrahmacariyattā. Pariciṇṇasatthukena sāvakena nāma satthuno yāva dhammena kātabbā pāricariyā, tāya sammadeva sampādittā. Navamādīni uttānatthāni.

Pātubhāvasuttādivaṇṇanā niṭṭhitā.

Ānisaṃsavaggavaṇṇanā niṭṭhitā.

107-116. Ekādasamavaggo uttānatthoyeva.

**Iti manorathapūraṇiyā aṅguttaranikāyaṭṭhakathāya
Chakkanipātavaṇṇanāya anattānatthadīpanā samattā.**

Sattakanipāta

Paṇṇāsaka

1. Dhanavaggavaṇṇanā

1-10. Sattakanipātassa paṭhamo vaggo uttānattho.

2. Anusayavagga

4. Puggalasuttavaṇṇanā

14. Dutiyaassa catutthe ubhato ubhayathā, ubhato ubhohi bhāgehi vimuttoti **ubhatobhāgavimutto** ekadesasarūpekasesanayena. **Dvīhi bhāgehīti** karaṇe nissakke cetam. Bahuvacanam. Āvutti-ādivasena ayam niyamo veditabboti āha “**arūpasamāpattiyā**”ti-ādi. Etena “samāpattiyā vikkhambhanavimokkhena, maggena samucchedavimokkhena vimuttattā ubhatobhāgavimutto”ti evam pavatto **Tipiṭakacūlanāgattheravādo**, “nāmakāyato rūpakāyato ca vimuttattā ubhatobhāgavimutto”ti evam pavatto **Tipiṭakamahārakkhitattheravādo**, “samāpattiyā vikkhambhanavimokkhena ekavāram, maggena samucchedavimokkhena ekavāram vimuttattā ubhatobhāgavimutto”ti evam pavatto **tipiṭakacūlābhayattheravādo** cāti imesam tiṇṇampi theravādānam ekajjham saṅgaho katoti daṭṭhabbam. Ettha ca paṭhamavāde dvīhi bhāgehi vimutto ubhatobhāgavimutto vutto, dutyavāde ubhato bhāgato vimuttoti ubhatobhāgavimutto, tatiyavāde dvīhi bhāgehi dve vāre vimuttoti ayametesam visesoti. **Vimuttoti** kilesehi vimutto, kilesavikkhambhanasamucchedanehi vā kāyato vimuttoti attho.

Soti ubhatobhāgavimutto. Kāmañcettha rūpāvacaracatutthajjhānampi arūpāvacarajjhānam viya duvaṅgikam āneñjappattanti vuccati, tam pana padaṭṭhānam katvā arahattam patto ubhatobhāgavimutto nāma na hoti

rūpakāyato avimuttattā. Tam hi kilesakāyatova vimuttaṃ, na rūpakāyato, tasmā tato vuṭṭhāya arahattaṃ patto ubhatobhāgavimutto na hotīti āha “**catunnaṃ arūpa -pa- pañcavidho hotī**”ti. **Arūpasamāpattīnanti** niddhāraṇe sāmivacanaṃ. **Arahattaṃ patta-anāgāminoti** bhūtapubbagatiyā vuttaṃ. Na hi arahattaṃ patto anāgāmī nāma hoti. “Rūpī rūpāni passatī”ti-ādike nirodhasamāpatti-ante aṭṭha vimokkhe vatvā—

“Yato ca kho Ānanda bhikkhu ime aṭṭha vimokkhe kāyena phusitvā viharati, paññāya cassa disvā āsavā parikkhīṇā honti. Ayaṃ vuccati Ānanda bhikkhu ubhatobhāgavimutto”ti—

yadipi **mahānidāne**¹ vuttaṃ, tam pana ubhatobhāgavimuttaseṭṭhavasena vuttanti, idha pana sabba-ubhatobhāgavimutte saṅgahaṇatthaṃ “**pañcavidho hotī**”ti vatvā “**pāḷi panettha -pa- aṭṭhavimokkhalābhino vasena āgatā**”ti āha. Majjhimanikāye pana **kīṭāgirisutte**²—

“Katamo ca bhikkhave puggalo ubhatobhāgavimutto? Idha bhikkhave ekacco puggalo ye te santā vimokkhā atikkamma rūpe āruppā, te kāyena phusitvā viharati, paññāya cassa disvā āsavā parikkhīṇā honti. Ayaṃ vuccati bhikkhave puggalo ubhatobhāgavimutto”ti—

arūpasamāpattivasena cattāro ubhatobhāgavimuttā, seṭṭho ca vutto vuttalakkhaṇūpapattito. Yathāvuttesu hi pañcasu purimā cattāro samāpattisīsaṃ nirodhaṃ na³ samāpajjantīti pariyāyena ubhatobhāgavimuttā nāma. Aṭṭhasamāpattilābhī anāgāmī tam samāpajjitvā tato vuṭṭhāya vipassanaṃ vadḍhetvā arahattaṃ pattoti nippariyāyena ubhatobhāgavimuttaseṭṭho nāma.

Katamo ca puggaloti-ādi puggalapaññattipāḷi. Tattha **katamoti** pucchāvacanaṃ. **Puggaloti** asādhāraṇato pucchitabbavacanaṃ. **Idhāti** imasmim sāsane. **Ekaccoti** eko. **Aṭṭha vimokkhe kāyena phusitvā**

1. Dī 2. 60 piṭṭhe.

2. Ma 2. 143 piṭṭhe.

3. Pana (Ka) Abhi-Ṭṭha 3. 41 piṭṭhe passitabbaṃ.

vīharatīti aṭṭha samāpattiyo samāpajjitvā nāmakāyato paṭilabhitvā viharati.

Paññāya cassa disvā āsavā parikkhīṇā hontīti vipassanāpaññāya saṅkhāragataṃ, maggapaññāya cattāri saccāni passivā cattāropi āsavā parikkhīṇā hontī. **Disvāti** dassanahetu. Na hi āsave paññāya passanti, dassanakāraṇā pana parikkhīṇā disvā parikkhīṇātī vuttā dassanāyattaparikkhayattā. Evaṃ hi dassanaṃ āsavānaṃ khayassa purimakiriyābhāvena vuttaṃ.

Paññāvimumuttoti visesato paññāya eva vimumutto, na tassa adhiṭṭhānabhūtena aṭṭhavimokkhasaṅkhātena sātisayena samādhināti paññāvimumutto. Yo ariyo anadhigata-aṭṭhavimokkho sabbaso āsavehi vimumutto, tassetam̐ adhivacanaṃ. Adhigatepi hi rūpajjhānavimokkhe na so sātisayasamādhinissitoti na tassa vasena ubhatobhāgavimuttatā hotīti vuttovāyamattho. Arūpajjhānesu pana ekasmimpi sati ubhatobhāgavimuttoyeva nāma hoti. Tena hi aṭṭhavimokkhekadesena taṃnāmadānasamatthena aṭṭhavimokkhalābhītveva vuccati. Samudāye hi pavatto vohāro avayavepi dissati yathā taṃ “sattisayo”ti anavasesato āsavānaṃ parikkhīṇatā. **Aṭṭhavimokkhapaṭikkhepavaseneva** na ekadesabhūtarūpajjhānapaṭikkhepavasena. Evaṃ hi arūpajjhānekadesābhāvepi aṭṭhavimokkhapaṭikkhepo na hotīti siddham̐ hoti. Arūpāvacarajjhānesu hi ekasmimpi sati ubhatobhāgavimuttoyeva nāma hoti.

Phuṭṭhantaṃ sacchikatoti phuṭṭhānaṃ anto phuṭṭhanto, phuṭṭhānaṃ arūpajjhānānaṃ anantaro kāloti adhippāyo. Accantasamyoge cetam̐ upayogavacanaṃ. Taṃ phuṭṭhānantarakārameva sacchikātabbam̐ sacchikato sacchikaraṇūpāyenāti vuttaṃ hoti, bhāvanapuṃsakaṃ vā etaṃ “ekamantaṃ nisīdī”ti-ādīsu viya. Yo hi arūpajjhānena rūpakāyato nāmakāyekadesato ca vikkhambhanavimokkhena vimumutto, tena nirodhasaṅkhāto vimokkho ālocito pakāsiko viya hoti, na pana kāyena sacchikato. Nirodham̐ pana ārammaṇaṃ katvā ekaccesu āsavesu khepitesu tena so sacchikato hoti, tasmā so sacchikātabbam̐ nirodham̐ yathā-ālocitam̐nāmakāyena sacchikarotīti “**kāyasakkhī**”ti vuccati,

na tu “vimutto”ti ekaccānaṃ āsavānaṃ aparikkhīṇattā. Tenāha **“jhānaphassaṃ paṭhamam phusati, pacchā nirodham nibbānam sacchikaroti”**ti. Ayaṃ catunnaṃ arūpasamāpattīnaṃ ekekato vuṭṭhāya saṅkhāre sammasitvā kāyasakkhibhāvaṃ pattānaṃ catunnaṃ, nirodhā vuṭṭhāya aggamaggappatta-anāgāmino ca vasena ubhatobhāgavimutto viya pañcavidho nāma hotīti vuttam **abhidhammaṭīkāyam**¹ “kāyasakkhimhipi eseva nayo”ti. **Ekacce āsavāti** heṭṭhimamaggavajjhā āsavā.

Diṭṭhantaṃ pattoti dassanasāṅkhātassa sotāpattimaggañāṇassa anantaram pattoti vuttam hoti. “Diṭṭhattā patto”tipi pāṭho. Etena catusaccadassanasāṅkhātāya diṭṭhiyā nirodhassa pattatam dīpeti. Tenāha **“dukkhāsāṅkhārā”**ti-ādi. Tattha **paññāyāti** maggapaññāya. Paṭhamaphalaṭṭhato paṭṭhāya yāva aggamaggaṭṭhā diṭṭhippatto. Tenāha **“sopi kāyasakkhī viya chabbidho hoti”**ti. Yathā pana paññāvimutto, evam ayampi sukkhavipassako catūhi arūpajjhānehi vuṭṭhāya diṭṭhippattabhāvappattā cattāro cāti pañcavidho hotīti veditabbo. Saddhāvimuttepi eseva nayo. **Idam dukkhanti** ettakaṃ dukkham, na ito uddham dukkhanti. **Yathābhūtaṃ pajānāti** ṭhapetvā taṇham upādānakkhandhapañcakaṃ dukkhasaccanti yāthāvato pajānāti. Yasmā pana taṇhā dukkham janeti nibbatteti, tato taṃ dukkham samudeti, tasmā nam **“ayaṃ dukkhasamudayo”**ti **yathābhūtaṃ pajānāti**. Yasmā pana idam dukkhaṇca samudayo ca nibbānam patvā nirujjhati, appavattim gacchati, tasmā nam **“ayaṃ dukkhanirodho”**ti **yathābhūtaṃ pajānāti**. Ariyo pana aṭṭhaṅgiko maggo taṃ dukkhanirodham gacchati, tena taṃ **“ayaṃ dukkhanirodhagāminī paṭipadā”**ti **yathābhūtaṃ pajānāti**. Ettāvatā nānākkhaṇe saccavavatthānaṃ dassitam. Idāni taṃ ekakkhaṇe dassetum **“tathāgatappaveditā”**ti-ādi vuttam. **Tathāgatappaveditāti** tathāgatena bodhimaṇḍe paṭividdhā veditā pākaṭākatā. **Dhammāti** catusaccadhammā. **Vodiṭṭhā** hontīti sudiṭṭhā. **Vocaritāti** sucaritā, paññāya suṭṭhu carāpitāti attho. **Ayanti** ayaṃ evarūpo puggalo diṭṭhippattoti.

Saddhāya vimuttoti saddahanavasena vimutto. Etena sabbathā avimuttassapi saddhāmattena vimuttabhāvaṃ dasseti. **Saddhāvimuttoti** vā saddhāya

1. Mūlaṭī 3. 35 piṭṭhe.

adhimuttoti attho. Kim pana nesaṃ kilesappahāne nānattaṃ atthīti? Natthi.
Atha kasmā saddhāvimutto diṭṭhippattaṃ na pāpuṇātīti?

Āgamanīyanānattena. Diṭṭhippattaṃ hi āgamanamhi kilese vikkhambhento
appadukkhena akasirena akilamantova sakkoti vikkhambhitum,
saddhāvimutto pana dukkhena kasirena kilamanto sakkoti vikkhambhitum,
tasmā saddhāvimutto diṭṭhippattaṃ na pāpuṇātīti. Tenāha “**etassa hī**”ti-ādi.

Saddahantassāti “ekaṃsato ayaṃ paṭipadā kilesakkhayaṃ āvahati
sammāsambuddhena bhāsītattā”ti evaṃ saddahantassa. Yasmā panassa
aniccānupassanādīhi niccasaññāpahānavasena bhāvanāya pubbenāparaṃ
vīsesaṃ passato tattha tattha paccakkhatāpi atthi, tasmā vuttaṃ
“**saddahantassa viyā**”ti. Sesapadadvayaṃ tasseva vevacanaṃ. Ettha ca
pubbabhāgamaggabhāvanāti vacanena āgamanīyanānattena
diṭṭhippattasaddhāvimuttānaṃ paññānānattaṃ hotīti dassitaṃ.

Abhidhammatṭhakathāyampi¹ “nesaṃ kilesappahāne nānattaṃ natthi,
paññāya nānattaṃatthiyevā”ti vatvā “āgamanīyanānatteneva saddhāvimutto
diṭṭhippattaṃ na pāpuṇātīti sanniṭṭhānaṃ katan”ti vuttaṃ.

Ārammaṇaṃ yāthāvato dhāreti avadhāretīti dhammo, paññā. Taṃ
paññāsaṅkhātaṃ dhammaṃ adhimattatāya pubbaṅgamaṃ hutvā pavattaṃ
anussaratīti **dhammānusārī**. Tenāha “**dhammo**”ti-ādi. **Paññāpubbaṅgamanti**
paññāpadhānaṃ. “Saddhaṃ anussarati, saddhāpubbaṅgamaṃ maggaṃ
bhāvetī”ti imamatthaṃ **eseva nayoti** atidisati. Paññaṃ vāhetīti **paññāvāhī**,
paññaṃ sātīsayāṃ pavattetīti attho. Tenāha “**paññāpubbaṅgamaṃ**
ariyamaggaṃ bhāvetī”ti. Paññā vā puggalaṃ vāheti nibbānābhimukhaṃ
gameṭīti **paññāvāhī**. **Saddhāvāhī**ti etthāpi iminā nayeneva attho veditabbo.
Ubhatobhāgavimuttādīkathāti ubhatobhāgavimuttādīsū āgamanato paṭṭhāya
vattabbakathā. **Tasmāti visuddhimagge**² vuttattā. Tato eva
Visuddhimaggasaṃvaṇṇanāyaṃ³ vuttanayeneva cettha attho veditabbo.

Puggalasuttavaṇṇanā niṭṭhitā.

1. Abhi-Ṭṭha 3. 43 piṭṭhe.

2. Visuddhi 2. 297, 352 piṭṭhesu.

3. Visuddhi-Ṭṭi 2. 466 piṭṭhe.

5. Udakūpamāsuttavaṇṇanā

15. Pañcame **ekantakālakehī**ti natthikavāda-ahetukavāda-akiriyavādasankhātehi niyatamicchādiṭṭhidhammehi. Tenāha “**niyatamicchādiṭṭhim sandhāya vuttan**”ti. **Evam puggaloti** iminā kāraṇena ekavāram nimuggo nimuggoyeva so hoti. Etassa hi puna bhavato vuṭṭhānaṃ nāma natthīti vadanti makkhaligosālādayo viya. Heṭṭhā heṭṭhā narakaggīnamyeva āhāro. **Sādhu saddhā kusalesūti** kusaladhammesu saddhā nāma sāhu laddhakāti ummujjati, so bhāvattakeneva kusalena ummujjati nāma. **Sādhu hirīti**-ādīsupi eseva nayo. **Caṅkavāreti** rajakānaṃ khāraparissāvane, surāparissāvane vā. **Evam puggaloti** “evam sādhu saddhā”ti imesaṃ saddhādīnaṃ vasena ekavāram ummujjitvā tesam pariḥāniyā puna nimujjatiyeva devadattādayo viya. Devadatto hi aṭṭhasamāpattiyo pañca ca abhiññāyo nibbattetvāpi puna buddhānaṃ paṭipakkhatāya tehi guṇehi pariḥīno ruhiruppādakammaṃ samghabhedakammaṃca katvā kāyassa bhedaṃ dutiyacittavārena cuticcittamanantarā niraye nibbatto. Kokāliko dve aggasāvake upavaditvā padumaniraye nibbatto.

Neva hāyati no vaḍḍhatīti appahonakakālepi na hāyati, pahonakakālepi na vaḍḍhati. Ubhayampi panetaṃ agārikenapi anagārikenapi dīpetabbaṃ. Ekacco hi agāriko appahonakakāle pakkhikabhattaṃ vassikaṃ vā upanibandhāpesi, so pacchā pahonakakālepi pakkhikabhattādīmattameva pavatteti. Anagārikopi ādimhi appahonakakāle uddesaṃ dhutaṅgaṃ vā gaṇhāti, medhāvī balavīriyasampattiyaṃ pahonakakāle tato uttariṃ na karoti. **Evam puggaloti** evaṃ imāya saddhādīnaṃ ṭhitiyā puggalo ummujjitvā ṭhito nāma hoti. **Ummujjitvā pataratīti** sakadāgāmipuggalo kilesatanutāya uṭṭhahitvā gantabbadisābhimukho tarati nāma.

Paṭigādhappatto hotīti anāgāmipuggalaṃ sandhāya vadati. Ime pana satta puggalā udakopamena dīpitā. Satta kira jaṅghavāṇijā addhānamaggappaṭipannā antarāmagge ekaṃ puṇṇanadiṃ pāpuṇimsu. Tesu paṭhamam otiṇṇo udakabhīruko puriso otiṇṇaṭṭhāneyeva nimujjitvā puna saṅṭhātum nāsakkhi, avassaṃva macchakacchapabhattaṃ jāto. Dutiyō otiṇṇaṭṭhāne

nimujjitvā sakim̄ uṭṭhahitvā puna nimuggo uṭṭhātum̄ nāsakkhi, antoyeva macchakacchapabhataṃ jāto. Tatiyo nimujjitvā uṭṭhito majjhe nadiyā ṭhatvā neva orato āgantum̄, na pāraṃ gantum̄ asakkhi. Catuttho uṭṭhāya ṭhito uttaraṇatittham̄ olokesi. Pañcama uttaraṇatittham̄ oloketvā patarati. Chaṭṭho taṃ disvā pārimatīraṃ gantvā kaṭippamāṇe udake ṭhito. Sattamo pārimatīraṃ gantvā gandhacunṇādīhi nhatvā varavatthādīni nivāsetvā surabhivilepanam̄ vilimpitvā nīluppalamālādīni pilandhitvā nānālankārapaṭimaṇḍito mahānagaraṃ pavisitvā pāsādamāruhitvā uttamabhojanam̄ bhuñjati.

Tattha jaṅghavāṇijā viya ime satta puggalā, nadī viya vaṭṭam̄, paṭhamassa udakabhīrukassa purisassa otiṇṇaṭṭhāneyeva nimujjanam̄ viya micchādīṭṭhikassa vaṭṭe nimujjanam̄, ummujjitvā nimujjanapuriso viya saddhādīnam̄ uppattimatthakena ummujjitvā tāsam̄ hāniyā nimuggapuggalo, majjhe nadiyā ṭhatvā viya saddhādīnam̄ ṭhitiyā ṭhitipuggalo, uttaraṇatittham̄ olokeno viya sotāpanno, patarantapuriso viya kilesakāmāvaṭṭatāya pataranto sakadāgāmī, taritvā kaṭimatte udake ṭhitapuriso viya anāvaṭṭadhammattā anāgāmī, nhatvā pārimatīraṃ uttaritvā thale ṭhitapuriso viya cattāro oghe atikkamitvā nibbānathale ṭhito khīṇāsavabrāhmaṇo, thale ṭhitapurisassa nagaram̄ pavisitvā pāsādam̄ āruyha uttamabhojanabhūñjanam̄ viya khīṇāsavassa nibbānārammaṇasamāpattim̄ appetvā vītināmanam̄ veditabbari.

Udakūpamāsuttavaṇṇanā niṭṭhitā.

6. Aniccānupassīsuttādivaṇṇanā

16-19. Chaṭṭhe “**idha samasīsī kathito**”ti vatvā evam̄ samasīsitaṃ vibhajitvā idhādhippetam̄ dassetum̄ “**so catubbidho hotī**”ti-ādimāha. Rogavasena samasīsī **rogasamasīsī**. Esa nayo sesesupi. **Ekappahārenevāti** ekavelāyameva. Yo cakkhurogādīsū aññatarasmim̄ sati “**ito anuṭṭhito arahattaṃ pāpuṇissāmī**”ti vipassanam̄ paṭṭhapesi, athassa arahattaṅca rogato vuṭṭhānaṅca ekakālameva

hoti, ayaṃ **rogasamasīsī** nāma. **Iriyāpathassa pariyosānanti** iriyāpathantarasamāyogo. Yo ṭhānādīsu iriyāpathesu aññatarāṃ adhiṭṭhāya “avikopetvāva arahattāṃ pāpuṇissāmi”ti vipassanaṃ paṭṭhapesi, athassa arahattappatti ca iriyāpathavikopanañca ekappahārenea hoti, ayaṃ **iriyāpathasamasīsī** nāma. **Jīvitasamasīsī nāmāti** ettha “palibodhasīsāṃ māno, parāmāsasīsāṃ diṭṭhi, vikkhepasīsāṃ uddhaccaṃ, kilesasīsāṃ avijjā, adhimokkhasīsāṃ saddhā, paggahasīsāṃ vīriyaṃ, upaṭṭhānasīsāṃ sati, avikkhepasīsāṃ samādhi, dassanasīsāṃ paññā, pavattasīsāṃ jīvitindriyaṃ, cutisīsāṃ vimokkho, saṅkhārasīsāṃ nirodho”ti **paṭisambhidāyaṃ**¹ vuttesu sattarasasu sīsesu pavattasīsāṃ kilesasīsanti dve sīsāni idhādhippetāni “apubbaṃ acarimaṃ āsavapariyādānañca hoti jīvitapariyādānañca”ti vacanato. Tesu kilesasīsāṃ arahattamaggo pariyādiyati, pavattasīsāṃ jīvitindriyaṃ cuticittāṃ pariyādiyati. Tattha avijjāpariyādāyakaṃ cittaṃ jīvitindriyaṃ pariyādātuṃ na sakkoti, jīvitindriyapariyādāyakaṃ avijjāṃ pariyādātuṃ na sakkoti. Aññaṃ avijjāpariyādāyakaṃ cittaṃ, aññaṃ jīvitindriyapariyādāyakaṃ. Yassa cetāṃ sīsadvayaṃ samaṃ pariyādānaṃ gacchati, so **jīvitasamasīsī** nāma.

Kathaṃ panidaṃ samaṃ hotīti? Vārasamatāya. Yasmiṃ hi vāre maggavutṭhānaṃ hoti, sotāpattimagge pañca paccavekkhaṇāni, sakadāgāṃmimagge pañca, anāgāṃmimagge pañca, arahattamagge cattārīti ekūnavīsatiṃ paccavekkhaṇāṇaṃ patiṭṭhāya bhavaṅgaṃ otaritvā parinibbāyato imāya vārasamatāya idaṃ ubhayasīsapariyādānampi samaṃ hotīti imāya vārasamatāya. Vārasamavuttidāyakena hi maggacittena attano anantaram viya nipphādetabbā paccavekkhaṇavārā ca kilesapariyādānasēva vārāti vattabataṃ arahati. “Vimuttasmiṃ vimuttamiti ñāṇaṃ hotī”ti² vacanato paccavekkhaṇaparisamāpanena kilesapariyādānaṃ sampāpitaṃ nāma hotīti imāya vāravuttiyā samatāya kilesapariyādānajīvitapariyādānānaṃ samatāveditabbā. Tenevāha “**yasmā panassa -pa- tasmā evaṃ vuttan**”ti.

Āyuno vemajjhaṃ anatikkamitvā antarāva kilesaparinibbānena parinibbāyatīti **antarāparinibbāyī**. Tenāha “**yo pañcasu**

1. Khu 9. 405 piṭṭhe.

2. Ma 1. 47; Saṃ 2. 18, 19 piṭṭhesu.

suddhāvāsesū”ti-ādi. **Vemajjheti** avihādīsu yattha uppanno, tattha āyuno vemajjhe. Āyuvemajjhaṃ upahacca atikkamitvā tattha parinibbāyatīti **upahaccaparinibbāyī**. Tenāha “**yo tatthevā**”ti-ādi. Asaṅkhārena appayogena anussāhena akilamanto tikkhindriyatāya sukheneva parinibbāyatīti **asaṅkhāraparinibbāyī**. Tenāha “**yo tesamyevā**”ti-ādi. **Tesamyeva puggalānanti** niddhāraṇe sāmivacanaṃ. **Appayogenāti** adhimattappayogena vinā appakasirena. Sasaṅkhārena sappayogena kilamanto dukkhena parinibbāyatīti **sasaṅkhāraparinibbāyī**. Uddhamvāhibhāvena uddhamassa taṇhāsotaṃ vaṭṭasotañcāti, uddhamā vā gantvā paṭilabhitabbato uddhamassa maggasotanti **uddhamāso**. Paṭisandhivasena akaniṭṭhaṃ gacchatīti **akaniṭṭhagāmī**.

Ettha pana catukkaṃ veditabbaṃ. Yo hi avihato paṭṭhāya cattāro devaloke sodhetvā¹ akaniṭṭhaṃ gantvā parinibbāyati, ayaṃ **uddhamāso akaniṭṭhagāmī nāma**. Ayaṃ hi aviheṣu kappasahassaṃ vasanto arahattaṃ pattuṃ asakkuṇitvā atappaṃ gacchati, tatrāpi dve kappasahassāni vasanto arahattaṃ pattuṃ asakkuṇitvā sudassaṃ gacchati, tatrāpi cattāri kappasahassāni vasanto arahattaṃ pattuṃ asakkuṇitvā sudassiṃ gacchati, tatrāpi aṭṭha kappasahassāni vasanto arahattaṃ pattuṃ asakkuṇitvā akaniṭṭhaṃ gacchati, tattha vasanto aggamaggaṃ adhigacchati. Tattha yo avihato paṭṭhāya dutiyaṃ vā catutthaṃ vā devalokaṃ gantvā parinibbāyati, ayaṃ **uddhamāso na akaniṭṭhagāmī nāma**. Yo kāmabhavato cavitvā akaniṭṭhesu parinibbāyati, ayaṃ **na uddhamāso akaniṭṭhagāmī nāma**. Yo heṭṭhā catūsu devalokesu tattha tattheva nibbattitvā parinibbāyati, ayaṃ **na uddhamāso na akaniṭṭhagāmīti**.

Ete pana aviheṣu uppannasamanantara-āyuvemajjhaṃ appatvāva parinibbāyanavasena tayo antarāparinibbāyino, eko upahaccaparinibbāyī, eko uddhamāsoṭoti pañcavidho, asaṅkhārasasaṅkhāraparinibbāyivibhāgena dasa honti, tathā atappasudassasudassīsūti cattāro dasakāti cattārīsaṃ. Akaniṭṭhe pana uddhamāso natthi, tayo antarāparinibbāyino,

1. Ṭatvā (Ka) Abhi-Ṭṭha 3. 49 piṭṭhe passitabbaṃ.

eko upahaccaparinibbāyīti cattāro,
asaṅkhārasasaṅkhāraparinibbāyivibhāgena aṭṭhāti aṭṭhacattārīsam
anāgāmino. Sattamādīsu natthi vattabbaṃ.

Aniccānupassīsuttādivaṇṇanā niṭṭhitā.

10. Niddasavatthusuttavaṇṇanā

20. Dasame **niddasavatthūnī**ti ādisaddalopenāyaṃ niddesoti āha “**niddasādivatthūnī**”ti. Natthi idāni imassa dasāti **niddaso**. **Pañhoti** ñātum icchito attho. **Puna dasavasso na hotīti** tesam matimattametanti dassetum “**so kirā**”ti kirasaddaggaṇaṃ. **Niddasoti** cetam vacanamattaṃ. Tassa nibbīsādibhāvassa viya ninnavādibhāvassa ca icchitattāti dassetum “**na kevalañcā**”ti-ādi vuttaṃ. **Gāme vicarantoti** gāme piṇḍāya caranto. Na idam titthiyānaṃ adhvacaṇaṃ tesu tannimittassa abhāvā, sāsanepi sekhassapi na idam adhvacaṇaṃ, kimaṅgaṃ pana puthujjanassa. Yassa panetaṃ adhvacaṇaṃ yena ca kāraṇena, tam dassetum “**khīṇāsavassetan**”ti-ādi vuttaṃ. Appaṭisandhikabhāvo hissa paccakkhato kāraṇaṃ. Paramparāya itarāni yāni pāḷiyam āgatāni.

Sikkhāya sammadeva ādānaṃ **sikkhāsamādānaṃ**. Tam panassā paripūriyā veditabbanti āha “**sikkhāttayapūraṇe**”ti. Sikkhāya vā sammadeva ādito paṭṭhāya rakkhaṇaṃ **sikkhāsamādānaṃ**. Tañca atthato pūraṇena paricchinnaṃ arakkhaṇe sabbena sabbaṃ abhāvato, rakkhaṇe ca paripūraṇato. **Balavacchandoti** daḷhacchando. **Āyatinti** anantarānāgatadivasādikālo adhippeto, na anāgatabhavoti āha “**anāgate punadivasādīsūpi**”ti. Sikkhaṃ paripūrentassa tattha nibaddhabhattitā¹ **avigatapematā**. Tebhūmakadhammānaṃ aniccādivasena sammadeva nijjhānaṃ **dhammanisāmanāti** āha “**vipassanāyetaṃ adhvacaṇaṃ**”ti. **Taṇhāvinayeti** bhaṅgānupassanāñāṇānubhāvasiddhe² taṇhāvikkhambhane. **Ekībhave**ti gaṇasaṅgaṇikākilesasaṅgaṇikāvigamasiddhe vivekavāse. **Vīriyārambheti** sammappadhānassa

1. Niviṭṭha-atthitā (Ka)

2. Virāgānupassanādivipassanāñāṇānubhāvasiddhe (pāthikavagge saṅgītisuttaṭikāyaṃ)

paggaṇhane. Taṃ pana sabbaso vīriyassa paribrūhanam hotīti āha “**kāyikacetāsikassa vīriyassa pūraṇe**”ti. **Satiyañceva nipakabhāve cāti** satokāritāya ceva sampajānakāritāya ca. Satisampajāññabaleneva hi vīriyārambho ijjhati. **Diṭṭhipaṭivedheti** maggasammādiṭṭhiyā paṭivijjhane. Tenāha “**maggadassane**”ti.

Niddasavatthusuttavaṇṇanā niṭṭhitā.

Anusayavaggavaṇṇanā niṭṭhitā.

3. Vajjisattakavagga

1. Sārandadasuttavaṇṇanā

21. Tatiyassa paṭhame devāyatanabhāvena cittatā lokassa cittikāraṭṭhānatāya ca **cetiyaṃ** ahoṣi. **Yāvakiṅvanti**¹ ekamevetam padam aniyamato parimānavācī. Kālo cetttha adhippetoti āha “**yattakam kālan**”ti. **Abhiṅham sannipātā**ti nicasannipātā. Taṃ pana nicasannipātataṃ dassetuṃ “**divasassā**”ti-ādi vuttam. **Sannipātabahulā**ti pacurasannipātā. **Vosānanti** saṅkocam. “**Vuddhiyevā**”ti-ādinā vuttamattham byatirekamukhena dassetuṃ “**abhiṅham asannipatantā hi**”ti-ādi vuttam. **Ākulā**ti khubhitā na pasannā². **Bhijjivā**ti vaggabandhato vibhajja visum visum hutvā.

Sannipātabheriyāti sannipātārocanabheriyā. **Addhabhuttā vā**ti sāmibhuttā vā. **Osīdamāneti** hāyamāne.

Suṅkanti bhaṇḍam gahetvā gacchantehi pabbatakhāṇadanaditthagāmadvārādīsu rājapurisānam dātābbabhāgam. **Balinti** nipphanasassādito chabhāgam sattabhāganti-ādinā laddhabbakaram³. **Daṇḍanti** dasavīsaticahāpaṇādikam aparādhānurūpaṃ gahetabbadhaṇḍam. **Vajjidhammanti** vajjirājadhammam. Idāni apaññattapaññāpanādīsu tappaṭikkhepe ca ādinavānisamse ca vitthārato dassetuṃ

1. Dī-Ṭī 2. 123 piṭṭhādīsupi passitabbam.

2. Na phītā na sampannā (Ka)

3. Laddhakaram (Dī-Ṭī 2. 123 piṭṭhe.)

“tesan”ti-ādi vuttaṃ. **Pāricariyakkhamāti** upaṭṭhānakkhamā. **Porāṇaṃ vajjidhammanti** ettha pubbe kira vajjirājāno “ayaṃ coro”ti ānetvā dassite “gaṇhatha naṃ coran”ti avatvā vinicchayamahāmatānaṃ denti. Te vinicchinitvā sace acoro hoti, vissajjenti. Sace coro, attanā kiñci akatvā vohārikānaṃ denti, tepi vinicchinitvā acoro ce, vissajjenti. Coro ce, suddharānaṃ denti. Tepi vinicchinitvā acoro ce, vissajjenti. Coro ce, aṭṭakulikānaṃ denti, tepi tatheva katvā senāpatissa, senāpati uparājassa, uparājā rañño. Rājā vinicchinitvā sace acoro hoti, vissajjenti. Sace pana coro hoti, pavenīpaṇṇakaṃ vācāpeti. Tattha “yena idaṃ nāma kataṃ, tassa ayaṃ nāmadaṇḍo”ti likhitaṃ. Rājā tassa kiriyāṃ tena samānetvā tadanucchavikaṃ daṇḍaṃ karoti. Iti etaṃ porāṇaṃ vajjidhammaṃ samādāya vattantānaṃ manussā na ujjhāyanti. Paramparāgatesu aṭṭakulesu jātā agatigamanaviratā aṭṭamahallakapurisā **aṭṭakulikā**.

Sakkāranti upakāraṃ. **Garubhāvaṃ paccupaṭṭhapetvāti** “ime amhākaṃ garuno”ti tattha garubhāvaṃ paṭi paṭi upaṭṭhapetvā. **Mānessantīti** sammānessanti. Taṃ pana sammānaṃ tesu nesaṃ attamanatāpubbakanti āha “**manena piyāyissanti**”ti. **Nipaccakāraṃ** paṇipātaṃ. **Dassentīti** garucittabhāraṃ dassenti. **Sandhānetunti**¹ sambandhaṃ avicchinnāṃ katvā ghaṭetum.

Pasayhakārassāti balakkārassa. Kāmaṃ vuddhiyā pūjanīyatāya “vuddhihāniyo”ti vuttaṃ, attho pana vuttānukkameneva yojetabbo. Pāḷiyāṃ vā yasmā “vuddhiyeva pāṭikaṅkhā, no parihānī”ti vuttaṃ, tasmā tadanukkamena “**vuddhihāniyo**”ti vuttaṃ.

Vipaccitum aladdhokāse pāpakamme, tassa kammaṃ vipāke vā anavasaroṃ devatopasaggo. Tasmim̄ pana laddhokāse siyā devatopasaggassa avasaroti āha “**anuppannaṃ -pa- vaḍḍhenti**”ti. Eteneva **anuppannaṃ sukhanti** etthāpi attho veditaṃ. Balakāyassa diguṇatiguṇatādassanaṃ paṭibhayabhāvadassananti evamādinā devatānaṃ **saṅgāmasīse sahāyatā** veditaṃ.

1. Sandhāretunti (Ka)

Anicchitanti aniṭṭham. **Āvaraṇatoti** nisedhanato. Dhammato anapetā dhammiyāti idha “**dhammikā**”ti vuttā. Migasūkarādighātāya sunakhādīnaṃ kadḍhitvā vanacaraṇaṃ vājo, tattha niyuttā, te vā vājentīti **vājikā**, migavadhacārino.

Sārandadasuttavaṇṇanā niṭṭhitā.

2. Vassakārasuttavaṇṇanā

22. Dutiye **abhiyātukāmoti** ettha **abhi**-saddo abhibhavanattho “anabhividditun”ti-ādīsu viyāti āha “**abhibhavanatthāya yātukāmo**”ti. **Vajjirājānoti** “vajjetabbā ime”ti ādīto pavattaṃ vacanaṃ upādāya vajjīti laddhanāmā rājāno, vajjiraṭṭhassa vā rājāno vajjirājāno. Raṭṭhassa pana vajjisamaññā tannivāsirājakumāravasena veditabbā. **Rājiddhiyāti** rājabhāvānugatenā pabhāvena. So pana pabhāvo nesam gaṇarājānaṃ mitho sāmaggīya loke pākaṭo. Ciraṭṭhāyī ca ahoṣīti “**samaggabhāvaṃ katheti**”ti vuttaṃ. Anu anu taṃsamaṅgino bhāveti vaḍḍhatīti anubhāvo, anubhāvo eva **ānubhāvo**, patāpo. So pana nesam patāpo hatthi-assādivāhanasampattiyā tattha ca susikkhitabhāvena loke pākaṭo jātoti “**etena -pa- katheti**”ti vuttaṃ. **Tālacchiggaḷenāti** kuñcīkāchiddena. **Asananti** saram. **Atipātayissantīti** atikkāmenti. **Poṅkhānupoṅkhanti** poṅkhassa anupoṅkhaṃ, purimasarassa poṅkhapadānugatapoṅkhaṃ itaraṃ saram katvāti attho. **Avirādhitanti** avirajjhitaṃ. **Ucchindissāmīti** ummūlanavasena kulasantatiṃ chindissāmi. Ayaṇaṃ vaḍḍhanaṃ ayo, tappaṭipakkhena **anayoti** āha “**avaḍḍhin**”ti. Ñātīnaṃ byasaṇaṃ vināso **ñātibyasaṇaṃ**.

Gaṅgāyāti gaṅgāsamīme. **Paṭṭanagāmanti** sakaṭapaṭṭanagāmaṃ. **Tatrāti** tasmīṃ paṭṭane. **Balavāghātājātoti** uppannabalavakodho. **Meti** mayhaṃ. **Gatenāti** gamanena. **Sītaṃ vā uṇhaṃ vā natthi** tāya velāya. **Abhimukhaṃ yuddhenāti** abhimukhaṃ ujukameva saṅgāmakaraṇena. **Upalāpanaṃ** sāmaṃ dānañcāti dassetuṃ “**alan**”ti-ādi vuttaṃ. Bhedopi idha upāyo

evāti vuttaṃ “**aññatra mithubhedā**”ti. Yuddhassa¹ pana anupāyatā pageva pakāsītā. **Idanti** “aññatra upalāpanāya aññatra mithubhedā”ti idaṃ vacanaṃ. **Kathāya nayaṃ labhitvāti** “yāvakiṅkaṇṇa -pa- parihānī”ti imāya bhagavato kathāya upāyaṃ labhitvā. **Anukampāyāti** vajjirājesu anuggahena.

Rājāpi tameva pesetvā sabbe -pa- pāpesīti² rājā taṃ attano santikaṃ āgataṃ “kiṃ ācariya bhagavā avacā”ti pucchi. So “yathā bho samaṇassa gotamassa vacanaṃ na sakkā vajjī kenaci gahetuṃ, apica upalāpanāya vā mithubhedena vā sakkā”ti āha. Tato naṃ rājā “upalāpanāya amhākaṃ hatthi-assādayo nassissanti, bhedeneva te gahessāmi, kiṃ karomā”ti pucchi. Tena hi mahārāja tumhe vajjī ārabba parisati kathaṃ samuṭṭhāpetha, tato ahaṃ “kiṃ te mahārāja tehi, attano santakena kasivaṇṇijjādīni katvā jīvantu³ ete rājāno”ti vatvā pakkamissāmi. Tato tumhe “kiṃ nu bho esa brāhmaṇo vajjī ārabba pavattaṃ kathaṃ paṭibāhati”ti vadeyyātha. Divasabhāge cāhaṃ tesaṃ paṇṇākāraṃ pesessāmi, tampi gāhāpetvā tumhepi mama dosaṃ āropetvā bandhanatāḷanādīni akatvāva kevalaṃ khuramuṇḍaṃ maṃ katvā nagarā nīharāpetha, athāhaṃ “mayā te nagare pākāro parikhā ca kāritā, ahaṃ thiradubbalaṭṭhānaṅka uttānagambhīraṭṭhānaṅka jānāmi, na cirassaṃ dāni taṃ ujum karissāmi”ti vakkhāmi. Taṃ sutvā tumhe “gacchatū”ti vadeyyāthāti. Rājā sabbaṃ akāsi.

Licchavī tassa nikkhamaṇaṃ sutvā “saṭho brāhmaṇo, mā tassa gaṅgaṃ uttāretuṃ adattā”ti āhaṃsu. Tatra ekaccehi “amhe ārabba kathitattā kira so evaṃ karoti”ti vutte “tena hi bhāṇe etū”ti vadiṃsu. So gantvā licchavī disvā “kimāgatattā”ti pucchito taṃ pavattiṃ ārocesi. Licchavino “appamattakena nāma evaṃ garuṃ daṇḍaṃ kātuṃ na yuttan”ti vatvā “kiṃ te tatra ṭhānantaraṃ”ti pucchiṃsu. Vinicchayamahāmacchohamasmīti. Tadeva te ṭhānantaraṃ hotūti. So suṭṭhutaṃ vinicchayaṃ karoti. Rājakumārā tassa santike sippaṃ uggaṇhanti. So patiṭṭhitaguṇo hutvā ekadivasaṃ ekaṃ licchaviṃ gahetvā ekamantaṃ gantvā

1. Daṇḍassa (Ka)

2. Dī-Ṭṭha 2. 112 piṭṭhādīsu passitabbaṃ.

3. Vasantu (Ka)

“dārakā kasantī”ti pucchi. Āma kasanti. Dve goṇe yojetvāti. Āma dve goṇe yojetvāti. Ettakaṃ vatvā nivatto. Tato tamañño “kiṃ ācariyo āhā”ti pucchitvā tena vuttaṃ asaddahanto “na meso yathābhūtaṃ kathetī”ti tena saddhiṃ bhijji.

Brāhmaṇo aparampi ekadivasāṃ ekaṃ licchaviṃ ekamantaṃ netvā “kena byañjanena bhuttosī”ti pucchitvā nivatto. Tampi añño pucchitvā asaddahanto tatheva bhijji. Brāhmaṇo aparampi divasāṃ ekaṃ licchaviṃ ekamantaṃ netvā “atiduggatosi kirā”ti pucchi. Ko evamāhāti. Asuko nāma licchavīti. Aparampi ekamantaṃ netvā “tvaṃ kira bhīrujātiko”ti pucchi. Ko evamāhāti. Asuko nāma licchavīti. Evaṃ aññena akathitameva aññassa kathento tīhi saṃvaccharehi te rājāno aññamaññaṃ bhinditvā yathā dve ekamaggena na gacchanti, tathā katvā sannipātabheriṃ carāpesi. Licchavino “issarā sannipatantu, sūrā sannipatantū”ti vatvā na sannipatimsu. Brāhmaṇo “ayaṃ dāni kālo, sīghaṃ āgacchatū”ti rañño sāsanaṃ pesesi. Rājā sutvāva balabheriṃ carāpetvā nikkhami. Vesālikā sutvā “rañño gaṅgaṃ uttaritum na dassāmā”ti bheriṃ carāpesum. Te sutvā “gacchantu sūrarājāno”ti-ādīni vatvā na sannipatimsu. “Nagarappavesanaṃ na dassāma, dvārāni pidahissāmā”ti bheriṃ carāpesum. Ekopi na sannipati. Yathāvivaṭehi dvārehi pavisitvā sabbe anayabyasanaṃ pāpetvā gato, taṃ sandhāyetaṃ vuttaṃ “rājāpi tameva pesetvā sabbepi bhinditvā gantvā anayabyasanaṃ pāpesī”ti.

Vassakārasuttavaṇṇanā niṭṭhitā.

3. Paṭhamasattakasuttavaṇṇanā

23. Tatiye aparihānāya hitāti **aparihāniyā**¹, na parihāyanti etehīti vā **aparihāniyā**. Evaṃ saṅkhepato vuttamatthaṃ vitthārato dassento “**idhāpi cā**”ti-ādimāha. Tattha **bhatoti**-ādi disāsu āgatasāsane vuttavacanaṃ vuttakathanāṃ. **Vihārasīmā ākulā**

1. Dī-Ṭī 2. 125 piṭṭhādīsopi passitabbaṃ.

yasmā, tasmā **uposathapavāraṇā** **ṭhitā**. **Oḷiyamānakoti** pālito atthato ca vinassamānako. **Ukkhipāpentāti** paṇḍabhāvakarāṇena atthasaṃvaṇṇanāvāsena ca paggaṇhantā.

Sāvattiyam bhikkhūviya¹ pācittiyam desāpetabboti paññāpentā. **Vajjiputtakā viya**² dasavattudīpanena. **Tathā akarontāti** navam katikavattam vā sikkhāpadam vā amaddantā dhammavinayato sāsanaṃ dīpentā khuddakampi ca sikkhāpadam asamūhanantā. **Āyasmā Mahākassapo viya cāti** “suṇātu me āvuso saṃgho, santāmhākaṃ sikkhāpadāni gihigatāni. Gihinopi jānanti ‘idaṃ vo samaṇānaṃ sakyaputtikānaṃ kappati, idaṃ vo na kappati’ti. Sacepi hi mayam khuddānukhuddakāni sikkhāpadāni samūhanissāma, bhavissanti vattāro ‘dhūmakālikam samaṇena gotamena sāvakānaṃ sikkhāpadam paññattam, yāvimesam satthā aṭṭhāsi, tāvime sikkhāpadesu sikkhimsu. Yato imesam satthā parinibbuto, na dānime sikkhāpadesu sikkhanti’ti. Yadi saṃghassa pattakallam, saṃgho apaññattam na paññapeyya, paññattam na samucchindeyya, yathāpaññattesu sikkhāpadesu samādāya vatteyyā”ti³ imam tantim ṭhapento āyasmā Mahākassapo viya ca.

Thirabhāvappattāti sāsane thirabhāvam anivattitabhāvam upagatā. **Therakārakehīti** therabhāvasādhakehi silādiguṇehi asekkhadhammehi. **Bahū rattiyoti** pabbajitā hutvā bahū rattiyo jānanti. Silādiguṇesu patiṭṭhāpanameva sāsane **pariṇāyakatāti** āha “**tisu sikkhāsu pavattenti**”ti. **Ovādamna denti** abhājanabhāvato. **Paveṇikathanti** ācariyaparamparābhataṃ sammāpaṭipattidīpanam dhammakatham. **Sārabhūtam dhammapariyāyanti** samathavipassanāmaggaḥalāsampāpanena sāsane sārabhūtam bojjaṅgakosalla-anuttarasītibhāva⁴ adhicittasuttādiddhammatantim. **Ādikam ovādanti ādi**-saddena “evam te āloketabbam, evam te viloketabbam, evam te samīñjitabbam, evam te pasāretabbam, evam te saṃghāṭipattacīvaram dhāretabbam”ti ovadam saṅgaṇhāti.

Punabbhavadānam **punabbhavo** uttarapadalopena. **Itareti** ye na paccayavasikā na āmisacakkhukā, te **na gacchanti** taṅhāya vasam.

1. Vi 1. 336 piṭṭhe vitthāravatthu.

3. Vi 4. 484 piṭṭhe.

2. Vi 4. 491 piṭṭhe vitthāravatthu.

4. Am 2. 379 piṭṭhe.

Āraññakesūti araññabhāgesu araññapariyāpannesu. Nanu yattha katthacipi taṇhā sāvajjā evāti codanaṃ sandhāyāha “**gāmantasenāsanesu hi**”ti-ādi. Tena “anuttāresu vimokkhesu pihaṃ upaṭṭhāpayato”ti ettha vuttapihādayo viya araññakasenāsanesu sālayatā sevitabbapakkhikā evāti dasseti.

Attanāvāti sayameva. Tena parehi anussāhitānaṃ saraseneva anāgatānaṃ pesalānaṃ bhikkhūnaṃ āgamaṇaṃ, āgatānaṃca phāsuvihāraṃ paccāsīsaṇṭīti dasseti. **Imināva nīhārenāti** imāya paṭipattiyā. **Aggahitadhammaggaṇanti** aggahitassa pariyattidhammassa uggahaṇaṃ. **Gahitasajjhāyakaṇanti** uggahitassa suṭṭhu atthacintanaṃ. Cintanatto hi ayaṃ sajjhāyasaddo. **Entīti**¹ upagacchanti. Nisīdanti² āsanapaññāpanādinā.

Paṭhamasattakasuttavaṇṇanā niṭṭhitā.

4. Dutiyasattakasuttādivaṇṇanā

24-26. Catutthe **karontoyevāti** yathāvuttaṃ tiracchānakatham kathentoyeva. Abhiracchānakathābhāvepi tassa tattha tapparabhāvadassanattamaṃ avadhāraṇavacanaṃ. **Pariyantakārīti** sapariyantaṃ katvā vattā. “Pariyantavatiṃ vācam bhāsītī”ti³ hi vuttaṃ. **Appabhassovāti** parimitakathoyeva ekantena kathetabbasseva kathanato. Samāpattisamāpajjanaṃ **ariyo tuṇhībhāvo**. **Niddāyatiyevāti** niddokkamane anādinavadassī niddāyatiyeva, iriyāpathaparivattanādinā na naṃ vinodeti. **Evaṃ saṃsaṭṭhovāti** vuttanayena gaṇasaṅgaṇikāya saṃsaṭṭho eva viharati. **Dussilāpāpicchā nāmāti** sayam nissilā asantagaṇasambhāvanicchāya samannāgatattā pāpā lāmakā icchā etesanti pāpicchā. Pāpapuggalehi mittikaraṇato **pāpamittā**. Tehi sadā sahapavattanena **pāpasahāyā**. Tattha ninnatādinā tadadhimuttatāya **pāpasampavaṅkā**. Pañcamādinī uttānatthāniyeva.

Dutiyasattakasuttādivaṇṇanā niṭṭhitā.

1. Āgacchanti (Aṭṭhakathāyaṃ)

2. Nisīdāpentī (Ka)

3. Dī 1. 4, 60 piṭṭhesu.

7. Saññāsuttādivaṇṇanā

27-31. Sattame aniccāti anupassati etāyāti **aniccānupassanā**. Tathāpavattavipassanā pana yasmā attanā saḥagatasaññāya bhāvitāya bhāvitā eva hoti, tasmā vuttaṃ “**aniccānupassanādīhi saḥagatasaññā**”ti. Imā satta lokiyavipassanāpi honti “aniccan”ti-ādīnā pavattanato. “Etaṃ santaṃ etaṃ paṇītaṃ yadidaṃ sabbasaṅkhārasamatho”ti āgatavasena panettha dve lokuttarā hontīti veditabbā. “Virāgo nirodho”ti hi tattha nibbānaṃ vuttanti idha virāgasaññā, tā vuttasaññā nibbānārammaṇāpi siyūṃ. Sesametta suviññeyyameva. Aṭṭhamādīni uttānatthāneva.

Saññāsuttādivaṇṇanā niṭṭhitā.

Vajjisattakavaggavaṇṇanā niṭṭhitā.

4. Devatāvagga

5. Paṭhamamittasuttavaṇṇanā

36. Catutthassa pañcame **attano guyhaṃ tassa āvikarotīti** attano guyhaṃ nigguhituṃ yuttakathaṃ aññassa akathetvā tasseva ācikkhati. **Tassa guyhaṃ aññesaṃ nācikkhatīti** tena kathitaguyhaṃ yathā aññe na jānanti, evaṃ anāvikaronto chādeti.

Paṭhamamittasuttavaṇṇanā niṭṭhitā.

6. Dutiyamittasuttādivaṇṇanā

37-43. Chaṭṭhe **piyo ca hoti manāpo cāti** kalyāṇamittalakkhaṇaṃ dassitaṃ. Kalyāṇamitto hi saddhāsampanno ca hoti sīlasampanno sutasampanno cāgasampanno vīriyasampanno satisampanno samādhisampanno paññāsampanno. Tattha saddhāsampattiyā saddahati tathāgatassa sambodhiṃ kammañca kammaphalañca, tena sambodhiyā hetubhūtaṃ sattesu hitasukhaṃ na

pariccajati. Sīlasampattiyā sattānaṃ piyo hoti garu bhāvanīyo codako pāpagarahī vattā vacanakkhamo. Sutasampattiyā saccapaṭṭiccasamuppādādīpaṭṭisaṃyuttānaṃ gambhīrānaṃ kathānaṃ kattā hoti. Cāgasampattiyā appiccho hoti santuṭṭho pavivitto asamsaṭṭho. Vīriyasampattiyā āradhāvīriyo hoti attahitaparāhitapaṭṭipattiyā. Satisampattiyā upaṭṭhitassatī hoti. Samādhisampattiyā avikkhitto hoti samāhitacitto. Paññāsampattiyā aviparītaṃ pajānāti. So satiyā kusalākusalānaṃ dhammānaṃ gatiyo samannesamāno paññāya sattānaṃ hitāhitaṃ yathābhūtaṃ jānitvā samādhinā tattha ekaggacitto hutvā vīriyena satte ahite nisedhetvā hite niyojeti. Tena vuttaṃ “**piyo -pa- niyojeti**”ti. Sattamādīni uttānatthāni.

Dutiyamittasuttādivaṇṇanā niṭṭhitā.

Devatāvaggavaṇṇanā niṭṭhitā.

5. Mahāyaññavagga

1. Sattaviññāṇaṭṭhitisuttavaṇṇanā

44. Pañcamassa paṭhame¹ yasmā **nidassanathe nipāto**, tasmā **seyyathāpi manussāti** yathā manussāti vuttaṃ hoti. **Viseso hotiyeva** satipi bāhirassa kāraṇassa² abhede ajjhattikassa bhinnatā. Nānattaṃ kāye etesaṃ, nānatto vā kāyo etesanti **nānattakāyā**. Iminā nayena sesapadesupi attho veditabbo. **Nesanti** manussānaṃ. Nānattā saññā etesaṃ atthīti **nānattasaññīno**. Sukhasamussayato vinipāto etesaṃ atthīti **vinipātikā** satipi devabhāve dibbasampattiyā abhāvato, apāyesu vā gato natthi nipāto etesanti **vinipātikā**. Tenāha “**catu-apāyavinimuttā**”ti. **Piyaṅkaramātādīnaṃ viyāti** piyaṅkaramātā kira yakkhinī paccūsasamaye anuruddhattherassa dhammaṃ sajjhāyato sutvā—

1. Dī-Ṭī 2. 114 piṭṭhādīsipi passitabbari.

2. Kārakassa (Dī-Ṭī 2. 114 piṭṭhe.)

“Mā saddamakārī piyaṅkara, bhikkhu dhammapadāni bhāsati.
Api dhammapadam vijāniya, paṭipajjema hitāya no siyā.

Pāṇesu ca saṃyamāmasa, sampajānamusā na bhaṇāmasa.
Sikkhema susīlyamattano, api mucceṃa pisācayoniya”ti¹—

evaṃ puttakaṃ saññāpetvā taṃ divasaṃ sotāpattiphalaṃ pattā. Uttaramātā
pana bhagavato dhammaṃ sutvāva sotāpannā jātā.

Brahmakāye paṭhamajjhānanibbatte brahmasamūhe, brahmanikāye vā
bhavāti **brahmakāyikā**. Mahābrahmuno parisāya bhavāti **brahmapārisajjā**
tassa paricārakaṭṭhāne ṭhitattā. Mahābrahmuno purohitaṭṭhāne ṭhitāti
brahmapurohitā. Āyuvanṇādīhi mahantā brahmānoti **mahābrahmāno**. Satipi
tesaṃ tividhānampi paṭhamena jhānena gantvā nibbattabhāve jhānassa pana
pavattibhedena ayaṃ visesoti dassetuṃ “**brahmapārisajjā panā**”ti-ādi
vuttaṃ. **Parittenāti** hīnena. Sā cassa hīnatā chandādīnaṃ hīnatāya veditabbā.
Paṭiladdhamattaṃ vā **hīnaṃ**. **Kappassāti** asaṅkhyeyyakappassa.
Hīnapañītānaṃ majjhe bhavattā **majjhimaṃ**. Sā cassa majjhimatā
chandādīnaṃ majjhimatāya veditabbā. Paṭilabhitvā nātisubhāvitāṃ vā
majjhimaṃ. **Upaḍḍhakappoti** asaṅkhyeyyakappassa upaḍḍhakappo.
Vipphārikataroti brahmapārisajjehi pamāṇato vipulatāro sabhāvato uḷāratāro
ca hoti. Sabhāvenapi hi uḷāratāro. Taṃ panettha appamāṇaṃ. Tassa hi
parittābhādīnaṃ parittasubhādīnaṃcā kāye satipi sabhāvavematte
ekattavaseneva vavatthapīyatīti “ekattakāyā”tveva te vuccanti. **Pañītenāti**
ukkaṭṭhena. Sā cassa ukkaṭṭhatā chandādīnaṃ ukkaṭṭhatāya veditabbā.
Subhāvitāṃ vā sammadeva vasībhāvaṃ pāpitaṃ **pañītaṃ** “padhānabhāvaṃ
nītaṃ”ti katvā. Idhāpi kappo asaṅkhyeyyakappavaseneva veditabbo
paripuṇṇamahākappassa asambhavato. **Itīti** evaṃ vuttappakārena. **Teti**
“brahmakāyikā”ti vuttā tividhāpi brahmāno. **Saññāya ekattāti**
tīhetukabhāvena ekasabhāvattā. Na hi tassā sampayuttadhammasena
aññopi koci bhedo atthi. **Evanti** iminā nānattakāyā ekattasaññīno gahitāti
dasseti.

1. Saṃ 1. 211 piṭṭhe.

Daṇḍa-ukkāyāti daṇḍadīpikāya. **Sarati** dhāvati¹, **vissarati** vippakiṇṇā viya dhāvati. **Dve kappāti** dve mahākappā. Ito paresupi eseva nayo. **Idhāti** imasmiṃ sutte. **Ukkatthaparicchedavasena** ābhassaraggahaṇeneva **sabbepi** te parittābhā-appamāṇābhāpi gahitā.

Sundarā pabhā subhā, tāya kiṇṇā subhākiṇṇāti vattabbe bhā-saddassa rassattaṃ antimāṇa-kārassa ha-kāraṇca katvā “**subhakiṇhā**”ti vuttā. Aṭṭhakathāyaṃ pana niccalāya ekagghanāya pabhāya subhoti pariyāyavacananti “subhena okiṇṇā vikiṇṇā”ti attho vutto. Etthāpi antimāṇa-kārassa ha-kāraṇaṃ icchitabbameva. **Na chijjitvā pabhā gacchati** ekagghanattā. **Catutthaviññāṇaṭṭhitimeva bhajanti** kāyassa saññāya ca ekarūpattā. Vipulasantasukhāyuvanṇādiphalattā **vehapphalā**. **Etthāti** viññāṇaṭṭhitiyaṃ.

Vivaṭṭapakkhe thitā apunarāvattanato. “**Na sabbakālikā**”ti vatvā tameva asabbakālikattaṃ vibhāvetuṃ “**kappasatasahassampi**”ti-ādi vuttaṃ. Soḷasakappasahassaccayena uppannānaṃ suddhāvāsabrahmānaṃ parinibbāyanato aññesaṇca tattha anuppajjanato **buddhasuññe loke** suññaṃ haṃ thānaṃ hoti, tasmā suddhāvāsā na sabbakālikā. **Khandhāvāraṭṭhānasadisā honti** suddhāvāsabhūmiyo. **Iminā suttena** suddhāvāsānaṃ sattāvāsabhāvadīpaneneva viññāṇaṭṭhitibhāvopi dīpito hoti, tasmā **suddhāvāsāpi** sattu viññāṇaṭṭhitisu **catutthaviññāṇaṭṭhitim**, navasu sattāvāsesu **catutthasattāvāsaṇca bhajanti**.

Sukhumattāti saṅkhārāvasesasukhumabhāvappattattā. Paribyattaviññāṇakiccābhāvato **neva viññāṇaṃ**, na sabbaso aviññāṇaṃ hotīti **nāviññāṇaṃ**, tasmā paripphutaviññāṇakiccavantiṃsu **viññāṇaṭṭhitisu na vuttaṃ**.

Sattaviññāṇaṭṭhitisuttavaṇṇanā niṭṭhitā.

2. Samādhiparikkhārasuttavaṇṇanā

45. Dutiye **samādhiparikkhārāti** ettha tayo parikkhārā. “Ratho sīlparikkhāro, jhānakkho cakkavīriyo”ti² hi ettha alaṅkāro

1. Saratīti dhāvati viya (Dī-Ṭī 2. 116 piṭṭhe.)

2. Saṃ 3. 5 piṭṭhe.

parikkhāro nāma. “Sattahi nagaraparikkhārehi suparikkhataṃ hotī”¹ ettha parivāro parikkhāro nāma. “Gilānapaccaya -pa- jīvitaparikkhārā”² ettha sambhāro parikkhāro nāma. So idha adhippetoti āha “**maggasamādhissa sambhārā**”³ti. Parivāraparikkhāropi vaṭṭatiyeva. Parivāro hi sammādiṭṭhādayo maggadhammā sammāsamādhissa saha jātādipaccayabhāvena parikaraṇato abhisāṅkharāṇato. **Parikkhatāti** parivāritā. **Ayaṃ vuccati ariyo sammāsamādhīti** ayaṃ sattahi ratanehi parivuto cakkavattī viya sattahi aṅgehi parivuto ariyo sammāsamādhīti vuccati. Upecca nissīyatīti upanisā, saha upanisāyāti **sa-upaniso**, sa-upanissayo attho, saparivāroyevāti vuttaṃ hoti. Sahakārikāraṇabhūto hi dhammasamūho idha “upaniso”⁴ti adhippebho.

Samādhiparikkhārasuttavaṇṇanā niṭṭhitā.

3. Paṭhama-aggisuttavaṇṇanā

46. Tatiye **anuḍḍahanatṭhenāti** kāmāṃ āhuneyyaggi-ādayo tayo aggī brāhmaṇehipi icchitā santi, te pana tehi icchitamattāva, na sattānaṃ tādīsā atthasādhakā. Ye pana sattānaṃ atthasādhakā, te dassetuṃ “**āhunam vuccati**”¹ti-ādi vuttaṃ. Tattha ānetvā hunanaṃ pūjanaṃ “āhunan”²ti vuttaṃ, taṃ **āhunam arahanti** mātāpitaro. Tenāha bhagavā “āhuneyyāti bhikkhave mātāpitūnaṃ etaṃ adhivacanan”³ti. Yadaggena ca te puttānaṃ bahūpakārabhāya āhuneyyāti, tesu sammāpaṭipatti nesaṃ hitasukhāvahā, tadaggena tesu micchāpaṭipatti ahitadukkhāvahāti āha “**tesu -pa-nibbattanti**”⁴ti.

Svāyamattho⁴ **mittavindaka**vatthunā veditabbo. Mittavindako hi mātārā “tāta ajja uposathiko hutvā vihāre sabbarattim dhammassavanaṃ suṇohi, sahaṃ te dassāmi”¹ti vutto dhanalobhena uposataṃ samādāya vihāraṃ gantvā “idaṃ ṭhānaṃ akutobhayan”²ti sallakkhetvā dhammāsanassa heṭṭhā nipanno sabbarattim niddāyitvā

1. Am 2. 478 piṭṭhe.

3. Khu 1. 269 piṭṭhe Itivuttake.

2. Ma 1. 150 piṭṭhe.

4. Di-Ṭṭha 3. 177 piṭṭhādīsupi passitabbaṃ.

gharaṃ agamāsi. Mātā pātova yāguṃ pacitvā upanāmesi. So sahasaṃ gahetvāva pivi. Athassa etadahosi “dhanam saṃharissāmī”ti. So nāvāya samuddam pakkhanditukāmo ahosi. Atha nam mātā “tāta imasmim kule cattālīsakoṭidhanam atthi, alam gamanena”ti nivāreti. So tassā vacanam anādiyitvā gacchati eva. Sā purato aṭṭhāsi. Atha nam kujjhitvā “ayam mayham purato tiṭṭhati”ti pādena paharivā patitam antaram tatvā agamāsi.

Mātā uṭṭhahitvā “mādisāya mātari evarūpaṃ kammaṃ katvā gatassa te gatattāhāne sukham bhavissatīti evaṃsaññī nāma tvaṃ puttā”ti āha. Tassa nāvam āruyha gacchato sattame divase nāvā aṭṭhāsi. Atha te manussā “addhā ettha pāpapuggalo atthi, salākam dethā”ti ahaṃsu. Salākā dīyamānā tasseva tikkhattum pāpuṇi. Te tassa uḷumpaṃ datvā tam samudde pakkhipimsu. So ekam dīpaṃ gantvā vimānapetīhi saddhim sampattim anubhavanto tāhi “purato purato mā agamāsi”ti vuccamānopi taddiguṇam taddiguṇam sampattim passanto anupubbena khuracakkadharam ekam addasa, tam cakkam padumapupphaṃ viya upaṭṭhāsi. So tam āha “ambho idaṃ tayā piḷandhitam padumam mayham dehi”ti. Na idaṃ sāmi padumam, khuracakkam etanti. So “vañcesi mam tvaṃ, kiṃ mayā padumam na diṭṭhapubban”ti vatvā “tvaṃ lohitaandanam vilimpitvā piḷandhanam padumapupphaṃ mayham na dātukāmo”ti āha. So cintesi “ayampi mayā katasadisam kammaṃ katvā tassa phalam anubhavitukāmo”ti. Atha nam “gaṇha re”ti vatvā tassa matthake cakkam khipi. Tena vuttam—

“Catubbi aṭṭhājḡagamā, aṭṭhāhi pica soḷasa.

Soḷasāhi ca bāṭṭimsa, atriccham cakkamāsado.

Icchāhatassa posassa, cakkam bhamati matthake”ti¹.

Soti gehasāmiko bhattā. **Purimanayenevāti** anuḍahanassa paccayatāya. Tatridam vatthu—kassapabuddhakāle sotāpannassa upāsakassa bhariyā aticāram carati. So tam paccakkhato disvā “kasmā evam karosī”ti āha. Sā “sacāham evarūpaṃ karomi, ayam me sunakho

1. Khu 5. 24, 132 piṭṭhesu.

viluppamāno khādatū”ti vatvā kālakatā kaṇṇamuṇḍakadahe vemānikapetī hutvā nibbattā divā sampattiṃ anubhavati, rattiṃ dukkhaṃ. Tadā bārāṇasirājā migavaṃ caranto araṇṇaṃ pavisitvā anupubbena kaṇṇamuṇḍakadahaṃ sampatto tāya saddhiṃ sampattiṃ anubhavati. Sā taṃ vañcetvā rattiṃ dukkhaṃ anubhavati. So ña tvā “kattha nu kho gacchatī”ti piṭṭhito piṭṭhito gantvā avidūre ʃhito kaṇṇamuṇḍakadahato nikkhamitvā taṃ “paṭapaṭan”ti khādamānaṃ ekaṃ sunakhaṃ disvā asinā dvidhā chindi, dve ahesuṃ. Puna chinne cattāro, puna chinne aṭṭha, puna chinne soḷasa ahesuṃ. Sā “kiṃ karosi sāmī”ti āha. So “kiṃ idan”ti āha. Sā “evaṃ akatvā kheḷapiṇḍaṃ bhūmiyaṃ niṭṭhubhitvā pādena ghaṃsāhī”ti āha. So tathā akāsi. Sunakhā antaradhāyimsu. Muṭṭhiyogo kirāyaṃ tassa sunakhantaradhānassa, yadidaṃ kheḷapiṇḍaṃ bhūmiyaṃ niṭṭhubhitvā pādena ghaṃsanaṃ, taṃ divasaṃ tassā kammaṃ khīṇaṃ. Rājā vippaṭisārī hutvā gantuṃ āraddho. Sā “mayhaṃ sāmī kammaṃ khīṇaṃ, mā agamāsī”ti āha. Rājā assutvāva gato.

Dakkhiṇāti cattāro paccayā dīyamānā dakkhanti etehi hitasukhānīti, taṃ dakkhiṇaṃ arahatīti **dakkhiṇeyyo**, bhikkhusaṃgho.

Paṭhama-aggisuttavaṇṇanā niṭṭhitā.

4. Dutiya-aggisuttādivaṇṇanā

47-48. Catutthe yaññavāṭaṃ sampādetvā mahāyaññaṃ uddissa saviññāṇakāni aviññāṇakāni ca yaññūpakaraṇāni sajjitānīti āha pāliyaṃ “**mahāyañño upakkhaṭo**”ti. Taṃ upakaraṇaṃ tesāṃ tathāsajjananti āha “**upakkhaṭoti paccupaṭṭhito**”ti. **Vaccharasatānī**ti yuvabhāvappattāni nātibalavavacchasatāni. Te pana vacchā eva honti, na dammā, balībaddā vā. **Urabbhāti** taruṇameṇḍakā vuccanti. **Upanītānī**ti ʃhapanatthāya upanītāni. **Vihimsatthenā**ti himsanatthena. **Upavāyatū**ti upagantvā sarīradarathaṃ nibbāpento saṅhasīṭalo vāto vāyatu. Sesāṃ suviññeyyameva. Pañcame natthi vattabbaṃ.

Dutiya-aggisuttādivaṇṇanā niṭṭhitā.

6. Dutiyasaññāsuttavaṇṇanā

49. Chaṭṭhe **nhāruvilekhananti** cammaṃ likhantānaṃ cammaṃ likhitvā chaḍḍitakasaṭaṃ. “Esohamasmī”ti-ādinā ahaṃkaraṇaṃ **ahaṅkāro**. “Etaṃ mama”ti mamaṅkaraṇaṃ **mamaṅkāro**. Tenāha “**ahaṅkāraditṭhito**”ti-ādi. **Tisso vidhāti** seyyasadisahīnavasena tayo mānā. “Ekavidhena rūpasaṅgaho”ti-ādīsu¹ koṭṭhāso “vidhā”ti vutto. “Kathaṃvidhaṃ sīlavantaṃ vadanti, kathaṃvidhaṃ paññavantaṃ vadanti”ti-ādīsu² pakāro³. “Tisso imā bhikkhave vidhā, katamā tisso? Seyyohamasmīti vidhā”ti⁴ ettha māno “vidhā”ti vutto. Idhāpi mānova adhippeto. Māno hi vidahanato hīnādivasena **tividhā**⁵. Tenākārena dahanato upadahanato “**vidhā**”ti vuccati.

Dutiyasaññāsuttavaṇṇanā niṭṭhitā.

7. Methunasuttādivaṇṇanā

50-51. Sattame **idhāti** imasmiṃ loke. **Ekaccoti** eko. **Samaṇo vā brāhmaṇo vāti** pabbajjāmattena samaṇo vā, jātimattena brāhmaṇo vā. **Dvayaṃdvayasamāpattinti** dvīhi dvīhi samāpajjitabbaṃ, methunanti attho. Na heva kho samāpajjatīti sambandho. **Ucchādanaṃ** ubbaṭṭanaṃ. **Sambāhanaṃ** parimaddanaṃ. **Sādiyatīti** adhivāseti. **Tadassādetīti** ucchādanādiṃ abhiramati. **Nikāmetīti** icchati. **Vittinti** tuṭṭhiṃ. **Idampi khoti** ettha **idanti** yathāvuttaṃ sādiyanādiṃ khaṇḍādibhāvavasena ekaṃ katvā vuttaṃ, **pi**-saddo vakkhamānaṃ upādāya samuccayattho, **kho**-saddo avadhāraṇattho. Idaṃ vuttaṃ hoti—yadetaṃ brahmacāripaṭiñṇassa asatipi dvayaṃdvayasamāpattiyāṃ mātugāmassa ucchādanahāpanasambāhanasādiyanādi, idampi ekaṃsena tassa brahmacariyassa khaṇḍādibhāvāpādanato khaṇḍampi chiddampi sabalampi kammāsampīti. Evaṃ pana khaṇḍādibhāvāpattiyā so aparissuddhaṃ brahmacariyaṃ carati, na parisuddhaṃ, saṃyutto methunasāmyogena,

1. Abhi 1. 145 piṭṭhe. 2. Saṃ 1. 51 piṭṭhe. 3. Saṅghānaṃ (Abhi-Ṭṭha 1. 343 piṭṭhe.)

4. Abhi 2. 381 piṭṭhe.

5. Vidhā (Ka)

na viśamīyutto, tato cassa na jāti-ādīhi parimuttīti dassento “**ayaṃ vuccati**”ti-ādīmāha.

Sañjagghatīti kilesavasena mahāhasitaṃ hasati. **Samkīlatī**hi kāyasamsaggavasena kīlati. **Samkelāyatī**ti sabbaso mātugāmaṃ kelāyanto viharati. **Cakkhunā**ti attano cakkhunā. **Cakkhunti** mātugāmassa cakkhuṃ. **Upanijjhāyatī**ti upecca nijjhāyati oloketi. **Tirokuṭṭanti** kuṭṭassa parato. Tathā **tiropākāraṃ**, “mattikāmayā bhitti **kuṭṭaṃ**, iṭṭhakāmayā **pākāro**”ti vadanti. Yā kāci vā bhitti porisakā diyaḍḍharatanappamaṇā **kuṭṭaṃ**, tato adhiko **pākāro**. **Assā**ti brahmacāripaṭiñṇassa. **Pubbeti** vatasamādānato pubbe. **Kāmaguṇehī**ti kāmakoṭṭhāsehi. **Samappitanti** suṭṭhu appitaṃ sahitaṃ. **Samaṅgibhū**tanti samannāgataṃ. **Paricārayamānanti** kīlantaṃ, upaṭṭhahiyamaṇaṃ vā. **Paṇidhāyā**ti patthetvā. **Sīlenā**ti-ādīsu yamaniyamādisamādānavasena **sīlaṃ**, avitikkamavasena **vataṃ**. Ubhayampi vā **sīlaṃ**, dukkaracariyavasena pavattitaṃ **vataṃ**. Taṃ taṃ akiccasammatato vā nivattilakkaṇaṃ **sīlaṃ**, taṃtaṃsamādānavato vesabhojanakiccakaraṇādivisesappaṭipatti **vataṃ**. Sabbathāpi dukkaracariyā **tapo**, methunā virati **brahmacariyanti** evampettha pālivaṇṇanā veditabbā. Aṭṭhamaṃ uttānameva.

Methunasuttādivaṇṇanā niṭṭhitā.

9. Dānamahapphalasuttavaṇṇanā

52. Navame “**sāhu dāna**”ti **dānaṃ detī**ti “dānaṃ nāma sādhu sundaraṃ”ti dānaṃ detīti attho. Dānaṃ hi datvā taṃ paccavekkhantassa pāmojjapītisomanassādayo uppajjanti, lobhadosa-issāmaccherādayo vidūrībhavanti. Idāni dānaṃ anukūladhammaparibrūhanena paccanīkadhammavidūrīkaraṇena ca bhāvanācittassa upasobhanāya ca parikkhārāya ca hotīti “**alaṅkārahūtañceva parivārahūtañca**¹ **detī**”ti vuttaṃ. **Jhānānāgāmī nāma hoti** jhānaṃ

1. Alaṅkāratthaṃ parivāratthañca (Ka)

nibbattetvā brahmalokūpapannānaṃ ariyānaṃ heṭṭhā anuppajjanato. **Imaṃ pecca paribhuñjissāmi**hi sāpekkhassa dānaṃ paralokaphalāsāya sātisayāya ca pubbācāravasena uppajjamānāya anubhavattā taṇhuttaraṃ nāma hotīti āha “**paṭhamaṃ taṇhuttariyadānaṃ**”ti. Dānaṃ nāma buddhādīhi pasatthanti garuṃ cittikāraṃ upaṭṭhapetvā dātabbattā “**dutiyāṃ citthikāradānaṃ**”ti vuttaṃ. Pubbakehi pitupitāmahehi dinnapubbaṃ katapubbaṃ jahāpetuṃ nāma nānucchavikanti attabhāvasatāgavasena hirottappaṃ paccupaṭṭhapetvā dātabbato “**tatiyāṃ hirottappadānaṃ**”ti vuttaṃ. “Ahaṃ pacāmi, na ime pacanti, nārahāmi pacanto apacantānaṃ dānaṃ adātun”ti evaṃsaññī hutvā dento niravasesaṃ katvā detīti āha “**catutthaṃ niravasesadānaṃ**”ti. “Yathā tesāṃ pubbakānaṃ isīnaṃ tāni mahāyaññakāni ahesuṃ, evaṃ me ayaṃ dānaparibhogo bhavissati”ti evaṃsaññino dānaṃ dakkhiṇaṃ arahesu dātabbato “**pañcamaṃ dakkhiṇeyyadānaṃ**”ti vuttaṃ. “Imaṃ me dānaṃ dadato cittaṃ pasīdati”ti-ādinā pītisomanassaṃ uppādetvā dentassa dānaṃ somanassabāhullappattiyā somanassupacāraṃ nāma hotīti āha “**chaṭṭhaṃ somanassupavicāradānaṃ**”ti vuttaṃ.

Dānamahapphalasuttavaṇṇanā niṭṭhitā.

10. Nandamātāsuttavaṇṇanā

53. Dasame “**vutthavasso pavāretvā -pa- nikkhamī**”ti aṅguttarabhāṇakānaṃ matenetaṃ vuttaṃ. Majjhimabhāṇakā pana vadanti “bhagavā upakaṭṭhāya vassūpanāyikāya jetavanato bhikkhusaṃghaparivuto cārikaṃ nikkhami. Teneva ca akāle nikkhantattā ko salarājādayo vāretuṃ ārabhiṃsu. Pavāretvā hi caraṇaṃ buddhāciṇṇaṃ”ti. Puṇṇāya sammāpaṭipattiṃ paccāsīsanto bhagavā “**mama nivattanapaccayā tvaṃ kiṃ karissasi**”ti āha. **Puṇṇāpi -pa- pabbajīti** ettha seṭṭhi “puṇṇāya bhagavā nivattito”ti sutvā taṃ bhujissaṃ katvā dhītuṭṭhāne ṭhapesi. Sā pabbajjāṃ yācitvā pabbaji, pabbajitvā vipassanaṃ ārabhi. Athassā satthā āraddhavipassakabhāvaṃ ña tvā imaṃ obhāsagāthaṃ vissajjesi—

“Puñṇe pūrassu saddhammaṃ, cando pannaraso yathā.
Paripuñṇāya paññāya, dukkhassantaṃ karissasī”ti¹.

Sā gāthāpariyosāne arahattaṃ patvā abhiññātā sāvīkā ahosi. Sesamettha suviññeyyameva.

Nandamātāsuttavaṇṇanā niṭṭhitā.

Mahāyaññavaggavaṇṇanā niṭṭhitā.

Paññāsako niṭṭhito.

6. Abyākatavagga

1. Abyākatasuttādivaṇṇanā

54-55. Chaṭṭhavaggassa paṭhamam suviññeyyameva. Dutiye **atīe attabhāve nibbattakaṃ kammaṃ**ti “purimakammabhavasmiṃ moho avijjā, āyūhanā saṅkhārā, nikanti taṇhā, upagamaṇaṃ upādānaṃ, cetanā bhavo”ti evamāgataṃ saparikkhāraṃ pañcavidhaṃ kammavaṭṭamaṃha. **Etarahi me attabhāvo na siyāti** viññānaṃāmarūpasaḷāyatanaphassavedanāsahitaṃ paccuppannaṃ pañcavidhaṃ vipākavaṭṭamaṃha. **Yaṃ atthikanti** yaṃ paramatthato vijjamānaṃ. Tenāha “**bhūtan**”ti. taṃ hi paccayanibbattatāya “bhūtan”ti vuccati. **Taṃ pajahāmīti** tappaṭibaddhacchandarāgappahānena tato eva āyatim anuppattidhammatāpādanavasena pajahāmi pariccajāmi. **Haritantanti**² haritameva. Anta-saddena padavaḍḍhanaṃ kataṃ yathā “vanantaṃ suttantaṃ”ti, allatiṇḍāṇi āgamma nibbāyatīti attho. **Pathantanti** mahāmaggaṃ. **Selantanti** pabbataṃ. **Udakantanti** udakaṃ. **Ramaṇīyaṃ vā bhūmibhāganti** tiṇagumbādirahitaṃ vivittaṃ abbhokāsabhūmibhāgaṃ. **Anāhārāti** apaccayā nirupādānā. Sesamettha uttānameva.

Abyākatasuttādivaṇṇanā niṭṭhitā.

1. Khu 2. 377 piṭṭhe.

2. Ma-Ṭṭha 2. 131 piṭṭhepi passitabbaṃ.

3. Tissabrahmāsuttavaṇṇanā

56. Tatiye **vivittāni** tādīsāni pana pariyaṅtāni atidūrāni hontīti āha “**antimariyaṅtimāni**”ti. Ante bhavāni antimāni, antimāniyeva pariyaṅtimāni. Ubhayenapi atidūrataṃ dasseti. **Samannāhāre ṭhapayamānoti** indriyaṃ samākārena vattento indriyasamataṃ paṭipādentō nāma hoti. Vipassanācittasampayutto samādhi, satipi saṅkhāranimittāvirahe niccanimittādivirahato “animitto”ti vuccatīti āha “**animittanti balavavipassanāsamādhiṃ**”ti.

Tissabrahmāsuttavaṇṇanā niṭṭhitā.

4. Sīhasenāpatisuttādivaṇṇanā

57-60. Catutthe kucchito ariyo **kadariyo**. Thaddhamacchariyasadisaraṃ hi kucchitaṃ sabbanihīnaṃ natthi sabbakusalānaṃ ādibhūtaṃ nisedhanato. Sesamettha pañcamādīni ca uttānatthāneva.

Sīhasenāpatisuttādivaṇṇanā niṭṭhitā.

8. Pacalāyamānasuttavaṇṇanā

61. Aṭṭhame **ālokasaññaṃ manasi kareyyāsīti** divā vā rattim vā sūriyapajjotacandamaṇi-ādīnaṃ ālokaṃ “āloko”ti manasi kareyyāsī. Idam vuttaṃ hoti—sūriyacandālokādīm divā rattiñca upaladdhaṃ yathā laddhavaseneva manasi kareyyāsī, citte ṭhapeyyāsī. Yathā te subhāvitālokaśiṅṅassa viya kasiṅṅaloko yadicchakaṃ yāvadicchakañca so āloko rattiyaṃ upatiṭṭhati, yena tattha divāsaññaṃ ṭhapeyyāsī, divā viya vigatathinamidhova bhavēyyāsīti. Tenāha “**yathā divā tathā rattin**”ti. **Iti vivaṭena cetāsīti** evaṃ apihitena cittaṃ thinamidhavidhānena apihitattā. **Apariyonaddhenāti** samantato anonaddhena asaṅchādhitena. **Sahobhāsanti** saññaṇobhāsaṃ. Thinamidhavinodana-ālokaṃ vā hotu

kasiṇālokopi vā parikammālokopi vā, upakkilesāloko viya sabboyaṃ āloko nāṇasamuṭṭhānovāti. Yesaṃ akarane puggalo mahājāniyo hoti, tāni **avassaṃ kātabbāni**. Yāni akātumpi vaṭṭanti, sati samavāye kātabbato tāni **karaṇīyāni**ti āha “**itarāni karaṇīyāni**”ti. Atha vā kātabbāni kammāni karaṇaṃ arahantīti **karaṇīyāni**. Itarāni **kiccānī**tipi vadanti.

Ādinayappavattā viggāhikakathāti “na tvaṃ imaṃ dhammavinayaṃ ājānāsi, ahaṃ imaṃ dhammavinayaṃ ājānāmi, kiṃ tvaṃ imaṃ dhammavinayaṃ ājānissasi, micchāpaṭipanno tvamasi, ahamasmi sammāpaṭipanno, sahitaṃ me, asahitaṃ te, purevacanīyaṃ pacchā avaca, pacchāvacaṇīyaṃ pure avaca, adhiciṇṇaṃ te viparāvattaṃ, āropito te vādo, niggahito tvamasi. Cara vādappamokkhāya, nibbeṭhehi vā sace pahosī”ti¹ evaṃpavattā kathā. Tattha² **sahitaṃ meti** mayhaṃ vacanaṃ sahitaṃ siliṭṭhaṃ, atthayuttaṃ kāraṇayuttanti attho. **Sahitanti vā** pubbāparāviroddhaṃ. **Asahitaṃ teti** tuyhaṃ vacanaṃ asahitaṃ asiliṭṭhaṃ. **Adhiciṇṇaṃ te viparāvattanti** yaṃ tuyhaṃ dīgharattāciṇṇavasena suppaṇaṃ, taṃ mayhaṃ ekavacaneneva viparāvattaṃ parivattitvā ṭhitaṃ, na kiñci jānāsīti attho. **Āropito te vādoti** mayā tava vādo āropito. **Cara vādappamokkhāyāti** dosamocanattaṃ cara vicara, tattha tattha gantvā sikkhāti, attho. **Nibbeṭhehi vā sace pahosīti** atha sayāṃ pahosi, idāni eva nibbeṭhehīti attho.

Taṇhā sabbaso khīyanti etthāti **taṇhāsaṅkhayo**, tasmim. **Taṇhāsaṅkhayeti** ca idaṃ visaye bhummanti āha “**taṃ ārammaṇaṃ katvā**”ti, **vimuttacittatāyāti** sabbasāṅkilesehi vippayuttacittatāya. Aparabhāge paṭipadā nāma ariyasaccābhisamayo. Sā sāsanacārigocarā³ paccattaṃ veditabbatoti āha “**pubbabhāgappaṭipadaṃ saṅkhittena desethāti pucchatī**”ti. Akuppadhammatāya khayavayasaṅkhātaṃ antaṃ atītāti accantā, so eva⁴ aparihāyanasabhāvattā accantā niṭṭhā assāti **accantaniṭṭho**. Tenāha “**ekantaniṭṭho satataniṭṭhoti attho**”ti. Na hi

1. Dī 1. 8; Ma 3. 32 piṭṭhesu.

3. Sā na desanāya gocarā (?)

2. Dī-Ṭṭha 1. 86 piṭṭhepi passitabbaṃ.

4. Tato eva (Ka)

paṭividdhassa lokuttaradhammassa dassanaṃ kuppanaṃ nāma atthi.
 Accantameva catūhi yogehi khemo etassa atthīti **accantayogakkhemī**.
 Maggabrahmacariyassa vusitattā tassa ca aparihāyanasabhāvattā accantaṃ
 brahmacārīti **accantabrahmacārī**. Tenāha “**niccabrahmacārīti attho**”ti.
Pariyosānanti maggabrahmacariyapariyosānaṃ vaṭṭadukkhapariyosānaṃca.

Pañcakkhandhāti pañcupādānakkhandhā. Sakkāyasabbaṃ hi sandhāya
 idha “**sabbe dhammā**”ti vuttaṃ vipassanāvisayassa avipphetattā. Tasmā
 āyatanadhātutopi taggatikā eva daṭṭhabbā. Tenāha bhagavā “**nālaṃ**
abhinivesāyā”ti. **Na yuttā abhinivesāya** “etaṃ mama, eso me attā”ti
 ajjhosānāya. “Alameva nibbindituṃ alaṃ virajjitun”ti-ādīsu¹ viya **alaṃ-**
 saddo yuttatthopi hotīti āha “**na yuttā**”ti. **Sampajantīti** bhavanti. Yadipi
 “tatiyā catutthī”ti idaṃ vusuddhidvayaṃ abhiññāpaññā, tassa pana
 sapaccayanāmarūpadassanabhāvato sati ca paccayapariggāhe sapaccayattā
 aniccanti, nāmarūpassa aniccatāya dukkhaṃ, dukkhaṃca anattāti atthato
 lakkhaṇattayaṃ supākaṭameva hotīti āha “**aniccaṃ dukkhaṃ anattāti**
ñātapariññāya abhijānāti”ti. **Tatheva tīraṇapariññāyāti** iminā
 aniccādibhāvena nālaṃ abhinivesāyāti nāmarūpassa upasaṃharati, na
 abhiññāpaññānaṃ² sambhāradhammānaṃ. Purimāya hi atthato āpannaṃ
 lakkhaṇattayaṃ gaṇhāti salakkhaṇasallakkhaṇaparattā tassā. Dutiyāya
 sarūpato tassā lakkhaṇattayāropanavasena sammasanabhāvato.
 Ekacittakkhaṇikatāya abhinipātamattatāya **ca appamattakampi**.
 Rūpapariggāhassa oḷārikabhāvato **arūpapariggāhaṃ dasseti**. Yasmā vā
 pañcannaṃ khandhānaṃ khayato vayato ñāṇadassanaṃ dassento ca
 vedanāya āsannabhāvato, visesato sukhasārāgitāya,
 bhavassādagadhitamānasatāya ca therassa vedanāvasena nibbattetvā dasseti.

Khayavirāgoti khayasaṅkhāto virāgo saṅkhārānaṃ palujjanā. Yaṃ
 āgamma sabbaso saṅkhārehi virajjanā hoti, taṃ nibbānaṃ **accantavirāgo**.
Nirodhānupassimhipīti nirodhānupassipadepi. **Eseva nayoti** atidisisivā

1. Dī 2. 161; Sam 1. 387, 390, 393, 397, 398 piṭṭhesu. 2. Abhiññāpariññānaṃ (Ka)

taṃ ekadesena vivaranto “**nirodhopi hi -pa- duvidhoyevā**”ti āha. Khandhānaṃ pariccajanaṃ tappaṭibaddhakilesappahānavasenāti yenākārena vipassanā kilese pajahati, tenākārena taṃnimittakkhandhe ca pajahatīti vattabbaṃ arahatīti āha “**sā hi -pa- vissajjati**”ti. **Ārammaṇatoti** kiccaśādhanaśasena ārammaṇakaraṇato. Evaṃ hi maggato aññesaṃ nibbānārammaṇānaṃ pakkhandanavossaggābhāvo siddhova hoti. Pariccajanaena pakkhandanena cāti **dvīhipi vā kāraṇehi**. Soti maggo. Sabbesaṃ khandhānaṃ vossajjanaṃ tappaṭibaddhasaṃkilesappahānena daṭṭhabbaṃ. Yasmā vā vipassanācittaṃ pakkhandatīti maggasampayuttacittaṃ sandhāyāha. Maggo ca samucchadavasena kilese khandhe ca pariccajati, tasmā yathākkamaṃ vipassanāmaggānañca vasena pakkhandanapariccāgavossaggāpi veditabbā. **Tadubhayasamaṅgīti** vipassanāsamaṅgī maggasamaṅgī ca. “Aniccānupassanāya niccasaññaṃ pajahati”ti-ādivacanato¹ hi yathā vipassanāya kilesānaṃ pariccāgappaṭinissaggo labbhati, evaṃ āyatim tehi kilesehi uppādetabbakkhandhānampi pariccāgappaṭinissaggo vattabbo. Pakkhandanappaṭinissaggo pana magge labbhamānāya ekantakāraṇabhūtāya vuṭṭhānagāminivipassanāya vasena veditabbo. Magge pana tadubhayampi ñāyāgatameva nipariyāyatova labbhamānattā. Tenāha “**tadubhayasamaṅgīpuggalo**”ti-ādi. Pucchantassa ajjhāsayavasena “na kiñci loke upādiyati”ti ettha kāmupādānavasena upādiyanaṃ paṭikkhipatīti āha “**taṇhāvasena na upādiyati**”ti. Taṇhāvasena vā asati upādiyane diṭṭhivasena upādiyanaṃ anavakāsamevāti “**taṇhāvasena**”icceva vuttaṃ. **Na parāmasatīti** nādiyati. Diṭṭhiparāmāsavasena vā “niccaṇ”ti-ādinā **na parāmasati**. **Saṃkhitteneva kathesīti** tassa ajjhāsayavasena papañcaṃ akatvā kathesi.

Pacalāyamānasuttavaṇṇanā niṭṭhitā.

9. Mettasuttavaṇṇanā

62. Navame² **mā bhikkhave puññaṇanti** ettha **māti** paṭisedhe nipāto. **Puñña**-saddo “kusalānaṃ bhikkhave dhammānaṃ samādānahetu evamidam puññaṃ

1. Khu 9. 55 piṭṭhe.

2. Itivuttaka-Ṭṭha 70 piṭṭhādīsu passitabbaṃ.

pavaḍḍhatī”ti-ādīsu¹ puññaphale āgato. “Avijjāgatoyaṃ bhikkhave purisapuggalo puññañce saṅkhāraṃ abhisāṅkharotī”ti-ādīsu² kāmarūpāvacarasaritesu. “Puññūpagamā hoti viññāṇaṃ”ti-ādīsu² sugativisesabhūte upapattibhave. “Tīṇimāni bhikkhave puññakiriyavatthūni dānamayaṃ puññakiriyavatthu, sīlamayaṃ puññakiriyavatthu, bhāvanāmayaṃ puññakiriyavatthū”ti-ādīsu³ kusalacetanāyaṃ. Idha pana tebhūmakakusaladhamme veditabbo. **Bhāyitthāti** ettha duvidhamā bhayaṃ ṇāṇabhayaṃ sārājjabhayaṃ. Tattha “yepi te bhikkhave devā dīghāyukā vaṇṇavanto sukhabahulā uccesu vimānesu ciraṭṭhitikā, tepi tathāgatassa dhammadesanaṃ sutvā yebhuyyena bhayaṃ saṃvegaṃ santāsaṃ āpajjantī”ti⁴ āgataṃ **ñāṇabhayaṃ**. “Ahudeva bhayaṃ, ahu chambhitattaṃ, ahu lomahaṃso”ti-ādīsu⁵ āgataṃ **sārājjabhayaṃ**. Idhāpi sārājjabhayaṃmeva. Ayaṃ hettha attho—bhikkhave digharattaṃ kāyavacīsaṃyamo vattappaṭivattapūraṇaṃ ekāsaṃ ekaseyyaṃ indriyadamo dhutadhammehi cittassa niggaho satisampajaññaṃ kammaṭṭhānānuyogavasena vīriyārambhoti evamādīni yāni bhikkhunā nirantaraṃ pavattetabbāni puññāni, tehi mā bhāyittha, mā bhayaṃ santāsaṃ āpajjittha, ekaccassa diṭṭhadhammasukhassa uparodhabhayaṃ samparāyikanibbānasukhadāyakehi puññehi mā bhāyitthāti. Nissakke idaṃ sāmivacanaṃ.

Idāni tato abhāyitabbabhāve kāraṇaṃ dassento “**sukhassetan**”ti-ādīmāha. Tattha **sukha**-saddo “sukho buddhānamuppādo, sukha virāgatā loke”ti-ādīsu⁶ sukhamūle āgato. “Yasmā ca kho mahāli rūpaṃ sukhaṃ sukhānupatitaṃ sukhāvakkantaṃ”ti-ādīsu⁷ sukhārammaṇe. “Yāvañcidamā bhikkhave na sukaraṃ akkhānena pāpuṇitum yāva sukhaṃ saggā”ti-ādīsu⁸ sukhapaccayaṭṭhāne. “Sukho puññassa uccayo”ti-ādīsu⁹ sukhahebhumihi. “Diṭṭhadhammasukhavihārā ete dhammā”ti-ādīsu¹⁰ abyāpajje. “Nibbānaṃ paramaṃ sukhaṃ”ti-ādīsu¹¹ nibbāne. “Sukhassa ca pahānā”ti-ādīsu¹² sukhavedanāyaṃ. “Adukkhamasukhaṃ santaṃ, sukhamicceva bhāsitaṃ”ti-ādīsu¹³ upekkhāvedanāyaṃ.

-
- | | |
|---|--|
| 1. Dī 3. 48 piṭṭhe. | 2. Saṃ 1. 310 piṭṭhe. |
| 3. Khu 1. 231; Dī 3. 182; Am 3. 72 piṭṭhesu. | 4. Am 1. 342 piṭṭhe. |
| 5. Dī 2. 193 piṭṭhe. | 6. Khu 1. 42 piṭṭhe Dhammapade. |
| 7. Saṃ 2. 57 piṭṭhe. | 8. Ma 3. 210 piṭṭhe. (Atthato samānaṃ) |
| 9. Khu 1. 30 piṭṭhe Dhammapade. | 10. Ma 1. 49 piṭṭhe. |
| 11. Ma 2. 176; Khu 1. 43 piṭṭhesu. | |
| 12. Dī 1. 69; Ma 1. 215; Saṃ 1. 413 piṭṭhesu. | 13. Saṃ 2. 409; Khu 1. 227 piṭṭhesu. |

“Dvepi mayā ānanda vedanā vuttā pariyāyena sukhā vedanā dukkhā vedanā”ti-ādīsu¹ iṭṭhasukhesu. “Sukho vipāko puññānan”ti-ādīsu² iṭṭhavipāke. Idhāpi iṭṭhavipāke eva daṭṭhabbo. **Iṭṭhassāti**-ādīsu icchitabbato³ ceva aniṭṭhappaṭipakkhato ca iṭṭhassa. Kamanīyato manasmim ca kamanato pavisanato **kantassa**. Piyāyitabbato santappanato ca **piyassa**. Mananīyato manassa vadḍhanato ca **manāpassāti** attho veditabbo. **Yadidaṃ puññānīti puññānīti** yadidaṃ vacanaṃ, etaṃ sukhassa iṭṭhassa vipākassa adhivacanaṃ nāmaṃ. **Sukhassetaṃ yadidaṃ puññānīti** phalena kāraṇassa abhedopacāraṃ vadati. Tena katūpacitānaṃ puññānaṃ avassambhāviphalaṃ sutvā appamattena sakkaccaṃ puññāni kattabbānīti puññakiriyaṃ niyojeti, ādaraṇca nesam tattha uppādeti.

Idāni attanā sunettakāle katena puññakammena dīgharattaṃ paccanubhūtaṃ bhavantarappaṭicchannaṃ uḷārataraṃ puññavipākaṃ udāharitvā tamatthaṃ pākaṭataraṃ karonto “**abhijānāmi kho panāhan**”ti-ādīmāha. Tattha **abhijānānīti** abhivisiṭṭhena ñāṇena jānāmi, paccakkhato bujjhāmi. **Dīgharattanti** cirakālaṃ. **Puññānanti** dānādīnaṃ kusaladhammānaṃ. **Satta vassānīti** satta saṃvaccharāni. **Mettacittanti** mijjatīti mettā, siniyhatīti attho. Mitte bhavā mittassa vā esā pavattītipi mettā. Lakkhaṇādito pana hitākārappavattilakkhaṇā, hitūpasambhārasā, āghātaṃ vinayapaccupaṭṭhānā, sattānaṃ manāpabhāvadassanapadaṭṭhānā. Byāpādūpasamo etissā sampatti, sinehasambhavo vipatti. **Mettacittaṃ bhāvetvāti** mettāsahagataṃ cittaṃ, cittaśisena samādhi vuttoti mettāsamādhiṃ mettābrahmavihāraṃ uppādetvā ceva vadḍhetvā ca.

Satta saṃvaṭṭa vivaṭṭakappeti satta mahākappe.

Saṃvaṭṭavivaṭṭaggaṇeṇeva hi saṃvaṭṭatṭhāyivivaṭṭatṭhāyinopi gahitā. **Imaṃ lokanti** kāmalokaṃ. **Saṃvaṭṭamāne sudanti** saṃvaṭṭamāne, sudanti nipātamattaṃ, vipajjamāneti attho. “Varasaṃvattaṭṭhāne⁴ sudan”tipi paṭhanti. **Kappeti** kāle. Kappasīsena hi kālo vutto, kāle khīyamāne sabbopi khīyateva. Yathāha

1. Ma 2. 60 piṭṭhe.

2. Khu 10. 199 piṭṭhe.

3. Esitabbato (Itivuttaka-Ṭṭha 71 piṭṭhe.)

4. Saṃvattamāne (Itivuttaka-Ṭṭha 72 piṭṭhe.)

“kālo ghasati bhūtāni, sabbāneva sahattanā”ti¹. “**Ābhassarūpago homī**”ti vuttattā tejosamvaṭṭavasenettha kappavuṭṭhānaṃ veditabbaṃ.

Ābhassarūpagoti tattha paṭisandhiggahaṇavasena ābhassarabrahmalokaṃ upagacchāmīti ābhassarūpago homi. **Vivattamāneti** saṅghahamāneti attho. **Suññaṃ brahmavimānaṃ upapajjāmīti** kassaci sattassa tattha nibbattassa abhāvato suññaṃ yaṃ paṭhamajjhānabhūmisāṅkhātaraṃ brahmavimānaṃ ādito nibbattati, taṃ paṭisandhiggahaṇavasena upapajjāmi upemi.

Brahmāti kāmāvacarasattehi visiṭṭhaṭṭhena² tathā tathā brūhitaguṇatāya brahmavihārato nibbattanaṭṭhena ca brahmā.

Brahmapārisajjabrahmapurohitehi mahanto brahmāti **mahābrahmā**, tato eva te abhibhavitvā ṭhitattā **abhibhū**. Tehi na kenacipi guṇena abhibhūtoti **anabhibhūto**. **Aññadatthūti** ekaṃsavacane nipāto. Dassanato **daso**, atītānāgatapaccuppannaṃ dassanasamattho abhiññāṇaṇena passitabbaṃ passāmīti attho. Sesabrahmaṇaṃ iddhipādabhāvanābalena attano cittaṅca mama vase vattemīti **vasavattī** homīti yojetabbaṃ. Tadā kira bodhisatto aṭṭhasamāpattilābhīpi samāno tathā sattahitaṃ attano pāramipūraṇaṅca olokeno tāsū eva dvīsū jhānabhūmīsū nikantiṃ uppādetvā mettābrahmavihāravasena aparāparaṃ saṃsari. Tena vuttam **“satta vassāni -pa- vasavattī”**ti.

Evam bhagavā rūpāvacarapuññaṃ vipākamahantataṃ pakāsetvā idāni kāmāvacarapuññaṃsapi vipākaṃ dassento **“chattimsakkhattun”**ti-ādimaḥa. Tattha **sakko ahosinti** chattimsakkhattuṃ chattimsavāre aññattha anupapajjitvā nirantaraṃ sakko devānamindo tāvatimsadevarājā ahoṣim. **Rājā ahosinti**-ādīsū catūhi acchariyadhammehi catūhi saṅghavattūhi ca lokaṃ rañjetīti **rājā**. Cakkaratanaṃ vatteti, catūhi sampatticakkehi vattati, tehi ca paraṃ vatteti, parahitāya ca iriyāpathacakkānaṃ vatto etasmiṃ atthīti **cakkavattī**. “Rājā”ti cettha sāmāññaṃ, “cakkavattī”ti viṣesaṃ. Dhammena caratīti **dhammiko**, nāyena samena vattatīti attho. Dhammeneva rajjaṃ labhitvā rājā jātoti **dhammarājā**, dasavidhe kusaladhamme agarahite ca rājadhamme niyuttoti **dhammiko**. Tena ca dhammena

1. Khu 5. 68 piṭṭhe Jātake.

2. Seṭṭhaṭṭhena (Itivuttaka-Ṭṭha 72. piṭṭhe.)

sakalaṃ lokaṃ rañjetīti **dhammarājā**. Parahitadhammakaraṇena vā **dhammiko**, attahitadhammakaraṇena **dhammarājā**. Yasmā cakkavattī dhammena ñāyena rajjaṃ adhigacchati, na adhammena, tasmā vuttaṃ “**dhammena laddharajjattā dhammarājā**”ti.

Catūsu disāsu samuddapariyosānatāya cāturantā nāma tattha tattha dipe mahāpathavīti āha “**puratthima -pa- issaro**”ti. **Vijitāvīti** vijetabbassa vijitavā, kāmakodhādikassa abhantarassa paṭirājabhūtassa bāhirassa ca arigaṇassa vijayī vijinitvā ṭhitoti attho. Kāmaṃ cakkavattino kenaci yuddhaṃ nāma natthi, yuddhena pana sādhetabbassa vijayassa siddhiyā “**vijitasāṅgāmo**”ti vuttaṃ. Janapado vā catubbidha-acchariyadhammena samannāgato asmiṃ rājini thāvariyaṃ kenaci asamhāriyaṃ daḷhabhattibhāvaṃ patto, janapade vā attano dhammikāya paṭipattiyā thāvariyaṃ thirabhāvaṃ pattoti **janapadatthāvariypatto**. Caṇḍassa hi rañño balidaṇḍādīhi lokaṃ pīlayato manussā majjhimanapadaṃ chaḍḍetvā pabbatasamuddatīrakandarādīni nissāya paccante vāsaṃ kappenti, atimudukassa rañño corehi sāhasikadhanavilopapīlitā manussā paccantaṃ pahāya janapadamajjhe vāsaṃ kappenti. Iti evarūpe rājini janapado thirabhāvaṃ na pāpuṇāti.

Sattaratanasamannāgatoti cakkaratanādīhi sattahi ratanehi samupeto. Tesu hi rājā cakkavattī cakkaratanehi ajitaṃ jināti, hatthi-assaratanehi vijite sukheneva anuvicarati, pariṇāyakaratanena vijitamanurakkhati, avasesehi upabhogasukhamanubhavati. Paṭhamena cassa ussāhasattiyogo, pacchimena mantasattiyogo, hatthi-assagahapatiratanehi pabhusattiyogo superipuṇṇo hoti. Itthimaṇiratanehi upabhogasukhamanubhavati, sesehi issariyasukhaṃ. Visesato cassa purimāni tīṇi adosakusalamūlajanitakammā nubhāvena sampajjanti, majjhimāni alohakuśalamūlajanitakammānubhāvena, pacchimekaṃ amohakuśalamūlajanitakammānubhāvenāti.

Sūrāti sattivanto, nibbhayāti atthoti āha “**abhīruno**”ti. **Aṅganti** kāraṇaṃ. Yena kāraṇena “**vīrā**”ti vucceyyuṃ, taṃ vīraṅgaṃ. Tenāha “**vīriyassetāṃ nāmaṃ**”ti. Yāva cakkavālapabbatā cakkassa vattanato “**cakkavālapabbataṃ sīmaṃ katvā ṭhitasamuddapariyantā**”ti vuttaṃ. **Adaṇḍenāti** iminā dhanadaṇḍassa sarīradaṇḍassa ca akaraṇaṃ vuttaṃ. **Asatthenāti**

iminā pana senāya yujjhanassāti tadubhayaṃ dassetuṃ **“na daṇḍenā”**ti-ādi vuttaṃ. Idaṃ vuttaṃ hoti—ye katāparādhe satte satampi sahasampi gaṇhanti, te dhanadaṇḍena rajjaṃ kārenti. Ye chejjabhejjaṃ anusāsanti, te satthadaṇḍena. Ahaṃ pana duvidhampi daṇḍaṃ pahāya adaṇḍena ajjhāvasiṃ. Ye ekatodhārādinā satthena paraṃ viheṭhenti, te satthena rajjaṃ kārenti nāma. Ahaṃ pana satthena khuddakamakkhikāya pivanamattampi lohitaṃ kassaci anuppādetvā dhammeneva **“ehi kho mahārājā”**ti evaṃ paṭirājūhi sampaṭicchitāgamano vuttappakāraṃ pathaviṃ abhijinitvā ajjhāvasiṃ, abhivijinitvā sāpī hutvā vasinti.

Iti bhagavā attānaṃ kāyasakkhim katvā puññānaṃ vipākamahantataṃ pakāsetvā idāni tamevatthaṃ gāthābandhanena dassento **“passa puññānaṃ vipākaṃ”**ti-ādimāha. **Sukhesinoti** ālapanavacanametāṃ, tena sukhapariyesake satte āmanteti. Pāḷiyaṃ pana **“passathā”**ti vattabbe **“passā”**ti vacanabyattayo katoti daṭṭhabbo. Manussānaṃ ure satthaṃ ṭhapetvā icchitadhanaharaṇādinā vā sāhasakāritāya sāhasikā, tesāṃ kammaṃ **sāhasikakammaṃ**. Pathaviyā issaro **pathabyoti** āha **“puthavisāmiko”**ti.

Mettasuttavaṇṇanā niṭṭhitā.

10. Bhariyāsuttavaṇṇanā

63. Dasame uccāsaddā mahāsaddā uddhaṃ uggatattā uccaṃ patthaṭṭā mahantaṃ avinibbhogaṃ vinibhuñjitvā gahetuṃ asakkuṇeyyaṃ saddaṃ karontā vadanti. Vacīghosopi hi bahūhi ekajjhaṃ pavattito atthato ca saddato ca duravabodho kevalaṃ mahānigghoso eva hutvā sotapathamāgacchati. **Macchavilopeti** macche vilumpitvā viya gahaṇe, macchānaṃ vā vilumpane. Kevaṭṭānaṃ hi macchapacchitṭhapitaṭṭhāne mahājano sannipatitvā **“idha aññaṃ ekaṃ macchaṃ dehi, ekaṃ macchaphālaṃ dehi, etassa te mahā dinno, mayhaṃ khuddako”**ti evaṃ uccāsaddamahāsaddaṃ karonti. Taṃ sandhāyetaṃ vuttaṃ **“kevaṭṭānaṃ macchapacchiraṃ otāretvā ṭhitaṭṭhāne”**ti. Macchaggahaṇatthaṃ jāle pakkhittepi tasmim ṭhāne kevaṭṭā ceva aññe ca **“paviṭṭho na**

paviṭṭho, gahito na gahito”ti mahāsaddaṃ karonti. Kaṃ sandhāyetaṃ vuttaṃ
“jāle vā -pa- mahāsaddo hotī”ti. **Kattabbavattanti**
 pādaparikkammādikattabbakiccaṃ. **Kharāti** cittena vācāya ca kakkhaḷā.
 Sesamettha uttānameva.

Bhariyāsuttavaṇṇanā niṭṭhitā.

11. Kodhanasuttavaṇṇanā

64. Ekādasame **sapattakaraṇāti** vā **sapattehi** kātabbā. **Kodhananti**
 kujjhanasīlaṃ. **Kodhanoyanti** kujjhano ayaṃ. **Ayanti** ca nipātamattaṃ.
Kodhaparetoti kodhena anugato, parābhibhūto vā. **Dubbaṇṇova hotīti**
 pakatiyā vaṇṇavāpi alaṅkatappaṭiyattopi mukhavikārādivasena virūpo eva
 hoti. Etarahi āyatiñcāti kodhābhibhūtassa ekantamidaṃ phalanti dīpetum
 “dubbaṇṇovā”ti avadhāraṇaṃ katvā puna **“kodhābhibhūto”**ti vuttaṃ.

Ayasabhāvanti akittimabhāvaṃ. Attano paresaṅca anattaṃ janetīti
anattahajano. **Antaratoti** abhantaro, cittato vā. **Taṃ jano nāvabujjhatīti**
 kodhasaṅkhātāṃ antarato abhantare attano citteyeva jātaṃ
 anattahajanacittappakopanādibhayaṃ bhayahetum ayaṃ bālamahājano na
 jānāti. **Yanti** yattha. Bhummatthe hi etaṃ paccattavacanaṃ. Yasmim kāle
 todho sahate naraṃ, andhatamaṃ tadā hotīti sambandho. **Yanti** vā
 kāraṇavacanaṃ, yasmā kodho uppajjamāno naraṃ sahate abhibhavati, tasmā
 andhatamaṃ tadā hoti, yadā kuddhoti attho yaṃ-taṃ-saddānaṃ
 ekantasambandhabhāvato. Atha vā **yanti** kiriyāparāmasanaṃ. **Sahateti**
 yadetaṃ kodhassa sahanaṃ abhibhavanaṃ, etaṃ andhatamaṃ bhavananti
 attho. Atha vā yaṃ naraṃ kodho sahate abhibhavati, tassa andhatamaṃ tadā
 hoti. Tato ca kuddho atthaṃ na jānāti, kuddho dhammaṃ na passatīti.

Bhūnaṃ vuccati vuddhi, tassa hananaṃ ghāto etesanti **bhūnahaccāni**.
 Tenāha **“hatavuddhīni”**ti. **Dama**-saddena vuttamevatthaṃ vibhāvetum

paññāvīriyena diṭṭhiyāti vuttanti dassento “**katarena damenā**”ti-ādimāha. Anekatto hi **dama** saddo. “Saccena danto damasā upeto, vedantagū vusitabrahmacariyo”ti¹ ettha hi indriyasamvaro damoti vutto “manacchaṭṭhāni indriyāni dameti”ti katvā. “Yadi saccā damā cāgā, khantya bhiiyodha vijjati”ti² ettha paññā damo “samkilesam dameti pajahati”ti katvā. “Dānena damena samyamena saccavajjena atthi puññaṃ, atthi puññassa āgamo”ti³ ettha uposathakammaṃ damo “upavasanasena kāyakammādāni dameti”ti katvā. “Sakkhissasi kho tvaṃ puṇṇa iminā damūpasamena samannāgato sunāparantasmim janapadantare viharitun”ti⁴ ettha adhivāsanakkhanti damo “kodhūpanāhamakkhādike dameti vinodeti”ti katvā. “Na mānakāmassa damo idhatthi, na monamatthi asamāhitassā”ti⁵ ettha abhisambojjhaṅgādiko samādhipakkhiko dhammodamo “dammati cittam etenā”ti katvā. Idhāpi “tam damena samucchinde, paññāvīriyena diṭṭhiyā”ti vacanato **dama**-saddena paññāvīriyadiṭṭhiyo vuttā.

Kodhanasuttavaṇṇanā niṭṭhitā.

Abyākatavaggavaṇṇanā niṭṭhitā.

7. Mahāvagga

1. Hiri-ottappasuttādivaṇṇanā

65-66. Sattamassa paṭhamam uttānameva. Dutiye **tayo samvaṭṭā** āposamvaṭṭo tejosamvaṭṭo vāyosamvaṭṭoti tayo samvaṭṭā. **Tisso samvaṭṭasīmā**ti ābhassarā subhakiṇhā vehapphalāti tisso samvaṭṭasīmā. Yadā hi kappo tejena samvaṭṭati vinassati, tadā ābhassarato heṭṭhā agginā dayhati. Yadā āpena samvaṭṭati, tadā subhakiṇhato heṭṭhā udakena vilīyati. Yadā vāyunā samvaṭṭati, tadā vehapphalato heṭṭhā vāyunā viddhamsati. Vitthārato pana sadāpi ekaṃ buddhakkhettaṃ vinassati. **Buddhakkhettaṃ** nāma tividham hoti jātikkhettaṃ

1. Saṃ 1. 170; Khu 1. 347 piṭṭhesu.

3. Saṃ 2. 531 piṭṭhe.

5. Saṃ 1. 4 piṭṭhe.

2. Saṃ 1. 217; Khu 1. 387 piṭṭhe.

4. Ma 3. 313; Saṃ 2. 287 piṭṭhesu.

āṇākkhettam̐ visayakkhettanti. Tattha **jātikkhettam̐** nāma dasasahassacakkavālapariyantam̐ hoti, yaṃ tathāgatassa paṭisandhigahaṇādisu kampaṭi. **Āṇākkhettam̐** koṭisahassacakkavālapariyantam̐, yattha ratanasuttam̐¹ khandhaparittam̐² dhajaggaparittam̐³ āṭānāṭiyaparittam̐⁴ moraparittanti⁵ imesaṃ parittānaṃ ānubhāvo vattati. **Visayakkhettam̐** anantamaparimāṇam̐, yaṃ “yāvata vā pana ākaṅkheyyā”⁶ti vuttam̐. Evametesu tīsu buddhakkhettesu ekaṃ āṇākkhettam̐ vinassati. Tasmim̐ pana vinassante jātikkhettam̐ vinaṭṭhameva hoti, vinassantañca ekatova vinassati, saṅṭhahantampi ekatova saṅṭhahati.

Tīṇi samvattamūlānīti rāgadosamohasaṅkhātāni tīṇi samvattakāraṇāni. Rāgādisu hi akusalamūlesu ussannesu loko vinassati. Tathā hi rāge ussannatare agginā vinassati, dose ussannatare udakena, mohe ussannatare vābhena. Keci pana “dose ussannatare agginā, rāge udakenā”ti vadanti.

Tīṇi kolāhalānīti kappakolāhalam̐ buddhakolāhalam̐ cakkavattikolāhalanti tīṇi kolāhalāni. Tattha “vassasatasahassamatthake kappuṭṭhānam̐ nāma bhavissati”ti-ādinā devatāhi ugghositasaddo **kappakolāhalam̐** nāma hoti, “ito vassasatasahassamatthake loko vinassissati, mettam̐ mārisā bhāvētha karuṇam̐ muditam̐ upekkhan”ti manussapathe devatā ghosantiyo caranti. “Vassasahassamatthake buddho uppajjissati”ti **buddhakolāhalam̐** nāma hoti, “ito vassasahassamatthake buddho uppajjitvā dhammānudhammappaṭipanno saṅgharatanena parivārito dhammam̐ desento vicarissati”ti devatā ugghosanti. “Vassasatamatthake pana cakkavattī uppajjissati”ti **cakkavattikolāhalam̐** nāma hoti, “ito vassasatamatthake sattaratatanasampanno cātuddīpissaro saṃsāraparivāro vehāsaṅgamo cakkavattī rājā uppajjissati”ti devatā ugghosanti.

Aciraṭṭhena na dhuvāti udakabubbulaḍayo viya na ciraṭṭhāyitāya dhuvabhāvarahitā. **Assāsarahitā**ti supinake pītapānīyam̐ viya anulittacandanam̐ viya ca assāsavirahitā.

1. Khu 1. 7, 314 piṭṭhesu.

3. Saṃ 1. 220 piṭṭhe.

5. Khu 5. 38 piṭṭhe Jātake.

2. Am̐ 1. 384; Vi 4. 245; Khu 5. 53 piṭṭhesu.

4. Dī 3. 158 piṭṭhe.

6. Am̐ 1. 226 piṭṭhe.

Upakappanameghoti kappavināsakameghaṃ sandhāya vadati. Yasmim̃ hi samaye kappo agginā nassati, āditova kappavināsakamahāmegho uṭṭhahitvā koṭisatasahassacakkavāḷe ekamahāvassaṃ vassati. Manussā tuṭṭhahaṭṭhā sabbabījāni nīharitvā vapanti. Sassesu pana gokhāyitakamattesu jātesu gadrabharavaṃ ravanto ekabindumpi na vassati, tadā pacchinnaṃ pacchinnameva vassaṃ hoti. Tenāha “**tadā nikkhanta bijaṃ -pa-ekabindumpi devo na vassatī**”ti. “Vassasatasahassa-accayena kappavutṭhānaṃ bhavissatī”ti-ādinā devatāhi vuttavacanaṃ sutvā yebhuyyena manussā ca bhummadevatā ca saṃvegajātā aññamaññaṃ muducittā hutvā mettādīni puññaṃ katvā devaloke nibbattanti, avīcīto paṭṭhāya tuccho hotīti.

Pañca bijajātānīti mūlabijaṃ khandhabijaṃ phaḷubijaṃ aggabijaṃ bijabijanti pañca bijāni jātāni. Tattha **mūlabijanti** vacā vacattaṃ haliddaṃ siṅgiveranti evamādi. **Khandhabijanti** assattho nigrodhoti evamādi. **Phaḷubijanti** ucchu veḷu naḷoti evamādi. **Aggabijanti** ajjukaṃ phaṇijjakanti evamādi. **Bijabijanti** vihi-ādīpubbaṇṇaṅceva muggamāsādi-aparaṇṇaṅca. Paccayantarasaṃvāye visadisuppattiyā visesakāraṇabhāvato ruhanasamatthe sārāphale niruḷho bija-saddo tadatthasiddhiyā mūlādīsipi kesuci pavattatīti mūlādīto nivattanatthaṃ ekena bija-saddena visesetvā vuttaṃ “bijabijan”ti “rūparūpaṃ¹ dukkhadukkhan”ti² yathā. Yathā phalapākāpariyantā **osadhirukkhā** veḷukadali-ādayo.

Yaṃ kadācīti-ādīsū yanti nipātamattaṃ. **Kadācīti** kismiñci kāle. **Karahacīti** tasseva vevacanaṃ. **Dīghassa addhunoti** dīghassa kālassa. **Accayenāti** atikkamena. Sesamettha uttānameva.

Hiri-ottappasuttādivaṇṇanā niṭṭhitā.

3. Nagaropamasuttavaṇṇanā

67. Tatiye paccante bhavaṃ **paccantimaṃ**. “Ratho sīlaparikkhāro, jhānakkho cakkavāriyo”ti-ādīsū³ viya alaṅkāravacano parikkhārasaddoti āha “**nagarālaṅkārehi alaṅkatan**”ti. Parivāravacanopi vaṭṭatiyeva “satta

1. Visuddhi 2. 81 piṭṭhe.

2. Saṃ 2. 453 piṭṭhe.

3. Saṃ 3. 5 piṭṭhe.

samādhiparikkhārā”ti-ādisu¹ viya. Nemaṃ vuccati thambhādīhi anupatabhūmippadesoti āha “**gambhīra-āvāṭā**”ti, gambhīraṃ bhūmiṃ anuppaviṭṭhāti attho. **Suṭṭhu sannisīdāpitāti** bhūmiṃ nikhanitvā sammadeva ṭhapitā.

Anupariyeti etenāti anupariyāyo, soyeva pathoti **anupariyāyapatho**, parito pākārassa anuyāyamaggo.

Hatthim ārohanti ārohāpayanti cāti **hatthārohā**². Yena hi payogena puriso hatthino ārohanayoggo hoti, hatthissa taṃ payogaṃ vidhāyantānaṃ sabbesampetesam gahaṇaṃ. Tenāha “**sabbepī**”ti-ādi. Tattha **hatthācariyā** nāma ye hatthino hatthārotakānaṃ sikkhāpakā. **Hatthivejja** nāma hatthitisakkā. **Hatthibandhā** nāma hatthīnaṃ pādarakkhakā. **Ādi**-saddena hatthīnaṃ yavapadāyakādike saṅgaṇhāti. **Assārohā rathikāti** etthāpi eseva nayo. Rathe niyuttā **rathikā**. **Ratharakkhā** nāma rathassa āṇirakkhakā. Dhanuṃ gaṇhanti gaṇhāpentī cāti **dhanuggahā**, issāsā dhanusippassa sikkhāpakā ca. Tenāha “**dhanu-ācariyā issāsā**”ti. Celena celapaṭākāya yuddhe akanti gacchantīti **celakāti** āha “**ye yuddhe jayaddhajaṃ gahetvā purato gacchantī**”ti. Yathā tathā ṭhite senike brūhakarāṇavasena tato tato calayanti uccālentīti **calakā**. Sakuṇagghi-ādayo viya maṃsapiṇḍaṃ parasenāsamūhaṃ sāhasikamahāyodhatāya chetvā chetvā dayanti uppatitvā gacchantīti **piṇḍadāyakā**. Dutiyaṅkappe piṇḍe dayanti janasammadde uppatantā viya gacchantīti **piṇḍadāyakāti** attho veditabbo. **Uggatuggatāti** thāmajavaparakkamādivasena ativiya uggatā, udaggāti attho. **Pakkhandantīti** attano vīrasūrabhāvena asajjamānā parasenaṃ anupavisantīti attho. Thāmajavabalaparakkamādisampattiyā **mahānāgā viya mahānāgā**. **Ekasūrāti** ekākisūrā attano sūrabhāveneva ekākino hutvā yujjhanakā. **Sajjalikāti** savammikā. **Saraparittāṇanti** cammaparisibbitaṃ khetakaṃ, cammamayaṃ vā phalakaṃ. **Gharadāsayodhāti** attano dāsayodhā.

Sampakkhandanalakkhaṇāti saddheyyavatthuno evametanti sampakkhandanalakkhaṇā. **Sampasādanalakkhaṇāti** pasīditabbe vatthusmiṃ pasīdanalakkhaṇā.

1. Dī 3. 208 piṭṭhe.

2. Dī-Ṭī 1. 219 piṭṭhādīsūpi passitabbaṃ.

Okappanasaddhāti okkantitvā pakkhanditvā adhimuccanaṃ. Pasādanīye vatthusmiṃ pasīdanaṃ **pasādasaddhā**. **Ayaṃ anudhammoti** ayaṃ navannaṃ lokuttaradhammānaṃ anulomadhammo. **Nibbidābahuloti** ukkaṇṭhanābahulo. **Saddhā bandhati pātheyyanti** saddhā nāmāyaṃ sattassa maraṇavasena mahāpathaṃ saṃvajato mahākantāraṃ paṭipajjato mahāviduggaṃ pakkhandato pātheyyapuṭaṃ bandhati, sambalaṃ vissajjetīti attho. Saddhaṃ hi uppādetvā dānaṃ deti, sīlaṃ rakkhati, uposathakammaṃ karoti. Tenetaṃ vuttaṃ “saddhā bandhati pātheyyan”ti. **Sirīti** issariyaṃ. Issariye hi abhimukhībhūte thalatoṇi jalatoṇi bhogā āgacchantiyeva. Tenetaṃ vuttaṃ “**sirī bhogānamāsayo**”ti. **Saddhā dutiyā purisassa hotīti** purisassa devaloke manussaloke ceva nibbānaṅca gacchantassa saddhā dutiyā hoti, saḥāyakkiccaṃ sādheti. **Bhattapuṭādīti ādi-**saddena dutiyikādīnaṃ saṅgaho daṭṭhabbo. **Anekasarasatāti** anekasabhāvatā, anekakiccatā vā. Sesāṃ suviññeyyameva.

Nagaropamasuttavaṇṇanā niṭṭhitā.

4. Dhammaññūsuttavaṇṇanā

68. Catutthe suttageyyādidhammaṃ jānātīti **dhammaññū**. Tassa tasseva suttageyyādīnā bhāsītassa tadaññassa suttapadatthassa bodhakassa saddassa atthakusalatāvasena atthaṃ jānātīti **atthaññū**. “Ettakomhi sīlena samādhinā paññāyā”ti evaṃ yathā attano pamāṇajānanavasena¹ attānaṃ jānātīti **attaññū**. Paṭiggahaṇaparibhogapariyesanavissajjanesu mattaṃ jānātīti **mattaññū**. Niddese pana paṭiggahaṇamattaññūtāya eva paribhogādimmattaññūtā pabodhitā hotīti paṭiggahaṇamattaññūtāva dassitā. “Ayaṃ kālo uddeśassa, ayaṃ kālo paripucchāya, ayaṃ kālo yogassa adhigamāyā”ti evaṃ kālaṃ jānātīti **kālaññū**. Tattha pañca vassāni uddeśassa kālo, dasa paripucchāya, idaṃ atisambādham, atikkhapaññassa tāvatā kālena tīretuṃ asakkuṇeyyattā dasa vassāni uddeśassa kālo, vīsati paripucchāya, tato paraṃ yoge kammaṃ kātabbaṃ.

1. Samānājanānavasena (Ka)

Khattiyaparisādikaṃ aṭṭhavidhaṃ parisam jānātīti **parisaññū**.
 Bhikkhuparisādikaṃ catubbidhaṃ, khattiyaparisādikaṃ
 manussaparisamyeva puna catubbidhaṃ gahetvā aṭṭhavidhaṃ vadanti apare.
 Niddese panassa khattiyaparisādicatubbidhaporisaggahaṇaṃ
 nidassanamattaṃ daṭṭhabbaṃ. “Imaṃ me sevantassa akusalā dhammā
 parihāyanti, kusalā dhammā abhivaḍḍhanti, tasmā ayaṃ puggalo sevitabbo,
 vipariyāyato añño asevitabbo”ti sevitabbāsevitabbapuggalaṃ jānātīti
puggalaparoparaññū. Evaṃ hi tesam puggalānaṃ paroparam
 ukkaṭṭhanihīnataṃ jānāti nāma. Niddeseṭṭhassa sevitabbāsevitabbapuggale
 vibhāvanameva samaṇakathā¹katanti daṭṭhabbaṃ.

Dhammaññūsuttavaṇṇanā niṭṭhitā.

5. Pāricchattakasuttādivaṇṇanā

69-70. Pañcame **patitapalāsoti** patitapatto. Ettha paṭhamam
 paṇḍupalāsataṃ, dutiyam pannapalāsatañca vatvā tatiyam jālakajātataṃ,
 catuttham khārakajātataṃ ca pāḷiyam vuttā. **Dīghanikāyatṭhakathāyam** pana
mahāgovindasuttavaṇṇanāyam² imameva pāḷim āharitvā dassentena
 paṭhamam paṇḍupalāsataṃ, dutiyam pannapalāsatañca vatvā tatiyam
 khārakajātataṃ, catuttham jālakajātataṃ ca dassitā. Evaṃ hi tattha vuttam—
 “pāricchattake pupphamāne ekaṃ vassam upaṭṭhānam gacchanti, te tassa
 paṇḍupalāsabhāvato paṭṭhāya attamanā honti. Yathāha—

“Yasmiṃ bhikkhave samaye devānaṃ tāvatimsānaṃ pāricchattako
 koviḷāro paṇḍupalāso hoti, attamanā bhikkhave devā tāvatimsā tasmim
 samaye honti ‘paṇḍupalāso dāni pāricchattako koviḷāro, na cirasseva
 pannapalāso bhavissatī’ti. Yasmiṃ samaye devānaṃ tāvatimsānaṃ
 pāricchattako koviḷāro pannapalāso hoti, jālakajāto hoti, khārakajāto
 hoti, kuṭumalakajāto hoti, korakajāto hoti, attamanā

1. Pamāṇakaraṇato (?)

2. Di-Ṭṭha 2. 242 piṭṭhe.

bhikkhave devā tāvatimsā tasmim samaye honti ‘korakajāto dāni pāricchattako koviḷāro, na cirassega sabbapāliphullo bhavissatī’ti’.

Līnatthappakāsiniyampi¹ ettha evamattho dassito—**pannapalāsoti** patitapatto. **Khāarakajātoti** jātakhuddakamakuḷo. Ye hi nīlapattakā ativiya khuddakā makuḷā, te “khāarakā”ti vuccanti. **Jālakajātoti** tehiyeva khuddakamakuḷehi jātajālako sabbaso jālo viya jāto. Keci pana “jālakajātoti ekajālo viya jāto”ti attham vadanti. Pāricchattako kira khāarakaggahaṇakāle sabbatthakameva pallaviko hoti, te cassa pallavā pabhassarapavāḷavaṇṇasamujjalā honti. Tena so sabbaso samujjalanto tiṭṭhati. **Kuṭumalajātoti** sañjātamahāmakūḷo. **Korakajātoti** sañjātasūcibhedo sampativikasamānavattho. **Sabbapāliphullo**ti sabbaso phullitavikasitoti. Ayañca anukkamo dīghabhāṇakānam vaḷañjanānukkamena dassito, na ettha ācariyassa virodho āsaṅkitabbo.

Kantanakavātoti devānam puññakammappaccayā pupphānam chindanakavāto. **Kantatīti** chindati. **Sampaṭicchanakavātoti** chinnānam chinnānam pupphānam sampaṭiggahaṇakavāto. **Cinantoti**² nānāvidhabhattisannivesavasena nicinam karonto. **Aññataradevatānanti** nāmagottavasena apaññātadevatānam. **Reṇuvattīti** reṇusaṅghāto. **Kaṇṇikam āhaccāti** sudhammāya kūṭam āhantvā.

Anupharaṇānubhāvoti khīṇāsavassa bhikkhuno kittisaddassa yāva brahmalokā anupharaṇasaṅkhāto ānubhāvo. **Pabbajjānissitam hotīti** pabbajjāya catupārisuddhisīlampi dassitamevāti adhippāyo. **Paṭhamajjhānasannissitanti**-ādīsipi imināva nayena attho veditabbo, idha pana ubhayato paricchedo heṭṭhā sīlato upari arahattato ca paricchedassa dassitattā. **Tenetam vuttanti** tena kāraṇena etam “catupārisuddhisīlam pabbajjānissitam hotī”ti-ādivacanam vuttam. Chaṭṭham uttānameva.

Pāricchattakasuttādivaṇṇanā niṭṭhitā.

1. Dī-Ṭī 2. 219 piṭṭhe. 2. Rañjento (Aṭṭhakathāyam), naccanto (Dī-Ṭī 2. 219 piṭṭhe.)

7. Bhāvanāsuttavaṇṇanā

71. Sattame **atthassa asāmikā** “bhāvanam ananuyuttassā”ti vuttatā. **Sambhāvanattheti** “api nāma evam siyā”ti vikappanatto sambhāvanatto. **Evañhi loke siliṭṭhavacanam hotīti** ekameva saṅkham avatvā aparāya saṅkhāya saddhim vacanam loke siliṭṭhavacanam hoti yathā “dve vā tīṇi vā udakaphusitānī”ti. **Sammā adhisayitānīti** pādādīhi attanā nesaṃ kiñci upaghātaṃ akarontiyā bahivātādiparissayapariharaṇattham sammadeva upari sayitāni. Upari-attho hettha adhi-saddo. **Utum gaṇhāpentiyāti** tesam allasinehapariyādānattham attano kāyusmāvasena utum gaṇhāpentiyā. Tenāha “**usmīkatānī**”ti. **Sammā paribhāvitānīti** sammadeva sabbaso kukkuṭavāsanāya vāsītāni. Tenāha “**kukkuṭagandham gāhāpitānī**”ti. Ettha ca sammāparisedanam kukkuṭagandhaparibhāvanañca sammā-adhisayanāsammāparisedananipphattiyā ānubhāvanipphādītanti daṭṭhabbam. Sammā-adhisayaneneva hi itaradvayaṃ ijhati. Na hi sammā-adhisayanato visum sammāparisedanassa sammāparibhāvanassa ca kāraṇam atthi, tena pana saddhimyeva itaresam dvinnampi ijhanato vuttam.

Tividhakiriyākaraṇenāti sammā-adhisayanāditiividhakiriyākaraṇenāti attho. Kiñcāpi “evam aho vata me”ti-ādinā na icchā uppajjeyya kāraṇassa pana sampādītattā, atha kho bhābbāva te abhinibbhijjītanti yojanā. Kasmā bhābbāti āha “**te hi yasmā tāyā**”ti-ādi. **Sayampīti** aṇḍāni. **Pariṇāmanti** paripākam bahinikkhamanayogyatam. Yathā kapālassa tanutā ālokassa anto paññāyamānassa kāraṇam, tathā kapālassa tanutāya nakhasikhāmukhatuṇḍakānam kharatāya ca allasinehapariyādānam kāraṇavacananti daṭṭhabbam. **Tasmāti** ālokassa anto paññāyamānato sayañca paripākagatattā.

Opammasampañipādananti opammatthassa upameyyena sammadeva paṭipādanam. **Tanti** opammasampañipādanam. **Evanti** idāni vuccamānākārena. **Atthenāti** upameyyatthena saṃsandetvā saha yojetvā. Sampādanena sampayuttadhamavasena ñāṇassa tikkhabhāvo veditabbo. Ñāṇassa hi sabhāvato satinepakkato ca tikkhabhāvo, samādhivasena kharabhāvo, saddhāvasena vipasannabhāvo. **Pariṇāmakāloti** balavavipassanākālo.

Vaḍḍhikāloti vuṭṭhānagāminivipassanākālo. Anulomaṭṭhāniyā hi vipassanā gahitagabbhā nāma tadā maggagabbhassa gahitattā. **Tajjātikanti** tassa vipassanānuযোগassa anurūpaṃ. Satthāpi avijjaṇḍakosaṃ paharati, desanāpi vineyyasantānagataṃ avijjaṇḍakosaṃ paharati, yathāṭhāne ṭhātuṃ na deti.

Olambakasaṅkhātanti olambakasuttasaṅkhātaṃ. “Palan”¹ti hi tassa suttassa nāmaṃ. **Cāretvā** dārūno heṭṭhā dosajānanatthaṃ ussāpetvā. **Gaṇḍaṃ haratīti palavaṇḍoti** etena “palena gaṇḍahāro palagaṇḍoti pacchimapade uttarapadalopena niddeso”ti dasseti. **Gahaṇaṭṭhāneti** hatthena gahetabbaṭṭhāne. Sammadeva khipiyanti etena kāyaduccarītādīnīti saṅkhepo, pabbajjāva saṅkhepo **pabbajjāsaṅkhepo**. Tena vipassanaṃ anuyuñjantassa puggalassa ajānantasseva āsavānaṃ parikkhaya idha vipassanānisaṃsoti adhippeto.

Hemantikena kāraṇabhūtena, bhummatthe vā etaṃ karaṇavacanaṃ, hemantiketi attho. **Paṭippassambhantīti** paṭippassaddhaphalāni honti. Tenāha “pūtikāni bhavantī”²ti. **Mahāsamuddo viya sāsanaṃ** agādhagambhīrabhāvato. **Nāvā viya yogāvacharo** mahoghuttarato. **Pariyāyanaṃ viyāti** parito aparāparaṃ yāyanaṃ viya. **Khajjamānānanti** khādantena viya udakena khepiyamānabandhanānaṃ. **Tanubhāvoti** pariyaṭṭhānapavattiyā asamatthatāya dubbalabhāvo. **Vipassanāñānapītipāmojjehīti** vipassanāñānasamuṭṭhitehi pītipāmojjehi. **Okkhāyamāneti** vipassanākammaṭṭhāne vīthippaṭipāṭiyā okkhāyamāne, paṭisaṅkhānupassanāya vā **okkhāyamāne**. Saṅkhārupekkhāya **pakkhāyamāne**. **Dubbalatā dīpitā** “appakasireneva saṃyojanāni paṭippassambhanti, pūtikāni bhavantī”²ti vuttattā.

Bhāvanāsuttavaṇṇanā niṭṭhitā.

8. Aggikkhandhopamasuttādivaṇṇanā

72-73. Aṭṭhame **passatha nūti** api passatha. **Mahantanti** vipulaṃ. **Aggikkhandhanti** aggisamūhaṃ. **Ādittanti** padittaṃ. **Sampajjalitanti** samantato pajjalitaṃ

1. Phalanti (Ka)

accivipphuliṅgāni muñcantam. **Sajotibhūta**nti samantato uṭṭhitāhi jālāhi ekappabhāsamudayabhūtam. **Tam kiṃ maññathā**ti tam idāni mayā vuccamānattham kiṃ maññathāti anumattiggahaṇattham pucchati. Yadettha satthā aggikkhandhāliṅganam kaññāliṅganañca ānesi, tamattham vibhāvetum “**ārocayāmi**”ti-ādimāha.

Dussīlassāti nissīlassa sīlavirahitassa. **Pāpadhammassā**ti dussīlattā eva hīnajjhāsayatāya lāmakasabhāvassa. **Asucisaṅkassarasamācārassā**ti aparisuddhatāya asuci hutvā saṅkāya saritabbasamācārassa. Dussīlo hi kiñcideva asāruppaṃ disvā “idaṃ asukena kataṃ bhavissatī”ti paresam āsaṅkā hoti. Kenacideva karaṇīyena mantayante bhikkhū disvā “kacci nu kho ime mayā katakammaṃ jānitvā mantenti”ti attanoyeva saṅkāya saritabbasamācāro. **Paṭicchannakammantassā**ti lajjitabbatāya paṭicchādetabbakammantassa. **Assamaṇassā**ti na samaṇassa. Salākkaggahaṇādīsu “ahampi samaṇo”ti micchāpaṭiññāya **samaṇapaṭiññassa**. Aseṭṭhacāritāya **abrahmacārissa**. Uposathādīsu “ahampi brahmacārī”ti micchāpaṭiññāya **brahmacāripaṭiññassa**. Pūtinā kammaena sīlavipattiyaṃ anto anupaviṭṭhattā **antopūtikassa**. Chadvārehi rāgādikilesānussavanena tintattā **avassutassa**. Sañjātarāgādikacavarattā sīlavantehi chaḍḍetabbattā ca **kasambujātassa**.

Vālarajjuyāti vālehi katarajjuyā. Sā hi kharatarā hoti. **Ghamseyyā**ti mathanavasena ghamseyya. **Teladhotāyā**ti telena nisitāya. **Paccorasminti** pati-urasmim, abhimukhe uramajjheti adhippāyo. **Ayosaṅkunā**ti saṇḍāsena. **Pheṇuddehakanti** pheṇam uddehetvā uddehetvā, anekavāram pheṇam uṭṭhāpetvāti attho. Evamettha saṅkhepato pāḷivaṇṇanā veditabbā. Navamaṃ uttānameva.

Aggikkhandhopamasuttādivaṇṇanā niṭṭhitā.

10. Arakasuttavaṇṇanā

74. Dasame **parittanti** ittaram. Tenāha “**appaṃ thokaṃ**”ti. Pabandhānupacchedassa paccayabhāvo idha jīvitassa raso kiccanti adhippetanti

āha “**sarasaparittatāyapi**”ti. Tadadhīnavuttitāyapi hi “yo bhikkhave ciraṃ jīvati, so vassasatāṃ appaṃ vā bhiyyo”ti vacanato parittāṃ**khaṇaparittatāyapi**. Paramatthato hi atiparitto sattānaṃ jīvitakkhaṇo ekacittakkhaṇappavattimattoyeva. Yathā nāma rathacakkaṃ pavattamānampi ekeneva nemippadesena pavattati, tiṭṭhamānampi ekeneva tiṭṭhati, evamevaṃ ekacittakkhaṇikaṃ sattānaṃ jīvitaṃ tasmaṃ citte niruddhamatte satto niruddhoti vuccati. Yathāha “atīte cittakkhaṇe jīvittha na jīvati na jīvissati. Anāgate cittakkhaṇe na jīvittha na jīvati jīvissati. Paccuppanne cittakkhaṇe na jīvittha jīvati na jīvissati.

Jīvitaṃ attabhāvo ca, sukhadukkhā ca kevalā.

Ekacittasamāyuttā, lahuso vattate khaṇo.

Yo niruddhā marantassa, tiṭṭhamānassa vā idha.

Sabbepi sadisā khandhā, gatā appaṭisandhikā.

Anibbattena na jāto, paccuppannena jīvati.

Cittabhaṅgā mato loko, paññatti paramatthiyā”ti¹.

Lahusanti lahusaṃ. Tenāha “lahuṃ uppajjitvā nirujjhanato lahusaṃ”ti. **Parittāṃ lahusanti** ubhayaṃ panetaṃ appakassa vevacanaṃ. Yaṃ hi appakaṃ, taṃ parittañceva lahukañca hoti. Idha pana āyuno adhippetattā rassanti vuttaṃ hoti. **Mantāyanti** karaṇatthe etaṃ bhummavacanaṃ āha “**mantāya boddhabbaṃ, paññāya jānitabbanti attho**”ti. **Mantāyanti** vā manteyyanti vuttaṃ hoti, mantetabbaṃ mantāya upaparikkhitabbanti attho. **Paññāya jānitabbanti** jānitabbaṃ jīvitassa parittabhāvo bahudukkhādibhāvo. Jānitvā ca pana sabbapalibodhe chinditvā kattabbaṃ kusalaṃ, caritabbaṃ brahmacariyaṃ. Yasmā natthi jātassa amaraṇaṃ, appaṃ vā bhiyyo vassasatato upari appaṃ aññaṃ vassasatāṃ appatvā vīsaṃ vā tīsaṃ vā cattālīsaṃ vā paṇṇāsaṃ vā saṭṭhi vā vassāni jīvati, evaṃdīghāyuko pana atidullabho. “Asuko hi evaṃ ciraṃ jīvati”ti tattha tattha gantvā daṭṭhabbo hoti. Tattha visākhā upāsikā vīsasatāṃ jīvati, tathā pokkharasātibrāhmaṇo brahmāyubrāhmaṇo bāvariyabrāhmaṇo ānandatthero

1. Khu 7. 32, 90 piṭṭhesu.

mahākassapatttheroti. Anuruddhatthero pana vassasatañceva paṇṇāsañca vassāni. Bākulatthero vassasatañceva saṭṭhi ca vassāni, ayaṃ sabbadīghāyuko, sopi dve vassasatāni na jīvi.

Arakasuttavaṇṇanā niṭṭhitā.

Mahāvaggavaṇṇanā niṭṭhitā.

8. Vinayavagga

1. Paṭhamavinayadharasuttādivaṇṇanā

75-82. Aṭṭhamassa paṭhamaṃ dutiyañca uttānatthameva. Tatiye **vinayalakkhaṇe patiṭṭhito** lajjibhāvena vinayalakkhaṇe ṭhito hoti. Alajjī¹ hi bahussutopi samāno lābhagarukatāya tantiṃ visamvādetvā uddhammaṃ ubbinayaṃ satthusāsanam dīpetvā sāsane mahantaṃ upaddavaṃ karoti, saṃghabhedampi saṃgharājimpi uppādeti. Lajjī pana kukkuccako sikkhākāmo jīvitahetupi tantiṃ avisaṃvādetvā dhammameva vinayamevaca dīpeti, satthusāsanam garuṃ katvā ṭhapeti. Evaṃ yo lajjī, so vinayaṃ ajahanto avokkamantova lajjibhāvena vinayalakkhaṇe ṭhito hoti patiṭṭhito.

Asamhīroti ettha **samhīro** nāma yo pāḷiyam vā aṭṭhakathāyam vā hetṭhā vā uparito vā padapaṭipāṭiyā vā pucchiyamāno vitthunati vipphandati, saṅghātuṃ na sakkoti, yaṃ yaṃ parena vuccati, taṃ taṃ anujānāti, sakavādam chaddetvā paravādam gaṇhāti. Yo pana pāḷiyam vā aṭṭhakathāyam vā hetṭhupariyavasena vā padapaṭipāṭiyā vā pucchiyamāno na vitthunati na vipphandati, ekekalomaṃ saṅghāsena gaṇhanto viya “evaṃ mayam vadāma, evaṃ no ācariyā vadantī”ti vissajjeti. Yamhi pāḷi ca pāḷivinicchayo ca suvaṇṇabhājane pakkhittasīhavasā viya parikkhayaṃ pariādānam agacchanto tiṭṭhati, ayaṃ vuccati **asamhīro**. Yasmā pana evarūpo yaṃ yaṃ parena vuccati, taṃ taṃ nānujānāti, attanā suvinicchinitam katvā gahitam aviparītamattam

1. Vi-Ṭṭha 1. 199 piṭṭhepi passitabbam.

na vissajjeti, tasmā vuttaṃ “**na sakkoti gahitaggahaṇaṃ vissajjāpetun**”ti.
Catutthādīni suviññeyyāni.

Paṭhamavinayadharasuttādivaṇṇanā niṭṭhitā.

9. Satthusāsanasuttavaṇṇanā

83. Navame **vivekaṭṭhoti** vivitto. Tenāha “**dūrībhūto**”ti. **Sati-avippavāse** **ṭhitoti** kammaṭṭhāne satim avijahitvā ṭhito. **Pesitattoti** kāye ca jīvite ca anapekkhatāya nibbānaṃ pesitacitto tanninno tappono tappabbhāro.

Satthusāsanasuttavaṇṇanā niṭṭhitā.

10. Adhikaraṇasamathasuttavaṇṇanā

84. Dasame adhikarīyanti etthāti **adhikaraṇāni**. Ke adhikarīyanti?
Samathā. Kathaṃ adhikarīyanti? Samanavasena. Tasmā te tesam samanavasena pavattantīti āha “**adhikaraṇānisamenti**”ti-ādi. **Uppannānaṃ** **uppannānanti** uṭṭhitānaṃ uṭṭhitānaṃ. **Samathatthanti** samanatthaṃ. **Dīghanikāye saṅgītisuttavaṇṇanāyampi**¹ **vitthāratoyevāti** etthāyaṃ vitthāranayo—adhikaraṇesu tāva dhammoti vā adhammoti vā aṭṭhārasahi vatthūhi vivadantānaṃ bhikkhūnaṃ yo vivādo, idaṃ **vivādādhikaraṇaṃ** nāma. Silavipattiyā vā ācāradiṭṭhi-ājīvavipattiyā vā anuvadantānaṃ yo anuvādo upavadanā ceva codanā ca, idaṃ **anuvādādhikaraṇaṃ** nāma. Mātikāyaṃ āgatā pañca, vibhaṅge dveti sattapi āpattikkhandhā, idaṃ **āpattādhikaraṇaṃ** nāma. Yaṃ saṅghassa apalokanādīnaṃ catunnaṃ kammānaṃ karaṇaṃ, idaṃ **kiccādhikaraṇaṃ** nāma.

Tattha vivādādhikaraṇaṃ dvīhi samathehi sammati sammukhāvinayena ca yebhuyyasikāya ca. Sammukhāvinayeneva sammamānaṃ yasmim vihare uppannaṃ,

1. Dī-Ṭṭha 3. 223 piṭṭhe.

tasmiṃ yeva vā, aññatra vūpasamebhuṃ gacchantānaṃ antarāmagge vā, yattha gantvā saṅghassa niyyātitaṃ, tattha saṅghena vā, saṅghe vūpasametuṃ asakkonte tattheva ubbāhikāya sammatapuggalehi vā vinicchitaṃ sammati. Evaṃ sammamāne ca panetasmiṃ yā saṅghasammukhatā dhammasammukhatā vinayasammukhatā puggalasammukhatā, ayaṃ **sammukhāvinayo** nāma. Tattha ca kārakasaṅghassa saṅghasāmaggivasena sammukhibhāvo **saṅghasammukhatā**. Sametabbassa vatthuno bhūtattā **dhammasammukhatā**. Yathā taṃ sametabbaṃ, tathevassa samanāṃ **vinayasammukhatā**. Yo ca vivadati, yena ca vivadati, tesāṃ ubhinnāṃ atthapaccatthikānaṃ sammukhibhāvo **puggalasammukhatā**. Ubbāhikāya vūpasame panettha saṅghasammukhatā parihāyati. Evaṃ tāva sammukhāvinayeneva sammati.

Sace panevampi na sammati, atha naṃ ubbāhikāya sammatā bhikkhū “na mayaṃ sakkoma vūpasametun”ti saṅghasseva niyyātentī. Tato saṅgho pañcaṅgasamannāgataṃ bhikkhuṃ salākaggāhāpakāṃ sammannati, tena guḥhakavivaṭakasakaṇṇajappakesu tīsu salākaggāhakesu aññataravasena salākāṃ gāhāpetvā sannipatitāya parisāya dhammavādīnaṃ yebhuyyatāya yathā te dhammavādīno vadanti, evaṃ vūpasantaṃ adhikaraṇaṃ sammukhāvinayena ca yebhuyyasikāya ca vūpasantaṃ hoti. Tattha sammukhāvinayo vuttanayo eva. Yaṃ pana yebhuyyasikākamassa karaṇaṃ, ayaṃ yebhuyyasikā nāma. Evaṃ vivādādhikaraṇaṃ dvīhi samathehi sammati.

Anuvādādhikaraṇaṃ catūhi samathehi sammati sammukhāvinayena ca sativinayena ca amūḷhavinayena ca tassapāpiyasikāya ca. Sammukhāvinayeneva sammamānaṃ yo ca anuvadati, yañca anuvadati, tesāṃ vacanaṃ sutvā sace kāci āpatti natthi, ubho khamāpetvā, sace atthi, ayaṃ nāmettha āpattīti evaṃ vinicchitaṃ vūpasammati. Tattha sammukhāvinayalakkhaṇaṃ vuttanayameva.

Yadā pana khīṇāsavassa bhikkhuno amūlikāya sīlavipattiyā anuddhaṃsitassa sativinayaṃ yācamānassa saṅgho ña tticatutthena kammena sativinayaṃ deti, tadā sammukhāvinayena ca sativinayena ca vūpasantaṃ hoti. Dinne pana sativinaye puna tasmiṃ puggale kassaci anuvādo na ruhati. Yadā ummattako bhikkhu ummādasena kate assāmaṇake ajjhācāre “saratāyasmā evarūpiṃ āpattin”ti bhikkhūhi codiyamāno

“ummattakena me āvuso etaṃ kataṃ, nāhaṃ taṃ sarāmi”ti bhaṇantopi bhikkhūhi codiyamānova puna acodanattāya amūḷhavinayaṃ yācati, saṃgho cassa ña tticatutthena kammaṃ amūḷhavinayaṃ deti, tadā sammukhāvinayena ca amūḷhavinayena ca vūpasantaṃ hoti. Dinne pana amūḷhavinaye puna tasmiṃ puggale kassaci tappaccayā anuvādo na ruhati. Yadā pana pārājikena vā pārājikasāmantena vā codiyamānassa aññenaññaṃ paṭicarato pāpussannatāya pāpiyassa puggalassa “sacāyaṃ acchinnamūlo bhavissati, sammā vattitvā osāraṇaṃ labhissati. Sace chinnamūlo, ayamevassa nāsanā bhavissati”ti maññaṃāno saṃgho ñatticatutthena kammaṃ tassapāpiyasikaṃ karoti, tadā sammukhāvinayena ca tassapāpiyasikāya ca vūpasantaṃ hotīti. Evaṃ anuvādādhikaraṇaṃ catūhi samathehi sammati.

Āpattādhikaraṇaṃ tīhi samathehi sammati sammukhāvinayena ca paṭiññātakaraṇena ca tiṇavatthārakena ca. Tassa sammukhāvinayeneva vūpasamo natthi. Yadā pana ekassa vā bhikkhuno santike saṃghagaṇamajjhesu vā bhikkhu lahukaṃ āpattiṃ deseti, tadā āpattādhikaraṇaṃ sammukhāvinayena ca paṭiññātakaraṇena ca vūpasammati. Tattha sammukhāvinaye tāva yo ca deseti, yassa ca deseti, tesāṃ sammukhībhāvo puggalasammukhatā. Sesāṃ vuttanayameva.

Puggalassa ca gaṇassa ca desanākāle saṃghasammukhatā parihāyati. Yaṃ panettha “ahaṃ bhante itthannāmaṃ āpattiṃ āpanno”ti ca “passasi”ti ca “āma passāmi”ti ca paṭiññātāya “āyatiṃ saṃvareyyāsi”ti karaṇaṃ, taṃ paṭiññātakaraṇaṃ nāma. Saṃghādisese parivāsādiyācanā paṭiññā, parivāsādīnaṃ dānaṃ paṭiññātakaraṇaṃ nāma.

Dvepakkhajātā pana bhaṇḍanakārakā bhikkhū bahuṃ assāmaṇakaṃ ajjhācāraṃ caritvā puna lajjidhamme uppanne “sace mayaṃ imāhi āpattihi aññamaññaṃ kāressāma, siyāpi taṃ adhikaraṇaṃ kakkhaḷattāya vāḷattāya saṃvatteyyā”ti aññamaññaṃ āpattiyā kārāpane dosaṃ disvā yadā bhikkhū tiṇavatthārakakammaṃ karonti, tadā āpattādhikaraṇaṃ sammukhāvinayena ca tiṇavatthārakena ca sammati. Tatra hi yattakā hatthapāsūpagatā “na metaṃ khamatī”ti evaṃ diṭṭhāvikkammaṃ akatvā “dukkaṭaṃ kammaṃ puna kātabbāṃ

kamman”ti na ukkoṭenti, niddampi okkantā honti, sabbesaṃ ṭhapetvā thullavajjaṅca ghipaṭisaṃyuttaṅca sabbāpattiyo vuṭṭhahanti. Evaṃ āpattādhikaraṇaṃ tīhi samathehi sammati.

Kiccādhikaraṇaṃ ekena samathena sammati sammukhāvinayeneva. Iti imāni cattāri adhikaraṇāni yathānurūpaṃ imehi sattahi samathehi sammanti. Tena vuttaṃ “**uppannuppannānaṃ adhikaraṇānaṃ samathāya vūpasamāya sammukhāvinayo dātabbo -pa- tiṇavatthārako**”ti. Sesāṃ sabbattha uttānameva.

Adhikaraṇasamathasuttavaṇṇanā niṭṭhitā.

Vinayavaggavaṇṇanā niṭṭhitā.

**Iti manorathapūraṇiyā aṅguttaranikāyaṭṭhakathāya
Sattakanipātavaṇṇanāya anuttānatthadīpanā samattā.**

Atthakanipāta

1. Paṭhamapaṇṇāsaka

1. Mettāvagga

1. Mettāsuttavaṇṇanā

1. Atthakanipātassa paṭhame **vaḍḍhitāyā**ti bhāvanāpāripūrivasena paribrūhitāya. **Punappunam katāyā**ti bhāvanāya bahulīkaraṇena aparāparam pavattitāya. **Yuttayānasadisakatāyā**ti yathā yutta-ājaññayānam chekena sārathinā adhiṭṭhitam yathārucci pavattati, evam yathārucci pavattārahataṁ gamitāya. **Patitthānaṭṭhena**ti sabbasampatti-adhiṭṭhānaṭṭhena. **Paccupaṭṭhitāyā**ti bhāvanābahulīkārehi pati pati upaṭṭhitāya avijahitāya. **Samantato citāyā**ti sabbabhāgena bhāvanānurūpaṁ cayaṁ gamitāya. Tenāha “**upacitāyā**”ti. **Suṭṭhusamāraddhāyā**ti ativiya sammadeva nibbattigatāya.

Yo ca mettam bhāvayatīti-ādīsu yo koci gahaṭṭho vā pabbajito vā. **Mettanti mettājhānam**.

Appamāṇanti bhāvanāvasena ārammaṇavasena ca appamāṇam. Asubhabhāvanādayo viya hi ārammaṇe ekadesaggahaṇam akatvā anavasesapharaṇavasena anodhiso pharaṇavasena ca, appamāṇārammaṇatāya paguṇabhāvanāvasena ca appamāṇam. **Tanū samyojanā hontī**ti mettam pādakam katvā sammāsivā heṭṭhime ariyamagge adhigacchantassa sukheveva paṭighasamyojanādayo pahīyamānā tanū hontīti evamettha attho daṭṭhabbo.

Evam kilesappahānaṇca nibbānādhigamaṇca mettābhāvanāya sikhāpattamānisamsam dassetvā idāni aññepi ānisamse dassetum “**ekampi ce**”ti-ādī vuttam. Tatha **aduṭṭhacitto**ti mettābalena suṭṭhu vikkhambhi tabyāpādatāya byāpādena adūsitacitto. **Mettāyatī**ti hitapharaṇavasena

mettaṃ karoti. **Kusalīti** atisayena¹ kusalavā mahāpuñño, paṭighādi-anatthavigamena khemī. **Sabbe ca pāṇeti ca-saddo** byatireko.

Manasānukampīti cittena anukampanto. Idam vuttam hoti—ekasattavisayāpi tāva mettā mahākusalarāsi, sabbe pana pāṇe attano puttaṃ viya hitapharaṇena manasā anukampanto pahukaṃ pahuṃ anappakaṃ apariyantam catusaṭṭhimahākappepi attano vipākappabandham pavattetum samattham uḷāram puññaṃ ariyo parisuddhacitto puggalova karoti nipphādetīti. **Sattabharitanti** sattehi aviraḷam, ākiṇṇamanussanti attho.

Saṅgahavattḥūnīti² lokassa saṅgaṇhanakāraṇāni. Nipphanasassato nava bhāge kassakassa datvā raññaṃ ekabhāgaggahaṇam **dasamabhāgaggahaṇam**. Evaṃ kassakā haṭṭhatuṭṭhā sassāni sampādentīti āha “**sassasampādane medhāvitāti attho**”ti. Tato orabhāge kira chabhāgaggahaṇam jātam.

Chamāsikanti channam channam māsānam pahonakam. **Pāsetīti** pāsagate viya karoti. Vācāya piyam vācāpiyam, tassa kammaṃ **vācāpeyyam**³.

Sabbaso raṭṭhassa iddhādibhāvato **khemaṃ**. **Nirabbudam** coriyābhāvato. Iddham hi raṭṭham acoriyam. “**Niraggaḷan**”ti **vuccati** apārutagharabhāvato.

uddhammūlakam katvāti ummūlam katvā. **Dvīhi pariyaññehīti** mahāyaññassa pubbhāge pacchā ca pavattetabbehi dvīhi parivārayaññehi. **Satta -pa- bhīsanassāti** sattanavutādhikānam pañcannam pasusatānam māraṇena bheravassa pāpabhīrukānam bhayāvahassa. Tathā hi vadanti—

“Chasatāni niyujjanti, pasūnam majjhime hani.

Assamedhassa yaññassa, ūnāni pasūhi tīhi”ti⁴.

Sammanti yugacchidde pakkhipitabbadaṇḍakam. **Pāsantīti** khipanti. **Samhārimehīti** sakaṭehi vahitabbehi. Pubbe kira eko rājā sammāpāsam yajanto Sarassatinaditīre pathaviyā vivare dinne nimuggoyeva ahoṣi.

Andhabālabrahmaṇā gatānugatigatā “ayam tassa saggagamanamaggo”ti saññāya tattha sammāpāsam yaññaṃ paṭṭhapenti. Tena vuttam

“**nimuggokāsato**

1. Atisayo (Ka)

2. Sam-Ṭī 1. 179 piṭṭhepi passitabban.

3. Vācāya piyassa piyakarassa kammaṃ vācāpeyyam (Sam-Ṭī 1. 179 piṭṭhe.)

4. Sam-Ṭī 1. 180; Am-Ṭī 2. 298 piṭṭhesupi.

pabhuṭī”ti. Ayūpo appakadivaso yāgo, sayūpo bahudivasam sādheyyo **satrayāgo**. Mantapadābhisankhatānaṃ sappimadhūnaṃ “**vājam**”iti samaññā. Hiraññasuvaṇṇagomahimsāsādisattarasakadakkhiṇassa. Sāragabbhakoṭṭhāgārādīsu natthi ettha aggaḷāti **niraggaḷo**. Tattha kira yaññe attano sāpateyyaṃ anavasesato anigūhitvā niyyātiyati.

Candappabhāti¹ candimasseva pabhāya. **Tārā gaṇāva sabbeti** yathā sabbepi tārāgaṇā candimasobhāya soḷasimpi kalam nāgghanti, evaṃ te assamedhādayo yaññā mettassa cittassa vuttalakkhaṇena subhāvitassa soḷasimpi kalam nānubhavanti na pāpuṇanti, nāgghantīti attho.

Idāni aparepi diṭṭhadhammikasamparāyike mettābhāvanāya ānisamse dassetuṃ “**yo na hantī**”ti-ādi vuttaṃ. Tattha **yoti** mettābrahmavihārabhāvanānuyutto puggalo. **Na hantīti** teneva mettābhāvanānubhāvena dūravikkhambhi tabyāpādatāya na kañci sattam hiṃsati, leḍḍudaṇḍādīhi na vibādhati vā. **Na ghātetīti** param samādapetvā na satte mārāpeti na vibādḥāpeti ca. **Na jinātīti** sārambhaviggāhikakathādivasena na kañci jināti sārambhasseva abhāvato, jānikaraṇavasena vā aṭṭakaraṇādīnā na kañci jināti. Tenāha “**na attanā parassa jānīm karotī**”ti. **Na jāpayeti** parehi payojetvā paresampi dhanajānīm na kāraṇeyya. Tenāha “**na parena parassa jānīm kāretī**”ti. Mettāya vā aṃso avihethanaṭṭhena² avayavabhūtoti **mettaṃso**.

Mettāsuttavaṇṇanā niṭṭhitā.

2. Paññāsuttādivaṇṇanā

2-4. Dutiye **ādibrahmacariyikāyāti** ādibrahmacariyameva ādibrahmacariyikā. Tenāha “**maggabrahmacariyassa ādibhūtāyā**”ti. **Ariyoti** niddoso parisuddho. Tuṇḥībḥāvo na titthiyānaṃ mūgabbatagahaṇaṃ³ viya aparisuddhoti **ariyo tuṇḥībḥāvo**. **Catutthajjhānanti** ukkaṭṭhaniddesenetaṃ vuttaṃ, paṭhamajjhānādīnipi ariyo tuṇḥībḥāvotveva

1. Itivuttaka-Ṭṭha 90 piṭṭhepi passitabbaṃ.

2. Avijhanaṭṭhena (Itivuttaka-Ṭṭha 91 piṭṭhe.)

3. Monabbatagahaṇaṃ (Ka)

saṅkhaṃ gacchanti. **Jānanti** idaṃ kammaśādhanaṃ āha “**jānitabbakaṃ jānāti**”ti. Yathā vā ekacco viparītaṃ gaṇhanto jānantopi na jānāti, passantopi na passati, na evamayam. Ayam pana jānanto jānāti, passanto passatīti evamettha daṭṭhabbo. Tatiyādīni suviññeyyāni.

Paññāsuttādivaṇṇanā niṭṭhitā.

5. Paṭhamalokadhammasuttavaṇṇanā

5. Pañcame **lokassa dhammā**ti sattalokassa avassaṃbhāvidhammā. Tenāha “**eteḥi muttā nāma natthi**”ti-ādi. Ghāsacchādanādīnaṃ laddhi **lābho**, tāni eva vā laddhabbato **lābho**, tadabhāvo **alābho**, lābhaggahaṇena cettha tabbisayo anurodho gahito, alābhaggahaṇena virodho. Yasmā lohite sati tadupaghātavasena pubbo viya anurodho laddhāvasaro eva hoti, tasmā vuttaṃ “**lābhe āgate alābho āgatoyevā**”ti. Esa nayo yasādīsupi. Sesam suviññeyyameva.

Paṭhamalokadhammasuttavaṇṇanā niṭṭhitā.

6. Dutiyalokadhammasuttādivaṇṇanā

6-8. Chaṭṭhe adhikaṃ payasati payujjati etenāti **adhippayāso**, savisesaṃ itikattabbakiriyā. Tenāha “**adhikappayogo**”ti. Sattamaṭṭhame su natthi vattabbaṃ.

Dutiyalokadhammasuttādivaṇṇanā niṭṭhitā.

9. Nandasuttavaṇṇanā

9. Navame duvidhā kulaputtā jātikulaputtā ācārakulaputtā ca. Tattha “tena kho pana samayena raṭṭhapālo kulaputto tasmimyeva

thullakoṭṭhike aggakulikassa putto”¹ti evaṃ āgatā uccākulaputtā
jātikulaputtā. “Saddhāyete kulaputtā agāasmā anagāriyaṃ pabbajitā”²ti²
 evaṃ āgatā pana yattha kathaci kule pasutāpi **ācārakulaputtā** nāma. Idha
 pana uccākulappasutataṃ sandhāya “kulaputtoti bhikkhave nandaṃ sammā
 vadamāno vadeyyā”ti bhagavatā vuttanti āha “**jātikulaputto**”ti. Ubhohipi
 pana kāraṇehi tassa kulaputtabhāvoyeva. Sesamettha uttānameva.

Nandasuttavaṇṇanā niṭṭhitā.

10. Kāraṇḍavasuttavaṇṇanā

10. Dasame **paṭicaratī**ti paṭicchādanavasena carati pavattati.
 Paṭicchādanaṭṭho eva vā carati-saddo anekathattā dhātūnanti āha
 “**paṭicchādeti**”ti. **Aññenāññanti** pana paṭicchādanākāradassananti āha
 “**aññena kāraṇenā**”ti-ādi. Tattha **aññiṃ kāraṇaṃ vacanaṃ vā**ti yaṃ
 codakena cuditakassa dosavibhāvanāṃ kāraṇaṃ, vacanaṃ vā vuttaṃ, taṃ
 tato aññeneva kāraṇena, vacanena vā paṭicchādeti. **Kāraṇenā**ti codanāya
 amūlāya amūlikabhāvādīpaniyā yuttiyā vā. **Vacanenā**ti tadatthabodhakena
 vacanena. “Ko āpanno”ti-ādinā codanaṃ vissajjetvāva vikkhepāpajjanaṃ
aññenāññiṃ paṭicaraanāṃ. Bahiddhā kathāpanāmanā nāma “itthannāmaṃ
 āpattiṃ āpannosī”ti vutte “pāṭaliputtaṃ gatomi”ti-ādinā codanaṃ
 vissajjetvāti ayameva viseso. Yo hi “āpattiṃ āpannosī”ti vutto “ko āpanno,
 kiṃ āpanno, kismiṃ āpanno, kaṃ bhaṇatha, kiṃ bhaṇathā”ti vā vadati,
 “evarūpaṃ kiñci tayā diṭṭhan”ti vutte “na suṇāmi”ti sotāṃ vā upaneti, ayaṃ
aññenāññiṃ paṭicarati nāma. Yo pana “itthannāmaṃ nāma āpattiṃ
 āpannosī”ti puṭṭho “pāṭaliputtaṃ gatomi”ti vatvā puna “na tava
 pāṭaliputtagamanāṃ pucchāma, āpattiṃ pucchāma”ti vutte tato “rājagahaṃ
 gatomi. Rājagahaṃ vā yāhi brāhmaṇagahaṃ vā, āpattiṃ āpannosīti. Taṃ
 tattha me sūkaramāsaṃ laddhan”ti-ādīni vadati, ayaṃ **bahiddhā kathaṃ
 apanāmeti**

1. Ma 2. 245 piṭṭhe.

2. Ma 3. 57 piṭṭhe.

nāma. **Samaṇakacavaroti** samaṇavesadhāraṇena samaṇappatirūpakatāya samaṇānaṃ kacavarabhūtaṃ.

Kāraṇḍavam¹ **niddhamathāti** vipannasīlatāya kacavarabhūtaṃ puggalaṃ kacavaramiva anapekkhā apanetha. **Kasambuṃ apakassathāti** kasambubhūtañca naṃ khattiyādīnaṃ majjhagataṃ pabhinnapaggharitakuṭṭhaṃ caṇḍālaṃ viya apakaḍḍhatha. Kim kāraṇaṃ? Saṃghārāmo nāma sīlavantānaṃ kato, na dussīlānaṃ. Yato etadeva sandhāyāha “**tato palāpe vāhetha, assamaṇe samaṇamānine**”ti. Yathā palāpā anto sārarahitā ataṇḍulā bahi thusena vīhī viya dissanti, evaṃ pāpabhikkhū anto sīlarahitāpi bahi kāsāvādiparikkhārena bhikkhū viya dissanti, tasmā “palāpā”ti vuccanti. Te palāpe vāhetha opunatha vidhamatha paramatthato assamaṇe samaṇavesamattena samaṇamānino. **Kappayavhoti** kappetha, karoṭhāti vuttaṃ hoti. **Patissatāti** sappatissā. Vaṭṭadukkhassa antaṃ karissatha, parinibbānaṃ pāpuṇissathāti attho.

Kāraṇḍavasuttavaṇṇanā niṭṭhitā.

Mettāvaggavaṇṇanā niṭṭhitā.

2. Mahāvagga

1. Verañjasuttavaṇṇanā

11. Dutiyaṃ paṭhame **verañjāyaṃ viharatīti**² ettha **verañjāti** tassa nagarassetānaṃ adhivacanaṃ, tassaṃ verañjāyaṃ. Samīpatthe bhummavacanaṃ. **Naḷerupucimandamūleti** ettha **naḷeru** nāma yakkho. **Pucimandoti** nimbarukkho. **Mūlanti** samīpaṃ. Ayaṃ hi mūla-saddo “mūlāni uddhareyya antamaso usīranāḷimattānipī”ti-ādīsu³ mūlamūle dissati. “Lobho akusalamūlan”ti-ādīsu⁴ asādhāraṇahetumhi. “Yāva majjhanhike kāle chāyā pharati, nivāte paṇṇāni patanti, ettāvataṃ rukkhamūlan”ti-ādīsu⁵ samīpe. Idha pana

1. Suttanipāta-Ṭṭha 2. 47 piṭṭhepi passitabbaṃ.

2. Vi-Ṭṭha 1. 81 piṭṭhepi passitabbaṃ.

3. Am 1. 519 piṭṭhe.

4. Dī 3. 180; Vi 5. 222 piṭṭhesu.

5. Vi 1. 302 piṭṭhe. (Atthato samānaṃ)

samīpe adhippeto, tasmā naḷeruyakkhena adhiggahitassa pucimandassa samīpeti evamettha attho daṭṭhabbo. So kira pucimando ramaṇīyo pāsādikō anekesaṃ rukkhānaṃ ādhipaccaṃ viya kurumāno tassa nagarassa avidūre gamanāgamanasampanne ṭhāne ahosi. Atha bhagavā verañjaṃ gantvā patirūpe ṭhāne viharanto tassa rukkhassa samīpe heṭṭhābhāge vihāsi. Tena vuttaṃ “**verañjāyaṃ viharati naḷerupucimandamūle**”ti.

Paccuṭṭhānaṃ¹ nāma āsanā vuṭṭhānanti āha “**nāsanā vuṭṭhātī**”ti, nisinnāsanato na vuṭṭhahatīti attho. Etha ca **jiṇṇe -pa- vayo-anuppatteti** upayogavacanaṃ āsanā vuṭṭhānakiriyāpekkhaṃ na hoti. Tasmā “jiṇṇe -pa- vayo-anuppatte disvā”ti ajjhāhāraṃ katvā attho veditabbo. Atha vā paccuggamanakiriyāpekkhaṃ upayogavacanaṃ, tasmā **na paccuṭṭhātīti** uṭṭhāya paccuggamanaṃ na karotīti attho veditabbo. Paccuggamanampi hi paccuṭṭhānanti vuccati. Vuttaṃ hetam “ācariyaṃ pana dūratova disvā paccuṭṭhāya paccuggamanakaraṇaṃ paccuṭṭhānaṃ nāmā”ti. **Nāsanā vuṭṭhātīti** iminā pana paccuggamanābhāvassa upalakkhaṇamattaṃ dassitanti daṭṭhabbaṃ. **Vibhāvane nāma attheti** pakativibhāvanasaṅkhāte atthe. **Na abhivādeti vāti** na abhivādetabbanti vā sallakkhetīti vuttaṃ hoti.

Tam aññānanti “ayaṃ mama abhivādanādīni kātuṃ araharūpo na hotī”ti ajānana vasena pavattaṃ aññānaṃ. **Oloketoti** “dukkhaṃ kho agāra vo viharati appatisso, kiṃ nu kho ahaṃ samaṇaṃ vā brāhmaṇaṃ vā sakkareyyaṃ garuṃ kareyyaṃ”ti-ādisuttavaseneva² ñāṇacakkhunā oloketo. **Nipaccakārārahanti** paṇipātārahaṃ. **Sampatijātoti** muhuttajāto, jātasamanantaramevāti vuttaṃ hoti. **Uttarena mukhoti** uttaradisābhimukho. “**Sattapadavītiḥārena gantvā sakalaṃ dasasahasilokadhātuṃ olokesin**”ti idaṃ—

“Dhammatā esā bhikkhave sampatijāto bodhisatto samehi pādehi patiṭṭhahitvā uttarābhimukho sattapadavītiḥārena gacchati, setamhi chatte anudhāriyamāne sabbā disā viloketi, āsabhiṅca vācaṃ bhāsati”ti³—

1. Sārattha-Ṭī 1. 338 piṭṭhādīsupi passitabbaṃ. 2. Am 1. 328 piṭṭhe. 3. Dī 2. 13 piṭṭhe.

evaṃ pāḷiyam̐ sattapadavītiḥārupari ʘhitassa viya sabbādisānulokanassa kathitattā vuttam̐, na panetaṃ evaṃ daṭṭhabbam̐ sattapadavītiḥārato pageva disāvīlokanassa katattā. Mahāsatto hi manussānam̐ hatthato mucctivā puratthimam̐ disam̐ olokesi, anekāni cakkavāḷasahassāni ekaṅgaṇāni ahesum̐. Tattha devamanussā gandhamālādīhi pūjayamānā “mahāpurisa idha tumhehi sadisopi natthi, kuto uttaritaro”ti āhamsu. Evaṃ catasso disā, catasso anudisā, heṭṭhā, uparīti dasapi disā anuvīloketvā attano sadisam̐ adisvā “ayam̐ uttaradisā”ti sattapadavītiḥārena agamāsīti veditabbā. **Olokesinti** mama puññānubhāvena lokavivaraṇapāḷihāriye jāte paññāyamānam̐ dasasahasilokadhātum̐ maṃsacakkhunāva olokesinti attho.

Mahāpurisoti jātigottakulappadesādivasena mahantapuriso. **Aggoti** guṇehi sabbappadhāno. **Jeṭṭhoti** guṇavaseneva sabbesam̐ vuddhatamo, guṇehi mahallakatamoti vuttam̐ hoti. **Seṭṭhoti** guṇavaseneva sabbesam̐ pasatthatamo. Atthato pana pacchimāni dve purimasseva vevacanānīti veditabbam̐. **Tayāti** nissakke karaṇavacanam̐. **Uttaritaroti** adhikataro. **Patimānesīti** pūjesi. **Āsabhinti** uttamam̐. **Mayham̐ abhivādanādiraho puggaloti** mayham̐ abhivādanādikiriyāya araho anucchaviko puggalo. Nīccasāpekkhatāya panettha samāso daṭṭhabbo. **Tathāgatāti** tathāgatato, tathāgatassa santikāti vuttam̐ hoti. **Evarūpanti** abhivādanādisabhāvam̐. **Paripākasithilabandhananti** paripākena sithilabandhanam̐.

Tam̐ vacananti “nāham̐ tam̐ brāhmaṇā”ti-ādivacanam̐. “Nāham̐ arasarūpo, mādisā vā arasarūpā”ti vutte brāhmaṇo thaddho bhaveyya. Tena vuttam̐ “cittamudubhāvajanatthan”ti.

Katamo pana soti pariyāyāpekkho pulliṅganiddeso, katamo so pariyāyoti attho. **Jātivasenāti** khattiyādi-jātivasena. **Upapattivasenāti** devesu upapattivasena. **Seṭṭhasammatānampīti** apīsaddena pageva aseṭṭhasammatānanti dasseti. **Abhinandantānanti** sappītikataṇhāvasena pamodamānānam̐. **Rajjantānanti** balavarāgavasena rajjantānam̐. Rūpaparibhogena uppannataṇhāsampayuttasomanassavedanā rūpato nibbattivā

hadayatappanato ambarasādayo viya rūparasāti vuccanti. **Āviñchantīti** ākaḍḍhanti. **Vatthārammaṇādisāmaggiyanti** vatthu-
ārammaṇādikāraṇasāmaggiyaṃ. **Anukkipantoti** attukkaṃsanavasena
kathite brāhmaṇassa asappāyabhāvato attānaṃ anukkipanto anukkaṃsento.

Etasmim panatthe karaṇe sāmivacananti “jahitā”ti etasmim atthe
tathāgatassāti karaṇe sāmivacanāṃ, tathāgatena jahitāti attho. **Mūlanti**
bhavamūlaṃ. “Tālavatthuvatthukatā”ti vattabbe “oṭṭhamukho”ti-ādisu viya
majjhepadalopaṃ katvā a-kāraṇca dīghaṃ katvā “tālāvatthukatā”ti vuttanti
āha “**tālavatthu viya nesam vatthu katanti tālavatthukatā**”ti. Tattha tālassa
vatthu **tālavatthu**. Yathā ārāmassa vatthubhūtapubbo padeso ārāmassa
abhāve “ārāmavathū”ti vuccati, evaṃ tālassa patiṭṭhito kāso samūlaṃ
uddharite tāle padesamatte ḥite tālassa vatthubhūtapubbattā “tālavatthū”ti
vuccati. **Nesanti** rūparasādīnaṃ. Kathaṃ pana tālavatthu viya nesam vatthu
katanti āha “**yathā hī**”ti-ādi. Rūpādiparibhogena
uppannataṇhāyuttasomanassavedanāsāṅkhātarūparasādīnaṃ cittasantānassa
adhiṭṭhānabhāvato vuttaṃ “**tesam pubbe uppannapubbabhāvena vatthumatte**
cittasantāne kate”ti. Tattha **pubbeti** pure, sarāgakāleti vuttaṃ hoti.
Tālāvatthukatāti vuccantīti tālavatthu viya attano vatthussa katattā
rūparasādayo “tālāvatthukatā”ti vuccanti. Etena pahīnakilesānaṃ puna
uppattiyā abhāvo dassito.

Aviruḷidhammattāti aviruḷhisabhāvatāya. Matthakacchinno tālo
pattaphalādīnaṃ avatthubhūto tālavatthūti āha “**matthakacchinnatālo viya**
katā”ti. Etena “tālavatthu viya katāti tālavatthukatā”ti ayaṃ viggaho dassito.
Ettha pana “avatthubhūto tālo viya katāti avatthutālakatā”ti vattabbe
visesanassa paranipātaṃ katvā “tālāvatthukatā”ti vuttanti daṭṭhabbāṃ. Iminā
panatthena idaṃ dasseti—rūparasādivacanena vipākadhammadhammā hutvā
pubbe uppannakusalākusalā dhammā vahitā, te uppannāpi
matthakasadisānaṃ taṇhāvijjānaṃ maggasatthena chinnattā āyatim
tālapattasādise vipākakkhandhe nibbattetuṃ asamattā jātā, tasmā tālavatthu
viya katāti tālavatthukatā

rūparasādayoti. Imasmim atthe “abhinandantānan”ti iminā padena kusalasomanassampi saṅgahitanti vadantī. **Anabhāvaṃ katāti** ettha **anusaddo** pacchāsaddena samānatthoti āha “**yathā nesaṃ pacchābhāvo na hotī**”ti-ādi.

Yañca kho tvaṃ sandhāya vadesi, so pariyāyo na hotīti yaṃ vandanādisāmaggirasābhāvasaṅkhātāṃ kāraṇaṃ arasarūpatāya vadesi, taṃ kāraṇaṃ na hoti, na vijjatīti attho. Nanu cāyaṃ brāhmaṇo yaṃ vandanādisāmaggirasābhāvasaṅkhātāpariyāyaṃ sandhāya “arasarūpo bhavaṃ gotamo”ti āha, “so pariyāyo natthī”ti vutte vandanādīni bhagavā karotīti āpajjatīti imaṃ aṇiṭṭhappasaṅgaṃ dassento āha “**nanu cā**”ti-ādi.

Sabbpariyāyesūti sabbavāresu. **Sandhāyabhāsitamattanti**¹ yaṃ sandhāya brāhmaṇo “nibbhogo bhavaṃ gotamo”ti-ādimāha, bhagavā ca yaṃ sandhāya nibbhogatādim attani anujānāti, taṃ sandhāyabhāsitamattam. **Chandarāgaparibhogoti** chandarāgavasena paribhogo. **Aparaṃ pariyāyanti** aññaṃ kāraṇaṃ.

Kulasamudācārakammanti kulācārasaṅkhātāṃ kammaṃ, kulacārittanti attho. **Akiriyaṃti** akaraṇabhāvaṃ. “Anekavihitānaṃ pāpakānaṃ akusalānaṃ dhammānaṃ”ti sāmāññavacanepi pārisesañāyato vuttāvasesā akusaladhammā gahetabbāti āha “**ṭhapetvā te dhamme**”ti²ādi, te yathāvuttakāyaduccaritādike akusaladhamme ṭhapetvāti attho. **Anekavihitāti** anekappakārā.

Ayaṃ lokatantīti ayaṃ buddhānaṃ abhivādanādikiriyaḷakkhaṇā lokappaveṇī. Anāgāmi brahmānaṃ alaṅkāradīsu anāgāmi bhikkhūnañca cīvarādīsu nikantivasena rāguppatti hotīti anāgāmi maggena pañcakāmaguṇikarāgasseva pahānaṃ veditabbanti āha “**pañcakāmaguṇikarāgassā**”ti. Rūpādīsu pañcasu kāmaguṇesu vatthukāmakotthāsesu uppajjamāno rāgo “pañcakāmaguṇikarāgo”ti veditabbo. Koṭṭhāsavacano

1. Sandhāyabhāsitamattanti (Ka)

2. Kāyaduccaritādīni (Aṭṭhakathāyaṃ) Vi-Ṭṭha 1. 105 piṭṭhe pana passitabbaṃ.

hettha guṇa-saddo “vayoguṇā anupubbaṃ jahantī”ti-ādīsu¹ viya.

Akusalacittadvayasampayuttassāti

domanassasahagatacittadvayasampayuttassa. Mohassa

sabbākusalasādhāraṇattā āha “**sabbākusalasambhavassā**”ti. **Avasesānanti** sakkāyadiṭṭhi-ādīnaṃ.

Jigucchati maññeti ahamabhijāto rūpavā paññavā kathaṃ nāma aññesaṃ abhivādanādiṃ kareyyanti jigucchati viya, jigucchatīti vā sallakkhemi. Akusaladhamme jigucchamāno tesāṃ samaṅgibhāvampi jigucchatīti vuttaṃ “**akusalānaṃ dhammānaṃ samāpattiyā jigucchati**”ti.

Samāpattīti etasseva vevacanaṃ **samāpajjanā samaṅgibhāvoti**.

Maṇḍanaajātikoti maṇḍanakasabhāvo, maṇḍanakasīloti attho. **Jegucchitanti** jigucchanasīlataṃ.

Lokajeṭṭhakakammanti lokajeṭṭhakānaṃ kattabbakammaṃ, loke vā seṭṭhasammataṃ kammaṃ. **Tatrāti** tesu dvīsipi atthavikappesu. Padābhīhito attho **padattho**, byañjanatthoti vuttaṃ hoti. **Vinayaṃ vā arahatīti** etthaṃ vinayanaṃ **vinayo**, niggaṇhananti attho. Tenāha “**niggahaṃ arahatīti vuttaṃ hoti**”ti. Nanu ca paṭhamaṃ vuttasu dvīsipi atthavikappesu sakatthe arahatthe ca taddhitapaccayo saddalakkhaṇato dissati, na pana “vinayāya dhammaṃ desetī”ti imasmim atthe, tasmā kathamettha taddhitapaccayoti āha “**vicitrā hi taddhitavutti**”ti. Vicitratā cettha lokappamāṇato vedītabbā. Tathā hi yasmim yasmim atthe taddhitappayogo lokassa, tattha tattha taddhitavutti lokato siddhāti vicitrā taddhitavutti, tasmā yathā “mā saddamakāsī”ti vadanto “māsaddiko”ti vuccati, evaṃ vinayāya dhammaṃ desetīti venayikoti vuccatīti adhippāyo.

Kapaṇapurisoti guṇavirahitatāya dīnamanusso. **Byañjanāni avicāretvāti** tittadattādisaddesu viya “imasmim atthe ayaṃ nāma paccayo”ti evaṃ byañjanavicāraṃ akatvā, anipphannaṇāṭṭipadikavaseṇāti vuttaṃ hoti.

“**Devalokagabbhasampattiyā**”ti vatvāpi ṭhapetvā bhummadeve sesadevesu gabbhaggaṇassa abhāvato paṭisandhiyevettha gabbhasampattīti vedītabbāti vuttamevatthaṃ vivarītvā dassento āha “**devalokapaṭisandhipaṭilābhāya samvattati**”ti. **Assāti** abhivādanādisāmīcikammaṃ.

1. Saṃ 1. 3 piṭṭhe.

Mātukucchismiṃ paṭisandhiggahaṇe dosañ dassentoti mātito

aparissuddhabhāvaṃ dassento, akkositukāmassa dāsiyā puttoti dāsikucchimhi nibbattabhāve dosañ dassetvā akkosanaṃ viya bhagavato mātukucchismiṃ paṭisandhiggahaṇe dosañ dassetvā akkosantopi evamāhāti adhippāyo.

Gabbhatoti devalokappaṭisandhito. Tenevāha “**abhabbo devalokūpapattim pāpūnitunti adhippāyo**”ti. “Hīno vā gabbho assāti apagabbho”ti imassa

viggahassa ekena pariyaṇena adhippāyaṃ dassento āha

“**devalokagabbhaparibāhirattā āyatim hīnagabbhapaṭilābhabhāgī**”ti. Iti-

saddo hetu-attho. Yasmā āyatimpi hīnagabbhapaṭilābhabhāgī, tasmā hīno vā gabbho assāti apagabbhoti adhippāyo. Puna tasseva viggahassa

“kodhavasena -pa- dassento”ti heṭṭhā vuttanayassa anurūpaṃ katvā

adhippāyaṃ dassento āha “**hīno vāssa mātukucchismiṃ gabbhavāso ahoṣīti adhippāyo**”ti. **Gabbha-**saddo atthi mātukucchipariyāyo “gabbhe vasati māṇavo”ti-ādīsu¹ viya. Atthi mātukucchismiṃ nibbattasattapariyāyo

“antamaso gabbhapātanam upādāyā”ti-ādīsu² viya. Tattha

mātukucchipariyāyaṃ gahetvā attham dassento āha “**anāgate**

gabbhaseyyā”ti. Gabbhe seyyā **gabbhaseyyā. Anuttarena maggenāti**

aggamaggena. Kammakilesānaṃ maggena vihatattā āha “**vihatakāraṇattā**”ti.

Itarā tissopīti aṇḍajasaṃsedaja-opapātikā. Ettha ca yadipi “apagabbho”ti

imassa anurūpato gabbhaseyyā eva vattabbā, pasaṅgato pana labbhamānaṃ

sabbampi vattum vaṭṭatīti punabbhavābhiniḥḥattipi vuttāti veditabbā.

Idāni sattapariyāyassa **gabbha-**saddassa vasena viggahanānattam

dassento āha “**apicā**”ti-ādi. Imasmim pana vikappe gabbhaseyyā

punabbhavābhiniḥḥattīti ubhayampi gabbhaseyyavaseneva vuttantipi

vadanti. Nanu ca “āyatim gabbhaseyyā pahīnā”ti vuttattā gabbhassa seyyā

eva pahīnā, na pana gabbhoti āpajjatīti āha “**yathā cā**”ti-ādi. Atha

“abhinibbattī”ti ettakameva avatvā punabbhavaggahaṇam kimatthanti āha

“**abhinibbatti ca nāmā**”ti-ādi. **Apunabbhavabhūtāti** khaṇe khaṇe

uppañjamānānaṃ dhammānaṃ abhinibbatti.

1. Khu 5. 353 piṭṭhe Jātake.

2. Vi 3. 134 piṭṭhe.

Dhammadhātunti ettha dhamme anavasese dhāreti yāthāvato upadhāretīti dhammadhātu, dhammānaṃ yathāsabhāvato avabujjhanasabhāvo, sabbaññutaññāṇassetāṃ adhivacanaṃ. **Paṭivijjhivāti** sacchikatvā, paṭilabhitvāti attho, paṭilābhahetūti vuttaṃ hoti. **Desanāvīlāsappatto hotīti** rucivasena parivattetvā dassetuṃ samatthatā desanāvīlāso, taṃ patto adhigatoti attho. **Karuṇāvippahāranti** sabbasattesu mahākaruṇāya pharaṇaṃ. Tādilakkhaṇameva puna upamāya vibhāvetvā dassento āha “**pathavīsamacittatan**”ti. Yathā pathavī suci-asucinikkhepacchedanābhedaṇādisu na vikampati, anurodhavirodhaṃ na pāpuṇāti, evaṃ iṭṭhāniṭṭhesu lābhālābhādisu anurodhavirodhappahānato avikampitacittatāya pathavīsamacittatanti attho. **Akuppadhammatanti** ettha akuppadhammo nāma phalasaṃpattīti keci vadanti. “Paresu pana akkosantesupi attano pathavīsamacittatāya akuppanasabhāvatanti evamettha attho gahetabbo”ti amhākaṃ khanti. **Jarāya anusaṭanti** jarāya paliveṭṭitaṃ. Brāhmaṇassa vuddhatāya āsannaṃvuttimaraṇanti sambhāvanavasena “**ajja maritvā**”ti-ādi vuttaṃ. “**Mahantena kho pana ussāhenā**”ti “sādhu kho pana tathārūpānaṃ arahataṃ dassanaṃ hotī”ti evaṃ sañjātamahussāhena. **Appaṭisamaṃ pure jātabhāvanti** anaññasādhāraṇaṃ purejātabhāvaṃ. Natthi etassa paṭisamoti **appaṭisamo**, purejātabhāvo.

Pakkhe vidhunantāti patte cālentā. **Nikkhamantānanti** niddhāraṇe sāmivacanaṃ, nikkhantesūti attho.

So jeṭṭho iti assa vacanīyoti yo paṭhamataraṃ aṇḍakosato nikkhanto kukkuṭapotaṃ, so jeṭṭhoti vacanīyo assa, bhavēyyāti attho. **Sampaṭipādentoti** saṃsudento. Tibhūmapariyāpannāpi sattā avijjākosassa anto pavīṭṭhā tattha tattha appahīnāya avijjāya veṭṭhitattāti āha “**avijjākosassa anto pavīṭṭhesu sattesū**”ti. **Aṇḍakosanti** bījakapālaṃ. **Lokasannivāseti** lokoyeva saṅgamma samāgamma nivāsanaṭṭhena lokasannivāso, sattanikāyo. **Sammāsambocinti** ettha **sammāti** aviparītatto, **sarī**-saddo sāmanti imamatthaṃ dīpeti, tasmā sammā

aviparītenākārena sayameva cattāri saccāni bujjhati paṭivijjhatīti **sammāsambodhīti** maggo vuccati. Tenāha “**sammā sāmañca bodhin**”ti, sammā sayameva ca bujjhanakanti attho. **Sammāti** vā pasatthavacano, **sam-**saddo sundaravacanoti āha “**atha vā pasattham sundarañca bodhin**”ti.

Asabbaguṇadāyakattāti sabbaguṇānaṃ adāyakattā. Sabbaguṇe na dadātīti hi **asabbaguṇadāyako**, asamatthasamāsoyaṃ¹ gamakattā yathā “asūriyapassāni mukhāni”ti. **Tisso vijjāti** upanissayavato saheva arahattaphalena tisso vijjā deti. Nanu cettha tīsu vijjāsu āsavakkhayañāṇassa maggapariyāpannattā kathametaṃ yujjati “maggo tisso vijjā deti”ti? Nāyaṃ doso, satipi āsavakkhayañāṇassa maggapariyāpannabhāve aṭṭhaṅgike magge sati maggañāṇena saddhiṃ tisso vijjā paripuṇṇā hontīti “maggo tisso vijjā deti”ti vuccati. **Cha abhiññāti** etthāpi eseva nayo. **Sāvakaṇāmaññanti** aggasāvakehi paṭilabhittabbameva lokiyalokuttarañāṇaṃ.

Paccekabodhiññanti etthāpi imināva nayena attho vedittabbo.

Abbhāññāsinti jānīm. Jānanañca na anussavādivasenāti āha “**paṭivijjhin**”ti, paccakkhamakāsinti attho. Paṭivedhopi na dūre ṭhitassa lakkhaṇappaṭivedho vīyāti āha “**pattomhī**”ti, pāpuṇinti attho. Pāpuṇanañca na sayam gantvāti āha “**adhigatomhī**”ti, santāne uppādanavasena paṭilabhinti attho.

Opammasampañjānananti opammatthassa upameyyena sammadeva paṭipādanaṃ. **Atthenāti** upameyyatthena. Yathā kukkuṭiyā aṇḍesu tividdhakiriyākaraṇaṃ kukkuṭacchāpakānaṃ aṇḍakosato nikkhamanassa mūlakāraṇaṃ, evaṃ bodhisattabhūta bhagavato tividdhānupassanākaraṇaṃ avijjāṇḍakosato nikkhamanassa mūlakāraṇanti āha “**yathā hi tassā kukkuṭiyā -pa- tividdhānupassanākaraṇaṃ**”ti. “**Santāne**”ti vuttattā aṇḍasadisatā santānassa, bahi nikkhantakukkuṭacchāpakasadisatā buddhaguṇānaṃ, buddhaguṇāti ca atthato buddhoyeva “tathāgatassa kho etaṃ vāsetṭha adhvānaṃ dhammakāyo itipi”ti vacanato. **Avijjāṇḍakosassa tanubhāvoti** balavavipassanāvasena avijjāṇḍakosassa tanubhāvo, paṭicchādanasāmaññena ca avijjāya aṇḍakosasadisatā. Mudubhūtaṃ kharabhāvāpatti

1. Ayuttasamāsoyaṃ (Sārattha-Ṭī 1. 352 piṭṭhe.)

hotīti tannivattanattham **“thaddhakharabhāvo”**ti vuttam.

Tikkhakharavippasannasūrabhāvoti ettha pariggayhamānesu saṅkhāresu vipassanāñāṇassa samādhindriyavasena sukhānuppaveso **tikkhatā**, anupavisitvāpi satindriyavasena anatikkamanato akuṇṭhatā **kharabhāvo**. Tikkhopi hi ekacco saro lakkham patvā kuṇṭho hoti, na tathā idam. Satipi kharabhāve sukhumappavattivasena kilesasamudācārasaṅkhobharahitatāya saddhindriyavasena **pasannabhāvo**, satipi pasannabhāve antarā anosakkivā kilesapaccatthikānam suṭṭhu abhibhavanato vīriyindriyavasena **sūrabhāvo** veditabbo, evamimehi pakārehi saṅkhārupekkhāñāṇameva gahitanti daṭṭhabbam. **Vipassanāñāṇassa aparīṇāmakāloti** vipassanāya vuṭṭhānagāminibhāvāpatti. Tadā ca sā maggañāṇagabbham dhārentī viya hotīti āha **“gabbhaggahaṇakālo”**ti. **Gabbham gaṇhāpetvāti** saṅkhārupekkhāya anantaram sikhāpatta-anulomavipassanāvasena maggavijāyanattham gabbham gaṇhāpetvā. **Abhiññāpakketi** lokiyābhiññāpakke. Lokuttarābhiññā hi avijjaṇḍakosam padālītā. Potthakesu pana katthaci **“chābhiññāpakke”**ti likhanti, so apāḥhoti veditabbo.

Jeṭṭho seṭṭhoti vuddhatamattā jeṭṭho, sabbaḡuṇehi uttamattā pasatthatamoti seṭṭho.

Idāni **“āraddham kho pana me brāhmaṇa vīriyan”**ti-ādikāya desanāya anusandhim dassento āha **“evam bhagavā”**ti-ādi. Tattha **pubbabhāgato pabhuṭīti** bhāvanāya pubbabhāgiyavīriyārambhādito paṭṭhāya. **Muṭṭhassatināti** vinaṭṭhassatinā, sativirahitenāti attho. **Sāraddhakāyenāti** sadarathakāyena. **Bodhimaṇḍeti** bodhisāṅkhātassa nāṇassa maṇḍabhāvappatte ṭhāne. Bodhīti hi paññā vuccati, sā ettha maṇḍā pasannā jātāti so padeso **“bodhimaṇḍo”**ti paññāto. **Paggahitanti** ārambham sithilam akatvā daḥaparakkamasāṅkhātussahanabhāvena gahitam. Tenāha **“asithilappavattitan”**ti. **Asallīnanti** asaṅkucitam kosajjasena saṅkocam anāpannam. **Upaṭṭhitāti** ogāhanasaṅkhātena apilāpanabhāvena ārammaṇam upagantvā ṭhitā. Tenāha **“ārammaṇābhimukhībhāvenā”**ti. Sammosassa viddhamsanavasena pavattiyā na sammūṭṭhāti **asammūṭṭhā**. Kiñcāpi cittappassaddhivasena cittameva passaddham, kāyappassaddhivaseneva ca kāyo passaddho

hoti, tathāpi yasmā kāyappassaddhi uppajjamānā cittappassaddhiyā saheva uppajjati, na vinā, tasmā vuttaṃ “**kāyacittappassaddhivasenā**”ti. Kāyappassaddhiyā ubhayesampi kāyānaṃ passambhanāvahattā vuttaṃ “**rūpakāyopi passaddhoyeva hotī**”ti.

So ca khoti so ca kho kāyo. **Vigatadarathoti** vigatakilesadaratho. Nāmakāye hi vigatadarathe rūpakāyopi vūpasantadarathapariḷāho hoti. **Sammā āhitanti** nānārammaṇesu vidhāvanasaṅkhātāṃ vikkhepaṃ vicchinditvā ekasmiṃyeva ārammaṇe avikkhittabhāvāpādanena sammadeva āhitaṃ ṭhapaṃ. Tenāha “**suṭṭhu ṭhapitaṃ**”ti-ādi. Cittassa anekaggabhāvo vikkhepavasena cañcalatā, sā sati ekaggatāya na hotīti āha “**ekaggaṃ acalaṃ nipphandanā**”ti. **Ettāvātīti** “āraddhaṃ kho paṇā”ti-ādinā vīriyasatipassaddhisamādhīnaṃ kiccasiddhidassanena. Nanu ca saddhāpaññānampi kiccasiddhi jhānassa pubbhāgappaṭipadāya icchitabbāti? Saccāṃ, sā pana nānantarikabhāvena avuttasiddhāti na gahitā. Asati hi saddhāya vīriyārambhādīnaṃ asambhavoyeva, paññāpariggahe ca nesaṃ asati nīyārambhādībhave na siyā, tathā asallīnāsammosatādayo vīriyādīnanti asallīnatādiggahaṇenevettha paññākiccasiddhi gahitāti daṭṭhabbāṃ. Jhānabhāvanāyaṃ vā samādhikiccaṃ adhikaṃ icchitabbanti dassetuṃ samādhipariyosānāva jhānassa pubbhāgappaṭipadā kathitāti daṭṭhabbāṃ.

Atītabhave khandhā tappaṭibaddhāni nāmagottāni ca sabbāṃ pubbenivāsaṃtveva gahitanti āha “**kiṃ viditaṃ karoti? pubbenivāsaṃ**”ti. Moho paṭicchādakaṭṭhena tamo viya tamoti āha “**sveva moho**”ti. **Obhāsakaraṇaṭṭhenāti** kātabbato karaṇaṃ. Obhāsova karaṇaṃ **obhāsakaraṇaṃ**. Attano paccayehi obhāsabhāvena nibbattetabbaṭṭhenāti attho. **Sesaṃ pasaraṃsāvacaṇanti** paṭipakkhavidhamanapavattivisesānaṃ bodhanato vuttaṃ. **Avijjā vihatāti** etena vijānaṇaṭṭhena vijjāti ayampi attho dīpitoti daṭṭhabbāṃ. “**Kasmā? Yasmā vijjā uppannā**”ti etena vijjāpaṭipakkhā avijjā. Paṭipakkhatā cassā pahātābbabhāvena vijjāya ca pahāyakabhāvenāti dasseti. **Esa nayo itarasmimpi padadvayeti** iminā “tamo vihato vinaṭṭho. Kasmā? Yasmā āloko uppanno”ti imamatthaṃ atidisati. Kilesānaṃ

ātāpanaparitāpanaṭṭhena vīriyaṃ **ātāpoti** āha “**vīriyātāpena ātāpino**”ti, vīriyavatoti attho. **Pesitattassāti** yathādhippetatthasiddhiṃ pati vissatṭhacittassa. **Yathā appamattassa ātāpino pahitattassa viharatoti** aññassapi kassaci mādisassāti adhippāyo. **Padhānānuyogassāti** sammappadhānāmanuyuttassa.

Paccavekkhaṇāñānapariggahitanti na paṭhamadutiyañāṇadvayādhighamaṃ viya kevalanti adhippāyo. **Dassentoti** nigamanavasena dassento. Sarūpato hi pubbe dassitamevāti.

Tikkhattuṃ jātoti iminā pana idaṃ dasseti—“ahaṃ brāhmaṇa paṭhamavijjāya jātoyeva purejātassa saha-jātassa vā abhāvato sabbesaṃ vuddho mahallako, kimaṅgaṃ pana tīhi vijjāhi tikkhattuṃ jāto”ti. **Pubbenivāsañāṇena atītaṃsañāṇanti** atītaṃsañāṇasabhāgatāya tabbhāvibhāvato ca pubbenivāsañāṇena atītaṃsañāṇaṃ pakāsetvāti yojetabbaṃ. Tattha **atītaṃsañāṇanti** atītakkhandhāyatanadhātusaṅkhāte atīte koṭṭhāse appaṭihatañāṇaṃ. Dibbacakkuñāṇassa paccuppannārammaṇattā yathākammūpagañāṇassa anāgataṃsañāṇassa ca dibbacakkhuvaseva ijjanato dibbacakkhuno paribhaṇḍañāṇattā dibbacakkhumhiyeva ca ṭhitassa cetopariyañāṇasiddhito vuttaṃ “**dibbacakkhunā paccuppannānāgataṃsañāṇa**”ti. Tattha **dibbacakkhunāti** sapaṛibhaṇḍena dibbacakkuñāṇena. Paccuppannaṃso ca anāgataṃso ca paccuppannānāgataṃsaṃ, tattha ñāṇaṃ **paccuppannānāgataṃsañāṇaṃ**. Āsavakkhayañāṇādhighameneva sabbaññutaññāṇassa viya sesāsādhāraṇachañāṇadasabalañāṇa-āveṇikabuddhadhammādīnampi anaññasādhāraṇānaṃ buddhaguṇānaṃ ijjanato vuttaṃ “**āsavakkhayaṇa sakalalokiyalokuttaraguṇa**”ti. Tenāha “**sabbepi sabbaññiguṇe pakāsetvā**”ti.

Pītivipphāraparipuṇṇagattacittoti pītipharaṇena paripuṇṇakāyacitto. **Aññāṇanti** aññāṇassāti attho. Dhi-saddayogato hi sāmi-atthe etaṃ upayogavacanaṃ. Sesamettha suviññeyyameva.

Verañjasuttavaṇṇanā niṭṭhitā.

2. Sīhasuttavaṇṇanā

12. Dutiye **santhāgāraṃ**¹ nāma ekā mahāsālāva, uyyogakālādīsu hi rājāno tattha ṭhatvā “ettakā purato gacchantu, ettakā pacchā”ti-ādinā tattha nisīditvā santham karonti, mariyādaṃ bandhanti, tasmā taṃ ṭhānaṃ “santhāgāraṃ”ti vuccati. Uyyogaṭṭhānato ca āgantvā yāva gehe gomayaparibhaṇḍādivasena paṭijagganaṃ karonti, tāva ekaṃ dve divase te rājāno tattha santhambhantītipi **santhāgāraṃ**. Tesam rājūnaṃ saha atthānusāsanaṃ agārantipi **santhāgāraṃ**. Gaṇarājāno hi te, tasmā uppannaṃ kiccaṃ ekassa vasena na sijjhati², sabbesaṃ chando laddhuṃ vaṭṭati, tasmā sabbe tattha sannipatitvā anusāsanti. Tena vuttaṃ “**saha atthānusāsanaṃ agāraṃ**”ti. Yasmā vā tattha sannipatitvā “imasmim kāle kasituṃ vaṭṭati, imasmim kāle vapitun”ti-ādinā nayena gharāvāsakiccāni sammantayanti, tasmā chiddāvachiddaṃ gharāvāsaṃ santharantītipi **santhāgāraṃ**.

Puttadāradhanādi-upakaraṇapariccāgo **pāramiyo**. Attano aṅgapariccāgo **upapāramiyo**. Attanova jīvitapariccāgo **paramatthapāramiyo**. Ñātīnaṃ atthacariyā **ñātattacariyā**. Lokassa atthacariyā **lokattacariyā**.

Kammassakatañāṇavasena

anavajjakammāyatanasippāyatanavijjāṭṭhānaparicayavasena

khandhāyatanādiparicayavasena lakkhaṇattayatīraṇavasena ca ñāṇacāro

buddhacariyā³. Aṅganayanadhanarajjaputtadārapariccāgavasena **pañca**

mahāpariccāge pariccajantena. Satipi mahāpariccāgānaṃ dānapāramibhāve

pariccāgavisesasabhāvadassanatthañceva sudukkarabhāvadassanatthañca

pañcamahāpariccāgānaṃ visuṃ gahaṇaṃ, tatoyeva ca aṅgapariccāgato

visuṃ nayanavariccāgaggahaṇaṃ. Pariccāgabhāvasāmaññepi

dhanarajjapariccāgato puttadārapariccāgaggahaṇaṃca visuṃ kataṃ.

Pabbajjāva saṅkhepo.

Sattasu anupassanāsūti aniccānupassanā dukkhānupassanā
anattānupassanā nibbidānupassanā virāgānupassanā nirodhānupassanā
paṭinissaggānupassanāti imāsu sattasu anupassanāsu.

1. Ma-Ṭṭha 3. 11; Saṃ-Ṭṭha 3. 86 piṭṭhesupi passitabbaṃ.

2. Na chijjati (Ka)

3. Buddhacariyā (Ka)

Anuviccakāraṇti aveccakaraṇam. Dvīhi kāraṇehi aniyyānikasāsane ṭhitā attano sāvakattaṃ upagate paggaṇhanti, tāni dassetuṃ “**kasmā**”ti-ādi vuttaṃ.

Anupubbim kathanti¹ anupubbaṃ kathetabbakathaṃ, kā pana sāti? Dānādīkathā. Tattha **dānakathā** tāva pacurajanesupi pavattiyā sabbasattasādhāraṇattā sukarattā sīle patiṭṭhānassa upāyabhāvato ca ādito kathitā. Pariccāgasīlo hi puggalo pariggahavatthūsu nissaṅgabhāvato sukheneva sīlāni samādiyati, tattha ca suppatiṭṭhito hoti. Sīlena dāyakkappaṭiggāhakavisuddhito parānuggahaṃ vatvā parapīḷānivattivacanato kiriyādhammaṃ vatvā akiriyādhammavacanato bhogasampattihetuṃ vatvā bhavasampattihetuvacanato ca dānakathānantaraṃ **sīlakathā** kathitā. “Taṅca sīlaṃ vaṭṭanissitaṃ, ayaṃ bhavasampatti tassa phalaṃ”ti dassanattamaṃ, “imehi ca dānasīlamayehi paṇītapāṇītarādibhedabhinnehi puññakiriyavatthūhi etā cātumahārājikādīsū paṇītapāṇītarādibhedabhinnā aparimeyyā dibbabhogasampattiyo laddhabbā”ti dassanattamaṃ tadanantaraṃ **saggakathā**. “Svāyaṃ saggo rāgādīhi upakkiliṭṭho, sabbathānupakkiliṭṭho ariyamaggo”ti dassanattamaṃ saggānantaraṃ **maggo**, maggaṅca kathentena tadadhigamūpāyasandassanattamaṃ saggapariyāpannāpi pageva itare sabbepi kāmā nāma bahvādīnavā aniccā addhuvāvīpariṇāmadhammāti **kāmānaṃ ādīnavo**, “hīnā gammā pothujjanikā anariyā anattasamhitā”ti tesam **okāro** lāmakabhāvo, sabbepi bhavā kilesānaṃ vatthubhūtāti tattha **saṅkilesa**, sabbaso saṅkilesavippamuttaṃ nibbānanti **nekkhamme ānisaṃso** ca kathetabboti ayamatto **maggantī**ti ettha **iti**-saddena ādi-atthena dīpitoti veditabbaṃ.

Sukhānaṃ nidānanti diṭṭhadhammikānaṃ samparāyikānaṃ nibbānupasaṃhitānañcāti sabbesampi sukhānaṃ kāraṇam. Yaṃ hi kiñci loke bhogasukhaṃ nāma, taṃ sabbaṃ dānādīhīnanti pākaṭoyamattho. Yaṃ pana jhānavipassanāmaggaṃ phalaṃ nibbānappaṭisaṃyuttaṃ sukhaṃ, tassapi dānaṃ upanissayapaccayo hotiyeva. **Sampattīnaṃ mūlanti** yā imā loke padesarajjasirissariyasattaratanaṃ samujjalacakkavattisampadāti evaṃ pabhedā mānusikā sampattiyo, yā ca cātumahārājikādīgatā² dibbasampattiyo, yā vā panaññāpi

1. Dī-Ṭī 2. 66 piṭṭhādīsū passitabbaṃ.

2. Cātumahārājicātumahārājādībheda (Dī-Ṭī 2. 67 piṭṭhe.)

sampattiyo, tāsāṃ sabbāsāṃ idaṃ mūlakāraṇaṃ. **Bhogānanti** bhuñjitabbaṭṭhena “bhogo”ti laddhanāmānaṃ piyamanāpiyarūpādīnaṃ tannissayānaṃ vā upabhogasukkhānaṃ paṭiṭṭhā niccalādhiṭṭhānatāya. **Visamagatassāti** byasanappattassa. **Tānanti** rakkhā tato paripālanato. **Leṇanti** byasanehi paripātiyamānassa oliyanappadeso. **Gahīti** gantabbaṭṭhānaṃ. **Parāyaṇanti** paṭisaraṇaṃ. **Avassayoti** vinipatitum adento nissayo. **Ārammaṇanti** olubbhārammaṇaṃ.

Ratanamayasihāsanasadisanti

sabbaratanamayasattaṅgamahāsihāsanasadisaṃ. Evaṃ hissa mahagghaṃ hutvā sabbaso vinipatitum appadānaṭṭho dīpito hoti. **Mahāpathaviśadisam** gatagataṭṭhāne paṭiṭṭhānassa labbhāpanato. Yathā dubbalassa purisassa ālambanarajju uttiṭṭhato tiṭṭhato ca upatthambho, evaṃ dānaṃ sattānaṃ sampattibhave upapattiyā ṭṭhiyā ca paccayoti āha “**ālambanaṭṭhena ālambanarajjusadisam**”ti. **Dukkhanittharaṇaṭṭhenāti** duggatidukkhāṭṭhānanittharaṇaṭṭhena. **Samassāsanaṭṭhenāti** lobhamacchariyādiṭṭhānāṭṭhena. **Bhayaparittānaṭṭhenāti** dāliddiyabhayaṭṭhena. **Maccheramalādīhīti** maccheralobhadosaṃmāda-issāmicchādīṭṭhivicikicchādīcittamalehi. **Anupalittaṭṭhenāti** anupakkiliṭṭhatāya. **Tesanti** maccheramalādīnaṃ. Tesāṃ eva **durāsadaṭṭhena**. **Asantāsanaṭṭhenāti** santāsahetu-abhāvena. Yo hi dāyako dānapati, so sampatipi na kutoci santasati, pageva āyatim. **Balavantaṭṭhenāti** mahābalavatāya. Dāyako hi dānapati sampati pakkhabalena¹ balavā hoti, āyatim pana kāyabalādīhipi. **Abhimaṅgalasammataṭṭhenāti** “vaḍḍhikāraṇaṃ”ti abhisammatabhāvena. Vipattibhavato sampattibhavūpanayanaṃ **khemantabhūmisampāpanaṃ**.

Idāni mahābodhicariyabhāvenapi dānaguṇaṃ dassetuṃ “**dānaṃ nāmetan**”ti-ādi vuttaṃ. Tattha **attānaṃ niyyātentenāti** etena “dānaphalaṃ sammadeva passantā mahāpurisā attano jīvitampi pariccajanti, tasmā ko nāma viññujātikko bāhire vatthusmiṃ pageva saṅgaṃ kareyyā”ti ovādaṃ deti. Idāni yā lokiyā lokuttarā ca ukkaṃsagatā sampattiyo, tā sabbā dānatoyeva pavattantīti dassento “**dānañhi**”ti-ādimāha.

1. Sampattipattabalena (Ka)

Tattha sakkamārabrahmasampattiyo attahitāya eva, cakkavattisampatti pana attahitāya parahitāya cāti dassetuṃ sā tāsāṃ parato cakkavattisampatti vuttā. Etā lokiyā, imā pana lokuttarāti dassetuṃ “**sāvakaṭṭhapaṇānaṃ**”ti-ādi vuttaṃ. Tāsūpi ukkaṭṭhukkaṭṭhatarukkaṭṭhatamataṃ dassetuṃ kamena ṇāṇattayaṃ vuttaṃ. Tesāṃ pana dānassa paccayabhāvo heṭṭhā vuttoyeva. Eteneva tassa brahmasampattiyāpi paccayabhāvo dīpitoti veditabbo.

Dānañca nāma dakkhiṇeyyesu hitajjhāsayena pūjanajjhāsayena vā attano santakassa paresāṃ pariccajanāṃ, tasmā dāyako purisapuggalo pare hanti, paresāṃ vā santakaṃ haratīti atthānametanti āha “**dānaṃ dento sīlaṃ samādātuṃ sakkoti**”ti. **Sīlālāṅkārasadiso alāṅkāro natthi** sobhāvisesāvahattā sīlassa. **Sīlapupphasadisāṃ pupphaṃ natthīti** etthāpi eseva nayo. **Sīlagandhasadiso gandho natthīti** ettha “candanaṃ tagaraṃ vāpī”ti-ādikā¹ gāthā, “gandho isīnaṃ ciradikkhitānaṃ, kāyā cuto gacchati mālutena”ti-ādikā² jātakagāthāyo ca āharitvā vattabbā. Sīlaṃ hi sattānaṃ ābharaṇaṇceva alāṅkāro ca gandhavilepanaṇca parassa dassanīyabhāvāvahaṇca. Tenāha “**sīlālāṅkārena hī**”ti-ādi.

Ayaṃ saggo labbhatīti idaṃ majjhimehi āradhāṃ sīlaṃ sandhāyāha. Tenevāha sakko devarājā—

“Hīnena brahmacariyena, khattiye upapajjati.

Majjhimeṇa ca devattaṃ, uttamena visujjhatī”ti³.

Itthoti sukho. **Kantoti** kamaṇīyo. **Manāpoti** manavaḍḍhanako. Taṃ pana tassa itthādibhāvaṃ dassetuṃ “**niccamettha kīlā**”ti-ādi vuttaṃ.

Dosoti aniccatādinā appassādādinā ca dūsitabhāvo, yato te viññānaṃ cittaṃ nārādhenti. Atha vā ādīnaṃ vāti pavattatīti **ādīnavo**, paramakapaṇatā. Tathā ca kāmaṃ yathātathaṃ paccavekkhantānaṃ paccupatīṭṭhanti. **Lāmakabhāvoti** aseṭṭhehi sevitaḍḍho, seṭṭhehi na sevibhabbo nihīnabhāvo. **Saṃkilissananti** vibādhakatā upatāpakatā ca.

1. Khu 1. 21 piṭṭhe Dhammapade.

2. Khu 6. 6 piṭṭhe Jātaka.

3. Khu 5. 183 piṭṭhe Jātaka.

Nekkhamme ānisaṃsanti ettha “yattakā kāmesu ādīnavā, tappaṭipakkhato tattakā nekkhamme ānisaṃsā. Apica nekkhammaṃ nāmetam̐ asambādham̐ asaṃkiliṭṭham̐, nikkhantaṃ kāmehi, nikkhantaṃ kāmasaññāya, nikkhantaṃ kāmavitakkehi, nikkhantaṃ kāmapariḷāhehi, nikkhantaṃ byāpādasaññāyā”ti-ādīnā nayena nekkhamme ānisaṃse pakāsesi. Pabbajjāyaṃ jhānādīsu ca guṇe vibhāvesi vaṇṇesi. **Kallacittanti** kammaniyaṭṭhantaṃ heṭṭhā pavattitadesanāya assaddhiyādīnaṃ cittadosānaṃ vigatattā upari desanāya bhājanabhāvūpagamena kammakkhamacittaṃ. Aṭṭhakathāyaṃ pana yasmā assaddhiyādayo cittassa rogabhūtā, tadā te vigatā, tasmā āha “**arogacittan**”ti. Diṭṭhimānādīkilesavigamena **muducittan**. Kāmacchandādivigamena **vinīvaraṇacittan**. Sammāpaṭipattiyāṃ uḷāravītipāmojjayogena **udaggacittan**. Tattha saddhāsampattiyā **pasannacittan**. Yadā bhagavā aññāsīti sambandho. Atha vā **kallacittanti** kāmacchandavigamena arogacittan. **Muducittanti** byāpādivigamena mettāvasena akāṭhinacittan. **Vinīvaraṇacittanti** uddhaccakukkuccavigamena avikkhepato tena apihitacittan. **Udaggacittanti** thinamiddhavigamena sampaggahitavasena alīnacittan. **Pasannacittanti** vicikicchavigamena sammāpaṭipattiyāṃ adhimuttacittanti evamettha sesapadānaṃ attho vedītabbo.

Seyyathāpīti-ādīnā upamāvasena sīhassa kilesappahānaṃ ariyamagguppādanaṃca dasseti. **Apagatakālakanti** vigatakālakam̐. **Sammadevāti** suṭṭhudeva. **Rajananti** nīlapītalohitādīraṅgajātāṃ. **Paṭiggaṇheyyāti** gaṇheyya, pabhassaraṃ bhavēyya. **Tasmīnyeva āsaneti** tassaṃyeva nisajjāyaṃ. Etenassa lahuvipassakatā tikkhapaññatā sukhappaṭipadakhippābhiññatā ca dassitā hoti. **Virajanti** apāyagamanīyāgarajādīnaṃ vigamena virajam̐. Anavasesadiṭṭhivīvicikicchāmalāpagamena **vītamalam̐**. Paṭhamamaggavajjhakilesarajābhāvena vā **virajam̐**. Pañcavidhadussīyamalavigamena **vītamalam̐**. **Tassa uppatti-ākāradassanattanti** kasmā vuttam̐, nanu maggañāṇam̐ asaṃkhatadhammārammaṇanti codanaṃ sandhāyāha “**tañhī**”ti-ādi. Tattha **paṭivijjhantanti** asammohappaṭivedhavasena paṭivijjhantaṃ. Tenāha “**kiccavasenā**”ti. Tatridam̐ upamāsaṃsandanaṃ—vattham̐ viya cittaṃ, vatthassa āgantukamalehi kiliṭṭhabhāvo viya cittaṃ rāgādīmalehi saṃkiliṭṭhabhāvo, dhovanasilātalam̐ viya anupubbīkathā, udakam̐ viya saddhā,

udakena temetvā ūsagomayachārikakhārehi kāḷake sammadditvā vatthassa dhovanappayogo viya saddhāsinehena temetvā temetvā satisamādhīpaññāhi dose sithile katvā sutādividhinā cittassa sodhane vīriyārambho, tena payogena vatthe kāḷakāpagamo viya vīriyārambhena kilesavikkhambhanam, raṅgajātam viya ariyamaggo, tena suddhavatthassa pabhassarabhāvo viya vikkhambhitakilesassa cittassa maggena pariyodapananti.

“Dīṭṭhadhammo”ti vatvā dassanam nāma nāṇadassanato aññampi atthīti tannivattanattham **“pattadhammo”**ti vuttam. Patti nāma nāṇasampattito aññāpi vijjatīti tato visesanattham **“viditadhammo”**ti vuttam. Sā panesā viditadhammatā dhammesu ekadesenapi hotīti nippadesato viditabhāvam dassetum **“pariyogāḷhadhammo”**ti vuttam. Tenassa saccābhisambodhamyeva dīpeti. Maggañāṇam hi ekābhisamayavasena pariññādikiccam sādhentam nippadesena catusaccadhammam samantato ogāḷham nāma hoti. Tenāha **“dīṭṭho ariyasaccadhammo etenāti dīṭṭhadhammo”**ti. **Tiṇṇā vicikicchā**ti sappaṭibhayakantārasadisā soḷasavatthukā atthavatthukā ca tiṇṇā nittiṇṇā vicikicchā. **Vigatā kathamkathā**ti pavatti-ādīsu “evam nu kho, na nu kho”ti evam pavattikā vigatā samucchinnā kathamkathā. Sārajjakarānam pāpadhammanam pahīnattā tappaṭipakkhesu sīlādiguṇesu paṭiṭṭhitattā **vesārajjam** visāradabhāvam veyyattiyam **patto**. Attanā eva paccakkhato dīṭṭhattā na param pacceti, na cassa paro paccetabbo atthīti **aparappaccayo**.

Uddisitvā katanti attānam uddisitvā māraṇavasena katam nibbattitam maṁsam. **Paṭiccamanti** ettha kamma-saddo kammāsādhano atītakāliko cāti āha **“attānam paṭiccatan”**ti. **Nimittakammassetam adhivacanam** “paṭicca kammam phusatī”ti-ādīsu¹ viya. **Nimittakammassāti** nimittabhāvena laddhabbakammassa. Karaṇavasena paṭiccammam ettha atthīti maṁsam **paṭiccammam** yathā buddhi buddham, tam etassa atthīti buddho. Sesametta uttānameva.

Sīhasuttavaṇṇanā niṭṭhitā.

1. Khu 5. 102 piṭṭhe Jātake.

3. Assājānīyasuttādivaṇṇanā

13-14. Tatiye sāṭheyyānīti saṭṭattāni. Sesapadesupi eseva nayo. Tāni panassa sāṭheyyādīni kāyacittujukatāpaṭipakkhabhūtā lobhasahagatacittuppādassa pavatti-ākāravisesā. Tattha yassa kismiñcideva ṭhāne ṭhātukāmassa sato yaṃ ṭhānaṃ manussānaṃ sappaṭibhayaṃ, purato gantvā tatheva sappaṭibhayaṭṭhāneva ṭhassāmīti na hoti, vañcanādhippāyabhāvato ṭhātukāmaṭṭhāneyeva nikhātattambho viya cattāro pāde niccāletvā tiṭṭhati, ayaṃ **saṭho** nāma, imassa sāṭheyyassa pākāṭakaraṇaṃ. Tathā yassa kismiñcideva ṭhāne nivattitvā khandhagataṃ pātetukāmassa sato yaṃ ṭhānaṃ manussānaṃ sappaṭibhayaṃ, purato gantvā tatheva pāte ssāmītina hoti, pātetukāmaṭṭhāneyeva nivattitvā pātetī, ayaṃ **kūṭo** nāma. Yassa kālena vāmato, kālena dakkhiṇato, kālena ujumaggeneva ca gantukāmassa sato yaṃ ṭhānaṃ manussānaṃ sappaṭibhayaṃ, purato gantvā tatheva evaṃ karissāmīti na hoti, yadicchakaṃ gantukāmaṭṭhāneyeva kālena vāmato, kālena dakkhiṇato, kālena ujumaggaṃ gacchati, tathā leṇḍaṃ vā passāvaṃ vā vissajjetukāmassa idaṃ ṭhānaṃ susammaṭṭhaṃ ākiṇṇamanussaṃ ramaṇīyaṃ, imasmiṃ ṭhāne evarūpaṃ kātuṃ na yuttaṃ, purato gantvā paṭicchannaṭṭhāne karissāmīti na hoti, tattheva karoti, ayaṃ **jiṃho** nāma. Yassa pana kismiñci ṭhāne maggā ukkamma nivattitvā paṭimaggam ārohitukāmassa sato yaṃ ṭhānaṃ manussānaṃ sappaṭibhayaṃ, purato gantvā tattheva evaṃ karissāmīti na hoti, paṭimaggam ārohitukāmaṭṭhāneyeva maggā ukkamma nivattitvā paṭimaggam ārohati, ayaṃ **vaṅko** nāma. Iti imaṃ catubbidhampi kiriyaṃ sandhāyetaṃ vuttaṃ “**yāni kho panassa tāni sāṭheyyāni -pa- āvikattā hoti**”ti. Catutthe natthi vattabbaṃ.

Assājānīyasuttādivaṇṇanā niṭṭhitā.

5. Malasuttādivaṇṇanā

15-18. Pañcame¹ya kāci pariyatti vā sippaṃ vā yasmā asajjhāyantassa ananuyuñjantassa vinassati, nirantaraṃ vā na upaṭṭhāti, tasmā “**asajjhāyamalā**

1. Dhammapada-Ṭṭha 2. 222 piṭṭhepi passitabbaṃ.

mantā”ti vuttaṃ. Yasmā pana gharāvāsaṃ vasantassa utṭhāyutṭhāya jīṇṇappaṭisaṅkharāṇādīni akarontassa gharaṃ nāma vinassati, tasmā “**anuṭṭhānamalā gharā**”ti vuttaṃ. Yasmā gihissa vā pabbajitassa vā kosajjavasena sarīrappaṭijagganaṃ vā parikkhārappaṭijagganaṃ vā akarontassa kāyo dubbaṇṇo hoti, tasmā “**malaṃ vaṇṇassa kosajjan**”ti vuttaṃ. Yasmā pana gāvo rakkhantassa pamādasena niddāyantassa vā kīḷantassa vā tā gāvo atitthapakhandanādīhi vā vāḷamigacorādi-upaddavena vā paresaṃ sālikkhattādīni otarivā khādanavasena vā vināsamāpajjanti, sayampi daṇḍaṃ vā paribhāsaṃ vā pāpuṇāti, pabbajitaṃ vā pana chadvārādīni arakkhantaṃ pamādasena kilesā otarivā sāsanā cāventi, tasmā “**pamādo rakkhato malaṃ**”ti vuttaṃ. So hissa vināsāvahena malaṭṭhāniyattā **malaṃ**.

Duccaritanti aticāro. Aticāriṇiṃ hi itthiṃ sāmikopi gehā nīharati, mātāpitūnaṃ santikaṃ gatampi “tvaṃ kulassa aṅgārabhūtā¹, akkhihi na daṭṭhabbā”ti taṃ mātāpitāropi nīharanti, sā anāthā vicarantī mahādukkhaṃ pāpuṇāti. Tenassā duccharitaṃ “**malaṃ**”ti vuttaṃ. **Dadatoti** dāyakassa. Yassa hi khettakasanakāle “imasmim khetto sampanne salākabhattādīni dassāmi”ti cintetvāpi nipphanne sasse maccheraṃ uppajjitvā cāgacittaṃ nivāreti, so maccheravasena cāgacitte aviruhante manussasampatti dibbasampatti nibbānasampattīti tisso sampattiyo na labhati. Tena vuttaṃ “**maccheraṃ dadato malaṃ**”ti. Aññesupi evarūpesu eseva nayo. **Pāpakā dhammā**ti akusalā dhammā. Te pana idhaloke paraloke ca malameva. **Tatoti** heṭṭhā vuttamalato. **Malataranti** atirekamalaṃ. Chaṭṭhādīni uttānatthāneva.

Malasuttādivaṇṇanā niṭṭhitā.

9. Pahārādasuttavaṇṇanā

19. Navame¹ **asurā**ti devā viya na suranti na kīḷanti na virocantīti asurā. Surā nāma devā, tesam paṭipakkhāti vā **asurā**,

1. Agāravabhūtā (Dhammapada-Ṭṭha 2. 223 piṭṭhe.)

2. Udāna-Ṭṭha 271; Sārattha-Ṭṭha 3. 428 piṭṭhādīsipi passitabbaṃ.

vepacittipahārādādayo. Tesam bhavanam sinerussa heṭṭhābhāge, te tattha pavisantā nikkhamantā sinerupāde maṇḍapādīni nimminivā kīlantā abhiramanti. Sā tattha tesam abhirati ime guṇe disvāti āha “**ye disvā disvā asurā mahāsamudde abhiramantī**”ti.

Yasmā lokiyā jambudīpo himavā tattha patitṭhitasamuddadahapabbatā tappabhavā nadiyoti etesu yaṃ yaṃ na manussagocaram, tattha sayam sammūlḥā aññepi sammohayanti, tasmā tattha sammohavidhamanattam “**ayam tāva¹ jambudīpo**”ti-ādi āraddham. Dasasahassayojanaparimāṇo āyāmato vitthārato cāti adhippāyo. Tenāha “**tatthā**”ti-ādi. **Udakena ajjhotthaṭo** tadupabhogisattānam puññakkhayena. Sundaradassanam kūṭanti **sudassanakūṭam**, yaṃ loke “**hemakūṭam**”ti vuccati. **Mūlagandho** kālānusāriyādi. **Sāragandho** candanādi. **Pheggugandho** salalādi. **Tacagandho** lavaṅgādi. **Papaṭikāgandho** kapitthādi. **Rasagandho** sajjulasādi. **Pattagandho** tamālahiriverādi. **Pupphagandho** nāgakusumādi². **Phalagandho** jātiphalādi. **Gandhagandho** sabbesam gandhānam gandho. Sabbāni puthulato paññāsa yojanāni, āyāmato pana ubbedhato viya dviyojanasatānevā”ti vadanti.

Manoharasilātalānīti ratanamayattā³ manuññasopānasilātalāni. **Supaṭiyattānī**ti tadupabhogisattānam sādharāṇakammunāva suṭṭhu paṭiyattāni susaṅghitāni honti. Macchakacchapādīni udakam malam karonti, tadabhāvato **phalikasadisanimalodakāni**. Tiriyato dīgham uggatakūṭanti “**tiracchānapabbatan**”ti āha. **Purimāni nāmagottānī**ti ettha nadī ninnagāti-ādikam gottam, gaṅgā yamunāti-ādikam nāmam.

Savamānāti sandamānā. **Pūrattanti** puṇṇabhāvo. **Masāragallam** “cittaphalikan”tipi vadanti. **Mahatam bhūtānanti** mahantānam sattānam. **Timī timiṅgalā timitimiṅgalāti** tiso macchajātiyo. Timim gilanasamattā timiṅgalā. Timiṅca timiṅgalaṅca gilanasamattā timitimiṅgalāti vadanti.

1. Kira (Ma-Ṭṭha 3. 24 piṭṭhe), hi (Udāna-Ṭṭha 272 piṭṭhe.)

2. Nāgakuṅkumādi (Ka)

3. Otaṇatthāya (Ka)

Mama sāvakāti sotāpannādike ariyapuggale sandhāya vadati. **Na saṁvasatī**ti uposathakammādivasena saṁvāsam na karoti. **Ukkhipatī**ti apaneti. **Vimuttirasoti** kilesehi vimuccanaraso. Sabbā hi sāsanasampatti yāvadeva anupādāya āsavehi cittassa vimutti-atthā.

Ratanānīti ratijananaṭṭhena ratanāni. Satipaṭṭhānādayo hi bhāviyamānā pubbhāgepi anappakam pītipāmojjam nibbattenti, pageva aparabhāge. Vuttam hetam—

“Yato yato sammasati, khandhānam udayabbayam.
Labhatī pītipāmojjam, amataṁ tam vijānatan”¹.

Lokiyaratananibbattam² pana pītipāmojjam na tassa kalabhāgampi agghati. Apica—

Cittikataṁ mahagghañca, atulam dullabhadassanam.
Anomasattaparibhogam, ratananti pavuccati³.

Yadi ca cittikatādibhāvena ratanam nāma hoti, satipaṭṭhānādīnamyeva bhūtato ratanabhāvo. Bodhipakkhiyadhammānam hi so ānubhāvo, yam sāvakā sāvakapāramiññaṁ, paccekabuddhā paccekabodhiññaṁ, sammāsambuddhā sammāsambodhim adhigacchanti āsannakāraṇattā. Āsannakāraṇam hi dānādi-upanissayoti evam ratijananaṭṭhena cittikatādi-atthena ca ratanabhāvo bodhipakkhiyadhammānam sātisayo. Tena vuttam “**tatrimāni ratanāni, seyyathidaṁ. Cattāro satipaṭṭhānā**”^{ti}-ādi.

Tattha ārammaṇe okkantivā upaṭṭhānaṭṭhena upaṭṭhānam, satiyeva upaṭṭhānanti **satipaṭṭhānam**. Ārammaṇassa pana kāyādivasena catubbidhattā vuttam “**cattāro satipaṭṭhānā**”^{ti}. Tathā hi kāyavedanācittadhammesu subhasukhanicca-attasaññānam pahānato asubhadukkhāniccānattabhāvaggahaṇato ca nesam kāyānupassanādibhāvo vibhatto.

Sammā padahanti etena, sayam vā sammā padahati, pasattham sundaram vā padahantīti **sammappadhānam**, puggalassa vā sammadeva padhānabhāvakaraṇato

1. Khu 1. 67 piṭṭhe Dhammapade.

2. Lokiyaratananimittam Udāna-Ṭṭha 275 piṭṭhe Sārattha-Ṭṭi 3. 431 piṭṭhe ca.

3. Di-Ṭṭha 2. 35; Saṁ 3. 190; Khuddakapāṭha-Ṭṭha 143; Suttanipāta-Ṭṭha 1. 272; Mahāniddeśa-Ṭṭha 231 piṭṭhesupi.

sammappadhānaṃ, vīriyassettaṃ adhivacanaṃ. Tampi anuppannuppannānaṃ akusalānaṃ anuppādanappahānavasena anuppannuppannānaṃ kusalānaṃ dhammānaṃ uppādanaṭṭhāpanavasena ca catukiccasādhakattā vuttaṃ “**cattāro sammappadhānā**”ti.

Ijjhatīti iddhi, samijjhati nipphajjatīti attho. Ijjhanti vā tāya sattā iddhā vuddhā ukkaṃsagatā hontīti iddhi. Iti paṭhamena atthena iddhi eva pādoti **iddhipādo**, iddhikoṭṭhāsoti attho. Dutiyena atthena iddhiyā pādo patiṭṭhā adhigamupāyoti **iddhipādo**. Tena hi uparūparivisesasaṅkhātānaṃ iddhiṃ pajjanti pāpuṇanti. Svāyaṃ iddhipādo yasmā chandādike cattāro adhipatidhamme dhure jeṭṭhake katvā nibbattīyati, tasmā vuttaṃ “**cattāro iddhipādā**”ti.

Pañcindriyānīti saddhādīni pañca indriyāni. Tattha assaddhiyaṃ abhibhavitvā adhimokkhalakkhaṇe indaṭṭhaṃ kāretīti **saddhindriyaṃ**. Kosajjaṃ abhibhavitvā paggahalakkhaṇe, pamādaṃ abhibhavitvā upaṭṭhānalakkhaṇe, vikkhepaṃ abhibhavitvā avikkhepalakkhaṇe, aññānaṃ abhibhavitvā dassanalakkhaṇe indaṭṭhaṃ kāretīti **paññindriyaṃ**.

Tāniyeva assaddhiyādīhi anabhibhavanīyato akampiyaṭṭhena sampayuttadhammesu thirabhāvena ca **balāni** veditabbāni.

Satta bojjhaṅgāti bodhiyā, bodhissa vā aṅgāti **bojjhaṅgā**. Yā hi esā dhammasāmaggi yāya lokuttaramaggakkhaṇe uppajjamānāya līnuddhaccapatiṭṭhānāyūhana kāmasukhattakilamathānuyoga ucchedasassatābhinivesādīnaṃ anekesaṃ upaddavānaṃ paṭipakkhabhūtāya satidhammavicayavīriyapītipassaddhisamādhi-upekkhāsāṅkhātāya dhammasāmaggiyā ariyasāvako bujjhati, kilesaniddāya vuṭṭhahati, cattāri ariyasaccāni paṭivijjhati, nibbānameva vā sacchikarotīti “**bodhī**”ti vuccati, tassā dhammasāmaggiyā bodhiyā aṅgātipi **bojjhaṅgā** jhānaṅgamaggaṅgādayo viya. Yopesa vuttappakārāya dhammasāmaggiyā bujjhatīti katvā ariyasāvako “**bodhī**”ti vuccati, tassa bodhissa aṅgātipi **bojjhaṅgā** senaṅgarathaṅgādayo viya. Tenāhu porāṇā “bujjhanakassa puggalassa aṅgāti bojjhaṅgā”ti¹. “Bodhāya samvattantīti bojjhaṅgā”ti-ādinā² nayanepi bojjhaṅgattho veditabbo.

1. Abhi-Ṭṭha 2. 296; Saṃ-Ṭṭha 3. 176; Paṭisaṃ-Ṭṭha 2. 203 piṭṭhesupi.

2. Khu 9. 302 piṭṭhe Paṭisambhidāmagge.

Ariyo aṭṭhaṅgiko maggoti taṃtaṃmaggavajjhehi kilesehi ārakattā, ariyabhāvakarattā, ariyaphalappaṭilābhakarattā ca ariyo. Sammādiṭṭhi-ādīni aṭṭhaṅgāni assa atthi, aṭṭha aṅgāniyeva vā aṭṭhaṅgiko. Mārento kilese gacchati, nibbānatthikehi vā maggīyati, sayam vā nibbānam maggatīti maggoti evametesam satipaṭṭhānādīnam atthavibhāgo veditabbo.

Sotāpannoti maggasaṅkhātāṃ sotāṃ āpajjitvā pāpuṇitvā ṭhito, sotāpattiphalatṭhoti attho. **Sotāpattiphalasacchikiriyāya paṭipannoti** sotāpattiphalassa attapaccakkhakarāṇāya paṭipajjamāno paṭhamamaggaṭṭho, yo aṭṭhamakotipi vuccati. **Sakadāgāmīti** sakideva imaṃ lokam paṭisandhiggahaṇavasena āgamanasīlo dutiyaphalaṭṭho. **Anāgāmīti** paṭisandhiggahaṇavasena kāmalokam anāgamanasīlo tatiyaphalaṭṭho. Yo pana saddhānusārī dhammānusārī ekabījīti-evamādiko ariyapuggalavibhāgo, so etesaṃyeva pabhedoti. Sesam vuttanayasadisameva.

Pahārādasuttavaṇṇanā niṭṭhitā.

10. Uposathasuttavaṇṇanā

20. Dasame **tadahuposatheti**¹ tasmim uposathadivasabhūte ahani. **Uposathakaraṇatthāyāti** ovādapātimokkham uddisitum. **Uddhastam aruṇanti** aruṇuggamanam. **Uddisatu bhante bhagavā bhikkhūnam pātimokkhanti** thero bhagavantaṃ pātimokkhuddesaṃ yāci tasmim kāle “na bhikkhave anuposathe uposatho kātabbo”²ti² sikkhāpadassa apaññattattā. Kasmā pana bhagavā tiyāmarattim vītināmesi? Tato paṭṭhāya ovādapātimokkham anuddisitukāmo tassa vatthum pākaṭam kātum. **Addasāti** katham addasa? Attano cetopariyañāṇena tassaṃ parisati bhikkhūnam cittāni pariṇānto tassa dussīlassa cittam passi. Yasmā pana citte diṭṭhe taṃsamaṅgīpuggalo diṭṭho nāma hoti, tasmā “**addasā kho āyasmā**

1. Udāna-Ṭṭha 268; Sārattha-Ṭṭi 3. 426 piṭṭhādīsu passitabbanam.

2. Vi 3. 142 piṭṭhe. (Attato samānam)

mahāmoggallāno taṃ puḅḅalaṃ dussīlan”ti-ādī vuttaṃ. Yatheva hi anāgate sattasu divasesu pavattaṃ paresaṃ cittaṃ cetopariyaññalābhī jānāti, evaṃ atītepi. **Majjhe bhikkhusaṃghassa nisinnanti** saṃghapariyāpanno viya bhikkhusaṃghassa anto nisinnaṃ. **Diṭṭhosīti** ayaṃ na pakatattoti bhagavatā diṭṭho asi. Yasmā ca evaṃ diṭṭho, tasmā natthi te tava bhikkhūhi saddhim ekakammādisaṃvāso. Yasmā pana so saṃvāso tava natthi, tasmā uṭṭhehi āvusoti evamettha padayojanā veditabbā.

Tatiyampi kho so puḅḅalo tuṅhī ahosīti anekavāraṃ vatvāpi “thero sayameva nibbinno¹ oramissatī”ti vā, “idāni imesaṃ paṭipattiṃ jānissāmī”ti vā adhippāyena tuṅhī ahosi. **Bāhāyaṃ gahetvāti** “bhagavatā mayā ca yāthāvato diṭṭho, yāvatiyaṃ ‘uṭṭhehi āvuso’ti ca vutto na vuṭṭhāti, idānissa nikkadḍhanakālo, mā saṃghassa uposathantarāyo ahosī”ti taṃ bāhāyaṃ aggahesi, tathā gahetvā. **Bahi dvārakoṭṭhakā nikkhāmetvāti** dvārakoṭṭhakā dvārasālāto nikkhāmetvā. **Bahīti** pana nikkhāmitaṭṭhānadassanaṃ. Atha vā **bahidvārakoṭṭhakāti** bahidvārakoṭṭhakatopi nikkhāmetvā, na antodvārakoṭṭhakato eva. Ubhayatthāpi vihārato bahikatvāti attho. **Sūciḅhaṭṭikam datvāti** aggaḷasūciṅca upariḅhaṭṭikaṅca ādahitvā, suṭṭhutaṃ kavāṭaṃ thaketvāti attho. **Yāva bāhāgahaṅāpi nāmāti** iminā “aparissuddhā ānanda parisā”ti vacanaṃ sutvā eva hi tena pakkamitabbaṃ siyā, evaṃ apakkamitvā yāva bāhāgahaṅāpi nāma so moghapuriso āgamessati, acchariyamidanti dasseti. Idaṅca garahanacchariyamevāti veditabbaṃ.

Atha bhagavā cintesi “idāni bhikkhusaṃghe abbudo jāto, aparissuddhā puḅḅalā uposathaṃ āgacchanti, na ca tathāgatā aparissuddhāya parisāya uposathaṃ karonti, pātimokkhaṃ uddisanti. Anuddisante ca bhikkhusaṃghassa uposatho pacchijjati. Yaṃnūnāhaṃ ito paṭṭhāya bhikkhūnaṃyeva pātimokkhuddesaṃ anujāneyyaṃ”ti. Evaṃ pana cintetvā bhikkhūnaṃyeva pātimokkhuddesaṃ anujāni. Tena vuttaṃ “**atha kho bhagavā -pa- pātimokkhaṃ uddiseyyāthā**”ti. Tattha na dānāhanti idāni ahaṃ uposathaṃ

na karissāmi, pātimokkham na uddisissāmīti paccekam **na**-kārena sambandho. Duvidham hi pātimokkham āṇāpātimokkham ovādapātimokkhanti. Tesu “suṇātu me bhante”ti-ādikam¹ āṇāpātimokkham. Tam sāvakāva uddisanti, na buddhā, yaṃ anvaddhamāsam uddisīyati. “Khantī paramam -pa-. Sabbapāpassa akaraṇam -pa-. Anupavādo anupaghāto -pa- etaṃ buddhānasāsanam”ti² imā pana tisso gāthā ovādapātimokkham nāma. Tam buddhāva uddisanti, na sāvakā, channampi vassānam accayena uddisanti. Dīghāyukabuddhānam hi dharamānakāle ayameva pātimokkhuddeso, appāyukabuddhānam pana paṭhamabodhiyaṃyeva. Tato param itaro. Tañca kho bhikkhūyeva uddisanti, na buddhā, tasmā amhākampi bhagavā vīsativassamattam imam ovādapātimokkham uddisitvā imam antarāyam disvā tato param na uddisi. **Aṭṭhānanti** akāraṇam. **Anavakāso**ti tasseva vevacanam. Kāraṇam hi yathā tiṭṭhati ettha phalam tadāyattavuttitāyāti “ṭhānan”ti vuccati, evam “avakāso”tipi vuccati. **Yanti** kiriyāparāmasanam.

Aṭṭhime bhikkhave mahāsamuddeti ko anusandhi? Yvāyam aparisuddhāya parisāya pātimokkhassa anuddeso vutto, so imasmim dhammavinaye acchariyō abbhuto dhammoti tam aparehipi sattahi acchariyabbhutadhammehi saddhim vibhajitvā dassetukāmo paṭhamam tāva tesam upamābhāvena mahāsamudde aṭṭha acchariyabbhutadhamme dassento satthā “aṭṭhime bhikkhave mahāsamudde”ti-ādimāha.

Uposathasuttavaṇṇanā niṭṭhitā.

Mahāvaggavaṇṇanā niṭṭhitā.

3. Gahapativagga

1. Paṭhama-uggasuttādivaṇṇanā

21-27. Tatiyassa paṭhamadutiyesu natthi vattabham. Tatiye “hatthago”ti vattabbe **“hatthako”**ti vuttam. So hi rājapurisānam

1. Vi 3. 140 piṭṭhe.

2. Di 2. 42; Khu 1. 41, 127; Khu 10. 37 piṭṭhesu.

hatthato yakkhassa hattham, yakkhassa hatthato bhagavato hattham,
bhagavato hatthato puna rājapurisānam hattham gatattā nāmato **hatthako**
ālavakoti jāto. Tenāha “**Ālavakayakkhassa hatthato hatthehi**
sampaṭicchitattā hatthakoti laddhanāmo rājakumāro”ti. Catutthādīni
uttānatthāneva.

Paṭhama-uggasuttādivaṇṇanā niṭṭhitā.

8. Dutiyabalasuttavaṇṇanā

28. Aṭṭhame khīṇāsavassa sabbesaṃ saṅkhārānaṃ aniccatā
asammohavasena kiccatō maggapaññāya suppaṭividdhā, vipassanāya
ārammaṇakaraṇavasena pīti dassento āha “**sahavipassanāya**
maggapaññāya”ti. **Ime kāmā**ti dvepi kāme vadati. Kilesavasena
uppajjamāno hi pariḷāho vatthukāmasannissayo vatthukāmavisayo vāti dvepi
sapariḷāhaṭṭhena aṅgārakāsu viyāti “**aṅgārakāsūpamā**”ti vuttā. Anto vuccati
lāmakatṭhena taṇhā, byantaṃ vigatantaṃ bhūtanti **byantibhūtanti** āha
“**vigatantabhūtan**”ti, nittaṇhanti attho.

Dutiyabalasuttavaṇṇanā niṭṭhitā.

9. Akkhaṇasuttavaṇṇanā

29. Navame yasmā mahiddhikapetā devāsuraṇānaṃ āvāhaṃ gacchanti,
vivāhaṃ na gacchanti, tasmā pettivisayeneva asurakāyo gahitoti vedītabbo.
Petāsuraṇā pana petā evāti tesānaṃ petehi saṅgaho avuttasiddhova.

Akkhaṇasuttavaṇṇanā niṭṭhitā.

10. Anuruddhamahāvitakkasuttavaṇṇanā

30. Dasame **appicchassā**ti na icchassa. Abhāvattho hettha **appa**-saddo “appaḍaṃsamakasavātātapā”ti-ādīsu¹ viya. Paccayesu appiccho **paccayappiccho**, cīvarādipaccayesu icchārahito. **Adhigamappicchoti** jhānādi-adhigamavibhāvane icchārahito. **Pariyatti-appicchoti** pariyattiyam bāhusaccavibhāvane icchārahito. **Dhutaṅgappicchoti** dhutaṅgesu appiccho dhutaṅgabhāvavibhāvane icchārahito. **Santaḅṇaniguhanenā**ti attani samvijjamānānaṃ jhānādiguṇānañceva bāhusaccaguṇassa dhutaṅgaguṇassa ca niguhanena chādanena. **Sampajjati**ti nipphajjati sijjhati. **No mahicchassā**ti mahatiyā icchāya samannāgatassa no sampajjati anudhammassapi anipphajjanato. **Pavivittassā**ti pakārehi vivittassa. Tenāha “**kāyacitta-upadhivivekehi vivittassā**”ti. **Ārambhavatthuvasenā**ti bhāvanābhīyogavasena ekībhāvova kāyavivekoti adhippeto, na gaṇasaṅgaṇikābhāvamattanti dasseti. **Kammanti** yogakammaṃ.

Sattehi kilesehi ca saṅgaṇanaṃ samodhānaṃ saṅgaṇikā, sā āramitabbaṭṭhena ārāmo etassāti **saṅgaṇikārāmo**, tassa. Tenāha “**gaṇasaṅgaṇikāya cevā**”ti-ādi. **Āraddhavīriyassā**ti paggahitavīriyassa. Tañca kho upadhiviveke ninnatāvasena “ayaṃ dhammo”ti vacanato. Esa nayo itaresupi. Vivaṭṭanissitamīyeva hi samādhānaṃ idhādhippetam, tathā paññāpi. Kammassakatapaññāya hi ṭhito kammavasena bhavesu nānappakāro anattoti jānanto kammakkhayakaraṃ ñāṇaṃ abhipattheti, tadatthañca ussāhaṃ karoti. Mānādayo sattasantānaṃ² saṃsāre papañcenti vitthārentīti **papañcā**ti āha “**taṅhāmānadiṭṭhipapañcarahitattā**”ti-ādi. Sesamettha suviññeyyameva.

Anuruddhamahāvitakkasuttavaṇṇanā niṭṭhitā.

Gahapativaggavaṇṇanā niṭṭhitā.

1. Am 3. 268 piṭṭhe.

2. Sattānaṃ (Ka)

4. Dānavagga

1. Paṭhamadānasuttādivaṇṇanā

31-34. Catutthassa paṭhame āsajjāti yassa deti, tassa āgamanahetu¹ tena samāgamnimittam. **Bhayāti** bhayahetu. Nanu bhayam nāma laddhakāmatā rāgādayo viya cetanāya avisuddhikaram, tam kasmā idha gahitanti? Nayidam tādīsam vohārabhayādim² sandhāya vuttanti dassetum “**ayam adāyako akārako**”ti-ādi vuttam. **Adāsi meti** yam pubbe katam upakāram cintetvā dīyati, tam sandhāya vuttam. **Dassati meti** paccupakārāsīyā yam dīyati, tam sandhāya vadati. **Sāhu dānanti** dānam nāmetam paṇḍitapaññattanti sādhusamācāre ṭhatvā deti. **Alaṅkārattanti** upasobhanattham. Dānam hi datvā ta paccavekkhantassa pāmojjapītīso manassādayo uppajjanti, lobhadosa-issāmaccherādayopi vidūrī bhavanti. Idāni dānam anukūladhammaparibrūhanena paccanīkadhamavidūrīkaraṇena ca bhāvanācittassa upasobhanāya ca parikkhārāya ca hotīti “**alaṅkārattathāñceva parikkhārattathāñca deti**”ti vuttam. Tenāha “**dānam hi cittaṃ muduṃ karotī**”ti-ādi. **Muducitto hoti** laddhā dāyake “iminā mayham saṅgaho kato”ti, dātāpi laddhari. Tena vuttam “**ubhinnampi cittaṃ muduṃ karotī**”ti.

Adantadamananti adantā anassavāpissa dānena dantā assavā honti, vase vattanti. **Adānam dantadūsakanti** adānam pubbe dantānam assavānampi vighātuppādanena cittaṃ dūseti. **Unnamanti** dāyakā piyamvadā ca paresam garucittikāratthānatāya. **Namanti** paṭiggāhakā dānena piyavācāya ca laddhasaṅgahāsāṅgahakānam.

Cittālaṅkārādānameva uttamam anupakkiliṭṭhatāya suparisuddhatāya guṇavisesapaccayatāya ca. Dutiyādīni uttānatthāneva.

Paṭhamadānasuttādivaṇṇanā niṭṭhitā.

1. Āmodanahetu (Ka)

2. Corabhayādim (Ka)

5. Dānūpapattisuttavaṇṇanā

35. Pañcame **dānapaccayā**ti dānakāraṇā, dānamayapuññassa katattā upacitattāti attho. **Upapattiyoti** manussesu devesu ca nibbattiyo. **Ṭhapetī**ti ekavārameva anuppajjitvā yathā upari tenevākārena pavattati, evaṃ ṭhapeti. Tadeva cassa adhiṭṭhānanti āha “**tasseva vevacanan**”ti. **Vaḍḍhetī**ti brūheti na hāpeti. **Vimuttanti** adhimuttaṃ, ninnam poṇam pabbhāranti attho. **Vimuttanti** vā vissatṭham. Nippariyāyato **uttari** nāma paṇibham majjhepi hīnamajjhimavibhāgassa labbhanatoti vuttaṃ “**uttari abhāvitanti tato uparimaggaphalatthāya abhāvitan**”ti. **Samvattati** tathāpaṇihitam dānamayaṃ cittaṃ. Yaṃ pana pāliyaṃ “**tañca kho**”ti-ādi vuttaṃ, taṃ tatrūpapattiyā vibandhakaradussīlyābhāvadassanaparaṃ daṭṭhabbam, na dānamayassa puññassa kevalassa taṃsamvattanatādassanaparanti daṭṭhabbam. **Samucchinnarāgassā**ti samucchinnakāmarāgassa. Tassa hi siyā brahmaloke upapatti, na samucchinnabhavarāgassa. Vītarāgaggahaṇena cettha kāmesu vītarāgatā adhippetā, yāya brahmalokūpapatti siyā. Tenāha “**dānamattenevā**”ti-ādi. Yadi evaṃ dānam tatha kimatthiyanti āha “**dānam panā**”ti-ādi. **Dānena muducittoti** baddhāghāte veripuggalepi attano dānasampañchanena mudubhūtacitto.

Dānūpapattisuttavaṇṇanā niṭṭhitā.

6. Puññakiriyavatthusuttavaṇṇanā

36. Chaṭṭhe pujjabhavaphalam nibbattenti, attano santānam punantīti vā puññāni ca tāni hetupaccayehi kattabbato kiriyā cāti puññakiriyā, tāyeva ca tesam tesam piyamanāpatādi-ānisaṃsānam vatthubhāvato **puññakiriyavatthūni**.

Anucchinnabhavamūlassa anuggahavasena, pūjāvasena vā attano deyyadhammassa parassa pariccāgacetanā dīyati etenāti dānam, dānameva **dānamayaṃ**. Padapūraṇamattaṃ maya-saddo. Cīvarādīsu catūsu paccayesu¹, annādīsu

1. Dī-Ṭṭha 3. 180 piṭṭhepi passitabbam.

vā dasasu dānavatthūsu, rūpādīsu vā chasu ārammaṇesu taṃ taṃ dentassa tesam uppadanato paṭṭhāya pubbhāge pariccāgakāle pacchā somanassacittena anussaraṇe cāti tīsu kālesu pavattacetanā **dānamayaṃ puññakiriyavatthu** nāma.

Niccasilā-uposathasilādivasena pañca aṭṭha dasa vā sīlāni samādiyantassa “sīlapūraṇattham pabbajissāmī”ti vihāram gacchantassa pabbajantassa, manoratham matthakam pāpetvā “pabbajito vatamhi sādhu suṭṭhū”ti āvajjentassa, saddhāya pātimokkham paripūrentassa, paññāya cīvarādike paccaye paccavekkhantassa, satiyā āpāthagatesu rūpādīsu cakkhudvārādīni samvarantassa, vīriyena ājīvam sodhentassa ca pavattacetanā sīlati, sīletīti vā **sīlamayaṃ puññakiriyavatthu** nāma.

Paṭisambhidāyam¹ vuttena vipassanāmaggena cakkhum aniccato dukkhato anattato vipassantassa, sotam, Pa. Ghānam, Jivham, Kāyam, Pa. rūpe, Pa. dhamme, Pa. cakkhuviññāṇam, Pa. manoviññāṇam, Pa. cakkhusamphassam, Pa. manosamphassam, Pa. cakkhusamphassajam vedanam, Pa. manosamphassajam vedanam, Pa. jarāmarāṇam aniccato dukkhato anattato vipassantassa yācetanā, yā ca pathavīkasiṇādīsu sabbāsu aṭṭhattimsāya ārammaṇesu pavattā jhānacetanā, yā ca anavajjesu kammāyatanasippāyatanavijjāṭṭhānesu paricayamanasikārādivasena pavattā cetanā, sabbā sā bhāveti etāyāti bhāvanāmayam vuttanayena puññakiriyavatthu cāti **bhāvanāmayam puññakiriyavatthu**.

Ekamekañcetha yathāraham pubbhāgato paṭṭhāya karontassa kāyakammaṃ hoti. Tadattham vācam nicchārentassa vacīkammaṃ. Kāyaṅgam vācaṅgañca acopetvā manasā cintayantassa manokammaṃ. Annādīni dentassa cāpi “annadānādīni demī”ti vā, dānapāramim āvajjetvā vā dānakāle dānamayaṃ puññakiriyavatthu hoti. Yathā hi kevalam “annadānādīni demī”ti dānakāle dānamayaṃ puññakiriyavatthu hoti, evam “idam dānamayaṃ sammāsambodhiyā paccayo hotū”ti dānapāramim āvajjetvā dānakālepi dānasīseva pavattitattā. Vattasīse ṭhatvā dadanto “etaṃ dānam nāma

1. Khu 9. 51 piṭṭhe

mayham kulavaṃsahetu pavenicārittan”ti cārittasiṃsena vā dento cārittasiṃlattā sīlamayaṃ. Khayato vayato sammasaṇaṃ paṭṭhapetvā dadato bhāvanāmayāṃ puññakiriyavatthu hoti. Yathā hi deyyadhammapariccāgavasena vattamānāpi dānacetanā vattasiṃse ṭhatvā dadato sīlamayaṃ puññakiriyavatthu hoti pubbābhisankhārassa aparabhāge cetanāya ca tathāpavattattā.

Puññakiriyavatthusuttavaṇṇanā niṭṭhitā.

7. Sappurisdānasuttādivaṇṇanā

37-38. Sattame **viceyyadetī**ti ettha dve vicinanāni dakkhiṇeyyavicinanāṃ dakkhiṇāvicinanañca. Tesu vipannaṃsīle ito bahiddhā pañcanavutī¹ pāsaṇḍabhede ca dakkhiṇeyye pahāya sīlādiguṇasampannānaṃ sāsane pabbajitānaṃ dānaṃ **dakkhiṇeyyavicinanāṃ** nāma. Lāmakalāmake paccaye apanetvā paṇītapāṇīte vicinitvā tesam dānaṃ **dakkhiṇāvicinanaṃ** nāma. Tenāha “**imassa dinnāṃ mahapphalaṃ bhavissati**”ti-ādi. Aṭṭhame natthi vattabbaṃ.

Sappurisdānasuttādivaṇṇanā niṭṭhitā.

9. Abhisandasuttādivaṇṇanā

39-40. Navame **puññābhisandā**ti puññanadiyo. **Kusalābhisandā**ti kusalānaṃ pavāhā. **Sukhassāhārā**ti sukhapaccayā. Aggānīti ñātattā **aggaññāni**. Cīrattāṃ ñātattā **rattaññāni**. Ariyānaṃ sādhuṇaṃ vaṃsānīti ñātattā **vaṃsaññāni**. Porāṇānaṃ ādipurisānaṃ etānīti **porāṇāni**. Sabbaso kenacipi pakārena sādhuhi na kiṇṇāni na khittāni chaḍḍitānīti **asamkiṇṇāni**. Ayañca nayo nesaṃ yathā atīte, evaṃ etarahi anāgate cāti āha “**asamkiṇṇapubbāni na samkiyanti na samkiyissanti**”ti. Tato eva **appaṭikutṭhāni**. Na hi kadāci viññū samaṇabrāhmaṇā himsādipāpadhammaṃ anujānanti. **Aparimāṇānaṃ sattānaṃ abhayaṃ detī**

sabbesu bhūtesu nihitadaṇḍatā sakalassapi sattakāyassa bhayābhāvaṃ deti. **Averanti** verābhāvaṃ. **Abyābajjhanti** niddukkhatam. Evamettha saṅkhepato pālivaṇṇanā veditabbā. Dasame natthi vattabbam.

Abhisandasuttādivaṇṇanā niṭṭhitā.

Dānavaggavaṇṇanā niṭṭhitā.

5. Uposathavagga

1. Saṅkhittūposathasuttādivaṇṇanā

41-48. Pañcamassa paṭhamādīsu natthi vattabbam. Chaṭṭhe¹ pañca aṅgāni etassāti pañcaṅgam, pañcaṅgameva pañcaṅgikam, tassa **pañcaṅgikassa**. Mahatī daddarī vīṇāvisesopi **ātata mevāti** “cammapariyonaddhesū”ti visesanam katam. **Ekatalatūriyam** kumbhathunadaddarikādi. **Ubhayatalam** bherimudiṅgādi. Cammapariyonaddham hutvā vinibaddham **ātata vitatam**. **Sabbaso pariyonaddham** nāma caturassa-ambaṇam paṇavādi ca. Gomukhī-ādinampi ettheva saṅgaho daṭṭhabbo. **Vasādīti ādi**-saddena saṅkhādīnam saṅgaho. **Sammādīti** sammataḷakamsatāḷasilāsalaḷakataḷādi. Tattha **sammataḷam** nāma dantamayataḷam. **Kamsataḷam** lohamayam. Silāmayam ayopattena ca vādanataḷam **silāsalaḷakataḷam**. **Sumucchitassāti** suṭṭhu paṭiyattassa. **Pamāṇeti** nātidaḷhanātisithilasaṅkhāte majjhime mucchanāpamāṇe. **Chekoti** paṭu paṭṭho. So cassa paṭubhāvo manoharoti āha “**sundaro**”ti. **Raṅjetunti** rāgam uppādetum. **Khamatevāti** rocateva. **Na nibbindatīti** na tajjeti, sotasukhabhāvato piyāyitabbova hoti.

Bhattāram nātimaññatīti sāmikam muñcitvā aññam manasāpi na pattheti. **Uṭṭhāhikāti** uṭṭhānavīriyasampannā. **Analasāti** nikkosajjā. **Saṅgahitaparijjanāti** sammānanādīhi ceva chaṇḍīsu pesetabbapiyabhaṇḍādīpaṇṇākārapesanādīhi ca saṅgahitaparijjanā. Idha **parijano** nāma sāmikassa

1. Dī-Ṭī 2. 193; Saṃ-Ṭī 1. 225 piṭṭhesupi passitabbam.

ceva attano ca ñātijano. **Sambhatanti** kasivaṇijjādīni katvā ābhatadhanam. Sattamaṭṭhamāni uttānatthāni.

Samkhittūposathasuttādivaṇṇanā niṭṭhitā.

9. Paṭhama-idhalokikasuttādivaṇṇanā

49-50. Navame **idhalokavijayāyāti** idhalokavijjanatthāya abhibhavatthāya. Yo hi diṭṭhadhammikam anattam parivajjanavasena abhibhavati, tato eva tadattham sampādeti, so idhalokavijayāya paṭipanno nāma hoti paccatthikaniggaṇhanato sadatthasampādanato ca. Tenāha “**ayam’sa loko āraddho hoti**”ti. (Pasamsāvahato tayidam pasamsāvahanam kittisaddena idhaloke saddānam cittatosanaviddheyya bhāvāpādanena ca hotīti daṭṭhabbam.)¹ **Susamvihitakammantoti** yāgubhattapacanakālādīni anatikkamitvā tassa tassa sādhuḥkam karaṇena suṭṭhu samvihitakammanto. **Paralokavijayāyāti** paralokassa vijjanatthāya abhibhavatthāya. Yo hi samparāyikam anattam parivajjanavasena abhibhavati, tato eva tadattham sampādeti, so paralokavijayāya paṭipanno nāma hoti. Sesam sabbattha uttānameva.

Paṭhama-idhalokikasuttādivaṇṇanā niṭṭhitā.

Uposathavaggavaṇṇanā niṭṭhitā.

Paṭhamapaṇṇāsako niṭṭhito.

1. () Etthantare pāṭho adhiko viya dissati.

2. Dutiyapaṇṇāsaka

(6) 1. Gotamīvagga

1. Gotamīsuttādivaṇṇanā

51-53. Chaṭṭhassa paṭhame¹ **gotamī**ti gottam. Nāmakaraṇadivase panassā laddhasakkārā brāhmaṇā lakkhaṇasampattiṃ disvā “sace ayaṃ dhītaraṃ labhissati, cakkavattirañño mahesī bhavissati. Sace puttam labhissati, cakkavattirājā bhavissatīti ubhayathāpi mahatīyevassā pajā bhavissatī”ti byākarimsu. Athassā “mahāpajāpatī”ti nāmaṃ akaṃsu. Tenāha “**puttapajāya ceva dhītupajāya ca mahantattā evamladdhanāmā**”ti.

“Attadaṇḍā bhayaṃ jātaṃ, janaṃ passatha medhagaṃ.

Samvegaṃ kittayissāmi, yathā samvijitaṃ mayā”ti²—

ādinā **attadaṇḍasuttaṃ kathesi**. Tamāmpalobhanakiriya kāyavācāhi parakkamantiyo ukkaṇṭhantūti sāsanaṃ pesenti nāmāti katvā vuttaṃ “**sāsanaṃ pesetvā**”ti. **Kuṇāladahanti** kuṇāladahaṭṭhāraṃ. **Anabhiratiṃ vinodetvāti** itthīnaṃ dosadassanamukhena kāmānaṃ vokārasaṃkilesavibhāvanena anabhiratiṃ vinodetvā.

Āpādikāti samvaddhakā, tumhākaṃ hatthapādesu kiccaṃ asādhentesu hatthe ca pāde ca vaḍḍhetvā paṭijaggitāti attho. **Posikāti** divasassa dve tayo vāre nahāpetvā bhojetvā pāyetvā tumhe posesi. **Thaññaṃ pāyesīti** nandakumāro kira bodhisattato katipāheneva daharo, tasmim jāte mahāpajāpatī attano puttam dhātīnaṃ datvā sayam bodhisattassa dhātikiccaṃ sādhamānā attano thaññaṃ pāyesi. Tam sandhāya thero evamāha. **Daharoti** taruṇo. **Yuvāti** yobbaññe ṭhito. **Maṇḍanakajātikoti** alaṅkārasabhāvo. Tattha koci taruṇopi yuvā na hoti yathā atitaruṇo. Koci yuvāpi maṇḍanakajātiko na hoti yathā upasantasabhāvo, ālasiyabyasanādīhi vā abhibhūto. Idha pana

1. Sārattha-Ṭī 3. 436 piṭṭhādīsu passitabbaṃ.

2. Khu 1. 424; Khu 7. 315 piṭṭhesu.

daharo ceva yuvā ca maṇḍanakajātiko ca adhippeto, tasmā evamāha.
Uppalādīni maṇḍanakajātiko ca lokasammatattā vuttāni.

Mātugāmassa pabbajitattāti idaṃ pañcavassasatato uddham aṭṭhatvā
pañcasuyeva vassasatesu saddhammaṭṭhitiyā kāraṇanidassanam.
Paṭisambhidāpabbhappattakhīṇāsavavaseneva vuttanti ettha
paṭisambhidāpabbhappattakhīṇāsavaggahaṇena jhānānīpi gahitāneva honti. Na hi
nijjhānikānaṃ sabbappakārasampatti ijjatīti vadanti.
Sukkhavipassakakhīṇāsavavasena vassasahassanti-ādinā ca yaṃ vuttaṃ, taṃ
khandhakabhāṇakānaṃ matena vuttanti veditabbaṃ. **Vinayaṭṭhakathāyampi**¹
imināva nayena vuttaṃ.

Dīghanikāyaṭṭhakathāyam² pana “paṭisambhidāpabbhappattēhi vassasahassaṃ
aṭṭhāsi, chaḷabhiññēhi vassasahassaṃ, tevijjēhi vassasahassaṃ,
sukkhavipassakehi vassasahassaṃ, pātimokkheṇa vassasahassaṃ aṭṭhāsi”ti
vuttaṃ. Idhāpi **sāsanantaradhānakathāyam**³ “buddhānaṃ hi parinibbānato
vassasahassameva paṭisambhidā nibbattetuṃ sakkonti, tato paraṃ cha
abhiññā, tato tāpi nibbattetuṃ asakkontā tisso vijjā nibbattenti, gacchante
gacchante kāle tāpi nibbattetuṃ asakkontā sukkhavipassakā honti. Eteneva
upāyena anāgāmino, sakadāgāmino, sotāpannā”ti vuttaṃ.

Sarīyuttanikāyaṭṭhakathāyam⁴ pana “paṭhamabodhiyaṃ hi bhikkhū
paṭisambhidāpabbhappattā ahesuṃ. Atha kāle gacchante paṭisambhidā pāpuṇituṃ
na sakkhimsu, chaḷabhiññā ahesuṃ. Tato cha abhiññā pattuṃ asakkontā
tisso vijjā pāpuṇimsu. Idāni kāle gacchante tisso vijjā pāpuṇituṃ asakkontā
āsavakkhayamattaṃ pāpuṇissanti, tampi asakkontā anāgāmiphalaṃ, tampi
asakkontā sakadāgāmiphalaṃ, tasmim asakkontā sotāpattiphalaṃ, gacchante
kāle sotāpattiphalaṃ pattuṃ na sakkhissanti”ti vuttaṃ. Yasmā cetam
sabbaṃ aññamaññappaṭiviruddham, tasmā tesam tesam bhāṇakānaṃ
matameva ācariyena tattha tattha dassitanti gahetabbaṃ. Aññathā hi
ācariyasēva pubbāparavirodhappasaṅgo siyāti.

1. Vi-Ṭṭha 4. 127 piṭṭhe.

3. Am-Ṭṭha 1. 67 piṭṭhe.

2. Dī-Ṭṭha 3. 83 piṭṭhe.

4. Sarī-Ṭṭha 2. 187 piṭṭhe.

Tānīyevāti tānīyeva pañcavassasahassāni. Pariyattimūlakam sāsanti āha “**na hi pariyaṭṭiyā asati paṭivedho atthī**”ti-ādi. Pariyaṭṭiyā hi antarahitāya paṭipatti antaradhāyati, paṭipattiyā antarahitāya adhigamo antaradhāyati. Kimkāraṇā? Ayam hi pariyaṭṭi paṭipattiyā paccayo hoti, paṭipatti adhigamassa. Iti paṭipattitopi pariyaṭṭiyeva pamāṇam. Dutiyatatiyesu natthi vattabham.

Gotamīsuttādivaṇṇanā niṭṭhitā.

4. Dīghajāṇusuttādivaṇṇanā

54-55. Catutthe¹ **ekena bhoge bhuñjeyyā**ti ekena koṭṭhāsena bhoge bhuñjeyya, vinibhuñjeyya vāti attho. **Dvīhi kammanti** dvīhi koṭṭhāsehi kasivañijjādikammaṃ payojeyya. **Nidhāpeyyā**ti catutthakoṭṭhāsam nidhetvā ṭhapeyya, nidahitvā bhūmigataṃ katvā ṭhapeyyāti attho. **Āpadāsu bhavissatī**ti kulānam hi na sabbakālam ekasadisam vatthati, kadāci rāja-aggicoradubbhikkhādivasena āpadā uppajjanti, tasmā evam āpadāsu uppanāsu bhavissatīti ekam koṭṭhāsam nidhāpeyyāti vuttam. Imesu pana catūsu koṭṭhāsesu kataram koṭṭhāsam gahetvā kusalam kātabbanti? “bhoge bhuñjeyyā”ti vuttakoṭṭhāsam. Tato gaṇhitvā hi bhikkhūnampi kapaṇaddhikānampi dānam dātabbam, pesakāranhāpitādīnampi vetanam dātabbam. Samaṇabrāhmaṇakapaṇaddhikādīnam dānavasena ceva adhivatthadevatādīnam petabalivasena nhāpitādīnam vetanasena ca viniyogopi upayogo eva.

Apenti gacchanti, apentā vā etehīti apāyā, apāyā eva mukhāni dvārānīti **apāyamukhāni**. **Vināsadvārānī**ti etthāpi e seva nayo. Pañcame natthi vattabham.

Dīghajāṇusuttādivaṇṇanā niṭṭhitā.

1. Dī-Ṭṭha 3. 134 piṭṭhepi passitabbam.

6. Bhayasuttādivaṇṇanā

56-58. Chaṭṭhe gabbhavāso idha uttarapadalopena gabbho vuttoti āha “gabbhoti gabbhavāso”ti. Sattamaṭṭhamāni uttānatthāni.

Bhayasuttādivaṇṇanā niṭṭhitā.

9. Puggalasuttādivaṇṇanā

59-60. Navame **dānaṃ dadantānanti** dakkhiṇeyyaṃ uddissadānaṃ dentānaṃ. Upadhī vipaccanti etena, upadhīsu vā vipaccati, upadhayo vā vipākā etassāti **upadhivipākāṃ**. **Samghe dinnarṃ mahapphalanti** ariyasamghe dinnarṃ vipphāraṭṭhānaṃ hoti, vipulaphalanti attho. Dasame natthi vattabbarṃ.

Puggalasuttādivaṇṇanā niṭṭhitā.

Gotamīvaggavaṇṇanā niṭṭhitā.

(7) 2. Bhūmicālavagga

1. Icchāsuttādivaṇṇanā

61-65. Sattamassa paṭhamādīni suviññeyyāni. Pañcame¹ abhibhavatīti abhibhu, parikammaṃ, ñāṇaṃ vā. Abhibhu āyatanāṃ etassāti **abhibhāyatanāṃ**, jhānaṃ. Abhibhavitabbarṃ vā ārammaṇasaṅkhātāṃ āyatanāṃ etassāti **abhibhāyatanāṃ**. Atha vā ārammaṇābhibhavanato abhibhu ca taṃ āyatanaṃca yogino sukhavisesānaṃ adhiṭṭhānabhāvato manāyatanadhammāyatanabhāvato cātipi sasampayuttajjhānaṃ **abhibhāyatanāṃ**. Tenāha “**abhibhavanakāraṇāni**”ti-ādi. **Tāni hīti** abhibhāyatanasaññitāni jhānāni. “Puggalassa ñāṇuttariyatāyā”ti idam ubhayatthāpi yojetabbarṃ. Kathaṃ? **Paṭipakkhabhāvena paccanīkadhamme abhibhavanti puggalassa ñāṇuttariyatāya ārammaṇāni abhibhavanti**. Ñāṇabaleneva hi ārammaṇābhibhavanāṃ viya paṭipakkhābhibhavopīti.

1. Dī-Ṭī 2. 159 piṭṭhādīsu passitabbarṃ.

Parikkammavasena ajjhattaṃ rūpasāññī, na appanāvasena. Na hi paṭibhāganimitṭārammaṇā appanā ajjhattavisayā sambhavati. **Taṃ pana** ajjhattaparikkammavasena laddhaṃ kaṣiṇanimitṭaṃ **avisuddhameva hoti**, na bahiddhāparikkammavasena laddhaṃ viya visuddhaṃ.

Parittānīti yathāladdhāni suppasarāvamattāni. Tenāha “**avaḍḍhitānī**”ti. **Parittavasenevā**ti vaṇṇavasena ābhoge vijjamānepi parittavaseneva **idaṃ abhibhāyatanam vuttaṃ**. Parittatā hettha abhibhavanassa kāraṇaṃ. Vaṇṇābhoge satipi asatipi abhibhāyatanabhāvanā nāma tikkhapaññasseva sambhavati, na itarassāti āha “**ñāṇuttariko puggalo**”ti. **Abhibhavitvā samāpajjati**ti ettha abhibhavanam samāpajjanañca upacārajjhānādhiḡamasamanantameva appanājjhānuppādananti āha “**sahanimittuppādenevettha appanam pāpeti**”ti. **Saha nimittuppādenā**ti ca appanāparivāsābhāvassa lakkhaṇavacanametam. Yo “khippābhiñño”ti vuccati, tatopi ñāṇuttarasseva abhibhāyatanabhāvanā. **Etthā**ti etasmim nimitte. **Appanam pāpeti**ti bhāvanam appanam neti.

Ettha ca keci “uppanne upacārajjhāne taṃ ārabba ye heṭṭhimantena dve tayo javanavārā pavattanti, te upacārajjhānapakkhikā eva, tadana ntarañca bhavaṅgaparivāsena upacārāsevanāya ca vinā appanā hoti, saha nimittuppādeneva appanam pāpeti”ti vadanti, taṃ tesam matimattaṃ. Na hi pārivāsikakammena appanāvāro icchito, nāpi mahaggaṭappamāṇajjhānesu viya upacārajjhāne ekantato paccavekkhaṇā icchitabbā, tasmā upacārajjhānādhiḡamato param katipayabhavaṅgacittāvasāne appanam pāpuṇanto “saha nimittuppādenevettha appanam pāpeti”ti vutto. “Saha nimittuppādenā”ti ca adhippāyikamidam vacanam, na nītattham. Adhippāyo vuttanayeneva veditabbo.

Na antosamāpattiyam tadā tathārūpassa ābhogassa asambhavato, samāpattito vuṭṭhitassa ābhogo pubbabhāgabhāvanāya vasena jhānakkhaṇe pavattam abhibhavanākāram gahetvā pavattoti daṭṭhabbam. **Abhidhammaṭṭhakathāyam**¹ pana “iminā panassa pubbabhogo kathito”ti vuttaṃ.

1. Abhi-Ṭṭha 1. 233 piṭṭhe.

Antosamāpattiyam tathā ābhogābhāve kasmā “jhānasaññāyapī”ti vuttanti āha “**abhibhavana -pa- atthī**”ti.

Vaḍḍhitappamāṇānīti vipulappamāṇānī attho, na ekaṅguladvaṅgulādivasena vaḍḍhim pāpitānīti tathāvaḍḍhanassevettha asambhavato. Tenāha “**mahantānī**”ti. **Bhattavaḍḍhitakanti** bhuñjanabhājane vaḍḍhitvā dinnam bhattam, ekāsane purisena bhuñjitabbhattato upaḍḍhabhattanti attho.

Rūpe saññā rūpasaññā, sā assa atthīti rūpasaññī, na rūpasaññī **arūpasaññī**. Saññāsīsena jhānam vadati. Rūpasaññāya anuppādanamevettha **alābhitā**. **Bahiddhāva uppananti** bahiddhāvattusmirīyeva uppannam. **Abhidhamme**¹ pana “ajjhataṃ arūpasaññī bahiddhā rūpāni passati parittāni suvaṇṇadubbaṇṇāni, appamāṇāni suvaṇṇadubbaṇṇānī”ti evam catunnam abhibhāyatanānam āgatattā **abhidhammatṭhakathāyaṃ** “kasmā pana yathā suttante ajjhataṃ rūpasaññī eko bahiddhā rūpāni passati parittānīti-ādi vuttaṃ, evam avatvā idha catūsupi abhibhāyatanesu ajjhataṃ arūpasaññītāva vutta”ti codanam katvā “ajjhatarūpānam anabhibhavanīyato”ti kāraṇam vatvā “tatha vā idha vā bahiddhā rūpāneva abhibhavitabbāni, tasmā tāni niyamato va vattabbānīti tatrāpi idhāpi vuttāni, ‘ajjhataṃ rūpasaññī’ti idaṃ pana satthu desanāvīlāsamattamevā”ti vuttaṃ.

Ettha ca vaṇṇābhogarahitāni sahitāni ca sabbāni “parittāni suvaṇṇadubbaṇṇānī”ti vuttāni, tathā “appamāṇāni suvaṇṇadubbaṇṇānī”ti. Atthi hi so pariyāyo “parittāni abhibhuyya, tāni ce kadāci vaṇṇavasena ābhujitāni honti suvaṇṇadubbaṇṇāni abhibhuyyā”ti. Pariyāyakathā hi suttantadesanāti. Abhidhamme pana nipariyāyadesanattā vaṇṇābhogarahitāni visum vuttāni, tathā sahitāni. Atthi hi ubhayattha abhibhavanavisesoti, tathā idha pariyāyadesanattā vimokkhānampi abhibhavanapariyāyo atthīti “ajjhataṃ rūpasaññī”ti-ādinā paṭhamadutiya-abhibhāyatanesu paṭhamavimokkho, tatiyacatuttha-abhibhāyatanesu dutiyavimokkho, vaṇṇābhāyatanesu tatiyavimokkho ca abhibhavanappavattito saṅgahito. **Abhidhamme**² pana nipariyāyadesanattā

1. Abhi 1. 55, 64 piṭṭhesu.

2. Abhi 1. 55, 65 piṭṭhesu.

vimokkhābhībhāyatanāni asaṅkarato dassetuṃ vimokkhe vajjetvā abhībhāyatanāni kathitāni. Sabbāni ca vimokkhakiccāni jhānāni vimokkhadesanāyaṃ vuttāni. Tadetam “ajjhattam rūpasaññī”ti āgatassa abhībhāyatanadvayassa abhidhamme abhībhāyatanesu avacanato “rūpī rūpāni passatī”ti-ādīnañca sabbavimokkhakiccasādhāraṇavacanabhāvato vavattānam katanti¹ viññāyati. “Ajjhatarūpānam anabhībhavanīyato”ti idaṃ abhidhamme katthacipi “ajjhattam rūpāni passatī”ti avatvā sabbattha yaṃ vuttam “bahiddhā rūpāni passatī”ti, tassa kāraṇavacanam. Tena yaṃ aññahetukam, tam tena hetunā vuttam. Yaṃ pana desanāvīlāsahetukam ajjhattam arūpasaññītāya eva abhidhamme vacanam, na tassa aññam kāraṇam maggitabbanti dasseti.

Ajjhatarūpānam anabhībhavanīyatā ca tesam bahiddhārūpānam viya avibhūtattā desanāvīlāso ca yathāvuttavavattānavasena vedītabbo veneyyajjhāsavayasena vijjamānapariyāyakathābhāvato. “Suvaṇṇadubbaṇṇāni”ti eteneva siddhattā na nīlādi-abhībhāyatanāni vattabbānīti ce? Tam na, nīlādīsu katādhikārānam nīlādībhāvasseva abhībhavanakāraṇattā. Na hi tesam parisuddhāparisuddhavaṇṇānam parittatā vā appamāṇatā vā abhībhavanakāraṇam, atha kho nīlādībhāvo evāti. Etesu ca parittādikasiṇarūpesu yaṃ yaṃ caritassa imāni abhībhāyatanāni ijhanti, tam dassetuṃ “imesu panā”ti-ādi vuttam. **Sabbasaṅgāhikavasenāti** nīlavaṇṇanīlanidassananīlanībhāsānam sādāraṇavayasena. **Vaṇṇavasenāti** sabhāvavaṇṇavayasena. **Nidassanavasenāti** passitabbatāvasena cakkhuviññādiviññānavīthiyā gahetabbatāvasena. **Obhāsavasenāti** sappabhāsātāya avabhāsavayasena.

Icchāsuttādivaṇṇanā niṭṭhitā.

6. Vimokkhasuttavaṇṇanā

66. Chaṭṭhe² **kenatṭhenāti** kena sabhāvena. Sabhāvo hi ñāṇena yāthāvato araṇīyato ñātabbato “attho”ti vuccati, so

1. Na katanti (Ka)

2. Dī-Ṭī 2. 118 piṭṭhādīsu passitabbam.

eva ttha-kārassa ttha-kāraṃ katvā “aṭṭho”ti vutto. **Adhimuccanaṭṭhenā**ti adhikaṃ savisesaṃ muccanaṭṭhena. Etena satipi sabbassapi rūpāvacaṛajjhānassa vikkhambhanavasena paṭipakkhato vimuttabhāve yena bhāvanāvisesena taṃ jhānaṃ sātisaṃ paṭipakkhato vimuccitvā pavattahi, so bhāvanāviseso dīpito. Bhavati hi samānajātiyuttopi bhāvanāvisesena pavatti-ākāraviseso. Yathā taṃ saddhāvimuttato diṭṭhippattassa, tathā paccanīkadhammehi suṭṭhu vimuttatāya eva aniggahitabhāvena nirāsaṅkatāya abhirativasena suṭṭhu adhimuccanaṭṭhenapi **vimokkho**. Tenāha “**ārammaṇe cā**”ti-ādi. **Ayaṃ panatthoti** ayaṃ adhimuccanaṭṭho **pacchime vimokkhe** nirodhe **natthi**. Kevalo vimuttaṭṭho eva tatha labbhati, taṃ sayameva parato vakkhati.

Rūpīti yenāyaṃ sasantatipariyāpanna rūpena samannāgato, taṃ yassa jhānassa hetubhāvena viṣiṭṭharūpaṃ hoti, yena viṣiṭṭhena rūpena “rūpī”ti vucceyya rūpīsaddassa atisaṃyathadīpanato, tadeva sasantatipariyāpannarūpassa vasena paṭiladdhajjhānaṃ idha paramatthato rūpibhāvasādhakanti daṭṭhabbaṃ. Tenāha “**ajjhattan**”ti-ādi. **Rūpajjhānaṃ rūpaṃ** uttarapadalopena. **Rūpānī**ti panettha purimapadalopo daṭṭhabbo. Tena vuttaṃ “**nīlakasiṇādīni rūpānī**”ti. Rūpe kasiṇarūpe saññā rūpasaññā, sā etassa atthīti rūpasaññī, saññāsīsena jhānaṃ vadati. Tappaṭipakkhena **arūpasaññī**. Tenāha “**ajjhattaṃ na rūpasaññī**”ti-ādi.

Anto-appaṇāyaṃ “**subhan**”ti ābhogo **natthī**ti iminā pubbābhogavasena tathā adhimuttisiyāti dasseti. Evaṃ hettha tathāvattabbaṭṭapatticodanā anavaṭṭhānā¹ hoti. Yasmā suvisuddhesu nīlādīsu vaṇṇakasiṇesu kattha katādhikārānaṃ abhirativasena suṭṭhu adhimuccanaṭṭho sambhavati, tasmā aṭṭhakathayaṃ tathā tatiyo vimokkho saṃvaṇṇito. Yasmā pana mettādivasena pavattamānā bhāvanā satte appaṭikūlato dahanti, te subhato adhimuccitvā pavattati, tasmā **paṭisambhidāmagge**² brahmavihārabhāvanā “**subhavimokkho**”ti vuttā. Tayidaṃ ubhayampi tena tena pariyaṃyena vuttattā na virujjhatīti daṭṭhabbaṃ.

1. Samatthitā (Dī-Ṭī 2. 118 piṭṭhe.)

2. Khu 9. 235 piṭṭhe.

Sabbasoti anavasesato. Na hi catunnaṃ arūpakkhandhānaṃ ekadesopi tattha avasissati. **Vissatṭhattā**ti yathāparicchinnaṃ nirodhitattā. **Uttamo vimokkho nāma** ariyeheva samāpajjitabbato ariyaphalapariyosānattā diṭṭheva dhamme nibbānappattibhāvato ca.

Vimokkhasuttavaṇṇanā niṭṭhitā.

7. Anariyavohārasuttavaṇṇanā

67. Sattame anariyānaṃ lāmakānaṃ vohāro **anariyavohāro**. **Diṭṭhavāditā**ti diṭṭhaṃ mayāti evaṃ vāditā. Evaṃ sesesupi. Ettha ca taṃtaṃsamuṭṭhāpakacetanāvasena attho veditabbo. Tenāha “**yāhi cetanāhi**”ti-ādi.

Anariyavohārasuttavaṇṇanā niṭṭhitā.

9. Parisāsuttavaṇṇanā

69. Navame¹ samāgantabbato, samāgacchatīti vā samāgamo, parisā. Bimbisārappamukho samāgamo **bimbisārasamāgamo**. Sesadvayepi eseva nayo. Bimbisāra -pa- samāgamasadisam khattiyaparisanti yojanā. **Aññesu cakkavālesupi labbhateva** satthu khattiyaparisādi-upasaṅkamaṇaṃ. Ādito tehi saddhiṃ satthu bhāsaṇaṃ² **ālāpo**, kathanappaṭikathanam **sallāpo**. Dhammūpasamhitā pucchāpaṭipucchā **dhammasākacchā**. **Sanṭhānaṃ paṭicca kathitaṃ** sanṭhānapariyāyattā vaṇṇa-saddassa “mahantaṃ hatthirājavaṇṇaṃ abhinimminivā”ti-ādīsu³ viya. **Tesanti** padaṃ ubhayapadāpekkhaṃ “tesampi lakkhaṇasaṅṭhānaṃ viya satthu sarīrasaṅṭhānaṃ tesam kevalam paññāyati evā”ti. Nāpi āmuttamaṇikuṇḍalo bhagavā hotīti yojanā. **Chinnassarā**ti dvidhā bhinnassarā. **Gaggarassarā**ti jajjaritassarā. **Bhāsantaranti** tesam sattānaṃ bhāsāto aññaṃ bhāsaṃ. **Vīmaṃsā**ti cintanā. **Kimatthaṃ -pa- desetī**ti idaṃ nanu attānaṃ jānāpetvā dhamme kathite tesam

1. Dī-Ṭī 2. 158 piṭṭhepi passitabbaṃ. 2. Atthabhāsaṇaṃ (Ka) 3. Saṃ 1. 105 piṭṭhe.

sāṭisayo pasādo hotīti iminā adhippāyena vuttaṃ? Yesaṃ attānaṃ ajānāpetvāva dhamme kathite pasādo hoti, na jānāpetvā, tādise sandhāya sathā tathā karoti. Tattha payojanamāha “**vāsanatthāyā**”ti. **Evam sutopīti** evaṃ aviññātaadesako aviññātāgamanopi suto dhammo attano dhammasudhammatāyeva **anāgate paccayo hoti** suṇantassa.

Parisāsuttavaṇṇanā niṭṭhitā.

10. Bhūmicālasuttavaṇṇanā

70. Dasame¹ **udenayakkhassa cetiyaṭṭhāneti** udenassa nāma yakkhassa āyatanabhāvena iṭṭhakāhi kate mahājanassa cittikataṭṭhāne. **Katavihāro**ti bhagavantaṃ uddissa katavihāro. **Vuccatīti** purimavohārena “udenam cetiyam”ti vuccati. **Gotamakādīsupīti** “gotamakam cetiyam”ti-ādīsupi. **Eseva nayoti** cetiyaṭṭhāne katavihārabhāvaṃ atidisati. Tathā hi **sattambanti** kikissa rañño dhītarō satta kumāriyo saṃvegajātā gehato nikkhamitvā tattha padhānaṃ padahimsu, taṃ ṭhānaṃ “**sattambaṃ cetiyam**”ti vadanti. **Bahuputtakanti** ca bahupāroho eko nigrodharukkho, tasmim adhipattham devataṃ bahū manussā putte patthenti, tadupādāya taṃ ṭhānaṃ “**bahuputtakam cetiyam**”ti paññāyittha. **Sārandadassa** nāma yakkhassa vasitaṭṭhānaṃ, **cāpālassa** nāma yakkhassa vasitaṭṭhānaṃ, iti sabbānevetāni buddhuppādato pubbadevatā pariggahetvā cetiyavohārena voharitāni, bhagavato vihāre katepi tatheva sañjānanti. **Ramaṇīyāti** ettha vesāliya tāva bhūmibhāgasampattiyā sulabhapiṇḍatāya ramaṇīyabhāvo vedītabbo. Vihārānaṃ pana nagarato nātidūratāya naccāsannatāyagamanāgamanasampattiyā anākiṇṇavihāraṭṭhānatāya chāyudakasampattiyā pavivekapatirūpatāya ca ramaṇīyatā daṭṭhabbā.

Vaḍḍhitāti bhāvanāpāripūripasena paribrūhitā. **Punappunam katāti** bhāvanāya bahulīkaraṇena aparāparaṃ pavattitā. **Yuttayānam viya katāti**

1. Dī-Ṭī 2. 148; Saṃ-Ṭī 2. 503 piṭṭhādīsu passitabbaṃ.

yathā yuttamājaññāyānaṃ chekena sārathinā adhiṭṭhitāṃ yathāruci pavattati, evaṃ yathāruci pavattirahataṃ gamitā. **Paṭiṭṭhānaṭṭhenā**ti adhiṭṭhānaṭṭhena. **Vatthu viya katā**ti sabbaso upakkilesavisodhanena iddhivisayatāya¹ paṭiṭṭhānabhāvato suvisodhitaparissayavatthu viya katā. **Adhiṭṭhitā**ti paṭipakkhadūrībhāvato subhāvitabhāvena taṃtaṃadhiṭṭhānayogyatāya ṭhapitā. **Samantato citā**ti sabbabhāgena bhāvanupacayaṃ gamitā. Tenāha “**suvaḍḍhitā**”ti. **Suṭṭhu samāraddhā**ti iddhibhāvanāya sikhāppattiyā sammadeva saṃsevītā.

Aniyamenāti “yassa kassaṭ”ti aniyamavacanena. **Niyametvā**ti “tathāgatassā”ti sarūpadassanena niyametvā. **Āyuppamāṇanti**² paramāyuppamāṇaṃ vadati. Kiṃ panettha paramāyu nāma, kathaṃ vā taṃ paricchinappamāṇanti? Vuccate—yo tesāṃ tesāṃ sattānaṃ tasmim tasmim bhavavisesse purimasiddhabhavapatthanūpanissayavasena sarīrāvayavavaṇṇasaṅghānappamāṇādivisesā viya taṃtaṃgatinikāyādīsu yebhuyyena niyataparicchedo gabbhaseyyakakāmāvacaradevarūpāvacarasattānaṃ sukkasoṇita-utubhojanādi-utu-ādipaccuppannapaccayūpatthambhito vipākappabandhassa ṭhitikālaniyamo, so yathāsakaṃ khaṇamattāvaṭṭhāyīnampi attano sahaṅgātānaṃ rūpārūpadhammānaṃ ṭhapanākāravuttitāya pavattanakāni rūpārūpajīvitindriyāni yasmā na kevalaṃ tesāṃ khaṇaṭṭhitiyā eva kāraṇabhāvena anupālakāni, atha kho yāva bhavaṅgupacchedā anupabandhassa avicchedahetubhāvenapi, tasmā āyuhetukattā kāraṇūpacārena āyu, ukkaṃsaparicchedavasena paramāyūti ca vuccati. Taṃ pana devānaṃ nerayikānaṃ uttarakurukānaṃca niyataparicchedaṃ. Uttarakurukānaṃ pana ekantanityataparicchedameva, avasiṭṭhamanussapetatiracchānānaṃ pana ciraṭṭhitisāmvattanikakamma-bahule kāle taṃkammasahitasantānajanitasukkasōṇitapaccayānaṃ taṃmūlakānaṃca candasūriyasamavisamaparivattanādijanita-utu-āhārādisamavisamapaccayānaṃca vasena cirācirakālato aniyataparicchedaṃ, tassa ca yathā purimasiddhabhavapatthanāvasena taṃtaṃgatinikāyādīsu vaṇṇasaṅghānādivisesaniyamo siddho dassanānussavādīhi, tathā ādito gahaṇasiddhiyā. Evaṃ tāsu tāsu upapattīsu nibbattasattānaṃ yebhuyyena

1. Iddhivisadatāya (Ka) 2. Dī-Ṭī 1. 156; Sī-Ṭī Abhinava 1. 416 piṭṭhesupi passitabbaṃ.

samappamāṇaṭṭhitikālaṃ dassanānussavehi labhitvā taṃparamataṃ
 ajjhosāya pavattitabhavapatthanāvasena ādito paricchedaniyamo veditabbo.
 Yasmā pana kammaṃ tāsū tāsū upapattīsu yathā
 taṃtaṃupapattiniyatavaṇṇādinibbattane samatthaṃ, evaṃ
 niyatāyuparicchedāsu upapattīsu paricchedātikkamena vipākanibbattane
 samatthaṃ na hoti, tasmā vuttaṃ **“tasmim̄ tasmim̄ kāle yaṃ manussānaṃ
 āyuppamāṇaṃ, taṃ paripuṇṇaṃ karonto tiṭṭheyyā”**ti.

Mahāsīvathero pana “mahābodhisattānaṃ carimabhava
 paṭisandhidāyino kammaṃ asaṅkhyeyyāyukatāsaṃvattanasamatthataṃ
 hadaye ṭhapetvā buddhānaṃ āyusaṅkhārassa
 pariṣsayavikkhambhanasamatthataṃ pāḷiyaṃ āgatā evāti imaṃ
 bhaddakappameva tiṭṭhoyyā”ti avoca. **Khaṇḍiccādīhi abhibhuyyati** etena
 yathā iddhibalena jarāya na paṭighāto, evaṃ tena maraṇassapi na paṭighātoti
 atthato āpannamevāti. “Kva saro khitto, kva ca nipatito”ti aññathā
 vuṭṭhitenapi theravādena aṭṭhakathāvacanameva samatthitanti daṭṭhabbaṃ.
 Tenāha **“yo pana vuccati -pa- niyāmitan”**ti.

Oḷārike nimitteti thūle saññuppādane. Thūlasaññuppādanam̄ hetam̄
 “tiṭṭhatu bhagavā kappan”ti sakalam̄ kappam̄ avaṭṭhānayaṇāya, yadidaṃ
 “yassa kassaci ānanda cattāro iddhipādā bhāvitā”ti-ādinā aññāpadesena
 attano caturiddhipādabhāvanānubhāvena kappam̄
 avaṭṭhānasamatthataṃvibhāvanam̄. **Obhāseti** pākaṭavacane¹. Pākaṭavacanam̄
 hetam̄, yadidaṃ pariyāyam̄ muñcitvā ujukameva attano
 adhippāyavibhāvanam̄. **Pariyuṭṭhitacittoti** yathā kiñci atthānattham̄
 sallakkhetum̄ na sakkā, evaṃ abhibhūtacitto. So pana abhibhavo mahatā
 udakoghena appakassa udakassa ajjhottharaṇam̄ viya ahosīti vuttaṃ
“ajjhotthatacitto”ti. **Aññoti** therato, ariyehi vā aññopi yo koci puthujjano.
 Puthujjanaggahaṇaṇcetha yathā sabbena sabbaṃ appahīnavipallāso mārena
 pariyuṭṭhitacitto kiñci atthānattham̄ sallakkhetum̄ na sakkoti, evaṃ thero
 bhagavatā katanimittobhāsam̄ sabbaso na sallakkhesīti dassanattham̄.
 Tenāha **“māro hī”**ti-ādi.

1. Pākaṭavacane (Ka) Udāna-Ṭṭha 295 piṭṭhe pana passitabbaṃ.

Cattāro vipallāsāti asubhe “subhan”ti saññāvipallāso cittavipallāso dukkhe “sukhan”ti saññāvipallāso cittavipallāsoti ime cattāro vipallāsā. **Tenāti** yadipi itare aṭṭha vipallāsā pahīnā, tathāpi yathāvuttānaṃ catunnaṃ vipallāsānaṃ appahīnabhāvena. **Assāti** therassa. **Maddatīti** phusanamattena maddanto viya hoti, aññathā tena maddite sattānaṃ maraṇameva siyā. **Kim sakkhissati**, na sakkhissatīti adhippāyo. Kasmā na sakkhissati, nanu esa aggasāvakkassa kucchiṃ pavitṭhoti? Saccam pavitṭho, tañca kho attano ānubhāvadassanattam, na vibādhanādhippāyena. Vibādhanādhippāyena pana idha “kim sakkhissatī”ti vuttaṃ hadayamaddanassa adhikatattā. **Nimittobhāsanti** ettha “tiṭṭhatu bhagavā kappan”ti sakalakappaṃ avaṭṭhānayaṇāya “yassa kassaci ānanda cattāro iddhipādā bhāvītā”ti-ādinā aññāpadesena attano caturiddhipādabhāvanānubhāvena kappam avaṭṭhānasamatthatāvasena saññuppādanam nimittam. Tathā pana pariyāyam muñcitvā ujukameva attano adhippāyavibhāvanam obhāso. **Jānantoyevāti** mārena pariyuṭṭhitabhāvam jānantoyeva. Attano aparādhahetuto sattānam soko tanuko hoti, na balavāti āha “**dosāropanena sokatanukaraṇattan**”ti. Kim pana thero mārena pariyuṭṭhitacittakāle pavattim pacchā jānātīti? Na jānāti sabhāvena, buddhānubhāvena pana jānāti.

Gaccha tvaṃ ānandāti yasmā divāvihāratthāya idhāgato, tasmā ānanda gaccha tvaṃ yathārucitaṭṭhānam divāvihārāya. Tenāha “**yassa’dāni kālāni maññasī**”ti. **Anatthe niyojento** guṇamāraṇena **māreti**, virāgavibandhanena vā jātinimittatāya tattha tattha jātam mārento viya hotīti “**māretīti māro**”ti vuttaṃ. Ati viya pāpatāya **pāpimā**. Kaṇhadhammehi samannāgato **kaṇho**. Virāgādiguṇānam antakaraṇato **antako**. Sattānam anattāvaham paṭipattim na muñcatīti **namuci**. Attano mārapāsenā pamatte bandhati, pamattā vā bandhū etassāti **pamattabandhu**. Sattamasattāhato param satta ahāni sandhāyāha “**aṭṭhame sattāhe**”ti na pana pallaṅkasattāhādi viya niyatakiccessa aṭṭhamasattāhassa nāma labbhanato. Sattamasattāhassa hi parato

ajapālanigrodhamūle mahābrahmuno sakkassa ca devaraṅṅo paṭiṅṅātadhammadesanaṃ bhagavantaṃ ña tvā “idāni satte dhamma desanāya mama visayaṃ samatikkamāpessatī”ti sañjātađomanasso hutvā ṭhito cintesi “handa dānāhaṃ naṃ upāyena parinibbāpessāmi, evamassa manoratho aññathattaṃ gamissati, mama ca manoratho ijhissatī”ti. Evaṃ pana cintetvā bhagavantaṃ upasaṅkamtivā ekamantaṃ ṭhito “parinibbātu dāni bhante bhagavā”ti-ādinā parinibbānaṃ yāci. Taṃ sandhāya vuttaṃ “**aṭṭhame sattāhe**”ti-ādi. Tattha **ajjāti** āyusaṅkhārossajjanadivasāṃ sandhāyāha. **Bhagavā cassa** atibandhanādhippāyaṃ jānantopi taṃ anāvikatvā parinibbānassa akālabhāvameva pakāsento yācanaṃ **paṭikkhipi**. Tenāha “**na tāvāhan**”ti-ādi.

Maggavasena byattāti saccasampañivedhaveyyattiyena byattā. **Tatheva vinītāti** maggavaseneva kilesānaṃ samucchadavinayena vinītā. **Tathā visāradāti** ariyamaggādhigameneva satthusāsane vesārajappattiyā visāradā, sārājajakarānaṃ diṭṭhivicikicchādipāpadhammānaṃ vigamena visāradabhāvaṃ pattāti attho. Yassa sutassa vasena vaṭṭadukkhato nissaraṇaṃ sambhavati, taṃ idha ukkaṭṭhaniddesena sutanti adhippetanti āha “**tepiṭakavasena**”ti. Tiṇṇaṃ piṭakānaṃ samūho **tepiṭakaṃ**, tīṇi vā piṭakāni tipīṭakaṃ, tipīṭakameva **tepiṭakaṃ**, tassa vasena. **Tamevāti** yaṃ taṃ tepiṭakaṃ sotabbabhāvena “sutan”ti vuttaṃ, tameva. **Dhammanti** pariyaṭṭidhammaṃ. **Dhārentīti** suvaṇṇabhājane pakkhittasīhavasāṃ viya avinassantaṃ katvā suppaṅṇasupavattibhāvena dhārenti hadaye ṭhapenti. Iti pariyaṭṭidhammavasena bahussutadhammadharabhāvaṃ dassetvā idāni paṭivedhadhammavasenapi taṃ dassetuṃ “**atha vā**”ti-ādi vuttaṃ. **Ariyadhammassāti** maggaphaladhammassa, navavidhassapi vā lokuttaradhammassa. **Anudhammabhūtanti** adhigamāya anurūpadhammabhūtaṃ. **Anucchavikkappaṭipadanti** ca tameva vipassanādhammamāha, chabbidhā visuddhiyo vā. **Anudhammanti** tassā yathāvuttappaṭipadāya anurūpaṃ abhisallekhitāṃ appicchatādidhammaṃ. **Carāṇasīlāti** samādāya vattanasīlā. ANumaggaphaladhammo etissāti vā **anudhammā**, vuṭṭhānagāminī vipassanā. Tassā carāṇasīlā. **Attano ācariyavādanti** attano ācariyassa sammāsambuddhassa vādaṃ. Sadevakassa lokassa ācārasikkhāpanena **ācariyo**, bhagavā, tassa vādo, catusaccadesanā.

Ācikkhissantīti ādito kathessanti, attanā uggahitaniyāmena pare ugganḥāpessantīti attho. **Desessantī**ti vācessanti, pāḷim sammā pabodhessantīti attho. **Paññāpessantī**ti pajānāpessanti, saṅkāsessantīti attho. **Paṭṭhapessantī**ti pakārehi ṭhapessanti, pakāsessantīti attho. **Vivarissantī**ti vivaraṇaṃ karissantī. **Vibhajissantī**ti vibhattaṃ karissantī. **Uttānīkarissantī**ti anuttānaṃ gambhīraṃ uttānaṃ pākaṭaṃ karissantī. **Sahadhammenā**ti ettha **dhamma**-saddo kāraṇapariyāyo “hetumhi ñāṇaṃ dhammapaṭṭisambhidā”ti-ādīsu¹ viyāti āha “**sahetukena sakāraṇena vacanenā**”ti. **Sappāṭihāriyanti** sanissaraṇaṃ. Yathā paravādaṃ bhañjivā sakavādo patiṭṭhahati, evaṃ hetudāharaṇehi yathādhiगतamatthaṃ sampādetvā dhammaṃ kathessanti. Tenāha “**niyyānikaṃ katvā dhammaṃ desessantī**”ti, navavidhaṃ lokuttaradhammaṃ pabodhessantīti attho. Ettha ca “paññāpessantī”ti-ādīhi chahi padehi cha atthapadāni dassitāni, ādito pana dvīhi padehi cha byañjanapadāni. Ettāvataṃ teṭṭakāṃ buddhavacanaṃ samvannaṇānāyena saṅgahetvā dassitaṃ hoti. Vuttaṃ hetam **nettiyaṃ**² “dvādasa padāni suttaṃ, tam sabbaṃ byañjanañca attho cā”ti.

Sikkhāttayasaṅgahitanti adhisīlasikkhādisikkhāttayasaṅgahaṃ. **Sakalaṃ sāsanabrahmacariyanti** anavasesaṃ satthusāsanabhūtaṃ seṭṭhacariyaṃ. **Samiddhanti** sammadeva vaḍḍhitaṃ. **Jhānassādavasenā**ti tehi tehi bhikkhūhi samadhigatajjhānasukhavasena. **Vuddhippattanti** uḷārapaṇītabhāvūpagamena sabbaso parivuddhimupagataṃ. **Sabbapāliphullaṃ viya abhiññāsampattivāsena** abhiññāsampadāhi sāsanābhivuddhiyā matthakappattito. **Patiṭṭhitavasenā**ti patiṭṭhānavasena, patiṭṭhappattiyāti attho. Paṭivedhavasena bahuno janassa hitanti **bāhujaññaṃ**. Tenāha “**mahājanābhisamayavasena**”ti. Puthu puthulaṃ bhūtaṃ jātaṃ, puthu vā puthuttaṃ pattanti **puthubhūtaṃ**. Tenāha “**sabbā -pa- pattan**”ti. **Suṭṭhu pakāsītanti** suṭṭhu sammadeva ādikalyāṇādibhāvena paveditaṃ.

Satiṃ sūpaṭṭhitaṃ katvāti ayaṃ kāyādivibhāgo attabhāvasaṅgāto dukkhabhāro mayā ettakaṃ kālāṃ vahito, idāni pana na vahitabbo, etassa avahanatthaṃ hi cirataraṃ kālāṃ ariyamaggasambhāro sambhato, svāyaṃ ariyamaggo paṭividdho, yato ime kāyādayo

1. Abhi 2. 307 piṭṭhe.

2. Khu 10. 1 piṭṭhe.

asubhādito sabhāvādito sammadeva pariññātāti catubbidhampi sammāsatiṃ yathātathaṃ visaye suṭṭhu upaṭṭhitaṃ katvā. **Ñāṇena paricchinditvāti** imassa attabhāvasaññitassa dukkhabhāraṃsa vahane payoṇabhūtaṃ attahitaṃ tāva bodhimūle eva parisamāpitaṃ, parahitaṃ pana buddhavyavahāraṃ parisamāpitaṃ, taṃ idāni māsattayeneva parisamāpanaṃ pāpuṇissati, ahampi visākhāpuṇṇamāyaṃ parinibbāyissāmīti evaṃ buddhañāṇena paricchinditvā sabbabhāgeṇa nicchayaṃ katvā. **Āyusaṅkhāraṃ vissajjīti** āyuno jīvitassa abhisaṅkhāraṃ phalasaṃpattidhammaṃ na samāpajjissāmīti vissajji, taṃvissajja naneva tena abhisaṅkharīyamānaṃ jīvitasāṅkhāraṃ “na pavattessāmī”ti vissajji. Tenāha **“tatthā”**ti-ādi.

Ṭhānamahantatāyapi pavatti-ākāramahantatāyapi **mahanto pathavīkampo**. Tattha ṭhānamahantatāya bhūmicālassa mahantattaṃ dassetuṃ **“tadākira -pa- kampitthā”**ti vuttaṃ. Sā pana jātikkhettabhūtaṃ dasasahassī lokadhātu eva, na yā kāci. Yā mahābhinihāramahābhijāti-ādīsūpi kampittha, tadāpi tattikāya eva kampane kimkāraṇaṃ? Jātikkhettabhāvena tasseva ādīto pariggahassa katattā, pariggahakaraṇaṃ cassa dhammatāvasena veditaṃ. Tathā hi purimabuddhānampi tāvattakameva jātikkhettaṃ ahoṣi. Tathā hi vuttaṃ “dasasahassī lokadhātu, nissaddā hoti nirākulā -pa- mahāsamuddo ābhujati, dasasahassī pakampatī”ti ca ādi¹. Udakapariyantaṃ katvā chappakārapavedhanena avītarāge bhimsēti bhimsano, so eva **bhimsanakoti** āha **“bhayajanako”**ti. **Devabheriyoti** devadundubhisaddassa pariyāvacanamattaṃ. Na cettha kāci bherī “dundubhī”ti adhippetā, atha kho uppātabhāvena labbhamāno ākāśagato nigghosāsaddo. Tenāha **“devo”**ti-ādi. **Devoti** megho. Tassa hi gajjabhāvena ākāśassa vassābhāvena sukkhagajjitasaññite sadde niccharante devadundubhisamaññā. Tenāha **“devo sukkhagajjitaṃ gajji”**ti.

Pītivegavissatṭhanti “evaṃ cirataraṃ kālaṃ vahito ayaṃ attabhāvasaññito dukkhabhāro, idāni na cirasseva nikkhipissāmī”ti sañjātasomanasso bhagavā sabhāveneva pītivegavissatṭhaṃ udānaṃ udānesi.

1. Khu 4. 313 piṭṭhe Buddhavaṃse.

Evam̐ pana udānenta ayampi attho sādhitō hotīti dassanattam̐
aṭṭhakathāyaṃ “**kasmā**”ti-ādi vuttam̐.

Tulīyatīti **tulanti** tula-saddo kammaśādhānoti dassetuṃ “**tulitan**”ti-ādi
vuttam̐. Appānubhāvātāya **paricchinnam̐**. Tathā hi tam̐ parito
khaṇḍitabhāvena “parittan”ti vuccati. Paṭipakkhāvikkhambhanato
dīghasantānatāya vipulaphalatāya ca **na tulam̐** na paricchinnam̐. Yehi
kāraṇehi pubbe avisesato mahaggatam̐ “atulan”ti vuttam̐, tāni kāraṇāni
rūpāvacarato arūpassa sātisayāni vijjantīti arūpāvacarām̐ “atulan”ti vuttam̐
itaraṇca “tulan”ti. **Appavipākanti** tīsupi kammesu yaṃ tanuvipākam̐ hīnam̐,
tam̐ tulam̐. **Bahuvipākanti** yaṃ mahāvipākam̐ paṇītam̐, tam̐ atulam̐. Yaṃ
panettha majjhimam̐, tam̐ hīnam̐ ukkaṭṭhanti dvidhā bhinditvā dvīsupi
bhāgesu pakkhipitabbaṃ. Hīnattikavaṇṇanāyaṃ¹ vuttanayena vā
appabahuvipākataṃ niddhāretvā tassa vasena tulātulabhāvo vedītabbo.
Sambhavati etasmāti **sambhavoti** āha “**sambhavahetubhūtan**”ti.
Niyakajjhataratoti sasantānadhāmmesu vipassanāvasena gocarāsevanāya ca
nirato. Savipākampi samānam̐ pavattivipākamattadāyikammaṃ
savipākāṭṭhena sambhavam̐, na ca tam̐ kāmādibhavābhisaṅkhārakanti tato
visesanattam̐ “sambhavan”ti vatvā “**bhava saṅkhāran**”ti vuttam̐. **Ossajīti**
ariyamaggena avassajji. **Kavacam̐ viya** attabhāvam̐ pariyonandhitvā ṭhitam̐
attani sambhūtattā **attasambhavam̐** kilesaṇca abhindīti
kilesabhedasahbhāvikkammossajjanam̐ dassento tadubhayassa
kāraṇamavoca “**ajjhatarato samāhito**”ti.

Paṭhamavikappe avasajjanameva vuttam̐, ettha avasajjanākāroti tam̐
dassento “**atha vā**”ti-ādimāha. Tattha **tīrentoti** “uppādo bhayaṃ, anuppādo
kheman”ti-ādinā² vīmaṃsanto. “**Tulento tīrento**”ti-ādinā saṅkhepato
vuttamattham̐ vitthārato dassetuṃ “**pañcakkhandhā**”ti-ādim̐ vatvā
bhavasāṅkhārassa avasajjanākāram̐ sarūpato dasseti. **Evanti**-ādinā pana
udānagāthāvaṇṇanāyaṃ ādito vuttamattham̐ nigamavasena dasseti.

Yanti³ karaṇe, adhikaraṇe vā paccattavacananti āha “**yena samayena,**
yasmim̐ vā samaye”ti. **Ukkhepakavātāti** udakasandhārakavātāṃ
upacchinditvā

1. Abhi-Ṭṭha 1. 87 piṭṭhe.

2. Khu 9. 13 piṭṭhe Paṭisambhidāmagge.

3. Dī-Ṭṭi 2. 154 piṭṭhādīsū passitabbaṃ.

ṭhitaṭṭhānato khepakavātā. **Saṭṭhi -pa- bahalanti** idaṃ tassa vātassa ubbedhappamāṇameva gahetvā vuttaṃ, āyāmaṅgāro pana dasasahassacakkavāḷappamāṇaṃ koṭṭisahasassacakkavāḷappamāṇampi¹ udakasandhārakavātaṃ upacchindatiyeva. **Ākāseti** pubbe vātena patiṭṭhitākāse. **Puna vātoti** ukkhepakavāte tathā katvā vigate udakasandhārakavāto puna **ābandhitvā gaṇhāti**, yathā taṃ udakaṃ na bhassati, evaṃ upatthambhentaṃ ābandhanavitānavasena bandhitvā gaṇhāti. **Tato udakaṃ uggacchatīti** tato ābandhitvā gahaṇato tena vātena uṭṭhāpitam udakaṃ uggacchati upari gacchati. **Hotiyevāti** antarantarā hotiyeva. **Bahubhāvenāti** mahāpathaviyā mahantabhāvena. Sakalā hi mahāpathavī tadā oggacchati ca uggacchati ca, tasmā kampanaṃ na paññāyati.

Ijghanassāti icchitatthasijghanassa anubhavitabbassa issariyasampatti-ādikassa. **Parittāti** paṭiladdhamattā nāṭisubhāvitā. Tathā ca bhāvanā balavatī na hotīti āha “**dubbalā**”ti. Saññāsīsena hi bhāvanā vuttā. **Appamāṇāti** paguṇā subhāvitā. Sā hi thirā dalhatarā hotīti āha “**balavā**”ti. “**Parittā pathavīsāññā, appamāṇā āposāññā**”ti desanāmettaṃ, āposāññāya pana subhāvitāya pathavīkampā sukheva ijhatīti ayamettha adhippāyo veditabbo. **Samvejento vā** dibbasampattiyā pamattaṃ sakkāṃ devarājānaṃ, **vīmaṃsanto vā** tāvadeva samadhigataṃ attano iddhibalaṃ. So kirāyasmā² khuragge arahattaṃ patvā cintesi “atthi nu kho koci bhikkhu yena pabbajitadvaseyeva arahattaṃ patvā vejayanto pāsādo kampitapubbo”ti. Tato “natthi koci”ti nītvā “ahaṃ kampessāmī”ti abhiññābalena vejayantamatthake ṭhatvā pādena paharivā kompetuṃ nāsakkhi. Atha naṃ sakkassa nāṭakīthiyo āhamsu “putta Saṃgharakkhita tvaṃ pūṭigandheneva sīsena vejayantaṃ kompetuṃ icchasi, suppatiṭṭhito tāta pāsādo, kathaṃ kompetuṃ sakkhissasī”ti.

Sāmaṇero “imā devatā mayā saddhim keḷim karonti, ahaṃ kho pana ācariyaṃ nālatthaṃ, kahaṃ nu kho me ācariyo sāmuddikamahānāgattthero”ti āvajjtvā “mahāsamudde udakaleṇaṃ māpetvā

1. Idaṃ padaṃ Dī-Ṭī 2. 154 piṭṭhe natthi. 2. Dī-Ṭīha 2. 148 piṭṭhādīsu passitabbaṃ.

divāvihāraṃ nisinno”ti ñatvā tattha gantvā therāṃ vanditvā aṭṭhāsi. Tato naṃ thero “tāta Saṃgharakkhita asikkhitvāva yuddhaṃ pavittḥosi”ti vatvā “nāsakkhi tāta vejyantāṃ kampetun”ti pucchi. Ācariyaṃ bhante nālatthanti. Atha naṃ thero “tāta tumhādisse akampente añño ko kappessati, diṭṭhapubbaṃ te tāta udakapiṭṭhe gomayakhaṇḍaṃ pilavantaṃ, tāta kapallapūvaṃ paccantaṃ antantena paricchinnanti iminā opammaṇa jānāhi”ti āha. So “vaṭṭissati bhante ettakenā”ti vatvā “pāsādena patiṭṭhitokāsaṃ udakaṃ hotū”ti adhiṭṭhāya vejyantābhimukho agamāsi. Devadhītaṃ taṃ disvā “ekavāraṃ lajjitvā gato, punapi sāmaṇero eti, punapi eti”ti vadimsu. Sakko devarājā “mā mayhaṃ puttana saddhim kathayittha, idāni tena ācariyo laddho khaṇena pāsādaṃ kappessati”ti āha. Sāmaṇeropi pādaṅguṭṭhena pāsādathūpikaṃ pahari, pāsādo catūhi disāhi oṇamati. Devatā “patiṭṭhātum dehi tāta pāsādassa, patiṭṭhātum dehi tāta pāsādassā”ti viravimsu. Sāmaṇero pāsādaṃ yathāṭṭhāne ṭhapetvā pāsādamatthake ṭhatvā udānaṃ udānesi—

“Ajjevāhaṃ pabbajito, ajja pattāsavakkhayaṃ.

Ajja kampemi pāsādaṃ, aho buddhassuḷāratā.

Ajjevāhaṃ pabbajito -pa- aho dhammassuḷāratā.

Ajjevāhaṃ pabbajito -pa- aho saṃghassuḷāratā”ti.

“Dhammatā esā bhikkhave, yadā bodhisatto tusitakāyā cavitvā mātukucchim okkamati”ti¹ vatvā “ayaṅca dasasahassī lokadhātu saṅkampi sampakampi sampavedhī”ti¹, tathā “dhammatā esā bhikkhave, yadā bodhisatto mātukucchimhā nikkhamati”ti² vatvā “ayaṅca dasasahassī lokadhātu saṅkampi sampakampi sampavedhī”ti² ca mahāsattassa gabbhokkantiyaṃ abhijātiṅca dhammatāvasena mahāpadāne pathavīkampassa vuttattā itaresupī catūsu ṭhānesu pathavīkampe dhammatāvasenevāti atthato vuttametanti daṭṭhabbaṃ.

1. Dī 2. 10 piṭṭhe.

2. Dī 2. 13 piṭṭhe.

Idāni nesam pathavīkampāna kāraṇato pavatti-ākārato ca vibhāgaṃ dassetuṃ “**iti imesū**”ti-ādi vuttaṃ. **Dhātukopenā**ti ukkhepakavātasāṅkhātāya vāyodhātuyā pakopena. **Iddhānubhāvenā**ti nāṇiddhiyā, kammavipākajiddhiyā vā sabhāvena, tejenāti attho. **Puññatejenā**ti puññānubhāvena, mahābodhisattassa puññabalenāti attho. **Nāṇatejenā**ti anaññasādhāraṇena paṭivedhañāṇānubhāvena. **Sādhukāradānavasenā**ti yathā anaññasādhāraṇappaṭivedhañāṇānubhāvena abhihatā mahāpathavī abhisambodhiyaṃ kampittha, evaṃ anaññasādhāraṇena desanāñāṇānubhāvena abhihatā mahāpathavī kampittha, taṃ panassā sādhukāradānaṃ viya hotīti “sādhukāradānavasenā”ti vuttaṃ.

Yena pana bhagavā asīti-
anubyañjanappaṭiṃṇāḍḍhādvattimśamahāpurisalakkhaṇavicitrarūpakāyo sabbākāraparisuddhasīlakkhandhādiguṇaratanasamiddhidhammakāyo puññamahattathāmamahatta-iddhimahattayasamahattapaññāmahattānaṃ paramukkaṃsagato asamo asamasamo appaṭipuggalo araham̐ sammāsambuddho attano attabhāvasaññitaṃ khandhapañcakaṃ kappam̐ vā kappāvasesam̐ vā ṭhapetuṃ samatthopi saṅkhataḍḍhammaparijigucchanākārappavattena nāṇavisesena tiṇāyapi amaññamāno āyusaṅkhārossajjanavidhinā nirapekkho ossajji. Tadanubhāvābhihatā mahāpathavī āyusaṅkhārossajjane akam pittha. Taṃ panassā kāruññasabhāvasaṅṭhitā viya hotīti vuttaṃ “**kāruññābhāvenā**”ti.

Yasmā bhagavā parinibbānasamaye catuvīsati koṭīsatasaḥsasāṅkhā samāpattiyo samāpajji, antarantarā phalasaṃpattisaṃpajjanena tassa pubbabhāge sātisaṃyam̐ tikkham̐ sūram̐ vipassanāñāṇaṅca pavattesi. “yadatthaṅca mayā evaṃ sucirakālam̐ anaññasādhāraṇo paramukkaṃsagato nāṇasaṃbhāro sambhato, anuttaro ca vimokkho samadhigato, tassa vata me sikhāpattaphalabhūtā accantaniṭṭhā anupādisesaparinibbānadhātu ajja samijjhatī”ti bhīyo ativiya somanassappattassa bhagavato pītivipphārādiguṇavipulatarānubhāvo parehi asādhāraṇaṅñāṇāṅtisayo udapādi, yassa samāpattibalasaṃpabrūhitassa nāṇāṅtisayassa ānubhāvaṃ sandhāya idaṃ vuttaṃ “dveme piṇḍapātā samasaṃpattā samasaṃpattā”ti

ādi¹, tasmā tassānubhāvena samabhihatā mahāpathavī akampittha, taṃ panassā tassam velāyaṃ ārodanākārappatti viya hotīti “**aṭṭhamo ārodanenā**”ti vuttam.

Idāni saṅkhepato vuttamattham vivaranto “**mātukucchim okkamante**”ti-ādimāha. **Ayam panatthoti** “sādhukāradānavasenā”ti-ādinā vutta-attho. **Pathavīdevatāya vasenāti** ettha samuddadevatā viya mahāpathaviyā adhidevatā kira nāma atthi, tādise kāraṇe sati tassā cittavasena ayam mahāpathavī saṅkampati sampakampati sampavedhati. Yathā vātavalāhakadevatānam cittavasena vātā vāyanti, sītuṅha-abbhavassavalāhakadevatānam cittavasena sītādayo bhavanti, tathā hi visākhapuṇṇamāyaṃ abhisambodhi-attham bodhirukkhamūle nisinnassa lokanāthassa antarāyakaṛaṇattham upaṭṭhitam mārabalam vidhamitum—

“Acetanāyaṃ pathavī, aviññāya sukham dukham.

Sāpi dānabalā mayham, sattakkhattum pakampathā”ti².

Vacanasamanantaram mahāpathavī bhijjivā saporisam māram parivattesi. **Etanti** sādhukāradānādi. Yadi pi natthi acetanattā, dhammatāvasena pana vuttanayena siyāti sakkā vuttam. Dhammatā pana atthato dhammabhāvo, so puññadhammassa vā ñāṇadhammassa vā ānubhāvasabhāvoti. Tayidaṃ sabbam vicāritameva. Evañca katvā—

“Ime dhamme sammasato, sabhāvasarasalakkhaṇe.

Dhammatejena vasudhā, dasasahassī pakampathā”ti³—

ādivacanañca samatthitam hoti.

Ayam pana⁴ mahāpathavī aparesupi aṭṭhasu ṭhānesu akampittha mahābhinnikkhamane bodhimaṇḍūpasaṅkamane paṃsukūlaggahaṇe paṃsukūladhovane kālakārāmasutte gotamakasutte vessantarajātake brahmajāleti. Tattha mahābhinnikkhamanabodhimaṇḍūpasaṅkamanesu vīriyabalena akampittha. Paṃsu kūlaggahaṇe “dvisahassadīpaparivāre nāma cattāro mahādīpe pahāya pabbajivā susānam gantvā paṃsukūlam gaṇhantena dukkaram

1. Khu 1. 182, 183 piṭṭhesu.

3. Khu 4. 319 piṭṭhe Buddhavaṃse.

2. Khu 4. 396 piṭṭhe Cariyāpiṭake.

4. Dī-Ṭṭha 1. 120 piṭṭhepi passitabban.

bhagavatā katan”ti acchariyavegābhihatā akampittha.

Paṃsukūladhovanavessantaraajātakesu akālakampanena akampittha.

Kālakārāma¹ **gotamakassuttesu**² “ahaṃ sakkhī bhagavā”ti sakkhibhāvena akampittha. **Brahmajāle**³ pana dvāsaṭṭhiyā diṭṭhigatesu vijaṭetvā niggumbaṃ katvā desiyamānesu sādhu-kāradānavasena akampitthāti veditabbā.

Na kevalañca etesuyeva ṭhānesu pathavī akampittha, atha kho tīsu saṅgahesupi mahāmahindattherassa imaṃ dīpaṃ āgantvā jotivane nisīditvā dhammaṃ desitadvasepi akampittha. Kalyāṇiyamahāvihāre ca piṇḍapātiyattherassa cetiyaṅgaṇaṃ sammajjitvā tattheva nisīditvā buddhārammaṇaṃ pītiṃ gahetvā imaṃ suttantaṃ āradhassa suttapariyosāne udakapariyantaṃ katvā akampittha. Lohapāsādassa pācīna-ambalaṭṭhikaṭṭhānaṃ nāma ahosi, tattha nisīditvā dīghabhāṇakattherā brahmajālasuttaṃ ārabhīmsu. Tesāṃ sajjhāyapariyosānepi udakapariyantameva katvā pathavī akampittha.

Yadi evaṃ “aṭṭhime ānanda hetū aṭṭha paccayā mahato bhūmicālassa pātubhāvāyā”ti kasmā aṭṭheva hetū vuttāti? Niyamahetubhāvato. Imeyeva hi aṭṭha hetū niyamanti, nāññe. Te hi kadāci sambhavantīti aniyamabhāvato na gaṇitā. Vuttaṃ hetāṃ nāgasenattherena **milindapañhe**⁴—

“Aṭṭhime bhikkhave hetū aṭṭha paccayā mahato bhūmicālassa pātubhāvāyāti. Yaṃ vessantarena raññā mahādāne dīyamāne sattakkhattuṃ mahāpathavī kampitā, tañca pana akālikaṃ kadācuppattikaṃ aṭṭhahi hetūhi vippamuttaṃ, tasmā agaṇitaṃ aṭṭhahi hetūhi.

Yathā mahārāja loke tayoyeva meghā gaṇīyanti vassiko hemantiko pāvusakoti. Yadi te muñcitvā añño megho pavassati, na so megho gaṇīyati sammatehi meghehi, akālameghotveva saṅkhaṃ gacchati, evameva kho mahārāja vessantarena raññā mahādāne

1. Am 1. 333 piṭṭhe.

3. Dī 1. 1, 43 piṭṭhesu.

2. Am 1. 280 piṭṭhe.

4. Khu 11. 119 piṭṭhe.

dīyamāne yaṃ sattakkhattuṃ mahāpathavī kampitā, akālikam etaṃ kadācuppattikam aṭṭhahi hetūhi vippamuttam, na taṃ gaṇīyati aṭṭhahi hetūhi.

Yathā vā pana mahārāja himavantā pabbatā pañca nadisatāni sandanti, tesam mahārāja pañcannaṃ nadisatānaṃ daseva nadiyo nadigaṇanāya gaṇīyanti. Seyyathidaṃ? Gaṅgā yamunā aciravatī sarabhū mahī sindhu sarassatī vetravatī vītaṃsā candabhāgāti. Avasesā nadiyo nadigaṇanāya agaṇitā. Kim kāraṇā? na tā nadiyo dhuvasalilā, evameva kho mahārāja vessantarena raññā mahādāne dīyamāne yaṃ sattakkhattuṃ mahāpathavī kampitā, akālikam etaṃ kadācuppattikam aṭṭhahi hetūhi vippamuttam, na taṃ gaṇīyati aṭṭhahi hetūhi.

Yathā vā pana mahārāja rañño satampi dvisatampi tisatampi amaccā honti, tesam chayeva janā amaccagaṇanāya gaṇīyanti. Seyyathidaṃ? Senāpati purohito akkhadasso bhaṇḍāgāriko chattaggāhako khaggaggāhako, eteyeva amaccagaṇanāya gaṇīyanti. Kimkāraṇā? Yuttattā rājaguṇehi. Avasesā agaṇitā, sabbe amaccātveva saṅkham gacchanti, evameva kho mahārāja vessantarena raññā mahādāne dīyamāne yaṃ sattakkhattuṃ mahāpathavī kampitā, akālikam etaṃ kadācuppattikam aṭṭhahi hetūhi vippamuttam, na taṃ gaṇīyati aṭṭhahi hetūhi”ti.

Bhūmicālasuttavaṇṇanā niṭṭhitā.

Cāpālavaggavaṇṇanā niṭṭhitā.

(8) 3. Yamakavagga

1. Saddhāsuttādivaṇṇanā

71-80. Aṭṭhamassa paṭhamādīni uttānatthāneva. Dasame kucchitam sīdatīti **kusīto** da-kārassa ta-kāram katvā. Yassa dhammassa

vasena puggalo “kusīto”ti vuccati, so kusitabhāvo idha kusita-saddena vutto. Vināpi hi bhāvajotanasaddaṃ bhāvattho viññāyati yathā “paṭassa sukkan”ti, tasmā kusitabhāvavattthūnīti attho. Tenāha “**kosajjakāraṇānīti attho**”ti. Kammaṃ nāma samaṇasārappaṃ idisanti āha “**cīvaravicāraṇādī**”ti. **Vīriyanti** padhānavīriyaṃ. Taṃ pana caṅkamanavasena karaṇe kāyikantipi vattabbataṃ labhatīti āha “**duvidhampī**”ti. **Pattiyāti** pāpuṇanattham. **Osīdananti** bhāvanānuyoge saṅkoco. Māsehi ācītaṃ nicītaṃ viyāti **māsācītaṃ**, taṃ maññe. Yasmā māsā tintā visesena garukā honti, tasmā “**yathā tintamāso**”ti-ādi vuttaṃ. **Vuṭṭhito hoti** gilānabhāvāti adhippāyo.

Tesanti ārambhavatthūnaṃ. **Imināva nāyena** iminā kusītavattthūsu vutteneva nāyena “duvidhampi vīriyaṃ ārabhatī”ti-ādinā. **Idaṃ paṭhamanti** “idaṃ handāhaṃ vīriyaṃ ārabhāmi”ti, “evaṃ bhāvanāya abbhussahaṇaṃ paṭhamam ārambhavatthū”ti-ādinā ca attho veditabbo. Yathā tathā paṭhamam pavattaṃ abbhussahaṇaṃ hi upari vīriyārambhassa kāraṇam hoti. Anurūpapaccavekkhaṇasahitāni hi abbhussahaṇāni tammūlakāni vā paccavekkhaṇāni aṭṭha ārambhavatthūnīti veditabbāni.

Saddhāsuttādivaṇṇanā niṭṭhitā.

Yamakavaggavaṇṇanā niṭṭhitā.

81-626. Sesam uttānameva.

**Iti manorathapūraṇiyā aṅguttaranikāyaṭṭhakathāya
Aṭṭhakanipātavaṇṇanāya anuttānatthadīpanā samattā.**

Navakanipāta

1. Paṭhamapaṇṇāsaka

1. Sambodhivagga

1. Sambodhisuttādivaṇṇanā

1-2. Navakanipātassa paṭhamadutiyesu natthi vattabban̄.

3. Meghiyasuttavaṇṇanā

3. Tatiye¹ **meghiyoti** tassa therassa nāmaṃ. **Upaṭṭhāko hotīti** paricārako hoti. Bhagavato hi paṭhamabodhiyaṃ upaṭṭhākā anibaddhā ahesuṃ. Ekadā nāgasamalo, ekadā nāgito, ekadā upavāṇo, ekadā sunakkhatto, ekadā cundo samaṇuddeso, ekadā sāgato, ekadā meghiyo, tadāpi meghiyattherova upaṭṭhāko hoti. Tenāha “**tena kho pana samayena āyasmā meghiyo bhagavato upaṭṭhāko hotī**”ti.

Kimikāḷāyāti kālakimīnaṃ bahulatāya “kimikāḷā”ti laddhanāmāya nadiyā. **Jaṅghāvihāranti** ciranisajjāya jaṅghāsu uppannakilamathavinodanattaṃ vicaraṇaṃ. **Pāsādikanti** aviraḷarukkhatāya siniddhapattatāya ca passantānaṃ pasādaṃ āvahaṭīti pāsādikaṃ. Sandacchāyatāya manuññabhūmibhāgatāya ca anto pavīṭṭhānaṃ pītisomanassajanaṇaṭṭhena cittaṃ rametīti **ramaṇīyaṃ**. **Alanti** pariyattaṃ, yuttantipi attho. **Padhānatthikassāti** padhānena bhāvanānuyogena atthikassa. Yasmā so padhānakamme yutto padhānakammiko nāma hoti, tasmā vuttaṃ “**padhānakammikassā**”ti. **Āgaccheyyāhanti** āgaccheyyaṃ ahaṃ. Thereṇa kira pubbe taṃ ṭhānaṃ anuppaṭṭipāṭiyā pañca jāṭisatāni raññā eva satā anubhūtapubbaṃ uyyānaṃ ahosi, tenassa diṭṭhamatteyeva tattha viharitum cittaṃ nami.

1. Udāna-Ṭṭha 196 piṭṭhādīsupi passitabban̄.

Yāva aññoṇopi koci bhikkhu āgacchatīti añño kocipi bhikkhu mama santikaṃ yāva āgacchati, tāva āgamehīti attho. “Koci bhikkhu dissatī”tipi pāṭho, “āgacchatū”tipi paṭhanti, tathā “dissatū”tipi. **Natthi kiñci uttari karaṇīyanti** catūsu saccesu catūhi maggehi pariññādīnaṃ soḷasannaṃ kiccānaṃ katattā abhisambodhiyā vā adhigatattā tato aññaṃ uttari karaṇīyaṃ nāma natthi. **Catūsu saccesu catunnaṃ kiccānaṃ katattāti** idaṃ pana maggavasena labbhamānaṃ bhedaṃ anupekkhitvā vuttaṃ. **Atthi katassa paṭicayoti** mayhaṃ santāne nipphāditassa sīlādiddhammassa ariyamaggassa anadhigatattā tadatthaṃ puna vaḍḍhanasāṅkhāto paṭicayo atthi, icchitabboti attho.

Tividhanāṭakaparivāroti mahantitthiyo majjhimitthiyo atitaruṇitthiyoti evaṃ vadhūkaṃ mārikakaññāvattathāhi tividhāhi nāṭakitthīhi parivuto. **Akusalavitakkehīti** yathāvuttehi kāmavitakkādīhi. Apare pana “tasmim vanasaṇḍe pupphaphalapallavādīsu lobhavasena kāmavitakko, kharassarānaṃ pakkhi-ādīnaṃ saddassavanena byāpādavitakko, leḍḍu-ādīhi tesam viheṭhanādhippāyena vihiṃsāvitakko. ‘Idhevāhaṃ vaseyyan’ti tattha sāpekkhatāvasena vā kāmavitakko, vanacarake tattha tattha disvā tesu cittadubbhanena byāpādavitakko, tesam viheṭhanādhippāyena vihiṃsāvitakko tassa uppajjati”ti vadanti. Yathā tathā vā tassa micchāvitakkappavattiyeva acchariyakāraṇaṃ. **Acchariyaṃ vata bhoti** garaṇaṇacchariyaṃ nāma kiretaṃ. Yathā āyasmā ānando bhagavato valiyagattaṃ disvā avoca “acchariyaṃ bhante abbhutaṃ bhante”ti¹. **Samparivāritāti** vokiṇṇā. Attani garumhi ca ekattepi bahuvacanaṃ dissati. “Anvāsatto”tipi pāṭho. Kasmā panassa bhagavā tattha gamanaṃ anujāni? “Ananuññātopi cāyaṃ maṃ ohāya gacchissateva, paricārakāmatāya maññe bhagavā gantuṃ na detīti cassa siyā aññathattaṃ, tadassa dīgharattaṃ ahitāya dukkhāya saṃvatteyyā”ti anujāni.

Evaṃ tasmim attano pavattiṃ ārocetvā nisinne athassa bhagavā sappāyadhammaṃ desento “**aparipakkāya meghiya cetovimuttiyā**”ti-ādimāha. Tattha “**aparipakkāyā**”ti paripākaṃ appattāya.

1. Saṃ 3. 190 piṭṭhe.

Cetovimuttiyāti kilesehi cetaso vimuttiyā. Pubbabhāge hi tadaṅgavasena ceva vikkhambhanavasena ca cetaso vimutti hoti, aparabhāge samucchadavasena ceva paṭippassaddhivasena ca. Sāyaṃ vimutti heṭṭhā vitthārato kathitāva, tasmā tattha vuttanayena veditabbā. Tattha vimutti-paripācanīyehi dhammehi āsaye paripācīte sodhite vipassanāya maggagabbhaṃ gaṇhantiyā paripākāṃ gacchantiyā cetovimutti paripakkā nāma hoti, tadabhāve aparipakkā.

Katame pana vimutti-paripācanīyā dhammā? Saddhindriyādīnaṃ visuddhikaraṇavasena pannarasa dhammā veditabbā. Vuttaṃ hetam—

“Assaddhe puggale parivajjayato, saddhe puggale sevato bhajato payirupāsato, pasādanīye suttante paccavekkhato imehi tīhākārehi saddhindriyaṃ visujjhati.

Kusīte puggale parivajjayato, āraddhavīriye puggale sevato bhajato payirupāsato, sammappadhāne paccavekkhato imehi tīhākārehi vīriyindriyaṃ visujjhati.

Muṭṭhassatī puggale parivajjayato, upaṭṭhitassatī puggale sevato bhajato payirupāsato, satipaṭṭhāne paccavekkhato imehi tīhākārehi satindriyaṃ visujjhati.

Asamāhite puggale parivajjayato, samāhite puggale sevato bhajato payirupāsato, jhānavimokkhe paccavekkhato imehi tīhākārehi samādhindriyaṃ visujjhati.

Duppañṇe puggale parivajjayato, pañṇavante puggale sevato bhajato payirupāsato, gambhīrañṇācariyaṃ paccavekkhato imehi tīhākārehi pañṇindriyaṃ visujjhati.

Iti ime pañca puggale parivajjayato, pañca puggale sevato bhajato payirupāsato, pañca suttante paccavekkhato imehi pannarasahi ākārehi imāni pañcīndriyāni visujjhanti”¹.

1. Khu 9. 198 piṭṭhe Paṭisambhidāmagge.

Aparehipi pannarasahi ākārehi imāni pañcindriyāni visujjhanti. Aparepi pannarasa dhammā vimuttiparipācanīyā. Saddhāpañcamāni indriyāni, aniccasaññā anicce dukkhasaññā dukkhe anattasaññā pahānasaññā virāgasaññāti imā pañca nibbedhabhāgiyā saññā, kalyāṇamittatā, sīlasaṃvaro, abhisallekhatā, vīriyārambho, nibbedhikapāññāti. Tesu veneyyadamanakusalo satthā veneyyassa meghiyattherassa ajjhāsayavasena idha kalyāṇamittatādayo vimuttiparipācanīye dhamme dassento “**pañca dhammā paripakkāya saṃvattanti**”ti vatvā te vitthārento “**idha meghiya bhikkhu kalyāṇamitto hoti**”ti-ādimāha.

Tattha **kalyāṇamittoti** kalyāṇo bhaddo sundaro mitto etassāti kalyāṇamitto. Yassa sīlādiguṇasampanno “aghasa tātā hitassa vidhātā”ti evaṃ sabbākārena upakāro mitto hoti, so puggalo kalyāṇamittova. Yathāvutthehi kalyāṇapuggaleheva sabbiriyāpathesu saha ayati pavattati, na vinā tehīti **kalyāṇasahāyo**. Kalyāṇapuggalesu eva cittena ceva kāyena ca ninnapoṇapabbhārahāvena pavattatīti **kalyāṇasampavaṅko**. Padattayena kalyāṇamittasaṃsagge ādaraṃ uppādeti. **Ayaṃ** kalyāṇamittatāsaṅkhāto brahmacariyavāsassa ādibhāvato sabbesañca kusaladhammānaṃ bahukāratāya padhānabhāvato ca imesu pañcasu dhammesu ādito vuttatā **paṭhamo** anavajjadharmo avisuddhānaṃ saddhādīnaṃ visuddhikaraṇavasena **cetovimuttiyā paripakkāya saṃvattati**. Ettha ca kalyāṇamittassa bahukāratā padhānatā ca “upaḍḍhamidaṃ bhante brahmacariyassa yadidaṃ kalyāṇamittatā”ti vadantaṃ dhammabhaṇḍāgārikaṃ “mā hevaṃ ānandā”ti dvikkhattuṃ paṭisedhetvā “sakalameva hidam ānanda brahmacariyaṃ yadidaṃ kalyāṇamittatā kalyāṇasahāyatā”ti-ādisuttapadehi¹ veditabbā.

Puna caparanti puna ca aparaṃ dhammajātaṃ. **Sīlavāti** ettha kenatthena sīlaṃ? Sīlanatthena sīlaṃ. Kimidaṃ sīlaṃ nāma? Samādhānaṃ, kāyakammādīnaṃ susīlyavasena avippakiṇṇatāti attho. Atha vā upadhāraṇaṃ, jhānādikusaladhammānaṃ patiṭṭhānavasena ādhārahāvoti attho. Tasmā sīleti, sīlatīti vā sīlaṃ. Ayaṃ tāva saddalakkhaṇanayena sīlattho.

1. Saṃ 1. 88; Saṃ 3. 2 piṭṭhesu.

Apare pana “siraṭṭho sīlaṭṭho, sīlalaṭṭho sīlaṭṭho”ti niruttinayena atthaṃ vaṇṇenti. Tayidaṃ pāripūrito atisayato vā sīlaṃ assa atthīti **sīlavā**, sīlasampannoti attho.

Yathā ca sīlavā hoti sīlasampanno, taṃ dassetuṃ “**pātimokkhasaṃvarasaṃvuto**”ti-ādi vuttaṃ. Tattha **pātimokkhanti** sikkhāpadasīlaṃ. Taṃ hi yo naṃ pāti rakkhati, taṃ mokkheti moceti āpāyikādīhi dukkhehīti pātimokkhaṃ. Saṃvaraṇaṃ saṃvaro, kāyavācāhi avītikkamo. Pātimokkhameva saṃvaro pātimokkhasaṃvaro, tena saṃvuto pihitakāyavācoti **pātimokkhasaṃvarasaṃvuto**. Idamassa tasmim̐ sīle patiṭṭhitabhāvaridīpanaṃ. **Viharatīti** tadanurūpavīhārasamaṅgibhāvaridīpanaṃ. **Ācāragocarasaṃpannoti** heṭṭhā pātimokkhasaṃvarassa upari viśesānaṃ yogassa ca upakāradhammaparidīpanaṃ. **Aṇumattesu vajjesu bhayadassāvīti** pātimokkhasīlato acavanadhammatāparidīpanaṃ. **Samādāyāti** sikkhāpadānaṃ anavasesato ādānaparidīpanaṃ. **Sikkhatīti** sikkhāya samaṅgibhāvaridīpanaṃ. **Sikkhāpadesūti** sikkhitabbadhammaparidīpanaṃ.

Aparo nayo—kilesānaṃ balavabhāvato pāpakiriyāya sukarabhāvato puññakiriyāya ca dukkarabhāvato bahukkhattuṃ apāyesu patanasīloti pāti, puthujjano. Aniccatāya vā bhavādīsu kammavegukkhitto ghaṭiyantaṃ viya anavaṭṭhānena paribbhamanato gamanasīloti pāti. Maraṇavasena vā tamhi tamhi sattanikāye attabhāvassa patanasīlo vā pāti, sattasantāno, cittameva vā. Taṃ pātinaṃ saṃsāradukkhato mokkhetīti **pātimokkhaṃ**. Cittassa hi vimokkhena satto “vimutto”ti vuccati. Vuttaṃ hi “cittavodānā visujjhantī”ti¹, “anupādāya āsavehi cittaṃ vimuttan”ti² ca.

Atha vā avijjādihetunā saṃsāre patati gacchati pavattatīti pāti. “Avijjānīvaraṇānaṃ sattānaṃ taṇhāsamyojanānaṃ sandhāvataṃ saṃsaratanaṃ”ti³ hi vuttaṃ. Tassa pātino sattassa taṇhādisaṃkilesattayato mokkho etenāti **pātimokkhaṃ**.

1. Saṃ 2. 123 piṭṭhe.

2. Vi 3. 24 piṭṭhe.

3. Saṃ 1. 387 piṭṭhe.

Atha vā pāteti vinipāteti dukkheti pāti, cittaṃ. Vuttaṃ hi “cittena nīyatī loko, cittena parikkassatī”¹. Tassa pātino makkho etenāti **pātimokkhaṃ**. Patati vā etena apāyadukkhe saṃsāradukkhe cāti pāti, taṇhādisaṃkilesa. Vuttaṃ hi “taṇhā janeti purisaṃ”². Taṇhādutiyo puriso”³ ca ādi. Tato pātito makkhoti **pātimokkhaṃ**.

Atha vā patati etthāti pāti, cha ajjhattikabāhirāni āyatanāni. Vuttaṃ hi “chasu loko samuppanno, chasu kubbati santhavan”⁴. Tato cha-ajjhattikabāhirāyatanasaṅkhātato pātito makkhoti **pātimokkhaṃ**. Atha vā pāto vinipāto assa atthīti pāti, saṃsāro. Tato makkhoti **pātimokkhaṃ**. Atha vā sabbalokādhipatibhāvato dhammissaro bhagavā patīti vuccati, muccati etenāti makkho, patino makkho tena paññattattāti patimokkho, patimokkho eva **pātimokkhaṃ**. Sabbaguṇānaṃ vā mūlabhāvato uttamaṭṭhena pati ca so yathāvuttenatthena makkho cāti patimokkho, patimokkho eva **pātimokkhaṃ**. Tathā hi vuttaṃ “pātimokkhanti ādimetaṃ mukhametaṃ pamukhametan”⁵ vitthāro.

Atha vā **pa**-iti pakāre, **atī**ti accantatthe nipāto, tasmā pakārehi accantaṃ makkhetīti **pātimokkhaṃ**. Idaṃ hi sīlaṃ sayāṃ tadaṅgavasena, samādhisahitaṃ paññāsahitaṃca vikkhambhanavasena samucchedavasena accantaṃ makkheti mocetīti **pātimokkhaṃ**. Pati pati makkhoti vā patimokkho, tamhā tamhā vītikkamadosato paccekaṃ makkhoti attho. Patimokkho eva **pātimokkhaṃ**. Makkhoti vā nibbānaṃ, tassa makkhassa paṭibimbabhūtoti patimokkho. Sīlasaṃvaro hi sūriyassa aruṇuggamaṇaṃ viya nibbānassa udayabhūto tappaṭibhāgova yathārahaṃ kilesanibbāpanato. Patimokkhoyeva **pātimokkhaṃ**. Atha vā makkhaṃ pati vattati, makkhābhimukhanti vā patimokkhaṃ, patimokkhameva **pātimokkhanti** evaṃ tāva ettha pātimokkhasaddassa attho veditabbo.

1. Saṃ 1. 36 piṭṭhe. 2. Saṃ 1. 34 piṭṭhe. 3. Aṃ 1. 316; Khu 1. 201, 268 piṭṭhesu.

4. Khu 1. 304 piṭṭhe.

5. Vi 3. 141 piṭṭhe.

Saṃvarati pidahati etenāti saṃvaro, pātimokkhameva saṃvaroti pātimokkhasaṃvaro. Atthato pana tato tato vītikkamitabbato viratiyo cetanā ca, tena pātimokkhasaṃvarena upeto samannāgato **pātimokkhasaṃvarasaṃvuto**. Vuttaṃ hetam bhagavatā “iminā pātimokkhasaṃvarena upeto hoti samupeto upagato sampanno samannāgato, tena vuccati pātimokkhasaṃvarasaṃvuto”ti¹.

Viharatīti iriyāpathavihārena viharati iriyati vattati. **Ācāragocarasaṃpannoti** veḷudānādamicchājīvassa kāyapāgabbhiyādīnañca akaraṇena sabbaso anācāraṃ vajjetvā kāyiko avītikkamo, vācasiko avītikkamo, kāyikavācasiko avītikkamoti evaṃ vuttabhikkhu sārūpa-ācārasampattiyā vesiyādi-agocaraṃ vajjetvā piṇḍapātādi-atthaṃ upasaṅkamituṃ yuttaṭṭhānasaṅkhātāgocaracaraṇena ca sampannattā ācāragocarasaṃpanno.

Apica yo bhikkhu satthari sagāravo sappatisso sabrahmacārīsu sagāravo sappatisso hirottappasaṃpanno sunivattho supāruto pāsādikena abhikkantena paṭikkantena ālokitena vilokitena samiñjitena pasāritena iriyāpathasaṃpanno indriyesu guttadvāro bhojane mattaññū jāgariyaṃ anuyutto satisampajaññaṃ samannāgato appiccho santuṭṭho pavivitto asaṃsaṭṭho ābhisamācārikesu sakkaccakārī garucittikārahulo viharati, ayaṃ vuccati **ācārasaṃpanno**.

Gocaro pana upanissayagocaro ārakkhagocaro upanibandhagocaroti tividho. Tattha yo dasakathāvatthuguṇasaṃannāgato vuttalakkaṇo kalyāṇamitto, yaṃ nissāya assutaṃ suṇāti, sutam pariyaḍāpeti, kaṅkham vitarati, diṭṭhiṃ ujum karoti, cittaṃ pasādeti, yassa ca anusikkhanto saddhāya vaḍḍhati, sīlena, sutena, cāgena, paññāya vaḍḍhati, ayaṃ vuccati **upanissayagocaro**.

Yo bhikkhu antaragharaṃ pavīṭṭho vīthiṃ paṭipanno okkhittacakkhu yugamattadassī saṃvuto gacchati, na hatthiṃ olokento, na assaṃ, na

1. Abhi 2. 255 piṭṭhe Vibhaṅge.

rathaṃ, na pattim, na itthim, na purisaṃ olokento, na uddhaṃ ullokento, na adho olokento, na disāvidisaṃ pekkhamāno gacchati, ayaṃ **ārakkhagocaro**.

Upanibandhagocaro pana cattāro satipaṭṭhānā, yattha bhikkhu attano cittaṃ upanibandhati. Vuttaṃ hetam bhagavatā “ko ca bhikkhave bhikkhuno gocaro sako pettiko visayo, yadidaṃ cattāro satipaṭṭhānā”¹. Tattha upanissayagocarassa pubbe vuttattā itaresaṃ vasenettha gocaro veditabbo. Iti yathāvuttāya ācārasampattiyā imāya ca gocarasampattiyā samannāgatattā **ācāragocarasampanno**.

Aṇumattesu vajjesu bhayadassāvīti appamattakattā aṇuppanānesu assatiyā asaṅcicca āpannasekhiya-akusalacittuppādādibhedesuvajjesu bhayadassanasīlo. Yo hi bhikkhu paramāṇumattaṃ vajjaṃ aṭṭhasaṭṭhiyojanasatasahassubbedhasinerupabbatarājasadisam² katvā passati, yopi sabbalahukam dubbhāsitamattaṃ pārājikasadisam katvā passati, ayampi aṇumattesu vajjesu bhayadassāvī nāma. **Samādāya sikkhati sikkhāpadesūti** yaṅkiñci sikkhāpadesu sikkhitabbaṃ, taṃ sabbena sabbaṃ sabbathā sabbaṃ anavasesaṃ samādiyivā sikkhati, vattati pūretīti attho.

Abhisallekhikāti ativiya kilesānaṃ sallekhanīyā, tesaṃ tanubhāvāya pahānāya yuttarūpā. **Cetovigaraṇasappāyāti** cetaso paṭicchādakānaṃ nīvaraṇānaṃ dūrībhāvakaṇaṇena cetovivaraṇasaṅkhātānaṃ samathavipassanānaṃ sappāyā, samathavipassanācittasseva vā vivaraṇāya pākaṭikaraṇāya vā sappāyā upakārikāti cetovivaraṇasappāyā.

Idāni yena nibbidādi-āvahaṇena ayaṃ kathā abhisallekhikā cetovivaraṇasappāyā ca nāma hoti, taṃ dassetuṃ “**ekantanibbidāyā**”^{ti}-ādi vuttaṃ. Tattha **ekantanibbidāyāti** ekamseneva vaṭṭadukkhato nibbindanatthāya. **Virāgāya nirodhāyāti** tasseva virajjanatthāya ca nirujjhanatthāya ca. **Upasamāyāti** sabbakilesavūpasamāya. **Abhiññāyāti**

1. Saṃ 3. 128 piṭṭhe.

2. Paramāṇumattaṃ aṭṭhasaṭṭhiyojanasahasādhikayojanasatasahassubbedhasinerupabbatarājasadisam (Ka) Itivuttaka-Ṭṭha 293 piṭṭhe ceva Visuddhi-Ṭṭi 1. 46 piṭṭhe ca passitabbaṃ.

sabbassapi abhiññeyyassa abhiññānāya. **Sambodhāyāti** catumaggasambodhāya. **Nibbānāyāti** anupādisesanibbānāya. Etesu hi ādito tīhi padehi vipassanā vuttā, dvīhi nibbānaṃ vuttaṃ. Samathavipassanā ādiṃ katvā nibbānapariyosāno ayaṃ sabbo uttarimanussadhammo dasakathāvatthulābhino sijjhatīti dasseti.

Idāni taṃ kathaṃ vibhajtvā dassento “**appicchakathā**”ti-ādimāha. Tattha **appicchoti** ni-iccho, tassa kathā **appicchakathā**, appicchabhāvappaṭisamyuttakathā vā **appicchakatā**. Ettha ca atriccho pāpiccho mahiccho appicchoti icchāvasena cattāro puggalā. Tesu attanā yathāladdhena lābhena atitto uparūpari lābhaṃ icchanto **atriccho** nāma. Yaṃ sandhāya—

“Catubbhi aṭṭhājḥagamā, aṭṭhāhipi ca soḷasa.
Soḷasāhi ca bāttimāsa, atricchaṃ cakkamāsado.
Icchāhatassa posassa, cakkam bhamati matthake”¹ ca,
“Atricchaṃ atilobhena, atilobhamadena cā”² ca vuttaṃ.

Lābhasakkārasilokanikāmayamānāya asantaḡaṇasambhāvanādhippāyo **pāpiccho**. Yaṃ sandhāya vuttaṃ “idhekacco assaddho samāno ‘saddhoti maṃ jano jānātū’³ti icchati, dussilo samāno ‘sīlavāti maṃ jano jānātū’³ti icchatī”³ti-ādi³.

Santaḡaṇasambhāvanādhippāyo paṭiggahaṇe amattaññū **mahiccho**, yaṃ sandhāya vuttaṃ “idhekacco saddho samāno ‘saddhoti maṃ jano jānātū’³ti icchati, sīlavā samāno ‘sīlavāti maṃ jano jānātū’³ti icchatī”³ti-ādi³. Duttappiyatāya hissa vijātamātāpi cittaṃ gahetuṃ na sakkoti. Tenetaṃ vuccati—

“Aggikkhandho samuddo ca, mahiccho cāpi puggalo.
Sakaṭena paccaye dentu, tayopete atappayā”³ti.

Ete pana atricchatādayo dose ārakā vivajjetvā santaḡaṇaniguhānādhippāyo paṭiggahaṇe ca mattaññū **appiccho**. Attani vijjamānampi

1. Khu 5. 132 piṭṭhe Jātake.

2. Khu 5. 65 piṭṭhe Jātake.

3. Abhi 2. 364 piṭṭhe Vibhaṅge.

guṇaṃ paṭicchādetukāmatāya saddho samāno “saddhoti maṃ jano jānātū”ti na icchati, sīlavā, bahussuto, pavivitto, āradhāvīriyo, upaṭṭhitassati, samāhito, paññavā samāno “paññavāti maṃ jano jānātū”ti na icchati. Svāyaṃ paccayappiccho dhutaṅgappiccho pariyatti-appiccho adhigamappicchoti catubbidho. Tattha **catūsu paccayesu appiccho** paccayadāyakaṃ deyyadhammaṃ attano thāmañca oloketvā sacepi hi deyyadhammo bahu hoti, dāyako appaṃ dātukāmo, dāyakassa vasena appameva gaṇhāti. Deyyadhammo ce appo, dāyako bahuṃ dātukāmo, deyyadhammassa vasena appameva gaṇhāti. Deyyadhammopi ce bahu, dāyakopi bahuṃ dātukāmo, attano thāmaṃ ñatvā pamāṇayuttameva gaṇhāti. Evarūpo hi bhikkhu anuppannaṃ lābhaṃ uppādeti, uppannaṃ lābhaṃ thāvaram karoti, dāyakānaṃ cittaṃ ārādheti. Dhutaṅgasamādānassa pana attani atthibhāvaṃ na jānāpetukāmo **dhutaṅgappiccho**. Yo attano bahussutabhāvaṃ jānāpetuṃ na icchati, ayaṃ **pariyatti-appiccho**. Yo pana sotāpannādīsu aññataro hutvā sabrahmacārīnampi attano sotāpannādibhāvaṃ jānāpetuṃ na icchati, ayaṃ **adhigamappiccho**. Evametesaṃ appicchānaṃ yā appicchatā, tassā saddhiṃ sandassanādividhinā anekākāravokārānisaṃsavibhāvanavasena sappaṭipakkhassa atricchātādibhedassa icchācārassa ādīnavavibhāvanavasena ca pavattā kathā **appicchakathā**.

Santuṭṭhikathāti ettha **santuṭṭhī**ti sakena attanā laddhena tuṭṭhi santuṭṭhi. Atha vā visamaṃ paccayicchaṃ pahāya samaṃ tuṭṭhi santuṭṭhi, santena vā vijjamānena tuṭṭhi santuṭṭhi. Vuttañcetaṃ—

“Atītaṃ nānubaddho so¹, nappajappamanāgataṃ.

Paccuppanna yāpento, santuṭṭhoti pavuccatī”ti.

Sammā vā ñāyena bhagavatā anuññātaavidhinā paccayehi tuṭṭhi santuṭṭhi, atthato itarītarapaccayasantoso, so dvādasavidho hoti. Kathaṃ? Cīvare yathālābhasantoso, yathābalasantoso, yathāsārappasantosoti tividho. Evaṃ piṇḍapātādīsu.

1. Nānusoṇṇaṃ (Udāna-Ṭṭha 207 piṭṭhe.)

Tatrāyaṃ pabhedavaṇṇanā—idha bhikkhu cīvaram labhati sundaram vā asundaram vā, so teneva yāpeti, aññaṃ na pattheti, labhantopi na gaṇhāti, ayamassa **cīvare yathālābhasantoso**. Atha pana pakatidubbalo vā hoti ābādhajarābhībhūto vā, garucīvaram pārupanto kilamati, so sabhāgena bhikkhunā saddhiṃ taṃ parivattetvā lahukena yāpentopi santuṭṭhova hoti, ayamassa **cīvare yathābalasantoso**. Aparo paṇītapaccayalābhī hoti, so paṭṭacīvarādīnam¹ aññatarāṃ mahagghacīvaram bahūni vā labhitvā “idaṃ therānaṃ cirapabbajitānaṃ bahussutānaṃ anurūpaṃ, idaṃ gilānānaṃ dubbalānaṃ appalābhīnaṃ hotū”ti tesāṃ datvā attanā saṅkārakūṭādīto vā nantakāni uccinitvā saṃghāṭiṃ katvā tesāṃ vā purāṇacīvarāni gahetvā dhārentopi santuṭṭhova hoti, ayamassa **cīvare yathāsāruppasantoso**.

Idha pana bhikkhu piṇḍapātaṃ labhati lūkhaṃ vā paṇītaṃ vā, so teneva yāpeti, aññaṃ na pattheti, labhantopi na gaṇhāti, ayamassa **piṇḍapāte yathālābhasantoso**. Atha pana ābādhiko hoti, lūkhaṃ paṇītaṃ pakativiruddhaṃ byādhiviruddhaṃ vā piṇḍapātaṃ bhuñjitvā gāḷhaṃ rogābādhāṃ pāpuṇāti, so sabhāgassa bhikkhuno datvā tassa hatthato sappāyabhojanaṃ bhuñjitvā samaṇadhammaṃ karontopi santuṭṭhova hoti, ayamassa **piṇḍapāte yathābalasantoso**. Aparo bahuṃ paṇītaṃ piṇḍapātaṃ labhati, so “ayaṃ piṇḍapāto cirapabbajitānaṃ anurūpo”ti cīvaram viya tesāṃ datvā tesāṃ vā sesakaṃ attanā piṇḍāya caritvā missakāhāraṃ vā bhuñjantopi santuṭṭhova hoti, ayamassa **piṇḍapāte yathāsāruppasantoso**.

Idha pana bhikkhuno senāsanaṃ pāpuṇāti manāpaṃ vā amanāpaṃ vā antamaso tiṇasanthārakampi, so teneva santussati, puna aññaṃ sundaratarāṃ pāpuṇāti, taṃ na gaṇhāti, ayamassa **senāsane yathālābhasantoso**. Atha pana ābādhiko hoti dubbalo vā, pakativiruddhaṃ vā so byādhiviruddhaṃ vā senāsanaṃ labhati, yatthassa vasato aphāsuhoti, so taṃ sabhāgassa bhikkhuno datvā tassa santake sappāyaseṇāsane vasitvā samaṇadhammaṃ karontopi santuṭṭhova hoti,

1. Paṭṭacīvarādīnaṃ (Ka)

ayamassa **senāsane yathābalasantoso**. Aparo sundaramṃ senāsanamṃ pattampi na sampatiḥchati “paṇītasenāsanamṃ nāma pamādaṭṭhānan”ti, mahāpuññatāya vā leṇamaṇḍapakūṭāgārādīni bahūni paṇītasenāsanāni labhati, so tāni cīvarādīni viya cirapabbajitādīnamṃ datvā yattha katthaci vasantopi santuṭṭhova hoti, ayamassa **senāsane yathāsārappasantoso**.

Idha pana bhikkhu bhesajjamṃ labhati lūkhamṃ vā paṇītamṃ vā, so teneva tussati, aññamṃ na pattheti, labhantopi na gaṇhāti, ayamṃ **gilānapaccaye yathālābhasantoso**. Atha pana telena atthiko phāṇitamṃ labhati, so yamṃ labhati, so tamṃ sabhāgassa bhikkhuno datvā tassa hatthato telena bhesajjamṃ katvā samaṇadhammamṃ karontopi santuṭṭhova hoti, ayamassa **gilānapaccaye yathābalasantoso**. Aparo mahāpuñño bahumṃ telamadhuphāṇitādīpaṇītabhesajjamṃ labhati, so tamṃ cīvarādīni viya cirapabbajitādīnamṃ datvā tesamṃ ābhatakena yena kenaci bhesajjamṃ karontopi santuṭṭhova hoti. Yo pana ekasmimṃ bhājane muttahrītakamṃ, ekasmimṃ catumadhuramṃ ṭhapetvā “gaṇhatha bhante yadicchasi”ti vuccamāno “sacassa tesu aññātarenapi rogo vūpasammati, idamṃ muttahrītakamṃ nāma buddhādīhi vaṇṇitan”ti, “pūtimuttahesajjamṃ nissāya pabbajjā, tattha te yāvajīvamṃ ussāho karaṇīyo”ti¹ vacanamṃ anussaranto catumadhuramṃ paṭikkhipitvā muttahrītakena bhesajjamṃ karonto paramasantuṭṭhova hoti, ayamassa **gilānapaccaye yathāsārappasantoso**.

So evaṃpabhedo sabbopi santoso santuṭṭhīti pavuccati. Tena vuttamṃ “atthato itarītarapaccayasantoso”ti. Tassā santuṭṭhiyā saddhimṃ sandassanādividhinā ānisaṃsavibhāvanavasena tappatiḥpakkhassa atricchatādibhedassa icchācārassa ādīnavavibhāvanavasena ca pavattā kathā **santuṭṭhikathā**. Ito parāsupi kathāsu eseva nayo. Visesamattameva vakkhāma.

Pavivekakathāti ettha kāyaviveko cittaviveko upadhivivekoti tayo vivekā. Tesu eko gacchati, eko tiṭṭhati, eko

1. Vi 3. 133 piṭṭhe.

nisīdati, eko seyyaṃ kappeti, eko gāmaṃ piṇḍāya pavisati, eko paṭikkamati, eko abhikkamati, eko caṅkamaṃ adhiṭṭhāti, eko carati, eko viharati, evaṃ sabbiriyāpathesu sabbakiccesu gaṇasaṅgaṇikaṃ pahāya vivittavāso **kāyaviveko** nāma. Aṭṭha samāpattiyo pana **cittaviveko** nāma. Nibbānaṃ **upadhiviveko** nāma. Vuttam hetam “kāyaviveko ca vivekaṭṭhakāyānaṃ nekkhammābhiratānaṃ, cittaviveko ca parisuddhacittānaṃ paramavodānappattānaṃ, upadhiviveko ca nirupadhīnaṃ puggalānaṃ visankhāragatānaṃ”¹. Vivekoyeva paviveko, paviveke paṭisaṃyuttā kathā **pavivekakathā**.

Asaṃsaggakathāti ettha savanasaṃsaggo dassanasaṃsaggo samullapanasaṃsaggo sambhogasaṃsaggo kāyasaṃsaggoti pañca saṃsaggā. Tesu idhekacco bhikkhu suṇāti “amukasmim ṭhāne gāme vā nigame vā itthi abhirūpā dassanīyā pāsādikā paramāya vaṇṇapokkharatāya samannāgatā”²ti, so tam sutvā saṃsīdati visīdati, na sakkoti brahmacariyaṃ sandhāretum, sikkham paccakkhāya hīnāyāvattati, evaṃ visabhāgārammaṇassavanena uppannakilesasanthavo **savanasaṃsaggo** nāma. Na heva kho bhikkhu suṇāti, apica kho sāmaṃ passati itthim abhirūpaṃ dassanīyaṃ pāsādikaṃ paramāya vaṇṇapokkharatāya samannāgataṃ, so tam disvā saṃsīdati visīdati, na sakkoti brahmacariyaṃ sandhāretum, sikkham paccakkhāya hīnāyāvattati, evaṃ visabhāgārammaṇadassanena uppannakilesasanthavo **dassanasaṃsaggo** nāma. Disvā pana aññamaññaṃ ālāpasallāpavasena uppanno kilesasanthavo **samullapanasaṃsaggo** nāma. Sañjagghanādipi eteneva saṅgayhati. Attano pana santakaṃ yaṃ kiñci mātugāmassa datvā adatvā vā tena dinnassa vanabhaṅginīyādino paribhogavasena uppanno kilesasanthavo **sambhogasaṃsaggo** nāma. Mātugāmassa hatthagghādivasena uppannakilesasanthavo **kāyasaṃsaggo** nāma.

Yopi cesa “gihīhi saṃsaṭṭho viharati ananulomikena saṃsaggena sahasokī sahanandī sukhitesu sukhito dukkhitesu dukkhito uppannesu kiccakaraṇīyesu attanā voyogaṃ āpajjati”²

1. Khu 7. 122 piṭṭhe Mahāniddece.

2. Saṃ 2. 10; Khu 7. 302 piṭṭhesu.

evaṃ vutto ananulomiko gihisaṃsaggo nāma, yo ca sabrahmacārīhipi kilesupattihetubhūto saṃsaggo, taṃ sabbaṃ pahāya yvāyaṃ saṃsāre thiratarāṃ saṃvegasāṅkhāresu tibbaṃ bhayasaññaṃ sarīre paṭikkūlasaññaṃ sabbākusalesu jigucchāpubbaṅgamaṃ hirottappaṃ sabbakiriyaṃ satisampajaññanti sabbaṃ paccupaṭṭhapetvā kamaladale jalabindu viya sabbattha alaggabhāvo, ayaṃ sabbasaṃsaggappaṭipakkhatāya asaṃsaggo, tappaṭisaṃyuttā kathā **asaṃsaggakathā**.

Vīriyārambhakathāti ettha vīrassa bhāvo, kammanti vā vīriyaṃ, vidhinā īretabbaṃ pavattetabbanti vā vīriyaṃ, vīriyañca taṃ akusalānaṃ dhammānaṃ pahānāya, kusalānaṃ dhammānaṃ upasampadāya ārasanaṃ vīriyārambho. Svāyaṃ kāyiko cetasiko cāti duvidho, ārambhadhātu nikkamadhātu parakkamadhātu cāti tividho, sammappadhānavasena catubbidho. So sabbopi yo bhikkhu gamane uppannakilesaṃ ṭhānaṃ pāpuṇituṃ na deti, ṭhāne uppannaṃ nisajjaṃ, nisajjāya uppannaṃ sayanaṃ pāpuṇituṃ na deti, tattha tattheva ajapadena daṇḍena kaṇhasappaṃ uppīletvā gaṇhanto viya tikhiṇena asinā amittaṃ gīvāya paharanto viya sīsaṃ ukkhipituṃ adatvā vīriyabalena niggaṇhāti, tassevaṃ vīriyārambho āradhavīriyassa vasena veditabbo, tappaṭisaṃyuttā kathā **vīriyārambhakathā**.

Sīlakathāti-ādīsu duvidhaṃ sīlaṃ lokiyaṃ lokuttarañca. Tattha **lokiyaṃ** pātimokkhasaṃvarādi catupārisuddhisīlaṃ. **Lokuttaraṃ** maggasīlaṃ phalasīlañca. Tathā **samādhipi**. Vipassanāya pādakabhūtā saha upacārena aṭṭha samāpattiyo **lokiyo** samādhi, maggasampayutto panettha **lokuttaro** samādhi nāma. Tathā **paññāpi**. **Lokiyā** sutamayā cintāmayā jhānasampayuttā vipassanāññañca. Visesato panettha vipassanāpaññā gahetabbā. **Lokuttarā** maggapaññā phalapaññā ca. **Vimutti** ariyaphalavimutti nibbānañca. Apare pana tadaṅgavikkhambhanasamucchedavimuttīnampi vasenettha atthaṃ saṃvaṇṇenti. **Vimuttiññadassanampi** ekūnavīsatividhaṃ paccavekkhaṇaṇānaṃ. Iti imesaṃ sīlādīnaṃ saddhiṃ sandassanādividhinā anekākāravokāra-ānisaṃsavibhāvanavasena ceva tappaṭipakkhānaṃ dussīlyādīnaṃ ādinavavibhāvanavasena ca pavattā kathā, tappaṭisaṃyuttā kathā vā **sīlādīkathā nāma**.

Ettha ca “attanā ca appiccho hoti, appicchakathañca paresam kattā”¹, “santuṭṭho hoti itarītarena cīvarena, itarītara cīvarasantuṭṭhiyā ca vaṇṇavādī”² ca ādivacanato sayañca appicchatādiguṇasamannāgatena paresampi tadatthāya hitajjhāsayena pavattetabbā tathārūpī kathā. Yā idha abhisallekhhikādibhāvena visesetvā vuttā appicchakathādīti veditabbā. Kārakasēva hi kathā visesato adhippetatthasādhinī. Tathā hi vakkhati “kalyāṇamittassetam meghiya bhikkhuno pāṭikaṅkham -pa- akasiralābhī”³.

Evarūpiyāti īdisāya yathāvuttāya. **Nikāmalābhīti** yathicchitalābhī yathārucilābhī, sabbakālam imam katham sotum vicāretuñca yathāsukham labhanto. **Akicchalābhīti** nidukkhalābhī. **Akasiralābhīti** vipulalābhī.

Āraddhavīriyoti paggahitavīriyo. **Akusalānam dhammānam pahānāyāti** akosallasambhūtaṭṭhena akusalānam pāpadhammānam pajahanatthāya. **Kusalānam dhammānanti** kucchitānam salanādi-atthena anavajjaṭṭhena ca kusalānam sahavipassanānam maggaphaladhammānam. **Upasampadāyāti** sampādanāya attano santāne uppādanāya. **Thānavāti** ussolhisankhātena vīriyathāmena samannāgato. **Daḥaparakkamoti** thiraparakkamo asithilavīriyo. **Anikkhittadhuroti** anorohitadhuro anosakkavīriyo.

Paññavāti vipassanāpaññāya paññavā. **Udayatthagāminiyāti** pañcannam khandhānam udayañca vayañca paṭivijjhantiyā. **Ariyāyāti** vikkhambhanavasena kilesehi ārakā dūre ṭhitāya niddosāya. **Nibbedhikāyāti** nibbedhabhāgiyāya. **Sammā dukkhakkhayagāminiyāti** vaṭṭadukkhassa khepanato “dukkhakkhayo”⁴ti laddhanāmam ariyamaggam sammā hetunā nayena gacchantiyā. Imesu ca pana pañcasu dhammesu sīlam vīriyam paññā ca yogino ajjhattikam aṅgam, itaradvayam bāhiraṅgam. Tatthāpi⁴ kalyāṇamittasannissayeneva sesam catubbidham ijjhati, kalyāṇamittassevettha bahukāratam dassento satthā “**kalyāṇamittassetam meghiya bhikkhuno pāṭikaṅkham**”⁴ti-ādinā desanam vaḍḍhesi. Tattha **pāṭikaṅkhanti** ekamsena icchitabbanam, avassambhāvīti attho. **Yanti**

1. Ma 1. 199; Am 3. 359 piṭṭhesu.

2. Sam 1. 399; Khu 8. 249 piṭṭhesu.

3. Am 3. 169 piṭṭhe.

4. Tatthāpi (Udāna-Ṭṭha 212 piṭṭhe.)

kiriyaṅparāmasanaṃ. Idaṃ vuttaṃ hoti—“sīlavā bhavissatī”ti ettha yadetaṃ kalyāṇamittassa bhikkhuno sīlavantatāya bhavanaṃ sīlasampannattaṃ, tassa bhikkhuno sīlasampannattā etaṃ tassa pāṭikaṅkhaṃ, avassambhāvī ekamseneva tassa tattha niyojanatoti adhippāyo.

Pātimokkhasaṃvarasaṃvuto viharatīti-ādīsupi eseva nayo.

Evam bhagavā sadevake loke uttamakalyāṇamittasaṅkhātassa attano vacanaṃ anādiyitvā taṃ vanasaṅgaṃ pavisitvā tādīsaṃ vippakāraṃ pattassa āyasmato meghiyassa kalyāṇamittatādīnā sakalaṃ sāsanasampadaṃ dassetvā idānissa tattha ādarajātassa pubbe yehi kāmavitakkādīhi upaddutattā kammaṭṭhānaṃ na sampajjati, tassa tesaṃ ujuvipaccanīkabhūtattā ca bhāvanānayaṃ pakāsetvā tato paraṃ arahattassa kammaṭṭhānaṃ ācikkhanto “**tena ca pana meghiya bhikkhunā imesu pañcasu dhammesu patiṭṭhāya cattāro dhammā uttari bhāvetabbā**”ti-ādīmāha. Tattha **tenā**ti evaṃ kalyāṇamittasannissayena yathāvuttasīlādiguṇasamannāgatena. Tenevāha “**imesu pañcasu dhammesu patiṭṭhāyā**”ti. **Uttarī**ti āradhataruṇavipassanassa rāgādīparissayā ce uppajjeyyūṃ, tesaṃ visodhanatthaṃ tato uddhaṃ cattāro dhammā bhāvetabbā uppādetabbā vaḍḍhetabbā ca.

Asubhāti ekādasasu asubhakammaṭṭhānesu yathārahaṃ yattha katthaci asubhabhāvanā. **Rāgassa pahānāyā**ti kāmarāgassa pajahanatthāya. Ayamatto sālilāvakopamāya vibhāvetabbo. Evaṃbhūtaṃ bhāvanāvidhiṃ sandhāya vuttaṃ “asubhā bhāvetabbā rāgassa pahānāyā”ti. **Mettā**ti mettākammaṭṭhānaṃ. **Byāpādassa pahānāyā**ti vuttanayeneva uppannassa kopassa pajahanatthāya. **Ānāpānassatī**ti soḷasavatthukā ānāpānassatī. **Vitakkupacchedāyā**ti vuttanayeneva uppannānaṃ vitakkānaṃ pacchedanatthāya. **Asmimānasamugghātāyā**ti “asmī”ti uppajjanakassa navavidhassa mānassa samucchedanatthāya.

Aniccasaññinoti hutvā abhāvato udayabbayavantato pabhaṅguto tāvakālikato niccappaṭikkhepato ca “sabbe saṅkhārā aniccā”ti¹

1. Khu 1. 53; Khu 8. 128 piṭṭhesu.

pavatta-aniccānupassanāvasena aniccasaññino. **Anattasaññā saṅghātī** asārakato avasavattanato parato rittato tucchato suññato ca “sabbe dhammā anattā”¹ti evaṃ pavatta-anattānupassanāsaṅkhātā anattasaññā citte saṅghahati atidaḷhaṃ patiṭṭhahati. Aniccalakkhaṇe hi diṭṭhe anattalakkhaṇaṃ diṭṭhameva hoti. Tīsu lakkhaṇesu hi ekasmiṃ diṭṭhe itaradvayaṃ diṭṭhameva hoti. Tena vuttaṃ “aniccasaññino megghiya anattasaññā saṅghātī”²ti. Anattalakkhaṇe sudiṭṭhe “asmī”³ti uppajjanakamāno suppapahova hotīti āha “**anattasaññī asmimānasamugghātāṃ pāpuṇāti**”⁴ti. **Diṭṭheva dhamme nibbānanti** diṭṭheva dhamme imasmiṃyeva attabhāve apaccayaparinibbānaṃ pāpuṇāti. Ayamettha saṅkhepo, vitthārato pana asubhādibhāvanānayo **visuddhimagge**⁵ vuttanayena veditabbo.

Megghiyasuttavaṇṇanā niṭṭhitā.

4. Nandakasuttādivaṇṇanā

4-5. Catutthe āgamayamānoti olokayamāno, buddho sahasā apavisitvā yāva sā kathā niṭṭhāti, tāva aṭṭhāsīti attho. Tenāha “**idamavocāti idam kathāvasānaṃ udikkhamāno**”¹ti. Aniccadukkhādivasena sabbadhammasantīraṇaṃ **adhipaññāvīpassanāti** āha “**saṅkhārapariggahavīpassanāññāssā**”²ti. **Mānasanti** rāgopi cittampi arahattampi. “Antalikkhacaro pāso, yvāyaṃ carati mānaso”³ti ettha rāgo mānasaṃ. “Cittaṃ mano mānasaṃ”⁴ti ettha cittaṃ. “Appattamānaso sekho, kālaṃ kayirā jane sutā”⁵ti ettha arahattaṃ. Idhāpi arahattameva adhippetāṃ. Tenāha “**appattamānasāti appatta-arahattā**”⁶ti. Appattaṃ mānasaṃ arahattaṃ etehīti **appattamānasā**. Idāni citta-pariyāyameva mānasa-saddaṃ sandhāyāha “**arahattaṃ vā**”⁷ti-ādi. Pañcamaṃ suviññeyyameva.

Nandakasuttādivaṇṇanā niṭṭhitā.

1. Khu 1. 53; Khu 8. 128 piṭṭhesu.

2. Visuddhi 1. 173 piṭṭhe.

3. Saṃ 1. 113; Vi 3. 28 piṭṭhesu.

4. Abhi 1. 18 piṭṭhe.

5. Saṃ 1. 122 piṭṭhe.

6. Sevanāsuttavaṇṇanā

6. Chaṭṭhe **jīvitasambhārā**ti jīvitappavattiyā sambhārā paccayā. **Samudānetabbā**ti sammā ñāyena anavajja-uñchācariyādinā uddhamuddhamānetabbā pāpuṇitabbā. Te pana samudānitā samāhatā nāma hontīti āha “**samāharitabbā**”ti. **Dukkhe**na uppajantīti sulabhuppādā na honti. Etena gocara-asappāyādibhāvaṃ dasseti. **Rattibhāgaṃ vā divasabhāgaṃ vā**ti bhummatthe upayogavacananti āha “**rattikoṭṭhāse vā divasakoṭṭhāse vā**”ti. **Rattimyeva pakkamitabbam** samaṇadhammassa tattha anipphajjanato. **Saṅkhāpī**ti “yadatthamaḥam pabbajito, na metaṃ idha nipphajjati, cīvarādi pana samudāgacchati, nāhaṃ tadattham pabbajito, kiṃ me idha vāsenā”ti paṭisaṅkhāyapi. Tenāha “**sāmaññatthassa bhāvanāpāripūri-agamanam jānitvā**”ti. Anantaravāre **saṅkhāpī**ti samaṇadhammassa nipphajjanabhāvaṃ jānitvā. **So puggalo anāpucchā pakkamitabbam, nānubandhitabboti** “so puggalo”ti padassa “nānubandhitabbo”ti iminā sambandho. Yassa yena hi sambandho, dūraṭṭhenapi so bhavati. **Tam puggalanti** so puggaloti paccattavacanam upayogavasena pariṇāmetvā tam puggalam anāpucchā pakkamitabbanti attho. Atthagasena hi vibhattipariṇāmoti. **Āpucchā pakkamitabbanti** ca kataññukataveditāya niyojanam. **Evarūpoti** yam nissāya bhikkhuno guṇehi vuddhiyeva pāṭikaṅkhā, paccayehi na parissayo, evarūpo daṇḍakammādīhi niggaṇhāti cepi, na pariccajītabboti dasseti “**sacepī**”ti-ādinā.

Sevanāsuttavaṇṇanā niṭṭhitā.

7. Sutavāsuttādivaṇṇanā

7-10. Sattame **abhabbo khīṇāsavo bhikkhu sañcicca pāṇanti-ādi** desanāsīsameva, sotāpannādayopi pana abhabbāva, puthujjanakhīṇāsavānam nindāpasamsatthampi evam vuttaṃ. Puthujjano nāma gārayho mātughātādīni karoti, khīṇāsavo pana pāsamsa kunthakipillikaghātādīnipi na karotīti. **Sannidhikāraḥam kāme paribhuñjanti** yathā gihibhūto sannidhim katvā vatthukāme paribhuñjati, evam tilataṇḍulasappinavanītādīni

sannidhiṃ katvā idāni paribhuñjituṃ abhabboti attho. Vatthukāme pana nidahitvā paribhuñjantā tannissitaṃ kilesakāmampi nidahitvā paribhuñjanti nāmāti āha “**vatthukāmakilesakāme**”ti. Nanu ca khīṇāsavasessa vasanaṭṭhāne tilataṇḍulādayo paññāyantīti? Na pana te attano atthāya nidhenti, aphāsukapabbajitādīnaṃ atthāya nidhenti. Anāgāmissa kathanti? Tassapi pañca kāmagaṇā sabbasova pahīnā, dhammena pana laddhaṃ vicāretvā paribhuñjati. Akappiyakāmagaṇe sandhāyetaṃ vuttaṃ, na mañcapīṭha-attharaṇapāvuraṇādisannissitaṃ. **Seyyathāpi pubbe agāriyabhūto**ti yathā pubbe gihibhūto paribhuñjati, evaṃ paribhuñjituṃ abhabbo. Agāramajjhe vasantā hi sotāpannādayo yāvajīvaṃ gihibyañjanaṃ tiṭṭhanti. Khīṇāsavo pana arahattaṃ patvāva manussabhūto parinibbāti vā pabbajati vā. Cātumahārājikādīsu kāmāvacaradevesu muhuttampi na tiṭṭhati. Kasmā? Vivekaṭṭhānassa abhāvā. Bhummadevattabhāva pana ṭhito arahattaṃ patvāpi tiṭṭhati vivekaṭṭhānaṃ sambhāvā. Aṭṭhamādīni uttānatthāneva.

Sutavāsuttādivaṇṇanā niṭṭhitā.

Sambodhivaggavaṇṇanā niṭṭhitā.

2. Sīhanādavagga

1. Sīhanādasuttavaṇṇanā

11. Dutiyaṃ paṭhame avāpurenti vivaranti dvāraṃ etenāti **avāpuraṇaṃ**. Rajaṃ haranti etenāti **rajoḥaraṇaṃ**. **Kaḷopihatto**ti vilīvamayaabhājanahatto, “cammamayabhājanahatto”ti ca vadanti. Chinnāni visāṇāni etassāti chinnavisāṇo, usabho ca so chinnavisāṇo cāti **usabhachinnavisāṇo**. Visesanaparoṃ samāso. **Ahikuṇapena vāti**-ādi atijegucchappaṭṭikūlakūṇapadassanattaṃ vuttaṃ. **Kaṇṭhe āsattenāti** kenacideva paccatthikena ānetvā kaṇṭhe baddhena, omukkenāti attho. **Aṭṭo** āturo duggandhapīḷāya pīḷito. **Accayassa paṭiggaṇhanaṃ** vā adhivāsanaṃ. Evaṃ hi so kāraṇe desiyamāne

tato vīgato nāma hoti. Tenāha “**paṭiggaṇhatūti khamatū**”ti. Sesamettha suviññeyyameva.

Sihanādasuttavaṇṇanā niṭṭhitā.

2. Sa-upādisesasuttavaṇṇanā

12. Dutiye bhavassa appamattakatā nāma ittarakālatāyāti āha “**accharāsaṅghātamattampī**”ti.

Sa-upādisesasuttavaṇṇanā niṭṭhitā.

3. Koṭṭhikasuttavaṇṇanā

13. Tatiye diṭṭhadhammo vuccati paccakkhabhūto attabhāvo, tasmim veditabbaṃ phalaṃ **diṭṭhadhammavedanīyaṃ**. Tenāha “**imasmimyeva attabhāve**”ti. Catuppañcakkhandhaphalatāya saññābhavūpagaṃ kammaṃ **bahurvedanīyaṃ**. Ekakkhandhaphalattā asaññābhavūpagaṃ kammaṃ “**appavedanīyaṃ**”ti vuttaṃ. Keci pana “arūpāvacarakammaṃ bahukālaṃ veditabbaphalattā bahurvedanīyaṃ, itaraṃ appavedanīyaṃ. Rūpārūpāvacarakammaṃ vā bahurvedanīyaṃ, parittaṃ kammaṃ appavedanīyaṃ”ti vadanti. **Vedanīyanti** paccayantarasamavāye vipākuppādanasamatthaṃ, na āradhāvīpākameva. **Avedanīyanti** paccayavekallena vipaccitūṃ asamatthaṃ ahoṣikammādibhedam.

Koṭṭhikasuttavaṇṇanā niṭṭhitā.

4. Samiddhisuttavaṇṇanā

14. Catutthe **samiddhī**ti therassa kira attabhāvo samiddho abhirūpo pāsādiko, tasmā samiddhīveva saṅkhāto. Tenāha “**attabhāvasamiddhatāyā**”ti-ādi. **Rūpadhātu-ādīsūti ādi**-saddena saddadhātu-ādim saṅgaṇhāti.

Samiddhisuttavaṇṇanā niṭṭhitā.

5. Gaṇḍasuttādivaṇṇanā

15-19. Pañcame **mātāpettikasambhavassāti** mātito ca pitito ca nibbattena mātāpettikena sukkasoṇitena sambhūtassa.

Ucchādanadhammassāti ucchādetabbasabhāvassa. **Parimaddanadhammassāti** parimadditabbasabhāvassa. Ettha ca odanakummāsūpacaya-ucchādanapadehi vaḍḍhi kathitā, aniccabhedanavidhamsanapadehi hāni. Purimehi vā samudayo, pacchimehi atthaṅgamoti evaṃ cātumahābhūtikassa kāyassa vaḍḍhiparihāninibbattibhedā dassitā. Sesam suviññeyyameva. Chatṭhādīni uttānatthāni.

Gaṇḍasuttādivaṇṇanā niṭṭhitā.

10. Velāmasuttavaṇṇanā

20. Dasame **sakuṇḍakabhattanti** sakuṇḍakaṃ uttaṇḍulabhattam. Parittehi sakuṇḍehi taṇḍulehipi saddhiṃ vipakkabhattam uttaṇḍulameva hoti. Biḷaṅgaṃ vuccati āranāḷam, biḷaṅgato nibbattanato tadeva kañjiyato jātanti kañjiyaṃ, taṃ dutiyaṃ etassāti **biḷaṅgadutiyaṃ, taṃ kañjiyadutiyaṃ** vuttam. **Asakkaritvāti** deyyadhammampi puggalampi asakkaritvā. Deyyadhammassa asakkaraṇaṃ asampannakāro, puggalassa asakkaraṇaṃ agarukaraṇaṃ. Deyyadhammaṃ asakkaronto hi uttaṇḍulādidosasamannāgataṃ āhāraṃ deti, na sampannaṃ karoti. Puggalaṃ asakkaronto nisīdanaṭṭhānaṃ asammajjitvā yattha tattha vā nisīdāpetvā yaṃ vā taṃ vā dāraṃ pesetvā deti. **Acittikatvāti** na cittaṃ katvā, na pūjetvāti attho. Pūjento hi pūjetabbavattuṃ citte ṭhapeti, na tato bahi karoti. Cittaṃ vā acchariyaṃ katvā paṭipatti cittaṅgamaṃ sambhāvanakiriyaṃ, tappaṭikkhepatto acittikaraṇaṃ asambhāvanakiriyaṃ. **Apaviddhanti** uchiṭṭhādichadḍanīyadhammaṃ viya avakhittakaṃ. Yo hi chaḍḍetukāmo hutvā rogino sarīre odanādīni majjitvā vammike rogaṃ pakkhipanto viya deti, ayaṃ apaviddham deti nāma. **Anāgamanadiṭṭhikoti** “addhā imassa dānassa phalaṃ mama āgacchatī”ti evaṃ yassa kammassakatadiṭṭhi atthi, so āgamanadiṭṭhiko. Ayaṃ pana na tādīsoti anāgamanadiṭṭhiko, phalaṃ pāṭikaṅkhaṃ hutvā na detīti attho. Tenāha “**na kammaṅca phalaṅca saddahitvā detī**”ti.

Velāmoti ettha **mā**-saddo paṭisedhavacano, jātigottarūpabhogādiguṇānaṃ velā mariyādā natthi etasminti velāmo. Atha vā yathāvuttaguṇānaṃ velā mariyādā amati osānaṃ gacchati etasminti **velāmo**, velaṃ vā mariyādaṃ amati gacchati atikkamatīti **velāmo**. Tenāha “**jātigotta -pa- evaṃladdhanāmo**”ti. Dīyatīti dānaṃ, dānavatthu. Taṃ aggīyati nissajjīyati etthāti **dānaggaṃ**. Dānaṃ vā gaṇhanti etthāti **dānaggaṃ**, evaṃ **bhattaggaṃ**, parivesanaṭṭhānaṃ. **Dukūlasandanānī** rajatabhājanādinissite dukūle khīrassa sandanaṃ etesanti dukūlasandanāni. **Kaṃsūpadhāraṇānī**ti rajatamayadobhabhājanāni. Tenāha “**rajatamayakhīrapaṭicchakānī**”ti. Rajatamayāni khīrapaṭicchakāni khīrapaṭiggahabhājanāni etesanti **rajatamayakhīrapaṭicchakāni**. **Sodheyyāti** mahapphalabhāvakaraṇena visodheyya. Mahapphalabhāvappattiyā hi dakkhiṇā visujjhati nāma.

Maggenāgataṃ anivattanasaraṇanti iminā lokuttarasaraṇagamaṇaṃ dīpeti. **Apareti-ādinā** lokiyasaraṇagamaṇaṃ vuttaṃ. **Saraṇaṃ** nāma tiṇṇaṃ ratanānaṃ jīvitapariccāgamayaṃ puññaṃ sabbasampattiṃ deti, tasmā mahapphalataranti adhippāyo. Idañca “sace tvaṃ yathā gahitaṃ saraṇaṃ na bhindissasi, evāhaṃ taṃ māremī”ti yadipi koci tiṇhena satthena jīvitā voropeyya, tathāpi “nevāhaṃ buddhaṃ na buddhoti, dhammaṃ na dhammoti, saṃghaṃ na saṃghoti vadāmi”ti daḷhataraṃ katvā gahitassa vasena vuttaṃ. **Maggenāgataṃ** lokuttarasīlaṃ sandhāya vadati. **Apareti-ādinā** pana lokiyasīlaṃ vuttaṃ. Sabbesaṃ sattānaṃ jīvitadānādinihitadaṇḍatāya sakalalokiyalokuttaraguṇādhiṭṭhānato cassa mahapphalamahānisaṃsatā veditabbā.

Upasiṅghanamattanti ghāyanamattaṃ. **Gaddohanamattanti** pāḥantare godohanamattaṃ kālanti attho. So ca na sakalo godohanakkhaṇo adhippetoti dassetuṃ “**gāviyā ekavāraṃ thana-añchanamattan**”ti attho vutto. **Añchanamattanti** ākaḍḍhanamattaṃ. Gāviyā thanaṃ gahetvā ekakhīrabinduduhanakālamattampi gadduhanamattanti vadanti. Ettakampi hi kālaṃ yo vasanaḡabbhapariveṇavihārūpacāraparicchedena vā aparimāṇāsu

lokadhātūsu sabbasatte hitapharaṇaṃ mettacittaṃ bhāvetuṃ sakkoti, idaṃ tato yathāvuttadānādito mahapphalataraṃ.

Velāmasuttavaṇṇanā niṭṭhitā.

Sīhanādavaggavaṇṇanā niṭṭhitā.

3. Sattāvāsavagga

1. Tiṭṭhānasuttavaṇṇanā

21. Tatiyassa paṭhame **amamāti** vatthābharaṇapānabhojanādīsupi mamattavirahitā. **Apariggahāti** itthipariggahena apariggahā. Tesāṃ kira “ayaṃ mayhaṃ bhariyā”ti mamattaṃ na hoti, mātaraṃ vā bhaginiṃ vā disvā chandarāgo na uppajjati. Dhammatāsiddhassa sīlassa ānubhāvena putte diṭṭhamatte eva mātuthanato thaññaṃ paggharati, tena saññāṇena nesāṃ mātari puttassa mātusaññā, mātu ca putte puttasaññā paccupaṭṭhitāti keci.

Apicettha¹ uttarakurukānaṃ puññānubhāvasiddho ayampi viseso veditabbo. Tattha kira tesu tesu padesesu ghananicitapattasañchannasākhāpasākhā kūṭāgārasamā² manoramā rukkhā tesāṃ manussānaṃ nivesanakiccaṃ sādheti. Yattha sukhaṃ nivasanti, aññepi tattha rukkhā sujātā sabbadāpi pupphitaggaṃ tiṭṭhanti. Jalāsayāpi vikasitakamalakuvalayapuṇḍarīkasogandhikādipupphasañchannā sabbakālaṃ paramasugandhaṃ samantato pavāyantā tiṭṭhanti. Sarīrampi tesāṃ atidīghādidosarahitaṃ ārohapariṇāhasampannaṃ jarāya anabhibhūtattā valitapalitādidosavirahitaṃ yāvatāyukam aparikkhīṇajavabalaparakkamasobhameva hutvā tiṭṭhati. Anuṭṭhānaphalūpajīvitāya na ca nesāṃ kasivaṇijjādivasena āhārapariyeṭṭhivasena dukkhaṃ atthi, tato eva na dāsadāsikammakarādipariggaho atthi, na ca tattha sītuṇhaḍaṃsamakasavātātapasarīsapavāḷādiparissayo atthi. Yathā nāmettha giṃhānaṃ pacchime māse paccūsavelāyaṃ samasītuṇho

1. Sārattha-Ṭī 1. 273 piṭṭhādīsu passitabbaṃ.

2. Kūṭāgārupamā (Sārattha-Ṭī 1. 273 piṭṭhe.)

utu hoti, evameva sabbakālaṃ tattha samasītuṅhova utu hoti, na ca nesaṃ koci upaghāto vihesā vā uppajjati. Akatṭhapākimeva sāliṃ akaṇaṃ athusāṃ suddhaṃ sugandhaṃ taṇḍulapphalaṃ paribhuñjanti. Taṃ bhuñjantānaṃ nesaṃ kuṭṭhaṃ gaṇḍo kilāso soso kāso sāso apamāro jaroti evamādiko na koci rogo uppajjati, na ca te khujjā vā vāmana vā kāṇā vā kuṇī vā khañjā vā pakkhahatā vā vikalāṅgā vā vikalindriyā vā honti.

Itthiyopi tattha nātidīghā nātirassā nātikisā nāthūlā nātikāḷā naccodātā sobhaggappattarūpā honti. Tathā hi dīghaṅgulī tambanakhā alambathanā tanumajjhā puṇṇacandaṃ mukhī visālakkhī mudugattā sahitōrū odātadantā gambhīraṇābhī tanujaṅghā dīghanīlavellitakesī puthulasussoṇī nātilomā nālomā subhagā utusukhasamphassā saṅghā sakhilā sukhasambhāsā nānābharaṇavibhūsitā vicaranti, sabbadāpi soḷasavassuddesikā viya honti, purisā ca pañcavīsativassuddesikā viya. Na puttadāresu¹ rajjanti. Ayaṃ tattha dhammatā.

Sattāhikameva ca tattha itthipurisā kāmaratiyā viharanti, tato vītarāgā viya yathāsakaṃ gacchanti, na tattha idha viya gabbhokkantimūlakaṃ, gabbhāpariharaṇamūlakaṃ vijāyanamūlakaṃ vā dukkhaṃ hoti. Rattakaṇcukato kañcanaṇaṭṭimā viya dāraḷā mātukucchito amakkhitā eva semhādīnā sukheneva nikkhamanti. Ayaṃ tattha dhammatā.

Mātā pana puttaṃ vā dhītaraṃ vā vijāyitvā te vicaraṇakappadesa ṭhapetvā anapekkhā yathārucci gacchati. Tesāṃ tattha sayitānaṃ ye passanti purisā vā itthiyo vā, te attano aṅguliyo upanāmenti. Tesāṃ kammabalena tato khīraṃ pavattati, tena te dāraḷā yāpentī, evaṃ pana vaḍḍhentā katipayadivaseheva laddhabalā hutvā dārikā itthiyo upagacchanti, dāraḷā purise. Kapparukkhatō eva ca tesāṃ tattha vatthābharaṇāni nipphajjanti. Nānāvīrāgavaṇṇavicittāni hi sukhumāni mudusukhasamphassāni vatthāni tattha tattha kapparukkhesu olambantāni tiṭṭhanti.

1. Na puttā mātādīsu (Sāratthaḷī 1. 274 piṭṭhe.)

nānāvidharasmijālasamujjalavividhavaṇṇaratanavinaddhāni
 anekavidhamālākammalatākammabhittikammavicittāni
 sīsūpagagīvūpagahatthūpagakaṭūpagapādūpagāni sovaṇṇamayāni ābharaṇāni
 kapparukkhato olambanti. Tathā
 vīṇāmudiṅgapaṇavasammatālasaṅkhavaṃsavetālaparivādinīvallakīpabhutikā
 tūriyabhaṇḍāpi tato tato olambanti. Tattha bahū phalarukkhā kumbhamattāni
 phalāni phalanti madhurarasāni, yāni paribhuñjitvā te sattāhampi
 khuppiṇāsāhi na bādhīyanti.

Najjopi tattha suvisuddhajalā suppatitthā ramaṇīyā akaddamā vālukatalā
 nātisītā naccuṇhā surabhigandhīhi jalajapupphehi saṅchannā sabbakālaṃ
 surabhī vāyantiyo sandanti, na tattha kaṇṭakikā kakkhaḷagacchalatā honti,
 akaṇṭakā pupphaphalasangannā eva honti, candananāgarukkhā sayameva
 rasam paggharanti, nahāyitukāmā ca nadititthe ekajjham vatthābharaṇāni
 ṭhapetvā nadim otarivā nhatvā uttiṇṇuttiṇṇā upariṭṭhimam upariṭṭhimam
 vatthābharaṇam gaṇhanti, na tesam evam hoti “idaṃ mama, idaṃ parassā”ti.
 Tato eva na tesam koci viggaho vā vivādo vā. Sattāhikā eva ca nesam
 kāmaratikīlā hoti, tato vītarāgā viya vicaranti. Yattha ca rukkhe sayitukāmā
 honti, tattheva sayanam upalabbhati. Mate ca satte disvā na rodanti na
 socanti. Taṅca maṇḍayitvā nikkhipanti. Tāvadeva ca nesam tathārūpā
 sakuṇā upagantvā matam dīpantaram nenti, tasmā susānam vā asuciṭṭhānam
 vā tattha natthi, na ca tato matā nirayam vā tiracchānayanim vā
 pettivisayam vā upapajjanti. Dhammatāsiddhassa pañcasīlassa ānubhāvena
 te devaloke nibbantāntī vadanti. Vassasahassameva ca nesam sabbakālaṃ
 āyuppanānam, sabbametam tesam pañcasīlam viya dhammatāsiddhamevāti.

Tiṭṭhānasuttavaṇṇanā niṭṭhitā.

3. Taṇhāmūlakasuttavaṇṇanā

23. Tatiye **esanataṇhāti**¹ bhogānam pariyesanavasena pavattā taṇhā.
Esitataṇhāti pariyaṭṭhesu bhogesu uppajjamānataṇhā.

1. Dī-Ṭī 2. 98 piṭṭhādīsu passitabbam.

Paritassanavasena pariyesati etāyāti **pariyesanā**, āsayato payogato ca pariyesanā tathāpavatto cittuppādo. Tenāha “**taṇhāya sati hotī**”ti. **Rūpādi-ārammaṇappaṭilābhoti** savatthukānaṃ rūpādi ārammaṇānaṃ gavesanavasena paṭilābho. Yam¹ pana apariyiṭṭhaṃyeva labbhati, tampi atthato pariyesanāya laddhameva nāma tathārūpassa kammassa pubbekatattā eva labbhanato. Tenāha “**so hi pariyesanāya sati hotī**”ti.

Sukhavinicchayanti sukhaṃ visesato nicchinotīti sukhavinicchayo. Sukhaṃ sabhāvato samudayato atthaṅgamato ādīnavato nissaraṇato ca yāthāvato jānitvā pavattañāṇaṃva sukhavinicchayaṃ. **Jaññāti** jāneyya. “Subhaṃ sukhaṃ”ti-ādikaṃ ārammaṇe abhūtākāraṃ vividhaṃ ninnabhāvena cinoti āropetīti **vinicchayo**, assādānupassanā taṇhā. Diṭṭhiyāpi evameva vinicchayabhāvo veditabbo. Imasmim̃ pana sutte vitakkoyeva āgatoti yojanā. **Imasmim̃ pana sutteti** sakkapañhasutte². Tattha hi “chando kho devānaminda vitakkanidāno”ti² āgataṃ. **Idhāti** imasmim̃ sutte. **Vitakkeneva vinicchinantīti** etena “vinicchinati etenāti vinicchayo”ti vinicchayasaddassa karaṇasādhanamāha. **Ettakanti**-ādi vinicchayanākāradassanaṃ.

Chandanatṭhena chando, evaṃ rañjanatṭhena rāgoti **chandarāgo**. Svāyaṃ anāsevanatāya mando hutvā pavatto idhādhippetoti āha “**dubbalarāgassādhivacanan**”ti. **Ajjhosānanti** taṇhādiṭṭhivasena abhinivesanaṃ. “Mayhaṃ idan”ti hi taṇhāgāyo yebhuyyena attaggāhasannissayova hoti. Tenāha “**ahaṃ mamantī**”ti. **Balavasanniṭṭhānanti** ca tesam̃ gāhānaṃ thirabhāvappattimāha. **Taṇhādiṭṭhivasena pariggahakaraṇanti** ahaṃ mamanti balavasanniṭṭhānavasena abhiniviṭṭhassa attattaniyaggāhavatthuno aññāsādhāraṇaṃ viya katvā pariggahetvā ṭhānaṃ, tathāpavatto lobhasahagatacittuppādo. Attanā pariggahitassa vatthuno yassa vasena **parehi sādthāraṇabhāvassa** asahamāno hoti puggalo, so dhammo **asahanatā**. **Evaṃ vacanatthaṃ vadanti** niruttinayena. Saddalakkhaṇena pana yassa dhammassa vasena macchariyayogato puggalo

1. Gavesanavasena pavattiyam̃ (Ka)

2. Dī 2. 221 piṭṭhe.

maccharo, tassa bhāvo, kammaṃ vā **macchariyaṃ**, maccharo dhammo. Macchariyassa balavabhāvato ādarena rakkhaṇaṃ **ārakkhoti** āha “**dvāra -pa-suṭṭhu rakkhaṇaṃ**”ti.

Attano phalaṃ karotīti karaṇaṃ, yaṃ kiñci kāraṇaṃ. Adhikaṃ karaṇanti **adhikaraṇaṃ**, visesakāraṇaṃ. Visesakāraṇaṃca bhogaṇaṃ ārakkhadāṇḍādānādi-anatthasambhavassāti vuttaṃ “**ārakkhādhikaraṇaṃ**”ti-ādi. **Paranisedhanatthanti** māraṇādinā paresaṃ vibādhanatthaṃ. Ādiyanti etenāti ādānaṃ, daṇḍassa ādānaṃ **daṇḍādāna**, daṇḍaṃ āharitvā paraviheṭhanacittuppādo. **Satthādāne**pi eseva nayo. Hatthaparāmāsādivasena kāyena kātabbo kalaho **kāyakalaho**. Mammaghaṭṭanādivasena vācāya kātabbo kalaho **vācākalaho**. Virujjhanavasena virūpaṃ gaṇhāti etenāti **viggaho**. Viruddhaṃ vadati etenāti **vivādo**. “Tuvaṃ tuvaṃ”ti agāravavacanasahacaraṇato **tuvaṃtuvaṃ**. Sabbepi te tathāpavattadosasahagatā cittuppādā veditabbā. Tenāha bhagavā “**aneke pāpakā akusalā dhammā sambhavanti**”ti.

Taṇhāmūlakasuttavaṇṇanā niṭṭhitā.

4. Sattāvāsasuttādivaṇṇanā

24-25. Catutthe sattā āvasanti etesūti **sattāvāsā**, nānattasaññi-ādibhedā sattanikāyā. Yasmāte te sattanivāsā tappariyāpannānaṃ sattānaṃ tāya eva tappariyāpannatāya ādhāro viya vattabbaṃ arahanti. Samudāyācāro hi avayavassa yathā “rukkhe sākha”ti, tasmā “**sattānaṃ āvāsā, vasanaṭṭhānānīti attho**”ti vuttaṃ. **Suddhāvāsāpi sattāvāsova** “na so bhikkhave sattāvāso sulabharūpo, yo mayā anāvutthapubbo iminā dīghena addhunā aññatra suddhāvāsehi devehī”ti¹ vacanato. Yadi evaṃ te kasmā idha na gahikāti tattha kāraṇamāha “**asabbakālikattā**”ti-ādi. Vehapphalā pana catuttheyeva sattāvāse bhajantīti daṭṭhabbaṃ. Pañcamaṃ uttānameva.

Sattāvāsasuttādivaṇṇanā niṭṭhitā.

6. Silāyūpasuttavaṇṇanā

26. Chaṭṭhe pamānamajjhimassa purisassa catuvīsataṅguliko hattho **kukku**, “kakkū”tipi tasseva nāmaṃ. **Aṭṭha kukkū upari nemassāti** aṭṭha hatthā āvāssa upari uggantvā ṭhitā bhaveyyuṃ. Sesamettha uttānameva.

Silāyūpasuttavaṇṇanā niṭṭhitā.

7. Paṭhamaverasuttavaṇṇanā

27. Sattame¹ **yatoti** yasmim̄ kāle. Ayaṃ hi to-saddo dā-saddo viya idha kālavisaṃyo, yadāti vuttaṃ hoti. **Bhayāni verānīti** bhīyate **bhayaṃ**, bhayena yogā, bhāyitabbena vā bhayaṃ eva verappasavaṭṭhena **veranti** ca laddhanāmā cetanādayo. Pāṇātipātādayo hi yassa pavattanti, yañca uddissa pavattiyanti, ubhayesañca verāvahā, tato eva cete bhāyitabbā verasañjanakā nāmāti. Sotassa ariyamaggassa ādito pajjanaṃ paṭipatti adhiḡamo sotāpatti, tadatthāya tattha paṭiṭṭhitassa ca aṅgāni **sotāpattiyaṅgāni**. Duvidham² hi sotāpattiyaṅgaṃ sotāpatti-atthāya ca aṅgaṃ kāraṇaṃ, yaṃ sotāpattimaggaṇṇapaṭilābhato pubbabhāge sotāpattipaṭilābhāya saṃvattati, “sappurisasam̄sevo saddhammassavanaṃ yonisomanasikāro dhammānudhammapaṭipatti”³ti³ evaṃ āgataṃ. Paṭiladdhaguṇassa ca sotāpattim̄ patvā ṭhitassa aṅgaṃ, yaṃ “sotāpannassa aṅgaṃ”tipi vuccati “sotāpanno aṅgīyati ñāyati etenā”ti katvā, buddhe aveccappasādādīnaṃ etaṃ adhivacanaṃ. Idamidhādhippetaṃ.

Khīṇanirayoti-ādīsu āyatim̄ tattha anuppajjanatāya khīṇo nirayo mayhanti so ahaṃ khīṇanirayo. Esa nayo sabbattha. **Sotāpannoti** maggasotaṃ āpanno. **Avinipātadhammoti** na vinipātasabhāvo. **Niyatoti** paṭhamamaggasaṅkhātena sammattaniyāmena niyato. **Sambodhiparāyaṇoti** uparimaggattayasaṅkhāto sambodhi paraṃ

1. Saṃ-Ṭī 2. 84 piṭṭhepi passitabbaṃ.

2. Saṃ-Ṭītha 2. 67 piṭṭhedīsu passitabbaṃ.

3. Dī 3. 190 piṭṭhe.

ayanam mayhanti soham sambodhiparāyaṇo, sambodhim avassam abhisambujjhanakoti attho.

Pāṇātipātapaccayāti pāṇātipātakammassa karaṇahetu. **Bhayaṃ veranti** atthato ekam. Veram vuccati virodho, tadeva bhāyitabbato “bhayan”ti vuccati. Tañca panetaṃ duvidham hoti bāhiraṃ ajjhantikanti. Ekena hi ekassa pitā mārito hoti. So cinteti “etena kira me pitā mārito, ahampi tamyeva māressāmī”ti nisitaṃ sattham ādāya carati. Yā tassa abbhantare uppannā veracetanā, idam **bāhiraṃ veram** nāma tassa verassa mūlabhūtato verakārapuggalato bahibhāvattā. Yā pana itarassa “ayaṃ kira maṃ māressāmīti carati, ahameva naṃ paṭhamataram māressāmī”ti cetanā uppajjati, idam **ajjhantikam veram** nāma. Idam tāva ubhayampi diṭṭhadhammikameva. Yā pana taṃ niraye uppannam disvā “etaṃ paharissāmī”ti jalitaṃ ayamuggaram gaṇhantassa nirayapālassa cetanā uppajjati, idamassa samparāyikam bāhiraṃ veram. Yā cassa “ayaṃ niddosaṃ maṃ paharissāmīti āgacchati, ahameva naṃ paṭhamataram paharissāmī”ti cetanā uppajjati, idamassa samparāyikam ajjhantaṃ veram. Yam panetaṃ bāhiraṃ veram, taṃ aṭṭhakathāsu “puggalaveran”ti vuccati. **Dukkham domanassanti** atthato ekameva. Yathā cettha, evaṃ sesesupi “iminā mama bhaṇḍam haṭam, mayham dāresu cārittaṃ āpannam, musā vatvā attho bhaggo, surāmadamattena idam nāma katan”ti-ādinā nayena verappavatti veditabbā.

Aveccappasādenāti adhigatena acalappasādena. **Ariyakantehī**ti pañcahi sīlehi. Tāni hi ariyānam kantāni piyāni bhavanti, bhavantaragatāpi ariyā tāni na vijahanti, tasmā “ariyakantāni”ti vuccanti. Sesamettha yaṃ vattabham siyā, taṃ sabbam **visuddhimagge anussatiniddese**¹ vuttanti veditabham.

Paṭhamaverasuttavaṇṇanā niṭṭhitā.

1. Visuddhi 1. 215 piṭṭhe.

9. Āghātavatthusuttavaṇṇanā

29. Navame vasati ettha phalaṃ tannimittatāya pavattatīti **vatthu**, kāraṇanti āha “**āghātavatthūnī**”ti. Kopo nāmāyaṃ yasmim vatthusmim uppajjati, na tattha ekavārameva uppajjati, atha kho punapi uppajjatevāti vuttaṃ “**bandhati**”ti. Atha vā yo paccayavisesena uppajjamāno āghāto savisaye baddho viya na vigacchati, punapi uppajjateva. Taṃ sandhāyāha “**āghātam bandhati**”ti. Taṃ panassa paccayavasena nibbattanam uppādanamevāti vuttaṃ “**uppādeti**”ti.

Āghātavatthusuttavaṇṇanā niṭṭhitā.

10. Āghātaṭṭhavinayasuttavaṇṇanā

30. Dasame **taṃ kutettha labbhāti** ettha **tanti** kiriyāparāmasanam. Padajjhāhārena ca attho veditabboti “**taṃ anattacaraṇam mā ahoṣī**”ti-ādimāha. **Kena kāraṇena laddhabbam** niratthakabhāvato. Kammassakā hi sattā. Te kassa ruciyā dukkhitā sukhitā vā bhavanti, tasmā kevalam tasmim mayham anattacaraṇam, taṃ kutettha labbhāti adhippāyo. Atha vā **taṃ kopakāraṇam ettha puggale kuto labbhā** paramatthato kujjhitabbassa kujjhanakassa ca abhāvato. Saṅkhāramattañhetam, yadidaṃ khandhapañcakam yaṃ “satto”ti vuccati, te saṅkhārā ittarakhaṇikā, kassa ko kujjhatīti attho. **Lābhā nāma ke siyurū** aññatra anattuppattito.

Āghātaṭṭhavinayasuttavaṇṇanā niṭṭhitā.

11. Anupubbanirodhasuttavaṇṇanā

31. Ekādasame **anupubbanirodhāti** anupubbena anukkamena pavattettabbanirodhā. Tenāha “**anupaṭipāṭinirodhā**”ti.

Anupubbanirodhasuttavaṇṇanā niṭṭhitā.

Sattāvāsavaggavaṇṇanā niṭṭhitā.

4. Mahāvagga

1. Anupubbavihārasuttavaṇṇanā

32. Catutthassa paṭhame anupubbato viharitabbāti **anupubbavihārā**. **Anupaṭipāṭiyā**ti anukkamena. **Samāpajjitabbavihārā**ti samāpajjitvā samaṅgino hutvā viharitabbavihārā.

Anupubbavihārasuttavaṇṇanā niṭṭhitā.

2. Anupubbavihārasamāpattisuttādivaṇṇanā

33-34. Dutiye chātāṃ vuccati taṇhādiṭṭhiyo kāmānaṃ pātabbato tāsam vasena vattanato, tanninnattā natthi etesu chātanti **nicchātā**. Tenāha “**taṇhādiṭṭhicchātānan**”ti-ādi. Tatiye natthi vattabbaṃ.

Anupubbavihārasamāpattisuttādivaṇṇanā niṭṭhitā.

4. Gāvīupamāsuttavaṇṇanā

35. Catutthe **pabbatacārini**ti pakatiyā pabbate bahulacārini. **Akhettaññū**¹ agocaraññū. Samādhiparipanthānaṃ visodhanānabhiññatāya **bālo** Jhānassa paguṇabhāvāpādanaveyyattiyassa abhāvena **abyatto**. Uparijhānassa padaṭṭhānabhāvānavabodhena **akhettaññū**. Sabbathāpi samāpattikosallābhāvena **akusalo**. Samādhinimittassa vā anāsevanāya **bālo**. Abhāvanāya **abyatto**. Abahulīkārena **akhettaññū**. Sammadeva anadhiṭṭhānato **akusaloti** yojetabbaṃ. **Ubhato bhaṭṭhoti** ubhayato jhānato bhaṭṭho. So hi appaguṇatāya na suppaṭiṭṭhitatāya sa-ussāhopi vināsato asāmatthiyato ca jhānadvayato parihīno.

Gāvīupamāsuttavaṇṇanā niṭṭhitā.

1. Visuddhi-Ṭī 1. 178 piṭṭhepi passitabbaṃ.

5. Jhānasuttavaṇṇanā

36. Pañcame **aniccatoti** iminā niccappaṭikkhepatō tesam aniccatamāha. Tato eva udayavayavantato vipariṇāmato tāvakālikato ca te aniccāti jotitaṃ hoti. Yaṃ hi niccaṃ na hoti, taṃ udayavayaparicchinnajarāya maraṇena cāti dvedhā vipariṇataṃ ittarakkhaṇameva ca hoti. **Dukkhatoti** na sukhato. Iminā sukhappaṭikkhepatō tesam dukkhatamāha. Tato eva ca abhiṇhappaṭipīlanato dukkhavattthuto ca te dukkhāti jotitaṃ hoti. Udayavayavantatāya hi te abhiṇhappaṭipīlanato nirantaradukkhātāya dukkhasseva ca adhiṭṭhānabhūtā. Paccayayāpanīyatāya rogamūlatāya ca **rogato**. Dukkhatāsūlayogato kilesāsucipaggharato uppādajarābhaṅgehi uddhumātapakkabhijjanato ca **gaṇdato**. Pīlājananato antotudanato dunnīharaṇato ca **sallato**. Avaḍḍhi-āvahanato aghavattthuto ca **aghato**. Aseribhāvajanato ābādhappaṭiṭṭhānatāya ca **ābādhato**. Avasavattanato avidheyyatāya ca **parato**. Byādhijarāmarañehi palujjanīyatāya **palokato**. Sāminivāsikāravēdaka-adhiṭṭhāyaka virahato **suññato**. Atthappaṭikkhepaṭṭhena **anattato**. Rūpādīdhammāpi yathā na ettha attā atthīti **anattā**, evaṃ sayampi attā na hontīti **anattā**. Tenā abyāpārato nirīhato tucchato anattāti dīpitaṃ hoti.

Lakkhaṇattayameva sukhāvabonetthaṃ ekādasahi padehi vibhajitvā gahitanti dassetuṃ “**yasmā aniccato**”ti-ādi vuttaṃ. **Antosamāpattiyanti** samāpattīnaṃ sahaṇatāya samāpattīnaṃ abhantare cittaṃ paṭisaṃharatīti tappaṭibaddhachandarāgādīkilesavikkhambhanena vipassanācittaṃ paṭisaṃharati. Tenāha “**moceti apanetī**”ti. **Savanavasenāti** “sabbasaṅkhārasamatho”ti-ādinā savanavasena. **Thutivasenāti** tatheva thomanāvasena guṇato saṅkittanavasena. **Pariyattivasenāti** tassa dhammassa pariyaṇāpanavasena. **Paññattivasenāti** tadatthassa paññāpanavasena. Ārammaṇakaraṇavaseneva upasaṃharati maggacittaṃ, “etaṃ santan”ti-ādi pana avadhāraṇanivattitattadassanaṃ. Yathā vipassanā “etaṃ santan etaṃ paṇītan”ti-ādinā asaṅkhatāya dhātuyā cittaṃ upasaṃharati, evaṃ maggo nibbānaṃ sacchikiriyābhisamayavasena abhisamento tatha labbhamāne sabbepi

visese asammohato paṭivijjhanto tattha cittaṃ upasaṃharati. Tenāha “**iminā pana ākārenā**”ti-ādi.

So tattha ṭhitoti so adandhavipassako yogī tattha tāya aniccādilakkhaṇattayārammaṇāya vipassanāya ṭhito. **Sabbasoti** sabbattha tassa tassa maggassa adhigamāya nibbattitasamathavipassanāsu. **Asakkonto anāgāmī hotīti** heṭṭhimamaggāvahāsu eva samathavipassanāya chandarāgam pahāya aggamaggāvahāsu nikantiṃ pariyādātuṃ asakkonto anāgāmitāyameva saṅṭhāti.

Samatikkantattāti samathavasena vipassanāvasena cāti sabbathāpi rūpassa samatikkantattā. Tenāha “**ayaṃ hī**”ti-ādi. **Anenāti** yoginā. **Taṃ atikkammāti** idaṃ yo paṭhamam pañcavokāra-ekavokārapariyāpanne dhamme sammadeva sammāsivā te vissajjetvā tato arūpasamāpattim samāpajjitvā arūpadhamme sammāsati, taṃ sandhāya vuttam. Tenāha “**idāni arūpaṃ sammāsati**”ti.

Jhānasuttavaṇṇanā niṭṭhitā.

6. Ānandasuttavaṇṇanā

37. Chaṭṭhe okāsaṃ avasaraṃ adhigacchati etenāti **okāsādhigamo**, maggaphalasukhādigamāya okāsabhāvato vā okāso, tassa adhigamo **okāsādhigamo**. Ettha ca dīghanikāyeneva¹ pana suttantadesanāyam paṭhamajjhānaṃ, catutthajjhānaṃ, arahattamaggoti tayo okāsādhigamā āgatā. Tattha² paṭhamam jhānaṃ pañca nīvaraṇāni vikkhambhetvā attano okāsaṃ gahetvā tiṭṭhatīti “**paṭhamo okāsādhigamo**”ti vuttam. Catutthajjhānaṃ pana sukhadukkhaṃ vikkhambhetvā attano okāsaṃ gahetvā tiṭṭhatīti **dutiyo okāsādhigamo**. Arahattamaggo sabbakilese vikkhambhetvā attano okāsaṃ gahetvā tiṭṭhatīti “**tatiyo okāsādhigamo**”ti vutto. Idha pana vakkhamānāni tīṇi arūpajjhānāni sandhāya “**okāsādhigamo**”ti vuttam. Tesāmyeva ca gahaṇe kāraṇam sayameva vakkhati.

1. Dī 2. 173 piṭṭhe.

2. Dī-Ṭṭha 2. 236-7 piṭṭhesu.

Sattānaṃ visuddhiṃ pāpanatthāyāti rāgādīhi malehi abhiṃhāvisamalobhādīhi ca upakkilesehi kiliṭṭhacittānaṃ sattānaṃ visuddhipāpanatthāya samatikkamanatthāya. Āyatim anuppajjanaṃ hi idha “samatikkamo”ti vuttaṃ. **Atthaṃ gamanatthāyāti** kāyikadukkhassa ca cetasikadomanassassa cāti imesaṃ dvinnaṃ atthaṅgamāya, nirodhāyāti attho. Ñāyati nicchayena kamati nibbānaṃ, taṃ vā ñāyati paṭivijjhīyati etenāti **ñāyo**, samuccheda bhāvo ariyamaggoti āha “**sahavipassanakassa maggassā**”ti. **Paccakkhakarānatthāyāti** attapaccakkhatāya. Parapaccayena vinā paccakkhakarānaṃ hi “sacchikiriyā”ti vuccati. **Asambhinnanti** pittasemhādīhi apalibuddhaṃ anupahataṃ.

Rāgānugato samādhi **abhinato** nāma hoti ārammaṇe abhimukhābhāvena pavattiyā, dosānugato pana **apanato** apagamānavasena pavattiyā, tadubhayappaṭikkhepena “**na cābhinato na cāpanato**”ti vuttanti āha “**rāgavasena**”ti-ādi. **Na sasaṅkhāraniggayhavāritagatoti** lokiyaṃ jhānacittāni viya na sasaṅkhārena sappayogena tadaṅgappahānavikkhambhanappahānavasena ca niggahetvā vāretvā ṭhito. Kiñcaraṃhi kilesānaṃ chinnante uppanno. Tathābhūtaṃ phalasaṃmādhim sandhāyetaṃ vuttaṃ. Tenāha “**na sasaṅkhārena -pa- chinnante uppanno**”ti.

Ānandasuttavaṇṇanā niṭṭhitā.

7. Lokāyatikasuttavaṇṇanā

38. Sattame **lokāyatavādakā**ti āyatim hitaṃ loko na yatati na viruhati etenāti lokāyataṃ, vitaṇḍasatthaṃ. Taṃ hi ganthaṃ nissāya sattā puññakiriyāya cittampi na uppādenti, taṃ vadantīti **lokāyatavādakā**.

Daḷhaṃ thiraṃ dhanu etassāti daḷhadhanvā¹, so eva “**daḷhadhammā**”ti vutto. Paṭisattuvidhamanattaṃ dhanuṃ gaṇhātīti **dhanuggaho**. So eva usum saraṃ asati khipatīti **issāso**. **Dvisahassathāmanti** lohādibhāraṃ vahitum samatthaṃ dvisahassathāmaṃ. Tenāha “**dvisahassathāmaṃ nāmā**”ti-ādi. **Daṇḍeti** dhanudaṇḍe. **Yāva kaṇḍappamāṇāti** dīghato yattakaṃ kaṇḍassa pamāṇaṃ,

1. Am-Ṭī 2. 302; Sam-Ṭī 1. 159 piṭṭhesupi passitabbari.

tatthake dhanudaṇḍe ukkhittamatte āropitesuyeveva jiyādaṇḍesu so ce bhāro pathavito muccati, evaṃ idaṃ dvisahassathāmaṃ nāma dhanūti daṭṭhabbaṃ. **Uggahitasippoti** uggahitadhanusippo. **Katahatthoti** thiratarāṃ lakkhesu avirajjhanasarakkhepo. Īdiso pana tattha vasibhūto **katahattho** nāma hotīti āha “**ciṇṇavasibhāvo**”ti. Kataṃ rājakulādīsu upecca asanaṃ etena so **katūpāsanoti** āha “**rājakulādīsu dassitasippo**”ti. **Evaṃ katanti** evaṃ antosusirakaraṇādinā sallahukaṃ kattaṃ.

Lokāyatikasuttavaṇṇanā niṭṭhitā.

8. Devāsurasāṅgāmasuttādivaṇṇanā

39-40. Aṭṭhame **abhiyimsūti** kadā abhiyimsu? Yadā balavanto ahesuṃ, tadā. Tatrāyamanupubbikathā¹—sakko kira magadharaṭṭhe macalagāmake magho nāma māṇavo hutvā tettiṃsa purise gahetvā kalyāṇakammaṃ karonto satta vatapadāni pūretvā tattha kālakato devaloke nibbatti. Taṃ balavakammānubhāvena sapaṛisaṃ sesadevatā dasahi ṭhānehi adhigaṇhantaṃ disvā “āgantukadevaputtā āgatā”ti nevāsikā gandhapānaṃ sajjayimsu. Sakko sakaparasāya saññaṃ adāsi “mārisā mā gandhapānaṃ pivittha, pivanākāramattameva dassethā”ti. Te tathā akaṃsu. Nevāsikadevatā suvaṇṇasarakhehi upanītaṃ gandhapānaṃ yāvadatthaṃ pivitvā mattā tattha tattha suvaṇṇapathaviyaṃ patitvā sayimsu². Sakko “gaṇhatha puttahatāya putte”ti te pādesu gahetvā sinerupāde khipāpesi. Sakkassa puññatejena tadanuvattakāpi sabbe tattheva patimsu. Te sineruvemajjhakāle saññaṃ labhitvā “tātā suraṃ na pivimha, suraṃ na pivimhā”ti āhaṃsu. Tato paṭṭhāya **asurā** nāma jātā. Atha nesaṃ kammaṇṇapaccaya-utusamuṭṭhānaṃ sinerussa hetṭhimatale dasayojanasahassaṃ asurabhavanaṃ nibbatti. Sakko tesāṃ nivattitvā anāgamanatṭhāya ārakkhaṃ ṭhapesi. Yaṃ sandhāya vuttaṃ—

1. Saṃ-ṭṭha 1. 309; Sārattha-ṭṭi 1. 270 piṭṭhādīsupi passitabbaṃ. 2. Saṅkasāyimsu (Ka)

“Antarā dvinnam̐ ayujjhapurānam̐,
 Pañcavidhā ṭhapitā abhirakkhā.
 Uruga karoṭi payassa ca hārī,
 Madanayutā caturo ca mahatthā”ti¹.

Dve nagarāni hi yuddhena gahetuṃ asakkuṇeyyatāya **ayujjhapurāni** nāma jātāni devanagaraṇca asuranagaraṇca. Yadā hi asurā balavanto honti, atha devehi palāyitvā devanagaraṃ pavisitvā dvāre pidahite asurānaṃ sataśahassampi kiñci kātuṃ na sakkoti. Yadā devā balavanto honti, athāsurehi palāyitvā asuranagaraśśa dvāre pidahite sakkānaṃ sataśahassampi kiñci kātuṃ na sakkoti. Iti imāni dve nagarāni ayujjhapurāni nāma. Tesam̐ antarā etesu uragādīsu pañcasu ṭhānesu sakkena ārakkhā ṭhapitā. Tattha **uragasaddena** nāgā gahitā. Te hi udake balavanto honti, tasmā sinerussa paṭhamālinde etesam̐ ārakkhā. **Karoṭisaddena** supañṇā gahitā. Tesam̐ kira karoṭi nāma pānabhojanaṃ, tena taṃ nāmaṃ labhiṃsu, dutiyālinde tesam̐ ārakkhā. **Payassahārisaddena** kumbhaṇḍā gahitā, dānavarakkhasā kira te, tatiyālinde tesam̐ ārakkhā. **Madanayutasaddena** yakkhā gahitā. Visamacārino kirate yujjhasoṇḍā, catutthālinde tesam̐ ārakkhā. **Caturo ca mahatthā**ti cattāro mahārājāno vuttā, pañcamālinde tesam̐ ārakkhā, tasmā yadī asurā kupitāvilacittā devapuraṃ upayanti yujjhituṃ. Yaṃ girino paṭhamam̐ paribhaṇḍam̐, taṃ uragā paṭibāhayanti. Evaṃ sesesu sesā.

Te pana asurā āyuvaṇṇayasa-issariyasampattīhi tāvatīmsasadisāva, tasmā antarā attānaṃ ajānitvā pāṭaliyā pupphitāya “na idaṃ devanagaraṃ, tattha pāricchattako pupphati, idha pana cittapāṭalī, jarasakkenāmhākam̐ suram̐ pāyevtvā vañcitā, devanagaraṇca no gahitaṃ, gacchāma, tena saddhiṃ yujjhissāmā”ti hatthi-assarathe āruyha suvaṇṇarajatamaṇiphalakāni gahetvā yuddhasajjā hutvā asurabheriyo vādentā mahāsamudde udakam̐ dvidhā bhetvā uṭṭhahanti. Te deve vuṭṭhe

1. Saṃ-Ṭṭha 1. 309 piṭṭhepi.

vammikamakkhikā vammikaṃ viya sineruṃ āruhituṃ ārabhanti. Atha nesaṃ paṭhamāṃ nāgehi saddhiṃ yuddhaṃ hoti. Tasmiṃ kho pana yuddhe na kassaci chavi vā cammaṃ vā chijjati, na lohitaṃ uppajjati, kevalaṃ kumārakānaṃ dārumeṇḍakayuddhaṃ viya aññaṃaññasantāsanamattameva hoti. Koṭisatāpi koṭisahassāpi nāgā tehi saddhiṃ yujjhivā te asurapurāmyeva pavesetvā nivattanti. Yadā pana asurā balavanto honti, atha nāgā osakkivā dutiye ālinde supaṇṇehi saddhiṃ ekatova hutvā yujjhanti. Esa nayo supaṇṇādīsupi. Yadā pana tāni pañcapi ṭhānāni asurā maddanti, tadā ekato sampi ṇḍitānipi tāni pañca balāni osakkanti. Atha cattāro mahārājāno gantvā sakkassa taṃ pavattiṃ ārocenti. Sakko tesāṃ vacanaṃ sutvā diyaddhayaḥjanasatikāṃ vejayantarathaṃ āruya sayāṃ vā nikkhamati, ekaṃ puttaṃ vā peseti. Yadā devā puna apaccāgamanāya asure jinimsu, tadā sakko asure palāpetvā pañcasu ṭhānesu ārakkhaṃ datvā vediyapāde vajirahatthā indapaṭimāyo ṭhapesi. Asurā kālena kālaṃ utṭhahivā paṭimāyo disvā “sakko appamatto tiṭṭhatī”ti tatova nivattanti. Idha pana yadā asurānaṃ jayo ahosi, devānaṃ parājayo, taṃ sandhāyetaṃ vuttaṃ “parājitā ca bhikkhave devā apayimsu yeva uttarenābhimukhā, abhiyimsu asurā”ti.

Dakkhinābhimukhā hutvāti cakkavāḷapabbatābhimukhā hutvā. Asurā kira devehi parājitā palāyantā cakkavāḷapabbatābhimukhaṃ gantvā cakkavāḷamahāsamuddapiṭṭhiyaṃ rajatapattavaṇṇe vālikāpuline yattha paṇṇakuṭiyo māpetvā isayo vasanti, tattha gantvā isīnaṃ assamapadena gacchantā “sakko imehi saddhiṃ mantetvā amhe nāseti, gaṇhatha puttahatāya putte”ti kupitā assamapadepānīyaghaṭacaṅkamanapaṇṇasālādīni viddhaṃsenti. Isayo araṇṇato phalāphalaṃ ādāya āgatā disvā puna dukkhena paṭipākatikāṃ karonti, tepi punappunaṃ tatheva parājitā gantvā vināsenti. Tena vuttaṃ “parājitā ca kho bhikkhave asurā apayimsu yeva dakkhiṇenābhimukhā”ti. Navamaṃ uttānatthameva.

Devāsurasāṅgāmasuttādivaṇṇanā niṭṭhitā.

10. Tapussasuttavaṇṇanā

41. Dasame **pakkhandatī**ti pavisati. **Pasīdatī**ti pasādaṃ abhiruciṃ āpajjati, paṭiṭṭhāti vumuccatīti attho. **Kathāpābhatanti** kathāya mūlaṃ. Mūlaṃ hi “pābhatan”ti vuccati. Yathāha—

“Appakenapi medhāvī, pābhatena vicakkhaṇo.
Samuṭṭhāpeti attānaṃ, aṇuṃ aggaṃ va sandhaman”ti¹.

Tenevāha “**kathāpābhatanti kathāmūlan**”ti. Vitakkaggahaṇeneva taṃsahacarito vicāropi gahito. Tenevettha bahuvacananiddeso katoti āha “**vitakkesūti vitakkavicāresū**”ti.

Tapussasuttavaṇṇanā niṭṭhitā.

Mahāvaggavaṇṇanā niṭṭhitā.

5. Sāmaññaṃavagga

1. Sambādhasuttādivaṇṇanā

42-51. Aṭṭhamassa paṭhame **udāyī**ti tayo therā udāyī nāma kāḷudāyī lāḷudāyī mahā-udāyīti, idha kāḷudāyī adhippetoti āha “**udāyīti kāḷudāyitthero**”ti. **Sambādheti** sampīḷitatanhāsaṃkilesādinā sa-uppīlanatāya paramasambādhe. Ativiya saṅkaraṭṭhānabhūto hi nīvaraṇasambādho adhippeto. **Okāso**ti jhānassetam nāmaṃ. Nīvaraṇasambādhabhāvena hi jhānaṃ idha “okāso”ti vuttam. **Paṭilīnanisabhoti** vā paṭilīno hutvā seṭṭho, paṭilīnaṃ vā seṭṭhoti **paṭilīnanisabho**. Paṭilīnā nāma pahīnamānā vuccanti mānussayavasena uṇṇatābhāvato. Yathāha “kathaṅca bhikkhave bhikkhu paṭilīno hoti? Idha bhikkhave bhikkhuno asmimāno pahīno hoti ucchinnamūlo tālavatthukato anabhāvaṃgato āyatim anuppādadhammo”ti². Sesam sabbattha uttānameva.

Sambādhasuttādivaṇṇanā niṭṭhitā.

Iti manorathapūraṇiyā aṅguttaranikāyaṭṭhakathāya

Navakanipātavaṇṇanāya anuttānatthadīpanā samattā.

1. Khu 5. 2 piṭṭhe Jātake.

2. Am 1. 350; Khu 7. 172 piṭṭhesu.

Dasakanipāta

1. Paṭhamapaṇṇāsaka

1. Ānisamsavagga

1. Kimitthiyasuttavaṇṇanā

1. Dasakanipātassa paṭhame **avippaṭisārathānīti** avippaṭisārappayojanāni. **Avippaṭisārānisamsānīti** avippaṭisārudayāni. Etena avippaṭisāro nāma sīlassa udayamattam, samvaddhitassa rukkhassa chāyāpupphasadisam, añño eva paṇānena nipphādetabbo samādhi-ādiguṇoti dasseti. “Yāva maggāmaggañānadassanavisuddhi, tāva taruṇavipassanā”ti hi vacanato upakkilesavimutta-udayabbayañāṇato param ayañca vipassanā virajjanti yogāvacaro viratto puriso viya bhariyāya saṅkhārato¹ etenāti virāgo.

Kimitthiyasuttavaṇṇanā niṭṭhitā.

2. Cetanākaraṇīyasuttādivaṇṇanā

2-5. Dutiye saṃsāramahogghassa paratīrabhāvato yo nam adhigacchati, tam pāreti gametīti **pāram**, nibbānam. Tabbidūratāya natthi ettha pāranti **apāram**, saṃsāro. Tenāha “**orimatīrabhūtā tebhūmakavattā**”ti-ādi. tatiyādīsu natthi vattabban.

Cetanākaraṇīyasuttādivaṇṇanā niṭṭhitā.

6. Samādhisuttavaṇṇanā

6. Chaṭṭhe **santam santanti appetvā nisinnassāti**-ādīsu santam santam paṇītam paṇītanti-ādīni vadati. Iminā pana ākārena tam paṭivijjhivā

1. Virajjatto puriso viya bhayasaṅkhārako (Ka)

tattha cittaṃ upasaṃharato phalasaṃpattisaṅkhāto cittuppādo tathā pavattatīti veditaḃbo. Sesāṃ sabbattha uttānameva.

Samādhisuttavaṇṇanā niṭṭhitā.

Ānisaṃsavaggavaṇṇanā niṭṭhitā.

2. Nāthavagga

1. Senāsanasuttādivaṇṇanā

11-14. Dutiyassa paṭhame **nātidūranti** gocaraṭṭhānato aḍḍhagāvutato orabhāgatāya nātidūraṃ. **Nāccāsannanti** pacchimena pamāṇena gocaraṭṭhānato pañcadhanusatikatāya na ati-āsannaṃ. Tāya ca pana nātidūranāccāsannatāya gocaraṭṭhānapaṭiparissayādirahitamaggatāya ca gamanassa ca āgamanassa ca yuttarūpattā **gamaṇāgamanasampannaṃ**. Divasabhāge mahājanasaṃkiṇṇatābhāvena **divā appākiṇṇaṃ**. Abhāvattho hi ayaṃ **appa-saddo** “appiccho”ti-ādīsu viya. Rattiyaṃ manussasaddābhāvena **rattim appasaddaṃ**. Sabbadāpi janasaṃnipātanigghosaḃbhāvena **appanigghosaṃ**.

Appakasireṇāti akasireṇa sukheṇeva. Sīlādiguṇānaṃ thiraḃbhāvappattiyā **therā**. Suttageyyādi bahu suttaṃ etesanti **bahussutā**. Tamuggahadhāraṇena¹ sammadeva garūnaṃ santike āgamitabhāvena ca āgato pariyaṭṭidhammasaṅkhāto āgamo etesanti **āgatāgama**. Suttābhidhammasaṅkhātassa dhammassa dhāraṇena **dhammadharā**. Vinayassa dhāraṇena **vinayadharā**. Tesāṃ dhammavinayānaṃ mātikāya dhāraṇena **mātikādhara**. Tattha tattha dhammaparipucchāya **paripucchati**. Atthaparipucchāya **paripaṇḥati** vīmaṃsati vicāreti. **Idaṃ bhante kathaṃ, imassa ko attho**ti paripucchāparipaṇḥakāradassanaṃ. **Avivaṭaṇṇeva** pāṭiyā atthaṃ padesantarapāḷidassanaṇa āgamato **vivaranti**. **Anuttānikataṇca** yuttivibhāvanena **uttānimaḃkaronti**. **Kaṅkhāthāniyesu dhammesu** saṃsayuppattiyā hetutāya gaṇṭhiṭṭhānabhūtesu pāḷippadesesu yāthāvato vinicchayappadāṇena **kaṅkhaṃ paṭivinodenti**.

1. Vācuggatakaraṇena (Ka)

Ettha ca nātidūraṃ nāccāsannaṃ gamanāgamanasampannanti ekaṃ aṅgaṃ, divā appākiṇṇaṃ rattiṃ appasaddaṃ appanigghosanti ekaṃ, appaḍamsamakasavātā tapasarīsapasamphassanti ekaṃ, tasmim kho pana senāsane viharantassa -pa- parikkhārāti ekaṃ, tasmim kho pana senāsane therā -pa- kaṅkhaṃ paṭivinodentīti ekaṃ. Evaṃ pañca aṅgāni veditabbāni. Dutiyādīni uttānatthāni.

Senāsanasuttādivaṇṇanā niṭṭhitā.

5. Appamādasuttādivaṇṇanā

15-16. Pañcame **kārāpaka-appamādo** nāma “ime akusalā dhammā pahātabbā, ime kusalā dhammā upasampādetabbā”ti taṃtaṃparivajjetabbavajjanasampādetabbasampādanavasena pavatto appamādo. **Esāti** appamādo. **Lokiyova** na lokuttaro. **Ayañcāti** ca **esāti** ca appamādameva vadati. **Tesanti** cātubhūmakadhammānaṃ. **Paṭilābhakattenāti** paṭilābhāpanakattena.

Jaṅgalānanti jaṅgalacārīnaṃ. Jaṅgala-saddo cettha kharabhāvasāmaññaṃ pathavīpariyāyo, na anupaṭṭhānavidūradesavācī. Tenāha “**pathavītalacārīnaṃ**”ti. Padānaṃ vuccamānattā “**sapādakapāṇānaṃ**”ti visesetvā vuttaṃ. **Samodhānanti** antogadhabhāvaṃ. Tenāha “**odhānaṃ pakkhepan**”ti. “Upakkhepan”tipi paṭhanti, upanetvā pakkhipitabbanti attho. Vassikāya pupphaṃ **vassikaṃ** yathā “āmalakiyā phalaṃ āmalakan”ti. **Mahātala**sminti uparipāsāde. Chaṭṭhaṃ uttānameva.

Appamādasuttādivaṇṇanā niṭṭhitā.

7. Paṭhamanāthasuttādivaṇṇanā

17-18. Sattame yehi sīlādīhi samannāgato bhikkhu dhammasaraṇatāya dhammeneva nāthati āsīsati¹ abhibhavatīti nātho vuccati,

1. Īsati (Ka)

te tassa nāthabhāvakarā dhammā **nāthakaraṇā**ti vuttāti āha “**attano sanāthabhāvakarā paṭiṭṭhakarāti attho**”ti. Tattha **attano paṭiṭṭhakarā**ti yassa nāthabhāvakarā, tassa attano paṭiṭṭhāvīdhāyino. Appaṭiṭṭho anātho, sappatiṭṭho sanāthoti paṭiṭṭhattho nātha-saddo. Kalyāṇaguṇayogato kalyāṇāti dassento “**sīlādiguṇasampannā**”ti āha. Mijjanalakkhaṇā mettā etassa atthīti **mitto**. So vuttanayena kalyāṇo assa atthīti tassa atthitāmattam kalyāṇamittapadena vuttam. Assa tena sabbakālam avijahitavāsoti tam dassetuṃ “kalyāṇasahāyo”ti vuttanti āha “**tevassā**”ti. **Te eva** kalyāṇamittā **assa** bhikkhuno. **Saha ayanatoti** saha pavattanato. Asamodhāne cittena, samodhāne pana cittena ceva kāyena ca **sampavaṅko**. Sukham vaco etasmim anukūlagāhimhi ādaragāravavati puggaleti **suvaco**. Tenāha “**sukhena vattabbo**”ti-ādi. **Khamoti** khanto. Tamevassa khamabhāvam dassetuṃ “**gāḷhenā**”ti-ādi vuttam. **Vāmatoti** micchā, ayoniso vā gaṇhāti. **Paṭippharāti** paṭaṇṇikabhāvena tiṭṭhati. **Padakkhiṇam gaṇhātīti** sammā, yoniso vā gaṇhāti.

Uccāvacānīti vipulakhuddakāni. **Tatrupagamanīyāyāti** tatra tatra mahante khuddake ca kamme sādhanavasena upāyena upagacchantiyā, tassa tassa kammassa nipphādane samatthāyāti attho. **Tatrupāyāyāti** vā tatra tatra kamme sādhetabbe upāyabhūtāya.

Dhamme assa kāmoti dhammakāmoti byadhikaraṇānampi bāhirattho samāso hotīti katvā vuttam. Kāmetabbato vā piyāyitabbato kāmo, dhammo. dhammo kāmo assāti **dhammakāmo**. **Dhammoti** pariyattidhammo adhippetoti āha “**tepiṭakam buddhavacanam piyāyatīti attho**”ti. Samudāharaṇam kathanam samudāhāro, piyo samudāhāro etassāti **piyasamudāhāro**. **Sayañcāti** ettha **ca**-saddena “sakkaccan”ti padaṃ anukaḍḍhati, tena sayañca sakkaccam desetukāmo hotīti yojanā. **Abhidhammo satta pakaraṇāni** “adhiko abhivisiṭṭho ca pariyattidhammo”ti katvā. **Vinayo**

ubhatovibhaṅgā vinayanato kāyavācānaṃ. **Abhivinayo khandhakaparivārā** visesato ābhisamācārikadharmakittanato.

Ābhisamācārikadharmapāripūrivaseneva hi ādibrahmacariyakadharmapāripūrī. **Dhammo eva** piṭakadvayassapi pariyaṭṭidhammabhāvato. **Maggaphalāni abhidhammo** “nibbānadhammassa abhimukho”ti katvā. **Kilesavūpasamakaraṇaṃ** pubbhāgiyā tisso sikkhā saṅkhepato vivaṭṭanissito samatho vipassanā ca. **Uḷārapāmojjoti** balavapāmojjo. **Kāraṇattheti** nimittatthe. Kusaladhammanimittam hissa vīriyārambho. Tenāha “**tesaṃ adhiḡamatthāyā**”ti. **Kusalesu dhammesūti** vā nipphādetabbe bhummaṃ yathā “cetaso avūpasame ayonisomanasikārapadaṭṭhānaṃ”ti. Aṭṭhame natthi vattabbaṃ.

Paṭhamaṇāthasuttādivaṇṇanā niṭṭhitā.

9. Paṭhama-ariyāvāsasuttavaṇṇanā

19. Navame ariyānaṃ eva āvāsāti **ariyāvāsā**¹ anariyānaṃ tādisānaṃ asamabhavato. **Ariyāti** cettha ukkaṭṭhaniddesena khīṇāsavāgahitā. Te ca yasmā tehi sabbakālaṃ avijahitavāsā² eva, tasmā vuttam “**te³ āvasimsu āvasanti āvasissanti**”ti. Tattha **āvasimsūti** nissāya āvasimsu. Pañcaṅgavippahīnatādayo hi ariyānaṃ apassayā. Tesu pañcaṅgavippahānapaccekasaccapanodana-esanā-osaṭṭhāni, “saṅkhāyekaṃ paṭisevati, adhivāseti parivajjeti vinodeti”ti⁴ vuttesu apassenesu vinodanaṅca maggakiccāneva, itare maggena ca samijjhantīti.

Paṭhama-ariyāvāsasuttavaṇṇanā niṭṭhitā.

10. Dutīya-ariyāvāsasuttavaṇṇanā

20. Dasame kasmā pana bhagavā kurūsu viharanto imaṃ suttam abhāsīti āha “**yasmā**”ti-ādī. Kururaṭṭham kira tadā tannivāsisattānaṃ

1. Ariyānaṃ eva vāsāti ariyāvāsā (Ka) 2. Avirahitavāsā (Ka) 3. Ariyā eva (Ka)
4. Dī 3. 187; Ma 2. 127; Aṃ 3. 280 piṭṭhesu.

yonisomanasikāravantatādinā yebhuyyena suppaṭipannatāya pubbe ca katapuññatābalena vā tadā utu-ādisampattiyuttameva ahoṣi. Keci pana “pubbe pavattakuruvattadhammānuṭṭhānavāsanāya uttarakuru viya yebhuyyena utu-ādisampannameva hoti. Bhagavato kāle sātisaṃyaṃ utusappāyādiyuttaṃ raṭṭhaṃ ahoṣi”ti vadanti. Tattha bhikkhū bhikkhuniyo upāsakā upāsikāyo utupaccayādisampannattā tassa raṭṭhassa sappāya-utupaccayasevanena niccaṃ kallasarīrā kallacittā ca honti, te cittasarīrakallatāya anuggahitapaññābalā gambhīrakathaṃ paṭiggahetum samatthā paṭiccasamuppādanissitānaṃ gambhīrapaññānaṃca¹ kārakā honti. Tenāha “**kururaṭṭhavāsino bhikkhū gambhīrapaññākarakā**”ti-ādi².

Yuttappayuttāti satipaṭṭhānabhāvanāya yuttā ceva payuttā ca. Tasmiñhi³ janapade catasso parisā pakatīyāva satipaṭṭhānabhāvanānuyogamanuyuttā viharanti, antamaso dāsakammakaraparijanāpi satipaṭṭhānappaṭisaṃyuttameva kathaṃ kathenti, udakatitthasuttakantaṭṭhānādisupi niratthakakathā nāma nappavattati. Sace kāci itthī “amma tvaṃ katarāṃ satipaṭṭhānabhāvanāṃ manasi karosī”ti pucchitā “na kiñcī”ti vadati, taṃ garahanti “dhīratthu tava jīvitāṃ, jīvamānāpi tvaṃ matasadisā”ti. Atha naṃ “mā dāni puna evamakāsi”ti ovaditvā aññatarāṃ satipaṭṭhānaṃ uggaṇhāpenti. Yā pana “ahaṃ asukaṃ satipaṭṭhānaṃ nāma manasi karomī”ti vadati, tassā “sādhu sādhu”ti sādhu-kāraṃ datvā “tava jīvitāṃ sujīvitāṃ, tvaṃ nāma manussattaṃ pattā, tavatthāya sammāsambuddho uppanno”ti-ādīhi pasamsanti. Na kevalaṅcetha manussajātikāyeva satipaṭṭhānāmanasikārayuttā, te nissāya viharantā tiracchānagatāpi.

Tatridaṃ vatthu—eko kira naṭako suvapotaṃ gahetvā sikkhāpento vicarati. So bhikkhuni-upassayaṃ upanissāya vasitvā gamanakāle suvapotaṃ pamussitvā gato. Taṃ sāmaṇeriyo gahetvā paṭijaggiṃsu, “buddharakkhito”ti cassa nāmaṃ akaṃsu. Taṃ ekadivasaṃ purato nisinnaṃ disvā mahātherī āha “buddharakkhitā”ti. Kiṃ ayyebhi. Atthi te koci bhāvanāmanasikāroti. Natthayyeti.

1. Gambhīrapaññānaṃca (?)

2. Gambhīrapaññākarakāti-ādi (?)

3. Dī-Ṭṭha 2. 334; Ma-Ṭṭha 1. 233 piṭṭhādisupi passitabbaṃ.

Āvuso pabbajikānaṃ santike vasantena nāma viṣṣaṭṭha-attabhāvena bhavituṃ na vaṭṭati, kocideva manasikāro icchitabbo, tvaṃ pana aññaṃ na sakkhissasi, “aṭṭhi aṭṭhī”ti sajjhāyaṃ karohīti. So theriyā ovāde ṭhatvā “aṭṭhi aṭṭhī”ti sajjhāyanto carati.

Taṃ ekadivasam pātova toraṇagge nisīditvā bālātapaṃ tapamānaṃ eko sakuṇo nakhapañjarena aggahesi. So “kiri kirī”ti saddamakāsi. Sāmaṇeriyo sutvā “ayye buddharakkhito sakuṇena gahito, mocema nan”ti leḍḍu-ādīni gahetvā anubandhitvā mocesuṃ. Taṃ ānetvā purato ṭhapitaṃ therī āha “buddharakkhita sakuṇena gahitakāle kiṃ cintesī”ti. Ayye na aññaṃ cintesiṃ, “aṭṭhipuñjova aṭṭhipuñjaṃ gahetvā gacchati, katarasmim ṭhāne vippakirissatī”ti evaṃ ayye aṭṭhipuñjameva cintesinti. Sādhu sādhu buddharakkhita anāgate bhavakkhayassa te paccayo bhavissatīti. Evaṃ tatha tiracchānagatāpi satipaṭṭhānāmanasikāraṃyuttā.

Dīghanikāyādīsu mahānidānādīnīti dīghanikāye mahānidānaṃ¹ satipaṭṭhānaṃ² majjhimanikāye satipaṭṭhānaṃ³ sāropamaṃ⁴ rukkhopamaṃ raṭṭhapālaṃ⁵ māgaṇḍiyam⁶ āneñjasappāyanti⁷ evamādīni.

Ñāṇādayoti ñāṇaṅceva taṃsappayuttadhammā ca. Tenāha “**ñāṇanti vutte**”ti-ādi. **Ñāṇasappayuttacittāni labbhanti** tehi vinā sampajānatāya asambhavato. **Mahācittānīti** aṭṭhapi mahākiriyaṇacittāni labbhanti “satatavihārā”ti vacanato ñāṇupattipaccayarahitakālepi pavattijotanato. **Dasa cittānīti** aṭṭha mahākiriyaṇacittāni hasituppādavoṭṭhabbanacittehi saddhim dasa cittāni labbhanti. Arajjanādussanavasena pavatti tesampi sādharmaṇāti. “Upekkhako viharatī”ti vacanato chaḷaṅgupekkhāvasena āgatānaṃ imesaṃ satatavihārānaṃ somanassaṃ kathaṃ labbhatīti āha “**āsevanavasena labbhatī**”ti. Kiñcāpi khīṇāsavo iṭṭhāniṭṭhepi ārammaṇe majjhato viya bahulaṃ upekkhako viharati attano parisuddhapakatibhāvāvijahanato, kadāci pana tathā cetobhisaṅkhārābhāve yaṃ taṃ sabhāvato iṭṭham

1. Dī 2. 47 piṭṭhe. 2. Dī 2. 231 piṭṭhe. 3. Ma 1. 70 piṭṭhe. 4. Ma 1. 250 piṭṭhe.
5. Ma 2. 244 piṭṭhe. 6. Ma 2. 169 piṭṭhe. 7. Ma 3. 48 piṭṭhe.

ārammaṇaṃ, tattha yāthāvasabhāvaggahaṇavasena arahato cittaṃ somanassasahagataṃ hutvā pavattateva, tañca kho pubbāsevanavasena. Tena vuttaṃ “āsevanavasena labbhati”ti. **Ārakkhakiccaṃ sādheti** sativapullappattattā. **Caratoti**-ādinā niccasamādānaṃ dasseti, taṃ vikkhepābhāvena daṭṭhabbaṃ.

Pabbajjūpagatāti yaṃ kiñci pabbajjaṃ upagatā, na samitapāpā. **Bhovādinoti** jātimmattabrāhmaṇe vadati. **Pāṭekkasaccānī**ti tehi tehi diṭṭhigatikehi pāṭiyekkaṃ gahitāni “idameva saccan”ti abhiniviṭṭhāni diṭṭhisaccādīni. Tānipi hi “idameva saccan”ti gahaṇaṃ upādāya “saccānī”ti voharīyanti. Tenāha “idamevā”ti-ādi. **Nīhaṭānī**ti attano santānato nīharitāni apanītāni. **Gahitaggaṇassā**ti ariyamaggādhigamato pubbe gahitassa diṭṭhiggāhassa. **Vissatṭhabhāvavevacanānī**ti ariyamaggena sabbaso pariccāgabhāvassa adhivacanāni.

Natthi etāsaṃ vayo vekallanti **avayā**ti āha “**anūnā**”ti, anavasesoti attho. **Esanā**ti kāmesanādayo. **Magassa kiccanipphatti kathitā** rāgādīnaṃ pahīnabhāvādīpanato. **Paccavekkhaṇaphalaṃ kathitanti** paccavekkhaṇamukhena ariyaphalaṃ kathitaṃ. Adhigate hi aggaphale sabbaso rāgādīnaṃ anuppādadhammataṃ pajānāti, tañca pajānaṃ paccavekkhaṇañānti.

Dutiya-ariyāvāsasuttavaṇṇanā niṭṭhitā.

Nāthavaggavaṇṇanā niṭṭhitā.

3. Mahāvagga

1. Sīhanādasuttavaṇṇanā

21. Tatiyassa paṭhame **visamaṭṭhānesū**ti papātādīsu visamaṭṭhānesu. “**Aññehi asādhāraṇānī**”ti kasmā vuttaṃ, nanu cetāni sāvakānampi ekaccānaṃ uppajantīti? Kāmaṃ uppajanti, yādisāni pana buddhānaṃ ṭhānāṭṭhānañāḍīni, na tādisāni tadaññesaṃ kadācipi uppajantīti aññehi

asādhāraṇānīti. Tenāha “**tathāgatasseva balāni**”ti. Imameva hi yathāvuttalesam̐ apekkhitvā tadabhāvato āsayānusayaññāḍīsu eva asādhāraṇasamaññā niruḷhā. Kāmaṃ ñāṇabalānaṃ ñāṇasambhāro viṣesapaccayo, puññasambhāropi pana nesam̐ paccayo eva. Ñāṇasambhārassapi vā puññasambhārabhāvato “**puññussayasampattiyā āgatāni**”ti vuttaṃ.

Pakatihatthikulanti¹ giricaranadicaravanacarādippabhedā gocariyakālāvakanāmā sabbāpi balena pākatikā hatthijāti. **Dasannaṃ purisānanti** thāmamajjhimanāṃ dasannaṃ purisānaṃ. Ekassa tathāgataṃ kāyabalanti ānetvā sambandho. **Ekassāti** ca tathā heṭṭhā kathāyaṃ āgatattā desanāsotena vuttaṃ. **Nārāyanasaṅghātabalanti** ettha nārā vuccanti rasmiyo, tā bahū nānāvīdhā ito uppajantīti nārāyanaṃ, vajiraṃ, tasmā **nārāyanasaṅghātabalanti** vajirasaṅghātabalanti attho. Ñāṇabalaṃ pana pāḷiyam̐ āgatameva, na kāyabalaṃ viya aṭṭhakathāruḷhamevāti adhippāyo.

Samyuttake² āgatāni tesattati ñāṇāni, **sattasattati** ñāṇānīti vuttaṃ, tattha³ pana nidānavagge sattasattati āgatāni catucattārīsaṅca. Tesattati pana **paṭisambhidāmagge**⁴ sutamayādīni āgatāni dissanti, na samyuttake. **Aññānīpīti** etena **ñāṇavattuvibhaṅge**⁵ ekakādivasena vuttāni, aññattha ca “pubbante ñāṇaṃ”ti-ādinā⁶ brahmajālādīsu ca “tayidaṃ tathāgato pajānāti ‘imāni diṭṭhiṭṭhānāni evaṃ gahitāni’”ti-ādinā⁷ vuttāni anekāni ñāṇappabhedāni saṅgaṇhāti. Yāthāvappaṭivedhato sayaṅca akampiyam̐ puggalaṅca taṃsamaṅginam̐ neyyesu adhibalam̐ karotīti āha “**akampiyatṭhena upatthambhanaṭṭhena cā**”ti.

Usabhassa idanti **āsabham̐**, seṭṭhatṭhānaṃ. Sabbaññutāpaṭijānanavasena abhimukham̐ gacchanti, aṭṭha vā parisā upasaṅkamantīti **āsabhā**, pubbabuddhā. **Idam̐ panāti** buddhānaṃ ṭhānaṃ sabbaññutameva vadati. **Tiṭṭhamānovāti** avadantopi tiṭṭhamānova paṭijānāti nāmāti attho. **Upagacchatīti** anujānāti.

1. Saṃ-Ṭī 2. 54 piṭṭhādīsopi passitabbaṃ.

3. Mūlaṭī 2. 197 piṭṭhādīsopi passitabbaṃ.

5. Abhi 2. 323 piṭṭhe.

6. Abhi 1. 215 piṭṭhe.

2. Saṃ 1. 290 piṭṭhe.

4. Khu 9. 1, 5 piṭṭhesu.

7. Dī 1. 16 piṭṭhādīsū.

Aṭṭhasu parisāsūti “abhijānāmi kho panāham sārīputta anekasataṃ khattiyaparisaṃ -pa- tatra vata maṃ bhayaṃ vā sārājjaṃ vā okkamissatīti nimittametam sārīputta na samanupassāmi”¹ti vuttāsu aṭṭhasu parisāsu. **Abhītanādam nadatīti** parato dassitañāṇayogena dasabalohanti abhītanādam nadati.

Paṭivedhaniṭṭhattā arahattamaggañāṇaṃ paṭivedhoti “**phalakkhaṇe uppannam nāmā**”ti vuttam. Tena paṭiladdhassapi desanāñāṇassa kiccanipphatti parassa avabujjhanamattena hotīti “**aññāsikoṇḍaññassa sotāpattiphalakkhaṇe pavattam nāmā**”ti vuttam. Tato paraṃ pana yāva parinibbānā desanāñāṇapavatti tasseva pavattitassa dhammacakkassa ṭhānanti veditabbaṃ pavattitacakkassa cakkavattino cakkaranassa ṭhānaṃ viya.

Tiṭṭhatīti vuttam, kiṃ bhūmiyaṃ puriso viya, notī āha “**tadāyattavuttitāyā**”ti. **Ṭhānanti** cettha attalābho dharamānatā ca, na gatinivattīti āha “**uppajjati ceva pavattati cā**”ti. Yattha panetaṃ dasabalañāṇaṃ vitthāritaṃ, taṃ dassento “**abhidhamme panā**”ti-ādimāha. Sesesupi eseva nayo.

Samādiyantīti **samādānāni**, tāni pana samādiyitvā katāni hontīti āha “**samādiyitvā katānaṃ**”ti. **Kammameva vā kammamānānanti** etena **samādāna**saddassa apubbathābhāvaṃ dasseti muttagatasadde gatasaddassa viya. **Gatīti** nirayādigatiyo. **Upadhīti** attabhāvo. **Kāloti** kammassa vipaccanārahakālo. **Payogoti** vipākuppattiyā paccayabhūtā kiriyā.

Agatigāmininti nibbānagāminim. Vuttam hi “nibbānañcāham sārīputta pajānāmi nibbānagāminiñca paṭipadan”²ti. Bahūsupi manussesu ekameva pāṇaṃ ghātentesu kāmaṃ sabbesampi cetanā tassevekassa jīvitindriyārammaṇā, taṃ pana kammaṃ tesam nānakāraṃ. Tesu³ hi eko ādarena chandajāto karotī, eko “ehi tvampi karohī”³ti parehi nippīlito karotī, eko samānacchando viya hutvā appaṭibāhamāno vicarati. Tesu eko teneva kammena niraye nibbattati, eko tiracchānayoṇiyaṃ,

1. Ma 1. 104 piṭṭhe.

2. Ma 1. 106 piṭṭhe.

3. Abhi-Ṭṭha 2. 436 piṭṭhādīsupi passitabbaṃ.

eko pettivisaye. Taṃ tathāgato āyūhanakkhaṇeyeva “iminā nīhārena āyūhitattā esa niraye nibbattissati, esa tiracchānayoniyam, esa pettivisaye”ti jānāti. Niraye nibbattamānampi “esa mahāniraye nibbattissati, esa ussadaniraye”ti jānāti. Tiracchānayoniyam nibbattamānampi “esa apādako bhavissati, esa dvipādako, esa catuppado, esa bahuppado”ti jānāti. Pettivisaye nibbattamānampi “esa nijjhāmataphiko bhavissati, esa khuppiṇāsiko, esa paradattūpajīvī”ti jānāti. Tesu ca kammesu “idaṃ kammaṃ paṭisandhim ākaḍḍhissati, idaṃ aññena dinnāya paṭisandhiyā upadhivepakkaṃ bhavissati”ti jānāti.

Tathā sakalagāmaṃvāsikesu ekato piṇḍapātaṃ dadamānesu kāmam sabbesampi cetanā piṇḍapātārammaṇāva, taṃ pana kammaṃ tesam nānākāram. Tesu hi eko ādarena karotīti sabbaṃ purimasadisam, tasmā tesu keci devaloke nibbattanti, keci manussaloke. Taṃ tathāgato āyūhanakkhaṇeyeva jānāti. “Iminā nīhārena āyūhitattā esa manussaloke nibbattissati, esa devaloke. Tatthāpi esa khattiyakule, esa brāhmaṇakule, esa vessakule, esa suddakule, esa paranimmitavasavattīsu, esa nimmānarattīsu, esa tusitesu, esa yāmesu, esa tāvatim̐sesu, esa cātumahārājikesu, esa bhummadevesū”ti-ādinā tattha tattha hīnapañītasuvaṇṇadubbaṇṇa-apparivāramahāparivāratādibhedam taṃ taṃ visesam āyūhanakkhaṇeyeva jānāti.

Tathā vipassanam paṭṭhapentesuyeva “iminā nīhārena esa kiñci sallakkhetum na sakkhissati, esa mahābhūtamattameva vavatthapessati, esa rūpariggaheyyeva ṭhassati, esa arūpariggaheyyeva, esa nāmarūpariggaheyyeva, esa paccayariggaheyyeva, esa lakkhaṇārammaṇikavipassanāyameva, esa paṭhamaphaleyyeva, esa dutiyaphaleyyeva, esa tatiyaphaleyyeva, esa arahattam pāpuṇissatī”ti jānāti. Kasīnaparikammaṃ karontesupi “imassa parikammamattameva bhavissati, esa nimittam uppādessati, esa appanam eva pāpuṇissati, esa jhānam pādakam katvā vipassanam paṭṭhapetvā arahattam gaṇhissatī”ti jānāti. Tenāha “**imassa cetanā**”ti-ādi.

Kāmanato kāmetabbato kāmappaṭisaṃyuttato ca dhātu **kāmadhātu**. **Ādi-**saddena byāpādadhāturūpadhātu-ādināṃ saṅgaho. **Vilakkhaṇatāyāti** viśadisasabhāvatāya. **Khandhāyatanadhātulokanti** anekadhātum nānadhātum khandhalokaṃ āyatanalokaṃ dhātulokaṃ yathābhūtaṃ pajānātīti yojanā. “Ayaṃ rūpakkhandho nāma -pa- ayaṃ viññāṇakkhandho nāma. Tesupī ekavidhena rūpakkhandho, ekādasavidhena rūpakkhandho. Ekavidhena vedanākkhandho, bahuvīdhena vedanākkhandho. Ekavidhena saññākkhandho. Saṅkhārakkhandho. Viññāṇakkhandho, bahuvīdhena viññāṇakkhandho”ti evaṃ tāva khandhalokassa, “idaṃ cakkhāyatanaṃ nāma -pa- idaṃ dhammāyatanaṃ nāma. Tattha dasāyatanaṃ kāmāvacarā, dve cātubhūmakā”ti-ādinā āyatanalokassa, “ayaṃ cakkhūdhātu nāma -pa- ayaṃ manoviññādhātu nāma. Tattha soḷasa dhātuyo kāmāvacarā, dve cātubhūmakā”ti-ādinā dhātulokassa anekasabhāvaṃ nānāsabhāvaṃca pajānātīti. Na kevalaṃ upādinnasaṅkhāralokasseva, atha kho anupādinnakasaṅkhāralokassapī “imāya nāma dhātuyā ussannattā imassa rukkhassa khandho seto, imassa kāḷo, imassa maṭṭho, imassa sakaṇṭako, imassa bahalattaco, imassa tanuttaco, imassa pattaṃ vaṇṇasaṅṭhānādivasena evarūpaṃ, imassa pupphaṃ nilaṃ pītaṃ lohitaṃ odātaṃ sugandhaṃ duggandhaṃ, imassa phalaṃ khuddakaṃ mahantaṃ dīghaṃ vaṭṭaṃ susaṅṭhānaṃ dussaṅṭhānaṃ maṭṭhaṃ pharuṣaṃ sugandhaṃ duggandhaṃ madhuraṃ tittakaṃ kaṭukaṃ ambilaṃ kasāvaṃ, imassa kaṇṭako tikhiṇo kuṇṭho ujuko kuṭīlo tambo kāḷo odāto hotī”ti-ādinā pajānātīti. Sabbaññubuddhānaṃ eva hi etaṃ balaṃ, na aññesaṃ.

Nānādhimuttikatanti nānājjhāsayataṃ. Adhimutti nāma ajjhāsayadhātu ajjhāsayasabhāvo. So pana hīnapaṇītatāsāmaññena pāḷiyaṃ dvidhāva vuttopi hīnapaṇītādibhedena anekavidhoti āha **“hīnādīhi adhimuttīhi nānādhimuttikabhāvan”**ti. Tattha ye ye sattā yaṃyamādhimuttikā, te te taṃtadadhimuttike eva sevanti bhajanti payirupāsanti dhātusabhāgato. Yathā gūthādīnaṃ dhātūnaṃ sabhāvo eso, yaṃ gūthādīhi eva saṃsandanti samenti, evaṃ hīnājjhāsayā dussīlādīheva saṃsandanti samenti, sampannasīlādayo ca sampannasīlādīheva. Taṃ nesaṃ nānādhimuttikataṃ bhagavā yathābhūtaṃ pajānātīti.

Vuddhim hāniñcāti paccayavisesena sāmattiyato adhikataṃ anadhikatañca. Indriyaparopariyattañāṇaniddese¹ “āsayam jānāti, anusayam jānāti”ti āsayādi jānanam kasmā niddiṭṭhanti? Āsayajānanādinā yehi indriyehi paroparehi sattā kalyāṇapāpāsayaḍikā honti, tesam jānanassa vibhāvanato. Evañca katvā indriyaparopariyatta āsayānusayañāṇānam visum asādhāraṇatā, indriyaparopariyattanādhimuttikatāñāṇānam visum balavatā ca siddhā hoti. Tattha āsayanti yattha sattā nivasanti, tam tesam nivāsaṭṭhānam, diṭṭhigataṃ vā yathābhūtañāṇam vā **āsayo, anusayo** appahīnabhāvena thāmagato kilesa. Tam pana bhagavā sattānam āsayam jānanto tesam tesam diṭṭhigatānam vipassanāmaggañāṇānañca appavattikkhaṇepi jānāti. Vuttaṃ hetam—

“Kāmaṃ sevantaṃyeva bhagavā jānāti ‘ayaṃ puggalo kāmagaruko kāmasayo kāmadhimutto’ti. Kāmaṃ sevantaṃyeva jānāti ‘ayaṃ puggalo nekkhammagaruko nekkhammasayo nekkhammadhimutto’ti. Nekkhammaṃ sevantaṃyeva jānāti. Byāpādam, abyāpādam, thinamiddham, ālokasaññaṃ sevantaṃyeva jānāti ‘ayaṃ puggalo thinamiddhagaruko thinamiddhasayo thinamiddhadhimutto’ti”².

Paṭhamādīnam catunnam jhānānanti rūpāvacaṛānam paṭhamādīnam paccanīkajjhāpanaṭṭhena ārammaṇūpanijjhāpanaṭṭhena ca jhānānam. Catukkanayena hetam vuttaṃ. **Aṭṭhannaṃ vimokkhānanti** ettha paṭipāṭiyā satta appitappitakkhaṇe paccanīkadhammehi vimuccanato ārammaṇe ca adhimuccanato vimokkhā nāma. Aṭṭhamo pana sabbaso saññāvedayitehi vimuttattā apagamavimokkho nāma. Catukkanayapañcakanayesu paṭhamajjhānasamādhi savitakkasavicāro nāma. Pañcakanaye dutiyajjhānasamādhi avitakkavicāramatto. Nayadvayepi uparītisu jhānesu samādhi avitakka-avicāro. Samāpattīsu paṭipāṭiyā aṭṭhannaṃ samādhītipi nāmaṃ, samāpattītipi cittekaggatāsabbhāvato, nirodhasamāpattiyā tadabhāvato na samādhīti nāmaṃ. **Hānabhāgiyadhammanti** appaṇehi paṭhamajjhānādīhi vuṭṭhitassa saññāmanasikārānam kāmādi-anupakkhandanaṃ. **Visesabhāgiyadhammanti** paṇehi paṭhamajjhānādīhi vuṭṭhitassa

1. Abhi 2. 353; Khu 9. 117 piṭṭhesu.

2. Khu 9. 118 piṭṭhe.

saññāmanasikārānaṃ dutiyajjhānādīpakhandanaṃ. Iti saññāmanasikārānaṃ kāmādidutiyajjhānādīpakhandanāni hānabhāgiya visesabhāgiyā dhammāti dassitāni. Tehi pana jhānaṃ taṃsabhāvatā ca dhammasaddena vuttā. **Tasmāti** vuttamevatthaṃ hetubhāvena paccāmasati. **Vodānanti** paṇḍitāsaṅkhātāni vodānaṃ. Taṃ hi paṭhamajjhānādīhi vuṭṭhahitvā dutiyajjhānādī-adhigamassa paccayattā “vuṭṭhānaṃ”ti vuttam. Keci pana “nirodhato phalasaṃpattiyā vuṭṭhānanti pāḷi natthi”ti vadanti. Te “nirodhā vuṭṭhahantassa nevasaññānāsaññāyatanaṃ phalasaṃpattiyā anantarapaccayena paccayo”ti imāya **pāḷiyā**¹ paṭisedhetabbā. Yo saṃpattilābhī samāno eva “na lābhīmhi”ti, kammaṭṭhānaṃ samānaṃ eva “na kammaṭṭhānaṃ”ti saññī hoti, so sampattimyeva samānaṃ “vipatti”ti paccetīti veditabbo.

Na tathā daṭṭhabbanti yathā paravādinā vuttam, tathā na daṭṭhabbanti. **Sakasakakiccameva jānātīti** ṭhānāṭṭhānājānaṃ nādisakasakameva kiccaṃ kātuṃ jānāti, yathāsakameva visayaṃ paṭivijjhatīti attho. **Tampīti** tehi dasabalaññehi jānitabbampi. **Kammavipākantaramevāti** kammantarassa vipākantarameva jānāti. Cetanācetanāsampayuttadhamme nirayādinibbānagāminipāṭipadābhūte kammanti gahetvā āha “**kammaparicchadamevā**”ti. Dhātunānattaṅca dhātunānattakāraṅca **dhātunānattakāraṅanti** ekadesasarūpekaseso daṭṭhabbo. Taṃ hi ñāṇam tadubhayampi jānāti. “Imāya nāma dhātuyā ussannattā”ti-ādinā² tathā ceva saṃvaṇṇitaṃ. **Saccaparicchadamevāti** pariññābhisamayādivasena saccānaṃ paricchinnameva. **Appetuṃ na sakkoti** aṭṭhamaṇavaṃbalāni viya taṃsadisam, iddhividhaññamiva **vikubbituṃ**. Etenassa balasadisataṅca nivāreti. Jhānādiññam viya vā **appetuṃ vikubbituṅca**. Yadihi hi jhānādīpakcavekkhaṇāññam sattamaṇavaṃbalanti tassa savitakkasavicāratā vuttā, tathāpi jhānādīhi vinā paccavekkhaṇā natthīti jhānādisahagataṃ ñāṇam tadantogadham katvā evam vuttanti veditabbam. Atha vā sabbaññutaññam jhānādīkiccaṃ viya nasa sabbam balakiccaṃ kātuṃ sakkotīti dassetuṃ “**jhānaṃ hutvā appetuṃ, iddhi hutvā vikubbituṅca na sakkoti**”ti vuttam, na pana kassaci balassa jhāna-iddhibhāvatoti daṭṭhabbanti.

1. Abhi 8. 138 piṭṭhe Paṭṭhāne.

2. Abhi-Ṭṭha 2. 438 piṭṭhe.

Evam kiccavisesvasenapi dasabalañāṇasabbaññutaññāṇavisesam dassetvā idāni vitakkattikabhūmantaravasenapi tam dassetuṃ “**apicā**”ti-ādi vuttam. **Paṭipāṭiyā**ti ādito paṭṭhāya paṭipāṭiyā.

Anupadavaṇṇanam ña tvā veditabbānīti sambandho. Kilesāvaraṇam niyatamicchādiṭṭhi. Kilesāvaraṇassa abhāvo āsavakkhayañāṇadhigamassa ṭhānam, tabbhāvo aṭṭhānam. Anadhigamassa pana tadubhayampi yathākkamam aṭṭhānam ṭhānañcāti tatha kāraṇam dassento “**lokiya -pa-dassanato cā**”ti āha. Tattha lokiyasammādiṭṭhiyā ṭhiti āsavakkhayādhigamassa ṭhānam kilesāvaraṇābhāvassa kāraṇattā. Sā hi tasmim sati na hoti, asati ca hoti. Etena tassā aṭṭhitiyā tassa aṭṭhānatā vuttā eva. **Nesam** veneyyasattānam. **Dhātuvemattadassanatoti** kāmadhātu-ādīnam pavattibhedadassanato, yadaggena dhātuvemattam jānāti, tadaggena cariyādivisesampi jānāti. **Dhātuvemattadassanatoti** vā dhammadhātuvemattadassanato. Sabbāpi hi cariyā dhammadhātupariyāpannā evāti. **Payogaṃ anādiyitvāpi** santatimahāmattādīnam viya. **Dibbacakkhānubhāvato pattaḥḥenā**ti ettha dibbacakkhunā parassa hadayavatthusannissayalohitavaṇṇadassanamukhena tadā pavattamānacittajānanattham parikkammakaraṇam nāma sāvakānam, tañca kho ādikammikānam, yato dibbacakkhu-ānubhāvato cetopariyañāṇassa pattaḥḥatā siyā. Buddhānam pana yadipi āsavakkhayañāṇadhigamato pageva dibbacakkhuñāṇadhigamo, tathāpi tathāparikkammakaraṇam natthi vijjāttayasiddhiyā sijjhanato. Sesābhiññāttaye cetopariyañāṇam dibbacakkhuñāṇadhigamena pattanti ca vattaḥḥatam labhatīti tathā vuttanti daṭṭhabbam.

Sihanādasuttavaṇṇanā niṭṭhitā.

2. Adhivuttipadasuttādivaṇṇanā

22-24. Dutiye **adhivacanapadānanti** paññattipadānam. Dāsādīsu sirivaḍḍhakādisaddā viya vacanamattameva adhikāram katvā pavattiyā adhivacanam paññatti. Atha vā adhisaddo uparibhāge. Vuccatīti vacanam, upari vacanam adhivacanam,

upādābhūtarūpādīnaṃ upari paññapiyamānā upādāpaññattīti attho, tasmā paññattidīpakapadānīti attho daṭṭhabbo. Tassa padāni padaṭṭhānāni **adhivacanapadāni**. Tenāha “**tesaṃ ye**”ti-ādi. **Tesanti** adhvavanānaṃ. **Yeti** khandhādayo. Adhivuttitāya **adhivuttiyoti diṭṭhiyo vuccanti**. Adhikaṃ hi sabhāvadhammesu sassatādīṃ pakati-ādīṃ drabyādīṃ jīvādīṃ kāyādīṃca abhūtaṃ atthaṃ ajjhāropetvā diṭṭhiyo pavattantīti. Tenāha “**atha vā**”ti-ādi. Tatiyacatutthāni suviññeyyāni.

Adhivuttipadasuttādivaṇṇanā niṭṭhitā.

5. Kasiṇasuttavaṇṇanā

25. Pañcame **sakalaṭṭhenāti** nissesatṭhena. Anavasesapharaṇavasena cettha sakalaṭṭho veditabbo, asubhanimittādīsu viya ekadese aṭṭhatvā anavasesato gahetabbaṭṭhenāti attho. **Tadārammaṇānaṃ dhammānanti** taṃ kasiṇaṃ ārabha pavattanakadhammānaṃ. **Khettaṭṭhenāti** uppattiṭṭhānaṭṭhena. **Adhiṭṭhānaṭṭhenāti** pavattiṭṭhānabhāvena. Yathā khettaṃ sassānaṃ uppattiṭṭhānaṃ vaḍḍhanaṭṭhānaṃca, evameva taṃ taṃ jhānaṃ sampayuttadhammānanti. Yogino vā sukhavisesānaṃ kāraṇabhāvena. **Paricchinditvāti** idaṃ “uddhaṃ adho tiriyaṃ”ti etthāpi yojetabbaṃ. Paricchinditvā eva hi sabbattha kasiṇaṃ vaḍḍhetabbaṃ. **Tena tena vā kāraṇenāti** tena tena upari-ādīsu kasiṇavaḍḍhanakāraṇena. Yathā kinti āha “**ālokamiva rūpadassanakāmo**”ti. Yathā dibbacakkhunā uddhaṃ ce rūpaṃ daṭṭhukāmo, uddhaṃ ālokaṃ pasāreti. Adho ce, adho. Samantato ce rūpaṃ daṭṭhukāmo, samantato ālokaṃ pasāreti, evaṃ sabbakasiṇanti attho. **Ekassāti** pathavīkasiṇādīsu ekekassa. **Aññabhā vānupagamanatthanti** aññakasiṇabhāvānupagamanadīpanatthaṃ, aññassa vā kasiṇabhāvānupagamanadīpanatthaṃ. Na hi aññena pasāritakasiṇaṃ tato aññena pasāritakasiṇabhāvaṃ upagacchati, evampi nesaṃ aññakasiṇasambhedābhāvo veditabbo. **Na aññaṃ** pathavī-ādi. Na hi udakena ṭhitaṭṭhāne sasambhārapathavī atthi. **Aññakasiṇasambhedoti** āpokasiṇādīnā saṅkaro. **Sabbatthāti** sabbesu sesakasiṇesu.

Ekadese aṭṭhatvā anavasesapharaṇaṃ pamāṇassa aggahaṇato **appamāṇaṃ**. Teneva hi nesaṃ kasiṇasamaññā. Tathā cāha “**tañhī**”ti-ādi. Tattha **cetasā pharantoti** bhāvanācittena ārammaṇaṃ karonto. Bhāvanācittaṃ hi kasiṇaṃ parittaṃ vā vipulaṃ vā sakalameva manasi karoti, na ekadesaṃ. Kasiṇuggahāṭimākāse pavattaviññāṇaṃ pharaṇa-appamāṇavasena viññāṇakasiṇanti vuttaṃ. Tathā hi taṃ viññāṇanti vuccati. **Kasiṇavasenā**ti ugghāṭitakasiṇavasena kasiṇuggahāṭimākāse uddhamadhotiriyatā veditabbā. Yattakaṃ hi ṭhānaṃ kasiṇaṃ pasāritaṃ, tattakaṃ ākāsaḥbhāvanāvasena ākāsaṃ hotīti. Evaṃ yattakaṃ ṭhānaṃ ākāsaṃ hutvā upaṭṭhitaṃ, tattakaṃ sakalameva pharivā viññāṇassa pavattanato āgamanavasena viññāṇakasiṇepi uddhamadhotiriyatā vuttāti āha “**kasiṇuggahāṭimākāsavasena tattha pavattaviññāṇe uddhamadhotiriyatā veditabbā**”ti.

Kasiṇasuttavaṇṇanā niṭṭhitā.

6. Kāḷīsuttavaṇṇanā

26. Chaṭṭhe **atthassa pattinti** ekantato hitānuppattiṃ. **Hadayassa santinti** paramacittūpasamaṃ¹. **Kilesasenanti** kāmaguṇasaṅkhātāṃ paṭhamāṃ kilesasenaṃ. Sā hi kilesasenā accharāsaṅghātasabhāvāpi paṭipatthayamānā piyāyitabba-icchitabbarūpasabhāvato piyarūpasātarūpā nāma attano kiccavasena. **Ahaṃ ekova jhāyantoti** ahaṃ gaṇasaṅgaṇikāya kilesasaṅgaṇikāya ca abhāvato eko asahāyo lakkhaṇūpanijjhānena jhāyanto. **Anubujjhinti** anukkamena maggapaṭipāṭiyā bujjhiṃ paṭivijjhīṃ. Idaṃ vuttaṃ hoti—piyarūpaṃ sātarūpaṃ senaṃ jinitvā ahaṃ ekova jhāyanto “atthassa pattim hadayassa santin”ti saṅkhaṃ gataṃ arahattasukhaṃ paṭivijjhīṃ, tasmā janena mittasanthavaṃ na karomi, teneva ca me kāraṇena kenaci saddhiṃ sakkhī na sampajjatīti. **Atthābhiniabbatesunti** itisaddalopenāyaṃ niddesoti āha “**atthoti gahetvā**”ti.

Kāḷīsuttavaṇṇanā niṭṭhitā.

1. Hadayacittūpasamaṃ (Ka) Saṃ-Ṭī 1. 220 piṭṭhe passitabbaṃ.

7. Paṭhamamahāpañhasuttavaṇṇanā

27. Sattame **vuccethā**ti vucceyya. **Dutiyapadepī**ti “anusāsaniyā vā anusāsaniṇ”ti evaṃ dutiyavākyepi. **Te kira** bhikkhū. **Na ceva sampāyissantī**ti na ceva sammadeva pakārehi gahessanti ñāpessanti. Tenāha “**sampādetvā kathetuṃ na sakkhissantī**”ti. Yasmā avisaye pañhaṃ pucchitā honti¹, tasmā vighātaṃ āpajjissantīti yojanā. **Aññathā ārādhanaṃ nāma natthī**ti iminā sapaccayanāmarūpānaṃ yāthāvato avabodho eva ito bāhirakānaṃ natthi, kuto pavedanāti dasseti. **Ārādhanaṃ**ti yāthāvapavedanena cittassa paritosanaṃ.

Eko pañhoti eko pañhamaggo, ekaṃ pañhagavesananti attho. **Eko uddesoti** ekaṃ uddisanaṃ atthassa saṅkhittavacanaṃ. **Veyyākaraṇanti** niddisanaṃ atthassa vivaritvā kathanāṃ. **Hetunā**ti “antavantato anaccantikato tāvakālikato niccappaṭikkhepato”ti evamādinā nayena yathā ime saṅkhārā etarahi, evaṃ atīte anāgate ca aniccā saṅkhatā paṭiccasamuppannā khayadhammā vayadhammā virāgadhammāti atītānāgatesu nayena.

Sabbe sattāti anavasesā sattā. Te pana bhavabhedato saṅkhepeveva bhinditvā dassento “**kāmacchandissū**”ti-ādīmāha. Byadhikaraṇānampi bāhiratthasamāso hoti yathā “urasilomo”ti āha “**āhārato ṭhiti etesanti āhārattḥitikā**”ti. Tiṭṭhati etenāti vā ṭhiti, āhāro ṭhiti etesanti **āhārattḥitikā**ti evaṃ vā ettha samāsaviggaho daṭṭhabbo. **Āhārattḥitikā**ti paccayatḥitikā, paccayāyattavuttikāti attho. Paccayattho hettha āhārasaddo “ayamāhāro anuppannassa vā kāmacchandassa uppādāyā”ti-ādīsu² viya. Evaṃ hi “sabbe sattā”ti iminā asaññasattā pariggahitā honti. Sā panāyaṃ āhārattḥitikatā nippariyāyato saṅkhāradhammo. Tenāhu aṭṭhakathācariyā “āhārattḥitikāti āgataṭṭhāne saṅkhāraloko veditabbo”ti³. Yadi evaṃ “sabbe sattā”ti idaṃ kathanti? Puggalādhiṭṭhānadesanāti nāyaṃ doso. Tenevāha “ekadhamme bhikkhave bhikkhu sammā nibbindamāno sammā virajjamāno sammā vimuccamāno

1. Pañho pucchito (Ka)

2. Saṃ 3. 90 piṭṭhe.

3. Vi-Ṭṭha 1. 90; Visuddhi 1. 198 piṭṭhesu.

sammā pariyantadassāvī sammadattham abhisamecca diṭṭheva dhamme dukkhassantakaro hoti. Katamasmiṃ ekadhamme? Sabbe sattā āhāraṭṭhitikā”ti. Yvāyaṃ puggalādhiṭṭhānāya kathāya sabbesaṃ saṅkhārānaṃ paccayāyattavuttitāya āhārapariyāyena sāmāññato paccayadhammo vutto, ayaṃ āhāro nāma eko dhammo.

Codako vuttampi attham yāthāvato appaṭivijjhamāno neyyattham suttapadam nītatthato dahanto “sabbe sattā”ti vacanamatte ṭhatvā “**nanu cā**”ti-ādinā codeti. Ācariyo aviparītam tattha yathādhippetamattham pavedento “**na virujjhati**”ti vatvā “**tesaṃ hi jhānaṃ āhāro hoti**”ti āha. **Jhānanti** ekavokārabhavāvaham saññāya virajjanavasena pavattarūpāvacaracatutthajjhānaṃ. Pāliyaṃ pana “anāhārā”ti vacanam asaññabhava catunnam āhārānaṃ atāvaṃ sandhāya vuttam, na paccayāhārassa abhāvato. **Evam santepī**ti idam sāsane yesu dhammesu visesato āhārasaddo niruḷho, “āhāraṭṭhitikā”ti ettha yaḍi teyeva gayhanti, abyāpitadosamāpanno. Atha sabbopi paccayadhammo āhāroti adhippeto, imāya āhārapāliya virodho āpannoti dassetuṃ āradham. “**Na virujjhati**”ti yenādhippāyena vuttam, tam vivaranto “**etasmīhi sutte**”ti-ādimāha. Kabaḷikārāhārādīnam ojaṭṭhamakarūpāharaṇādi nippariyāyena āhārabhāvo. Yathā hi kabaḷikārāhāro ojaṭṭhamakarūpāharaṇena rūpakāyaṃ upatthambhenti, evaṃ phassādayo vedanādi-āharaṇena nāmakāyaṃ upatthambhenti, tasmā satipi janakabhāpe upatthambhakabhāvo ojāḍisu sātisayo labbhamāno mukhyo āhāraṭṭhoti te eva **nippariyāyena āhāralakkhaṇā dhammā vuttā**.

Idhāti imasmim sutte pariyāyena paccayo āhāroti vutto, sabbo paccayadhammo attano phalam āharatīti imam pariyāyaṃ labhatīti. Tenāha “**sabbadhammānañhi**”ti-ādi. Tattha **sabbadhammānanti** sabbesaṃ saṅkhatadhammānaṃ. Idāni yathāvuttamattham suttenasamatthetuṃ “**tenevāhā**”ti-ādi vuttam. **Ayanti** paccayāhāro. **Nippariyāyāhāropi gahitova hoti**ti yāvataḥ sopi paccayabhāveneva janako upatthambhako ca hutvā tam tam phalam āharatīti vattabbatam labhatīti.

Tatthāti pariyāyāhāro nippariyāyāhāroti dvīsu āhāresu asaṅṅabhāve yadipi nippariyāyāhāro na labbhati, pariyāyāhāro pana labbhateva. Idāni tamevattham vitthārato dassetuṃ”**anuppanne hi buddhe**”ti-ādi vuttaṃ. Uppanne buddhe titthakaramatanissitānaṃ jhānabhāvanāya asijjhanato “**anuppanne buddhe**”ti vuttaṃ. Sāsanikā tādīsaṃ jhānaṃ na nibbattenti “**titthāyatane pabbajitā**”ti vuttaṃ. Titthiyā hi upapattiviseso vimuttisaṅṅino saṅṅāvirāgāvirāgesu ādīnavānisamsadassinova hutvā asaṅṅasamāpattim nibbattetvā akkhaṇabhūmiyaṃ uppajjanti, na sāsanikā. **Vāyokasiṇe parikamma katvāti** vāyokasiṇe paṭhamādīni tīṇi jhānāni nibbattetvā tatiyajjhāne ciṅṅavasī hutvā tato vuṭṭhāya catutthajjhānādhiḡamāya parikammaṃ katvā. Tenevāha “**catutthajjhānaṃ nibbattetvā**”ti.

Kasmā¹ panettha vāyokasiṇeyeva parikammaṃ vuttanti? vuccate, yatheva hi rūpapaṭibhāgabhūtesu kasiṇavisesesu rūpavibhāvanena rūpavirāgabhāvanāsaṅkhāto arūpasamāpattiviseso sacchikariyati, evaṃ aparibyattaviggahatāya arūpapaṭibhāgabhūte kasiṇaviseso arūpavibhāvanena arūpavirāgabhāvanā saṅkhāto rūpasamāpattiviseso adhiḡamīyatīti. Ettha ca “saṅṅā rogo, saṅṅā gaṇḍo”ti-ādīnā², “dhi cittaṃ, dhi vatetaṃ cittaṃ”ti-ādīnā ca nayena arūpappavattiyā ādīnavadassanena tadabhāve ca santapaṇītabhāvasanniṭṭhānena rūpasamāpattiyā abhisāṅkharaṇaṃ arūpavirāgabhāvanā. Rūpavirāgabhāvanā³ pana saddhim upacārena arūpasamāpattiyō, tatthāpi vīsesena paṭhamārūppajjhānaṃ. Yadi evaṃ “paricchinnākāsakasiṇepī”ti vattabbaṃ, tassāpi arūpapaṭibhāgatā labbhatīti? Icchitamevetaṃ, kesaṅci avacanaṃ panettha pubbācariyehi aggaḡhitabhāvena. Yathā hi rūpavirāgabhāvanā virajjanīyadhammābhāvamattena parinipphannā, virajjānīyadhammaparibhāsabhūte ca visayaviseso pātubhavati, evaṃ arūpavirāgabhāvanāpīti vuccamāne na koci vīrodho. Titthiyeveva pana tassā samāpattiyā paṭipajjitabbatāya tesaṅca visayapathe sūpanibandhanasseva tassa jhānassa paṭipattito diṭṭhivantehi pubbācariyehi catuttheyeva bhūtakasiṇe arūpavirāgabhāvanāparikammaṃ vuttanti daṭṭhabbaṃ.

1. Dī-Ṭī 1. 167; Sī-Ṭī Abhinava 1. 436 piṭṭhesupī passitabbaṃ. 2. Ma 3. 20 piṭṭhe.
3. Sā (Ka)

Kiñca vaṇṇakasiṇesu viya purimabhūtakasiṇattayepi vaṇṇappaṭicchāyāva paṇṇatti ārammaṇaṃ jhānassa lokavohārānurodheneva pavattito. Evañca katvā **visuddhimagge**¹ pathavīkasiṇassa ādāsacandamaṇḍalūpamavacanañca samatthitaṃ hoti, catutthaṃ pana bhūtakasiṇaṃ bhūtappaṭicchāyameva jhānassa gocarabhāvaṃ gacchatīti tassevaṃ arūpapaṭibhāgatā yuttāti vāyokasiṇeyeva parikammaṃ vuttanti veditabbaṃ.

Dhīti jigucchanatthe nipāto, tasmā **dhi cittanti** cittaṃ jigucchāmi. **Dhi vatetaṃ cittanti** etaṃ mama cittaṃ jigucchitaṃ vata hotu. **Vatāti** sambhāvane. Tena jigucchanam sambhāvento vadati. **Nāmāti** ca sambhāvane eva. Tena cittassa abhāvaṃ sambhāveti. Cittassa bhāvābhāvesu ādīnavānisaṃse dassetuṃ “**cittañhī**”ti-ādi vuttaṃ. **Khantiṃ ruciṃ uppādetvāti** cittassa abhāvo eva sādhu suṭṭhūti imam diṭṭhinijjhānakkhantiṃ tattha ca abhiruciṃ uppādetvā. Tathā bhāvitassa jhānassa ṭhitibhāgiyabhāvappattiyā **aparihīnajjhānā**. Titthāyatane pabbajitasseva tathā jhānabhāvanā hotīti āha “**manussaloke**”ti. **Paṇihito ahoṣīti** maraṇassa āsannaḥāle ṭhapito ahoṣi. Yadi ṭhānādīnā ākārena nibbatteyya kammabalena, yāva bheda tenevākārena tiṭṭheyyāti āha “**tena iriyāpathenā**”ti-ādi. **Evarūpānampīti** evam acetanānampi. **Pi-saddena** pageva sacetanānanti dasseti. Kathaṃ pana acetanānaṃ nesaṃ paccayāhārassa upakappananti codanaṃ sandhāya tattha nidassanaṃ dassento “**yathā**”ti-ādimāha. Tena na kevalamāgamoyeva, ayamettha yuttīti dasseti. **Tāva tiṭṭhantīti** ukkaṃsato pañca mahākappasatāni tiṭṭhanti.

Ye uṭṭhānavīriyena divasaṃ vītināmetvā tassa nissandaphalamattaṃ kiñcīdeva labhitvā jīvikaṃ kappenti, te **uṭṭhānaphalūpajīvino**. Ye pana attano puññaphalameva upajīvanti, te **puññaphalūpajīvino**. Nerayikānaṃ pana neva uṭṭhānavīriyavasena jīvikakappanaṃ, puññaphalassa pana lesopi natthīti vuttaṃ “**ye panda nerayikā -pa- jīvīti vuttā**”ti. Paṭisandhiviññāṇassa āharaṇena manosañcetanā āhāroti vuttā, na yassa kassaci

1. Visuddhi 1. 122 piṭṭhe.

phalassāti adhippāyena “**kiṃ pañca āhārā atthī**”ti codeti. Ācariyo nippariyāyāhāre adhippete “siyā tava codanā avasarā, sā pana ettha anavasarā”ti ca dassento “**pañca, na pañcāti idaṃ na vattabban**”ti vatvā pariyāyāhārasseva panettha adhippetabhāvaṃ dassento “**nanu ‘paccayo āhāro’ti vuttametān**”ti āha. **Tasmāti** yassa kassaci paccayassa āhāroti icchittā. Idāni vuttamevattham pāḷiyā samatthento “**yaṃ sandhāyā**”ti-ādimāha.

Mukhyāhāravasenapi nerayikānaṃ āhāraṭṭhikataṃ dassetuṃ “**kabaḷim kārahāraṃ -pa- sādheti**”ti vuttaṃ. Yadi evaṃ nerayikā sukhappaṭisaṃvedinopi hontīti? Noti dassetuṃ “**kheḷo hī**”ti-ādi vuttaṃ. **Tayoti** tayo arūpāhārā kabaḷikārahārassa abhāvato. **Avasesānanti** asaṅghasattehi avasesānaṃ kāmabhavādīsu nibbattasattānaṃ. Paccayāhāro hi sabbesaṃ sādhaṇoti.

Paṭhamamahāpañhasuttavaṇṇanā niṭṭhitā.

8. Dutiyamahāpañhasuttādivaṇṇanā

28-29. Aṭṭhame **evamṇāmake**ti kajaṅgalāti evaṃ itthiliṅgavasena laddhanāmake majjhimappadesassa mariyādabhūte nagare. “Nigame”tipi vadanti, “niculavane”tipi vadanti. Niculaṃ nāma ekā rukkhajāti, “nīparukkho”tipi vadanti. Tena saṅgho mahāvanasaṅḍo, tattha viharatīti attho. **Hetunā nayanā**ti ca heṭṭhā vuttameva. Nanu ca “**eso ceva tassa attho**”ti kasmā vuttaṃ. Bhagavatā hi cattāroti-ādipañhabyākaraṇā cattāro āhārā pañcupādānakkhandhā cha ajjhakkāni āyatanāni satta viññāṇaṭṭhitiyo aṭṭha lokadhammā dassitā. Bhikkhuniyā pana cattāro satipaṭṭhānā pañcendriyāni cha nissāraṇiyā dhātuyo satta bojjhaṅgā ariyo aṭṭhaṅgiko maggoti dassitadhammā aññoyevattho bhikkhuniyā dassitoti codanaṃ sandhāyāha “**kiñcāpī**”ti-ādi. Navame natthi vattabbaṃ.

Dutiyamahāpañhasuttādivaṇṇanā niṭṭhitā.

10. Dutiyakosalasuttavaṇṇanā

30. Dasame uggantvā yujjhati etāyāti **uyyodhikā**, sathhappahārehi yujjhitassetam̐ adhivacanam̐. Uggantvā yujjhanam̐ vā **uyyodhiko**, sathhappahāro. Tenāha “**yuddhato nivatto**”ti. **Upassutivasena yujjhitabbākāram̐ ña tvāti** jetavane kira dattatthero dhanuggahatissattheroti dve mahallakattherā vihārapaccante paṇṇasālāya vasanti. Tesu dhanuggahatissatthero pacchimayāme pabujjhitvā utṭhāya nisinno dattattheram̐ āmantetvā “ayam̐ te mahodaro kosalo bhuttabhattameva pūtim̐ karoti, yuddhavicāraṇam̐ pana kiñci na jānāti, parājitotveva vadāpeti”ti vatvā tena “kim̐ pana kātum̐ vaṭṭati”ti vutte “bhante yuddho nāma padumabyūho cakkabyūho sakaṭabyūhoti tayo byūhā honti, ajātasattu gaṇhitukāmena asukasmim̐ nāma pabbatakucchismim̐ dvīsu pabbatabhittīsu manusse ṭhapetvā purato dubbalam̐ dassetvā pabbatantaram̐ pavitṭhabhāvam̐ jānitvā pavitṭhamaggaṃ rundhitvā purato ca pacchato ca ubhosu pabbatabhittīsu vaggitvā naditvā jālapakkhittamaccham̐ viya katvā sakkā gahetun”ti. Tasmim̐ khaṇe “bhikkhūnam̐ kathāsallāpam̐ suṇāthā”ti rañño pesitacarapurisā tam̐ sutvā rañño ārocesum̐. Tam̐ sutvā rājā saṅgāmaḥherim̐ paharāpetvā gantvā sakaṭabyūham̐ katvā ajātasattum̐ jīvaggāham̐ gaṇhi. Tena vuttam̐ “**upassutivase -pa- ajātasattum̐ gaṇhī**”ti.

Doṇapākanti doṇataṇḍulānam̐ pakkabhattam̐. **Doṇanti** catunālikānametamadhivacanam̐. **Manujassāti**¹ sattassa. **Tanukassāti** tanukā appikā assa puggalassa, bhuttapaccayā visabhāgavedanā na honti. **Sanīkanti** mandam̐ mudukam̐, aparissayamevāti attho. **Jīratīti** paribhuttāhāro paccati. **Āyu pālayanti** nirogo avedano jīvitam̐ rakkhanto. Atha vā **saṇīkam̐ jīratīti** so bhojane mattaññū puggalo parimitāhāratāya saṇīkam̐ cirena jīrati jaram̐¹ pāpuṇāti jīvitam̐ pālayanto.

Imam̐ ovādam̐ adāsīti ekasmim̐ kira² samaye rājā taṇḍuladoṇassa odanam̐ tadupiyena sūpabyañjanena bhuñjati. So ekadivasam̐

1. Ciram̐ (Ka) Sam̐-Ṭī 1. 185 piṭṭhe pana passitabbam̐.

2. Dhammapada-Ṭīha 2. 171 piṭṭhādīsipi passitabbam̐.

bhuttapātarāso bhattasammadaṃ avinodetvā satthu santikaṃ gantvā kilantarūpo ito cito ca samparivattati, niddāya abhibhuyyamānopi lahukaṃ nipajjitum asakkonto ekamantaṃ nisīdi. Atha naṃ satthā āha “kiṃ mahārāja avissamitvāva āgatosī”ti. Āma bhante bhuttakālato paṭṭhāya me mahādukkhaṃ hotīti. Atha naṃ satthā “mahārāja atibahubhojīnaṃ etaṃ dukkhaṃ hotī”ti vatvā—

“Middhī yadā hoti mahagghaso ca,
Niddāyitā samparivattasāyī.
Mahāvarāhova nivāpapaṭṭho,
Punappunaṃ gabbhamupeti mando”ti¹—

imāya gāthāya ovaditvā “mahārāja bhojanaṃ nāma mattāya bhuñjitum vaṭṭati, mattabhojino hi sukhaṃ hotī”ti uttaripi puna ovadanto “manujassa sadā satīmato”ti² imaṃ gāthamāha.

Rājā pana gātham uggaṇhitum nāsakkhi, samīpe ṭhitaṃ pana bhāgineyyaṃ sudassanaṃ nāma māṇavaṃ “imaṃ gātham uggaṇha tātā”ti āha. So taṃ gātham uggaṇhitvā “kiṃ karomi bhante”ti satthāraṃ pucchi. Atha naṃ satthā āha “māṇava imaṃ gātham naṭo viya pattapattaṭṭhāne³ mā avaca, rañño pātarāsaṃ bhuñjanaṭṭhāne ṭhatvā paṭhamapiṇḍādīsupi avatvā avasāne piṇḍe gahite vadeyyāsi, rājā sutvā bhattapiṇḍaṃ chaḍḍessati. Atha rañño hatthesu dhotesu pātim apanetvā sithhāni gaṇetvā tadupiyaṃ byañjanaṃ ña tvā punadivase tāvatake taṇḍule hāreyyāsi. Pātarāse ca vatvā sāyamāse mā vadeyyāsi”ti. So “sādhū”ti paṭissuṇitvā taṃ divasaṃ rañño pātarāsaṃ bhutvā gatattā sāyamāse bhagavato anusitṭhīniyāmena gātham abhāsi. Rājā dasabalassa vacanaṃ saritvā bhattapiṇḍaṃ pātiyaṃyeva chaḍḍesi. Rañño hatthesu dhotesu pātim apanetvā sithhāni gaṇetvā punadivase tattake taṇḍule harimsu, sopi māṇavo divase divase tathāgatassa santikaṃ gacchati. Dasabalassa vissāsiko ahosi. Atha naṃ ekadivasaṃ pucchi “rājā kittakaṃ bhuñcati”ti. So “nāḷikodanan”ti āha. Vaṭṭissati

1. Khu 1. 59; Khu 10. 30, 108 piṭṭhesu.

2. Saṃ 1. 82 piṭṭhe.

3. Bhuttabhuttaṭṭhāne (Ka)

ettāvata purisabhāgo esa, ito paṭṭhāya gātham mā vadīti. Rājā theva saṅghāsi. Tena vuttam “**nālikodanaparamatāya saṅghāsi**”ti. Rattaññutāya vaḍḍhitam sīlam assa atthīti **vaḍḍhitasīlo**. Apothujjanikehi sīlehīti catupārisuddhisīlehi sīlam ariyam suddham. Tena vuttam “**ariyasīlo**”ti. Tadekam anavajjaṭṭhena kusalam. Tena vuttam “**kusalasīlo**”ti.

Dutiyakosalasuttavaṇṇanā niṭṭhitā.

Mahāvaggavaṇṇanā niṭṭhitā.

4. Upālivagga

1. Upālisuttavaṇṇanā

31. Catutthassa paṭhame¹ **atthavaseti** vuddhivisesse, sikkhāpadapaññattihetu adhigamanīye hitaviseseti attho. Atthoyeva vā **atthavaso**, dasa atthe dasa kāraṇānīti vuttam hoti. Atha vā attho phalam tadadhīnavuttitāya vaso etassāti **atthavaso**, hetūti evampettha attho daṭṭhabbo. “Ye mama sotabbam saddahātabbam maññissanti, tesam tam assa dīgharattam hitāya sukhāyā”ti vuttattā “**yo ca tathāgatassa vacanam sampañcchati, tassa tam dīgharattam hitāya sukhāya samvattati**”ti vuttam. **Asampañcchane ādīnavanti** bhaddālisutte viya asampañcchane ādīnavam dassetvā. Sukhavihārābhāve sahaḥjīvamānassa abhāvato sahaḥjīvitāpi sukhavihārova vutto. **Sukhavihāro** nāma catunnam iriyāpathavihārānam phāsutā.

Maṅkutanti nittejatanam. **Dhammenāti**-ādīsu **dhammoti** bhūtam vatthu. **Vinayoti** codanā ceva sārāṇā ca. **Satthusāsananti** ña ttisampadā ceva anussāvanasampadā ca.

Piyasīlānanti sikkhākāmānam. Tesam hi sīlam piyam hoti. Tenevāha “**sikkhāttayapāripūriyā ghaṭamānā**”ti. **Sandiddhamanāti** saṃsayam

1. Sārattha-Ṭī 2. 33 piṭṭhādīsupi passitabbam.

āpajjamanā. **Ubbalḥā hontīti** pīlitā hontī. **Samṅhakammānīti** satipi uposathapavāraṇānaṃ saṃghakammabhāve gobalībaddaṇāyena uposathaṃ pavāraṇāṇca ṭhapetvā upasampadādisesaṃghakampānaṃ gahaṇaṃ veditabbaṃ. Samaggānaṃ bhāvo **sāmaggī**.

“Nāhaṃ cunda diṭṭhadhammikānaṃyeva āsavānaṃ saṃvarāya dhammaṃ desemī”¹ ettha vivādamūlabhūtā kilesā āsavāti āgatā.

“Yena devūpapatyassa, gandhabbo vā vihaṅgamo.

Yakkhattaṃ yena gaccheyyaṃ, manussattaṇca abbaje.

Te mayhaṃ āsavā khīṇā, viddhastā vinaḷikataṃ”²—

ettha tebhūmakāṃ kammaṃ avasesā ca akusalā dhammā. Idha pana parūpavādavippaṭṭisāravadhabandhādayo ceva apāyadukkhabhūtā ca nānappakārā upaddavā **āsavāti** āha “**asaṃvare ṭhitena tasmimyeva attabhāve pattabbā**”^{ti}-ādi. Yadi hi bhagavā sikkhāpadaṃ na ca pañṇapeyya, tato asaddhammappaṭisevana adinnādānapāṇātipātādihetu ye uppajjeyyūṃ parūpavādādayo diṭṭhadhammikā nānappakārā anattā, ye ca tannimittameva nirayādisu nibbattassa pañcavidhabandhanakammakāraṇādivasena mahādukkhānubhavanappakārā anattā, te sandhāya idaṃ vuttaṃ “**diṭṭha dhammikānaṃ āsavānaṃ saṃvarāya samparāyikānaṃ āsavānaṃ paṭighātāyā**”^{ti}. Diṭṭhadhammo vuccati paccakkho attabhāvo, tathā bhavādiṭṭhadhammikā. Tena vuttaṃ “**tasmimyeva attabhāve pattabbā**”^{ti}. Sammukhā garahaṇaṃ **akitti**, parammukhā garahaṇaṃ **ayasa**. Atha vā sammukhā parammukhā garahaṇaṃ **akitti**, parivārahāni **ayasoti** veditabbaṃ. **Āgamanamaggathakanāyāti** āgamanadvārapidahanattāya. Samparettabbato pecca gantabbato **samparāyo**, paralokoti āha “**samparāye narakādisū**”^{ti}.

Methunādīni **rajjanattḥānāni**. Pāṇātipātādīni **dussanattḥānāni**.

Saṃvaravinayoti sīlasaṃvaro satisaṃvaro ñāṇasaṃvaro khantisaṃvaro vīriyasaṃvaroti pañcavidho saṃvaro. Yathāsakaṃ saṃvaritabbānaṃ vinetabbānaṇca kāyaduccaritādīnaṃ saṃvaraṇato saṃvaro, vinayanato vinayoti

1. Dī 3. 107 piṭṭhe.

2. Aṃ 1. 348 piṭṭhe.

vuccati. **Pahānavinayoti** tadaṅgappahānaṃ vikkhambhanappahānaṃ samucchadappahānaṃ paṭipassaddhippahānaṃ nissaraṇappahānanti pañcavidhaṃ pahānaṃ yasmā cāgaṭṭhena pahānaṃ, vinayaṭṭhena vinayo, tasmā “pahānavinayo”ti vuccati. **Samathavinayoti** satta adhikaraṇasamathā. **Paññattivinayoti** sikkhāpadameva. Sikkhāpadapaññattiyā hi vijjamānāya eva sikkhāpadasambhavato paññattivinayopi sikkhāpadapaññattiyā anuggahito hoti. Sesamettha vuttatthameva.

Upālisuttavaṇṇanā niṭṭhitā.

Upālivaggavaṇṇanā niṭṭhitā.

5. Akkosavagga

1. Vivādasuttādivaṇṇanā

41-48. Pañcamassa paṭhamādīni uttānatthāni. Chaṭṭhe khaṇabhaṅguratāya na niccā na dhuvāti **aniccā**. Tato eva paṇḍitehi na iccā na upagantabbātipi **aniccā**. Svāyaṃ nesaṃ aniccaṭṭho udayavayaparicchinnatāya veditabboti āha “**hutvā abhāvino**”ti, uppajjitvā vinassakāti attho. **Sārarahitāti** niccasāradhuvasāra-attasāravirahitā. **Musāti** visamvādanaṭṭhena musā, ekamsena asubhādisabhāvā te bālānaṃ subhādibhāvena upaṭṭhahanti, subhādiggahaṇassa paccayabhāvena satte visamvādentī. Tenāha “**niccasubhasukhā viyā**”ti-ādi. **Na passanasabhāvāti** khaṇapabhaṅguratā ittarapaccupaṭṭhānatāya dissamānā viya hutvā adassanapakatikā. Ete hi khettaṃ viya vatthu viya hiraññasuvaṇṇaṃ viya ca paññāyitvāpi katipāheneva supinake diṭṭhā viya na paññāyanti. Sattamaṭṭhamāni suviññeyyāni.

Vivādasuttādivaṇṇanā niṭṭhitā.

9. Sarīraṭṭhadhammasuttādivaṇṇanā

49-50. Navame punabbhavadānaṃ punabbhavo uttarapadalopena, punabbhavo sīlamassāti **ponobhaviko**, punabbhavadāyakoti attho. Tenāha “**punabbhavanibbattako**”ti. **Bhavasāṅkharaṇakammanti** punabbhavanibbattanakammaṃ. Dasame natthi vattabbaṃ.

Sarīraṭṭhadhammasuttādivaṇṇanā niṭṭhitā.

Akkosavaggavaṇṇanā niṭṭhitā.

Paṭhamapaṇṇāsako niṭṭhito.

2. Dutiyapaṇṇāsaka

(6) 1. Sacittavagga

1. Sacittasuttādivaṇṇanā

51-60. Dutiyavaggassa paṭhamādīni uttānatthāni. Dasame pittaṃ samuṭṭhānametesanti **pittasamuṭṭhānā**, pittaṃ paccayāpittahetukāti attho. **Semhasamuṭṭhānā**dīsupi eseva nayo. **Sannipātikāti** tiṇṇampi pittaḍḍināṃ kopena samuṭṭhitā. **Utupariṇāmajāti** visabhāga-ututo jātā. Jaṅgaladesavāsīnaṃ hi anūpadese vasantānaṃ visabhāgo ca utu uppajjati, anūpadesavāsīnaṃ jaṅgaladeseti evaṃ parasamuddatīrādivasenapi¹ utuvisabhāgatā uppajjatiyeva. Tato jātāti **utupariṇāmajā**. Attano pakaticariyānaṃ visayānaṃ visamaṃ kāyapariharaṇavasena jātā **visamaparihārajā**. Tenāha “**aticiraṭṭhānanisajjādīnā visamaparihārena jātā**”ti. **Ādi**-saddena mahābhāravahanasudhakoṭṭanādīnaṃ saṅgaho. Parassa upakkamato nibbattā **opakkamikā**. Bāhiraṃ paccayaṃ anapekkhitvā kevalaṃ kammavipākatova jātā **kammavipākajā**. Tattha purimehi sattahi kāraṇehi uppannā sārīrikā vedanā sakkā paṭibāhituṃ, kammavipākajānaṃ pana sabbabhesajjānīpi sabbaparittānīpi nālaṃ paṭighātāya.

Sacittasuttādivaṇṇanā niṭṭhitā.

Sacittavaggavaṇṇanā niṭṭhitā.

(7) 2. Yamakavagga

1. Avijjāsuttādivaṇṇanā

61-67. Dutiyassa paṭhamādīni uttānatthāni. Sattame **naḷakapānake**ti evaṃnāmake nigame. Pubbe kira² amhākaṃ bodhisatto kapiyonīyaṃ

1. Malayasamuddatīrādivasenapi (Saṃ-Ṭṭha 3. 121 piṭṭhe.)

2. Jātaka-Ṭṭha 1. 186 piṭṭhādīsupi passitabbaṃ.

nibbatto mahākāyo kapiṛājā hutvā anekasatavānarahassaparivuto pabbatapāde vicari, paññavā kho pana hoti mahāpañño. So parisam evaṃ ovadati “tātā imasmim pabbatapāde visaphalāni honti, amanussapariggahitā pokkharaṇikā nāma honti, tumhe pubbe khāditapubbāneva phalāni khādatha, pītapubbāneva pānīyāni pivatha, ettha vo paṭipucchitakiccaṃ natthī”ti. Te apītapubbam disvā sahasāva apivivā samantā paridhāvivā mahāsattassa āgamanam olokayamānā nisīdīmsu. Mahāsatto āgantvā “kim tātā pānīyam na pivathā”ti āha. Tumhākam āgamanam olokemāti. “Sādhu tātā”ti samantā padam pariyesamāno otiṇṇapadamyeva addasa, na uttiṇṇapadam. Adisvā “saparissayā”ti aññāsī. Tāvadeva ca tattha abhinibbatta-amanusso udakam dvedhā katvā utthāsī setamukho nīlakucchi rattahatthapādo mahādāṭhiko vantadāṭho virūpo bībhaccho udakarakkhaso. So evamāha “kasmā pānīyam na pivatha, madhuram udakam pivatha, kim tumhe etassa vacanam suṇāthā”ti. Mahāsatto āha “tvam adhivattho amanusso”ti. Āmāhanti. “Tvam idha otiṇṇe labhasī”ti āha. Āma tumhe pana sabbe khādissāmīti. Na sakkhissasi yakkhāti. Pānīyam pana pivissathāti. Āma pivissāmīti. Evaṃ sante ekampi vānaram na muñcissanti. “Pānīyañca pivissāma, na ca te vasam gamissāmī”ti naḷam āharāpetvā koṭiyam gahetvā dhami. Sabbo ekacchiddo ahoṣi. Tīre nisīditvāva pānīyam pivi. Sesavānarānampi pāṭiyekkam naḷam āharāpetvā dhamitvā adāsī. Sabbete passantasseva pānīyam pivimsu. Vuttampi cetam—

“Disvā padamanuttiṇṇam, disvāno’aritam padam.

Naḷena vārim pissāma, neva mam tvam vadhissasī”ti¹.

Tato paṭṭhāya yāva ajjadivasā tasmim ṭhāne naḷa ekacchiddāva honti. Imasmim hi kappe kappapāṭṭhiyapāṭṭhiyāni nāma cande sasalakkhaṇam², vaṭṭajātaka³ saccakiriyaṭṭhāne aggijālassa āgamanupacchedo, ghaṭikārassa mātāpītunam vasanaṭṭhāne anovassanam⁴, pokkharaṇiyā tīre naḷanam ekacchiddabhāvoti. Iti sā pokkharaṇī naḷena pānīyassa pivittatā “naḷakapānakā”ti nāmam labhi. Aparabhāge tam pokkharaṇim

1. Khu 5. 5 piṭṭhe Jātaka.

3. Khu 5. 9 piṭṭhe.

2. Khu 5. 101 piṭṭhe.

4. Ma 2. 244 piṭṭhe.

nissāya nigamo patiṭṭhāsi, tassapi “naḷakapānan”tveva nāmaṃ jātaṃ. Taṃ pana sandhāya vuttaṃ “naḷakapāne”ti. **Palāsavaneti** kiṃsukavane.

Tuṇhībhūtaṃ tuṇhībhūtaṃ byāpanicchāyaṃ idaṃ āmeditavacananti dassetuṃ “**yaṃ yaṃ disan**”ti-ādi vuttaṃ. **Anuviloketvā**ti ettha anusaddo “parī”ti iminā samānatthoti āha “**tato tato viloketvā**”ti. **Kasmā āgilāyati** koṭisahassahatthināgānaṃ balaṃ dhārentassāti codakassa adhippāyo. Ācariyo panassa “esa saṅkhārānaṃ sabhāvo, yadidaṃ aniccatā. Ye pana aniccā, te ekanteneva udayavayappaṭipīḷitatāya dukkhā eva. Dukkhasabhāvesu tesu satthukāye dukkhuppattiyā¹ ayaṃ paccayo”ti dassetuṃ “**bhagavato**”ti-ādi vuttaṃ. **Piṭṭhivāto uppajji**, so ca kho pubbekatakammapaccayā. Etthāha “kiṃ pana taṃ kammaṃ, yena aparimāṇakālaṃ sakkaccaṃ upacitavipulapuññasambhāro satthā evarūpaṃ dukkhavipākamanubhavatī”ti? Vuccate—ayameva bhagavā bodhisattabhūto atītajātiyaṃ mallaputto hutvā pāpajanasevī ayonisomanasikārabahulo carati. So ekadivasaṃ nibbuddhe vattamāne ekaṃ mallaputtaṃ gahetvā gālhataṃ nippīlesi. Tena kammena idāni buddho hutvāpi dukkhamanubhavi. Yathā cetāṃ, evaṃ ciñcamāṇavikāḍḍhinamitthīnaṃ yāni bhagavato abbhakkhānāḍḍhīni dukkhāni, sabbāni pubbekatassa vipākāvasesāni, yāni kammapiḷotikānīti vuccanti. Vuttaṃ hetāṃ **apadāne**²—

“Anotattasarāsanne, ramaṇīye silātale.

Nānāratanaṃ pājote, nānāgandhavanantare.

Mahatā bhikkhusaṃghena, pareto lokanāyako.

Āsīno byākarī tattha, pubbakammāni atthano.

Suṇātha bhikkhavo mayhaṃ, yaṃ kammaṃ pakatāṃ mayā.

Piḷotikassa kammaṃ, buddhattepi vipaccati.

1. Munāli nāmaṃ dhutto, pubbe aññāsu jātisu.

Paccekaḥ buddhaṃ surabhiṃ, abbhācikkhiṃ adūsakaṃ.

1. Sabbakāyadukkhappattiyā (Ka)

2. Khu 3. 346 piṭṭhe.

Tena kammavipākena, niraye saṃsariṃ ciraṃ.
Bahū vassasahassāni, dukkhaṃ vedesi vedanaṃ.

Tena kammāvasesena, idha pacchimake bhave.
Abbhakkhānaṃ mayā laddhaṃ, sundarikāya kāraṇā.

2. Sabbābhībhussa buddhassa, nando nāmāsi sāvako.
Taṃ abbhakkhāya niraye, ciraṃ saṃsaritaṃ mayā.

Dasa vassasahassāni, niraye saṃsariṃ ciraṃ.
Manussabhāvaṃ laddhāhaṃ, abbhakkhānaṃ bahūṃ labhiṃ.

Tena kammāvasesena, ciñcamāṇavikā mamaṃ.
Abbhācikkhi abhūtena, janakāyassa aggato.

3. Brāhmaṇo sutavā āsiṃ, ahaṃ sakkatapūjito.
Mahāvane pañcasate, mante vācesi māṇave.

Tatthāgato isi bhīmo, pañcābhiñño mahiddhiko.
Tañcāhaṃ āgataṃ disvā, abbhācikkhiṃ adūsakaṃ.

Tatohaṃ avacaṃ sisse, kāmabhogī ayaṃ isi.
Mayhampi bhāsamānassa, anumodimsu māṇavā.

Tato māṇavakā sabbe, bhikkhamānaṃ kule kule.
Mahājanassa āhaṃsu, kāmabhogī ayaṃ isi.

Tena kammavipākena, pañca bhikkhusatā ime.
Abbhakkhānaṃ labhuṃ sabbe, sundarikāya kāraṇā.

4. Vemātubhātaraṃ pubbe, dhanahetu haniṃ ahaṃ.
Pakkhipiṃ giriduggasmiṃ, silāya ca apimsayiṃ.

Tena kammavipākena, devadatto silaṃ khipi.
Aṅguttāhaṃ pimsayī pāde, mama pāsāṇasakkharā.

5. Purehaṃ dāraako hutvā, kīlamāno mahāpathe.
Paccekabuddhaṃ disvāna, magge sakalikaṃ khipiṃ.

Tena kammavipākena, idha pacchimake bhava.
Vadhatthaṃ maṃ devadatto, abhimāre payojayi.

6. Hatthāroho pure āsiṃ, paccekamunimuttamaṃ.
Piṇḍāya vicarantaṃ taṃ, āsādesiṃ gajenahaṃ.

Tena kammavipākena, bhanto nāḷāgirī gajo.
Giribbaje puravare, dāruṇo samupāgami.

7. Rājāhaṃ patthivo āsiṃ, sattiyā purisaṃ haniṃ.
Tena kammavipākena, niraye paccisaṃ bhusaṃ.
Kammuno tassa sesena, idāni sakalaṃ mama.
Pāde chaviṃ pakappesi, na hi kammaṃ vinassati.

8. Ahaṃ kevaṭṭagāmasmiṃ, ahuṃ kevaṭṭadārako.
Macchake ghātite disvā, janayiṃ somanassakaṃ.
Tena kammavipākena, sīsadukkhaṃ ahū mama.
Sabbe sakkā ca haññimsu, yadā hani viṭaṭūbho.

9. Phussassāhaṃ pāvacane, sāvake paribhāsayiṃ.
Yavaṃ khādatha bhuñjatha, mā ca bhuñjatha sālayo.
Tena kammavipākena, temāsaṃ khāditāṃ yavaṃ.
Nimantito brāhmaṇena, verañjāyaṃ vasiṃ tadā.

10. Nibbuddhe vattamānamhi, mallaputtaṃ niheṭhayiṃ.
Tena kammavipākena, piṭṭhidukkhaṃ ahū mama.

11. Tikicchako ahaṃ āsiṃ, seṭṭhiputtaṃ virecayiṃ.
Tena kammavipākena, hoti pakkhandikā mama.

12. Avacāhaṃ jotipālo, sugataṃ kassapaṃ tadā.
Kuto nu bodhi muṇḍassa, bodhi paramadullabhā.
Tena kammavipākena, acarīṃ dukkaraṃ bahuṃ.
Chabbassānuruvelāyaṃ, tato bodhimapāpuṇiṃ.

Nāhaṃ etena maggena, pāpuṇim bodhimuttamaṃ.

Kummaggena gavesissaṃ, pubbakammaena vārito.

Puñṇapāpapakikkhīṇo, sabbasantāpavajjito.

Asoko anupāyāso, nibbāyissamanāsavo.

Evaṃ jino viyākāsi, bhikkhusaṃghassa aggato.

Sabbābhiññābalappatto, anotatte mahāsare”ti¹.

Avijjāsuttādivaṇṇanā niṭṭhitā.

9. Paṭhamakathāvatthusuttādivaṇṇanā

69-70. Navame² duggatito saṃsārato ca niyyāti etenāti niyyānaṃ, saggamaggo mokkhamaggo ca. Taṃ niyyānaṃ arahati, niyyāne vā niyuttā, niyyānaṃ vā phalabhūtaṃ etissā atthīti niyyānikā. Vacīduccaritasamkilesato niyyātīti vā ikārassa rassattaṃ, yakārassa ca kakāraṃ katvā niyyānikā, cetaṇāya saddhiṃ samphappalāpā veramaṇi. Tappaṭipakkhato aniyyānikā, tassā bhāvo aniyyānikattaṃ, tasmā **aniyyānikattā**. **Tiracchānabhūtaṃ** tirokaraṇabhūtaṃ. **Gehassitakathā**ti gehappaṭisaṃyuttā.

Kammaṭṭhānabhāveti aniccatāpaṭisaṃyuttacatusaccakammaṭṭhānabhāve.

Saha atthenāti **sāttakam**, hitappaṭisaṃyuttanti attho. “Surākathā”tipi pāṭhoti āha “**surākathanti pāliyaṃ panā**”ti. Sā panesā kathā “evarūpā navasurā pītā ratijananī hotī”ti assādavasena na vaṭṭati, ādīnavavasena pana “ummattakasaṃvattanikā”ti-ādīnā nayena vaṭṭati. Tenāha “**anekavidharṇ -pa- ādīnavavasena vaṭṭati**”ti. **Visikhā**ti gharasanniveso. Visikhāgahaṇena ca tannivāsino gahitā “gāmo āgato”ti-ādīsu viya. Tenevāha “**sūrāsamatthā**”ti ca “**saddhā pasannā**”ti ca. Kumbhaṭṭhānappadesena kumbhadāsiyo vuttāti āha “**kumbhadāsikathā vā**”ti.

1. Khu 3. 350 piṭṭhe Apadāne.

2. Dī-Ṭī 1. 128; Sī-Ṭī Abhinava 1. 366; Saṃ-Ṭī 2. 539 piṭṭhādīsopi passitabbaṃ.

Rājakathādipurimakathāya, lokakkhāyikādipacchimakathāya vā vinimuttā purima pacchimakathā **vimuttā**. Uppattiṭhitisamhārādivasena lokam akkhāyatīti **lokakkhāyikā**. **Asukena nāmāti** pajāpatinā brahmunā, issarena vā. **Vitaṇḍasallāpakathāti** “aṭṭhīnam setattā setoti na vattabbo, pattānam kāḷattā kāḷoti pana vattabbo”ti evamādikā. **Ādi-saddena** “selapupphalakāni viya jīvidāvirapārayattivīsālā natthi yaṁ yo koci tiriyāmānā katattā”¹ti evamādīnam saṅgaho daṭṭhabbo. **Sāgaradevenāti** sāgaraputtarājūhi. **Khatoti** etaṁ ekavacanam tehi paccekam khatattā “sāgaradevena khatattā”ti vuttam. Sahamuddā samuddoti vutto. Bhavati vaddhati etenāti **bhavo**. Bhavābhavā hontīti **itibhavābhavakathā**. Ettha ca **bhavoti** sassatam, **abhavoti** ucchedam. **Bhavoti** vuddhi, **abhavoti** hāni. **Bhavoti** kāmasukham, **abhavoti** attakilamathoti iti imāya chabbidhāya itibhavābhavakathāya saddhim bāttimsa tiracchānakathā nāma hontī. Atha vā pāḷiyam sarūpato anāgatāpi araṇṇapabbatanadīpapakathā itisaddena saṅgaṇhitvā bāttimsa tiracchānakathā vuttā. Dasame natthi vattabbam.

Paṭhamakathāvatthusuttādivaṇṇanā niṭṭhitā.

Yamakavaggavaṇṇanā niṭṭhitā.

(8) 3. Ākaṅkhavagga

1. Ākaṅkhasuttādivaṇṇanā

71-74. Tatiyassa paṭhame sīlassa anavasesasamādānena akhaṇḍādibhāvāpattiyā ca **paripuṇṇasīlā**. Samādānato paṭṭhāya avicchindanato **sīlasamaṅgino**. **Ettāvata kirāti**² **kira-saddo** arucisūcanattho. Tenettha ācariyavādassa attano aruccanabhāvaṁ dīpeti. **Sampannasīlāti** anāmaṭṭhavisesaṁ sāmāññato sīlasaṅkhepena gahitam. Taṅca catubbidhanti ācariyatthero “**catupārisuddhisīlam uddisitvā**”ti āha.

1. Ettha ākārapāṭho viññūhi sodhetabbo.

2. Am-Ṭi 2. 34 piṭṭhe passitabbam.

Tatthāti catupārisuddhisīle. **Jeṭṭhakasīlanti**¹ padhānasīlaṃ. **Ubhayatthā**ti uddesaniddese. Idha niddese viya uddeseṇi pātimokkhasaṃvaro bhagavatā vutto “sampannasīlā”ti vuttattāti adhippāyo. Sīlaggahaṇaṃ hi pāliyaṃ pātimokkhasaṃvaravasena āgataṃ. Tenāha “**pātimokkhasaṃvaroyevā**”ti-ādi. Tattha avadhāraṇena itaresaṃ tiṇṇaṃ ekadesena pātimokkhantogadhatāṃ dīpeti. Tathā hi anolokiyolokane ājīvahetu chasikkhāpadavītikkame gilānapaccayassa apaccavekkhitaparibhoge ca āpatti vihitāti. **Tiṇṇī**ti indriyasamvarasīlādīni. **Sīlanti vuttatṭhānaṃ nāma atthī**ti sīlapariyāyena tesāṃ katthaci sutte gahitaṭṭhānaṃ nāma kiṃ atthi yathā pātimokkhasaṃvaroti ācariyassa sammukhattā appaṭikkhipantova upacārena pucchanto viya vadati. Tenāha “**ananujānanto**”ti.

Chadvārarakkhāmattakamevāti tassa sallahukabhāvamāha cittādhiṭṭhānamattena paṭipākatikabhāvāpattito. Itaresuṇi eseva nayo. **Paccayuppattimattakanti** phalena hetuṃ dasseti. Uppādanahetukā hi paccayānaṃ uppatti. **Idamatthanti** idaṃ payojanaṃ imassa paccayassa paribhuñjanti adhippāyo. **Nippariyāyenā**ti iminā indriyasamvarādīni tiṇṇi padhānassa sīlassa parivāravasena pavattiyā pariyāyasīlāni nāmāti dasseti.

Idāni pātimokkhasaṃvarasseva padhānabhāvaṃ byatirekato anvayato ca upamāya vibhāvetuṃ “**yassā**”ti-ādimāha. Tattha **soti** pātimokkhasaṃvaro. **Sesānī**ti indriyasamvarādīni. **Tassevā**ti “sampannasīlā”ti ettha yaṃ sīlaṃ vuttaṃ, tasseva. **Sampannapātimokkhā**ti ettha pātimokkhaggahaṇena vevacanaṃ vatvā **taṃ vitthāretvā -pa- ādimāha**. Yathā aññatthāpi “idha bhikkhu sīlavā hotī”ti puggalādhiṭṭhānāya desanāya uddiṭṭhaṃ sīlaṃ “pātimokkhasaṃvarasaṃvuto viharatī”ti² niddiṭṭhaṃ. **Kasmā āraddhanti** desanāya kāraṇapucchā. **Sīlānisamsadassana tthanti** payojanāniddeso. “Sīlānisamsadassanatthan”ti hi ettha byatirekato yaṃ sīlānisamsassa adassanaṃ, taṃ imissā desanāya kāraṇanti kasmā āraddhanti? Veneyyānaṃ sīlānisamsassa adassanatoti atthato

1. Saṃ-Ṭī 2. 484 piṭṭhādīsu passitabbāṃ.

2. Abhi 2. 253 piṭṭhe jhānavibhaṅge.

āpanno eva hoti. Tenāha “**sacepi**”ti-ādi. **Sīlānisamsadassanattanti** pana imassa atthaṃ vivarituṃ “**tesan**”ti-ādi vuttaṃ. **Ānisamsoti** udayo. “Sīlavā sīlasampanno kāyassa bhedaṃ paraṃ maraṇā sugatiṃ saggāṃ lokāṃ upapajjati”ti-ādīsu¹ pana vipākaphalampi “ānisamsa”ti vuttaṃ. **Ko visesoti** ko phalaviseso. **Kā vaḍḍhīti** ko abbhudayo. Vijjamānopi guṇo yāthāvato vibhāvito eva abhiruciṃ uppādeti, na avibhāvito, tasmā ekantako ānisamsakittanaṃ icchitabbamevāti dassetuṃ “**appeva nāmā**”ti-ādimāha.

Piyoti piyāyitabbo. Piyassa nāma dassanaṃ ekantato abhinanditabbaṃ hotīti āha “**piyacakkhūhi sampassitabbo**”ti. Pītisamuṭṭhānappasannasommarūpapariggahaṃ hi cakkhu “piyacakkhū”ti vuccati. **Tesanti** sabrahmacārīnaṃ. **Manavaḍḍhanakoti** pītimanassa paribrūhanato uparūpari pīticittasseva uppādanako. **Garuṭṭhāniyoti** garukaraṇassa ṭhānabhūto. **Jānaṃ jānātīti** ñāṇena jānitabbaṃ jānāti. Yathā vā aññe ajānantāpi jānantā viya pavattanti, na evamayaṃ, ayaṃ pana jānanto eva jānāti. **Passaṃ passatīti** dassanabhūtena paññācakkhunā passitabbaṃ passati, passanto eva vā passati. **Evam sambhāvanīyoti** evaṃ viññutāya paṇḍitabhāvena sambhāvetabbo. **Sīlesvevassa paripūrakārīti** sīlesu paripūrakārī eva bhavyeyyāti. Evaṃ uttarapadāvadhāraṇaṃ datṭhabbaṃ. Evaṃ hi iminā padena uparisikkhādvayaṃ anivattitameva hoti. Yathā pana sīlesu paripūrakārī nāma hoti, taṃ phalena dassetuṃ “**ajjhattan**”ti-ādi vuttaṃ. Vipassanādhiṭṭhānasamādhisaṃvattanikatāya hi idha sīlassa pāripūrī, na kevalaṃ akhaṇḍādibhāvamattaṃ. Vuttaṃ hettaṃ “yāni kho pana tāni akhaṇḍāni -pa- samādhisaṃvattanikāni”ti. Evañca katvā uparisikkhādvayaṃ sīlassa sambhārabhāvena gahitanti sīlassevettha padhānaggahaṇaṃ siddhaṃ hoti. Sīlanurakkhakā hi cितtekaggaṭāsāṅkhārapariggahā. **Anūnenāti** akhaṇḍādibhāvena, kassaci vā ahāpanena upapannena. **Ākārenāti** karaṇena sampādanena.

1. Dī 3. 197; Aṃ 2. 222; Vi 3. 322 piṭṭhesu.

Ajjhattanti vā **attanoti** vā ekaṃ ekatthaṃ, byañjanameva nānaṃ. Bhummatthe cetaṃ, “**samathan**”ti upayogavacanaṃ “anū”ti iminā upasaggena yoge siddhanti āha “**attano cittasamathe yutto**”ti. Tattha **cittasamathe**ti cittassa samādhāne. **Yuttoti** aviyutto pasuto. Yo sabbena sabbaṃ jhānabhāvanāya ananuyutto, so taṃ bahi nīharati nāma. Yo ārabhitvā antarā saṅkocaṃ āpajjati, so taṃ vināseti nāma. Yo pana īdiso ahutvā jhānaṃ upasampajja viharati, so anirākatajjhānoti dassento “**bahi anīhaṭajjhāno**”ti-ādimāha. Nīharaṇavināsatthaṃ hi idaṃ nirākaraṇaṃ nāma. “Thambhaṃ niraṃkatvā nivātavutti”ti-ādīsu¹ cassa payogo daṭṭhabbo.

Sattavidhāya anupassanāyāti ettha aniccānupassanā dukkhānupassanā anattānupassanā nibbidānupassanā virāgānupassanā nirodhānupassanā paṭinissaggānupassanāti imā sattavidhā anupassanā. Suññāgāragato bhikkhu tattha laddhakāyavivekatāya samathavipassanāvasena cittavivekaṃ paribrūhento yathānusiṭṭhapaṭipattiyā lokaṃ sāsanañca attano viśesādhigamaṭṭhānabhūtaṃ suññāgārañca upasobhayamāno guṇavisesā dhiṭṭhānabhāvāpādanena viññūnaṃ atthato taṃ brūhento nāma hotīti vuttaṃ “**brūhetā suññāgārānaṃ**”ti. Tenāha “**ettha cā**”ti-ādi. Ekabhūmakādipāsāde kurumānopi pana neva suññāgārānaṃ brūhetāti daṭṭhabbo. Suññāgāraggahaṇena cettha araññarukkhamūlādi sabbaṃ padhānānuyogakkhamaṃ senāsaṇaṃ gahitanti daṭṭhabbaṃ.

Ettāvatā yathā taṇhāvicaritadesanā paṭhamaṃ taṇhāvasenā āraddhāpi taṇhāpadaṭṭhānattā mānadiṭṭhīnaṃ mānadiṭṭhiyo osarivā kamena papañcattayadesanā² jātā, evamayaṃ desanā paṭhamaṃ adhisīlasikkhāvasena āraddhāpi sīlapadaṭṭhānattā samathavipassanānaṃ samathavipassanāyo osarivā kamena sikkhāttayadesanā jātāti veditabbā. Ettha hi “sīlesvevassa paripūrakārī”ti ettāvatā adhisīlasikkhā vuttā, “ajjhattaṃ cetosamathamānuyutto anirākatajjhāno”ti ettāvatā adhiccittasikkhā, “vipassanāya samannāgato”ti ettāvatā adhipaññāsikkhā. “Brūhetā suññāgārānaṃ”ti iminā pana samathavasena

1. Khu 1. 327 piṭṭhe Suttanipāte.

2. Sikkhāttayadesanā (Ka) Ma-Ṭṭha 1. 162 piṭṭhe pana passitabbā.

suññāgāravaḍḍhane adhicitasikkhā, vipassanāvasena adhipaññāsikkhāti evaṃ dvepi sikkhā saṅgahetvā vuttā. Ettha ca “ajjhataṃ cetosamathamanyutto anirākatajjhāno”ti imehi padehi sīlanurakkhikā eva cित्तेkaggatā kathitā, “vipassanāyā”ti iminā padena sīlanurakkhiko saṅkhārapariggaho.

Kathaṃ cित्तेkaggatā sīlamanurakkhati? Yassa hi cित्तेkaggatā natthi, so byādhimhi uppanne vihaññati, so byādhivihato vikkhittacitto sīlaṃ vināsetvāpi byādhivūpasamaṃ kattā hoti. Yassa pana cित्तेkaggatā atthi, so taṃ byādhidukkhaṃ vikkhambhetvā samāpattim samāpajjati, samāpannakkhaṇe dukkhaṃ dūragataṃ¹ hoti, balavataraṃ sukhamuppajjati. Evaṃ cित्तेkaggatā sīlamanurakkhati. Kathaṃ saṅkhārapariggaho sīlamanurakkhati? Yassa hi saṅkhārapariggaho natthi, tassa “mama rūpaṃ mama viññāṇaṃ”ti attabhāve balavamamattaṃ hoti, so tathārūpesu dubbhikkhabyādhibhayādīsu sampattesu sīlaṃ nāsetvāpi attabhāvaṃ posetā hoti. Yassa pana saṅkhārapariggaho atthi, tassa attabhāve balavamamattaṃ vā sineho vā na hoti, so tathārūpesu dubbhikkhabyādhibhayādīsu sampattesu sacepissa antāni bahi nikkhamanti, sacepi ussussati visussati, khaṇḍākhaṇḍiko vā hoti satadhāpi sahasadhāpi, neva sīlaṃ vināsetvā attabhāvaṃ posetā hoti. Evaṃ saṅkhārapariggaho sīlaṃ anurakkhati.

“Brūhetā suññāgārānaṃ”ti iminā pana tasseva ubhayassa brūhanā vaḍḍhanā sātaccakiriyā dassitā. Evaṃ bhagavā yasmā “sabrahmacārīnaṃ piyo cassaṃ -pa- bhāvanīyo cā”ti ime cattāro dhamme ākaṅkhanena natthaññāṃ kiñci kātabbāṃ, aññadatthu sīlādiguṇasamannāgateneva bhavitabbāṃ. Īdiso hi sabrahmacārīnaṃ piyo hoti manāpo garu bhāvanīyo. Vuttampi hetāṃ—

“Sīladassanasampannaṃ, dhammaṭṭhaṃ saccavedinaṃ.

Attano kamma kubbānaṃ, taṃ jano kurute piyaṃ”ti².

Tasmā “ākaṅkheyya ce bhikkhave bhikkhu sabrahmacārīnaṃ piyo cassaṃ -pa- sīlesvevassa paripūrakārī -pa- suññāgārānaṃ”ti vatvā idāni yasmā

1. Durāpagataṃ (Ma-Ṭṭha 1. 162 piṭṭhe.)

2. Khu 1. 45 piṭṭhe Dhammapade.

paccayalābhādīṃ patthayantenapi idameva karaṇīyaṃ, na aññaṃ kiñci, tasmā “ākaṅkheyya ce bhikkhave bhikkhu lābhī assan”ti-ādimāha. **Lābhī assanti** lābhāsāya saṃvarasīlaparipūraṇaṃ pāliyaṃ āgataṃ. Kimīdisaṃ bhagavā anujānātīti? Na bhagavā sabhāvena īdisaṃ anujānāti, mahākāruṇikatāya pana puggalajjhāsayena evaṃ vuttanti dassento “**na bhagavā**”ti-ādimāha. Tattha **ghāsesanaṃ chinnakatho, na vācaṃ payuttaṃ bhaṇeti** chinnakatho mūgo viya hutvā obhāsaparikathānimittaviññattipayuttaṃ ghāsesanaṃ vācaṃ na bhaṇe na katheyyāti attho. **Puggalajjhāsayavasenā**ti saṅkhepato vuttamatthaṃ vivaranto “**yesaṃ hi**”ti-ādimāha. Raso sabhāvabhūto ānisaṃso **rasānisaṃso**.

Paccayadānakārāti cīvarādipaccayadānavasena pavattakārā. **Mahapphalā mahānisaṃsā**ti ubhayametam atthato ekaṃ, byañjanaṃeva nānaṃ. “Pañcime gahapatayo ānisaṃsā”ti-ādīsu¹ hi ānisaṃsasaddo phalapariyāyopi hoti. Mahantaṃ vā lokiyasukhaṃ phalanti pasavantīti **mahapphalā**, mahato lokuttarasukhassa paccayā hontīti **mahānisaṃsā**. Tenāha “**lokiyasukhena phalabhūtenā**”ti-ādi.

Peccabhavaṃ gatāti petūpapattivāsena nibbattiṃ upagatā. Te pana yasmā idha katakālakiriyā kālena katajīvitupacchedā honti, tasmā vuttaṃ “**kālakatā**”ti. Sassusasurā ca tappakkhikā ca **sassusasurapakkhikā**. Te ñātiyonisambandhena āvāhavivāhasambandhavasena sambaddhā **ñāti**. **Sālohitā**ti yonisambandhavasena. **Ekalohitabaddhā**ti ekena samānena lohitasambandhena sambaddhā. **Pasannacittoti** pasannacittako. Kālakato pitā vā mātā vā petayoniyam uppannoti adhikārato viññāyatīti vuttaṃ. **Mahānisaṃsameva hotīti** tassa tathāsīlasampannattāti adhippāyo.

Ajjhottharītāti madditā. **Na ca maṃ arati saheyyā**ti maṃ ca arati na abhibhaveyya na maddeyya na ajjhotthareyya. **Uppannanti** jātaṃ nibbattaṃ. Sīlādiguṇayutto hi aratiñca ratiñca sahati ajjhottharati, madditvā tiṭṭhati, tasmā īdisamattānaṃ icchantenapi sīlādiguṇayutteneva

1. Vi 3. 322 piṭṭhe.

bhavitabbanti dasseti. **Cittutrāso** bhāyatīti **bhayaṃ**, **ārammaṇaṃ** bhāyati etasmāti **bhayaṃ**. Taṃ duvidhampi bhayaṃ bheravañca sahati abhibhavatīti **bhayabheravasaho**. Sīlādiguṇayutto hi bhayabheravaṃ sahati ajjhottharati, madditvā tiṭṭhati ariyakoṭiyavāsī¹ mahādattatthero viya.

Thero kira maggaṃ paṭipanno aññatarāṃ pāsādikaṃ araññaṃ disvā “idhevajja samaṇadhammaṃ katvā gamissāmī”ti maggā okkamma aññatarasmim rukkhamūle saṅghāṭim paññapetvā pallāṅkaṃ ābhujitvā nisīdi. Rukkhadevatāya dāraḷā therassa sīlatejena sakabhāvena saṅghātuṃ asakkontā vissaramakaṃsu. Devatāpi sakalarukkhaṃ cālesi. Thero acalova nisīdi. Sā devatā dhūmāyi pajjali. Neva sakkhi therāṃ cāletuṃ. Tato upāsakavaṇṇenāgantvā vanditvā aṭṭhāsī. “Ko eso”ti vuttā “ahaṃ bhante tasmim rukkhe adhivatthā devatā”ti avoca. Tvaṃ ete vikāre akāsīti. Āma bhanteti. “Kasmā”ti ca vuttā āha “tumahākaṃ bhante sīlatejena dāraḷā sakabhāvena saṅghātuṃ asakkontā vissaramakaṃsu, sāhaṃ tumhe palāpetuṃ evamakāsin”ti. Thero āha “atha kasmā ‘idha bhante mā vasatha, mayhaṃ aphāsukan’ti paṭikacceva nāvacāsī, idāni pana mā maṃ kiñci avaca, ‘ariyakoṭiyamahādatto amanussabhayena gato’ti vacanato lajjāmi, tenāhaṃ idheva vasissāṃ, tvaṃ pana ajjekadivasāṃ yattha katthaci vasāhī”ti. Evaṃ sīlādiguṇayutto bhayabheravasaho hoti, tasmā īdisamattānaṃ icchantenapi sīlādiguṇayutteneva bhavitabbanti dasseti. Dutiyādīni uttānatthāni.

Ākaṅkhasuttādivaṇṇanā niṭṭhitā.

5. Migasālāsuttādivaṇṇanā

75-80. Pañcame imassa hi puggalassa sīlavirahitassa paññā sīlaṃ **paridhovatīti** akhaṇḍādibhāvāpādanena sīlaṃ ādimajjhapariyosānesu

1. Sāṭiyakoṭivāsī (Ka)

paññāya suvisodhitam karoti. Yassa hi abbhantare sīlasamvaro natthi, ugghaṭitaññutāya pana cātuppadikagāthāpariyosāne paññāya sīlam dhovitvā saha paṭisambhidāhi arahattam pāpuṇāti, ayaṃ paññāya sīlam dhovati nāma seyyathāpi santatimahāmatto.

Sīlavāpana paññam dhovati. Yassa¹ hi puthujjanassa sīlam saṭṭhi-asītivassāni akhaṇḍam hoti, so maraṇakālepi sabbakilese ghātetvā sīlena paññam dhovitvā arahattam gaṇhāti kandarasālapariveṇe mahāsaṭṭhivassatthero viya. There kira maraṇamañce nipajjitvā balavavedanāya nitthunante tissamahārājā “theram passissāmī”ti gantvā pariveṇadvāre ṭhito tam saddam sutvā pucchi “kassa saddo ayaṃ”ti. Therassa nitthunanasaddoti. “Pabbajjāya saṭṭhivassena vedanāpariggahamattampi na kataṃ, idāni na tam vandissāmī”ti nivattitvā mahābodhim vanditum gato. Tato upaṭṭhākadaharo theram āha “kim no bhante lajjāpetha, saddhopi rājā vipaṭṭisārī hutvā ‘na vandissāmī’ti gato”ti. Kasmā āvusoti. Tumhākam nitthunanasaddam sutvāti. “Tena hi me okāsam karoṭhā”ti vatvā vedanam vikkhambhetvā arahattam patvā daharassa saññam adāsi “gacchāvuso idāni rājānam amhe vandāpehi”ti. Daharo gantvā “idāni kira theram vandathā”ti āha. Rājā susumārapatitena theram vandanto “nāham ayyassa arahattam vandāmi, puthujjanabhūmiyam pana ṭhatvā rakkhitasīlameva vandāmi”ti āha. Evaṃ sīlena paññam dhovati nāma. Sesam vuttameva. Chaṭṭhādīsu natthi vattabbam.

Migasālāsuttādivaṇṇanā niṭṭhitā.

Ākaṅkhavaggavaṇṇanā niṭṭhitā.

(9) 4. Theravagga

1. Vāhanasuttādivaṇṇanā

81-88. Catutthassa paṭhame **vimariyādīkatena**ti nimmariyādīkatena. **Cetasā**ti evaṃvidhena cittena viharati. Tattha dve mariyādā kilesamariyādā ca ārammaṇamariyādā ca. Sace hissa rūpādike ārabha

1. Dī-Ṭṭha 1. 260 piṭṭhepi passitabbam.

rāgādayo uppajjeyyūṃ, kilesamariyādā tena katā bhaveyya. Tesu panassa ekopi na uppannoti kilesamariyādā natthi. Sace panassa rūpādidhamme āvajjentassa ekacce āpāthaṃ nāgaccheyyūṃ, evamassa ārammaṇamariyādā bhaveyya. Te panassa dhamme āvajjentassa āpāthaṃ anāgatadhammo nāma natthīti ārammaṇamariyādāpi natthi. Idha pana kilesamariyādā adhippetāti āha “**kilesamariyādāṃ bhinditvā**”ti-ādi. Tatiyādīsu natthi vattabbaṃ.

Vāhanasuttādivaṇṇanā niṭṭhitā.

9. Kokālikasuttādivaṇṇanā

89-90. Navame¹ kokālikanāmakā dve bhikkhū. Tato idhādhippetāṃ niddhāretvā dassetuṃ “**koyaṃ kokāliko**”ti pucchā. Suttassa aṭṭhuppattim dassetuṃ “**kasmā ca upasaṅkamī**”ti pucchā. **Ayaṃ kirāti**-ādi yathākkamaṃ tāsāṃ vissajjanaṃ. Vivekavāsāṃ vasitukāmatā appicchatāya ca **mā no kassaci -pa- vasīṃsu. Āghātaṃ uppādesi** attano icchāvighātanato. **Therā bhikkhusaṅghassa niyyādayīṃsu** payuttavācāya akatattā therehi ca adāpitattā. **Pubbepi -pa- maññeti** iminā therānaṃ kohaṅṅe ṭhitabhāvaṃ āsaṅkati avaṇe vaṇaṃ passanto viya, suparisuddhe ādāsatale jallaṃ² uṭṭhāpento viya ca.

Aparajjhivāti bhagavato sammukhā “pāpabhikkhū jātā”ti vatvā. **Mahāsāvajjadassanattanti** mahāsāvajjabhāvadassanattānaṃ, ayameva vā pāṭho. **Māhevanti** mā evamāha, mā evaṃ bhaṇi. Saddhāya ayo uppādo saddhāyo, taṃ āvahaṭīti **saddhāyikoti** āha “**saddhāya āgamakaro**”ti. **Saddhāyikoti** vā saddhāya ayitabbo, saddheyyoti attho. Tenāha “**saddhātabbavacano vā**”ti.

Pīlakā nāma bāhirato paṭṭhāya aṭṭhīni bhindanti, imā pana paṭṭhamānyeva aṭṭhīni bhinditvā uggatā. Tenāha “**aṭṭhīni bhinditvā uggatāhi pīlakāhi**”ti. **Taruṇabeluvamattiyoti** taruṇabillaphalamattiyoti. **Visagilitoti**

1. Saṃ-Ṭī 1. 247 piṭṭhādīsupi passitabbaṃ.

2. Lekhaṃ (Saṃ-Ṭī 1. 247 piṭṭhe.)

khittapaharaṇo. Tañcabaḷisaṃ visasamaññā loke. Ārakkhadevatānaṃ saddaṃ sutvāti padaṃ ānetvā sambandho.

Brahmaloketi suddhāvāsalohe. **Varākoti** anuggahavacanametaṃ. Hīnapariyāyoti keci. **Piyasīlāti** iminā etasmim atthe niruttinayena pesalāti padasiddhīti dasseti. **Kabarakkhīnīti** byādhibalena paribhinnavaṇṇatāya kabarabhūtāni akkhīni. **Yattakanti** bhagavato vacanaṃ aññathā karontena yattakaṃ tayā aparaddhaṃ, tassa pamāṇaṃ natthīti attho. Yasmā anāgāmino nāma pahīnakāmacchandabyāpādā honti, tvañca diṭṭhikāmacchandabyāpādavasena idhāgato, tasmā yāvañca te idaṃ aparaddhanti evamettha attho daṭṭhabbo.

Adiṭṭhippattoti appattadiṭṭhiko. **Gilitaviso viya** visaṃ gilitvā ṭhito viya. **Kuṭhārisadisā** mūlapacchindanaṭṭhena. **Uttamattheti** arahatte. **Khīṇāsavoti vadati** Sunakkhatto viya acelaṃ korakkhattiyaṃ. **Yo** aggasāvako viya **pasamsitabbo khīṇāsavo**, taṃ “dussīlo ayan”ti vadati. **Vicinātīti** ācinoti pasavati. Pasamsiyaṇindā tāva sampannaguṇaparidhaṃsanavasena pavattiyā sāvajjatāya kaṭukavipākā, nindiyappasamsā pana kathaṃ tāya samavipākāti? Tattha avijjamānaguṇasamāropanena attano paresaṅca micchāpaṭipattihetubhāvato pasamsiyena tassa samabhāvakaraṇato ca. Lokepi hi asūraṃ sūrena samaṃ karonto gārayho hoti, pageva duppaṭipannaṃ suppaṭipannaṃ samaṃ karontoti.

Sakena dhanenāti attano sāpateyyena. **Ayaṃ appamattako aparādho** diṭṭhadhammikattā sappatikārattā ca tassa. **Ayaṃ mahantataro kali** katūpacitassa¹ samparāyikattā appatikārattā ca.

Nirabbudoti gaṇanāvīseso esoti āha “nirabbudagaṇanāyā”ti, sataśahassaṃ nirabbudānanti attho. **Yamariyagarahī nirayaṃ upetīti** ettha yathāvutta-āyuppanānaṃ pākatikavasena ariyūpavādinā vuttanti veditabbaṃ. Aggasāvakānaṃ pana guṇamahantatāya tatopi ativiya mahantatamevāti vadanti.

1. Katūpacitattā (Ka) Saṃ-Ṭī 1. 246 piṭṭhe pana passitabbaṃ.

Atha kho brahmā sahaṃpatīti ko ayaṃ brahmā, kasmā ca pana bhagavantam upasaṅkamtivā etadavocāti? Ayaṃ kassapassa bhagavato sāsane saḥako nāma bhikkhu anāgāmī hutvā suddhāvāsesu uppanno, tattha sahaṃpati brahmāti sañjānanti. So panāham bhagavantam upasaṅkamtivā “padumanirayaṃ kittessāmi, tato bhagavā bhikkhūnam ārocessati, athānusandhikusalā bhikkhū tatthāyuppaṃmāṇam pucchissanti, bhagavā ācikkhanto ariyūpavāde ādīnavam pakāsessatī”ti iminā kāraṇena bhagavantam upasaṅkamtivā etadavoca.

Magadharaṭṭhe saṃvohāratho **māgadhako pattho**, tena. **Paccitabbatṭhānassā**ti nirayadukkhena paccitabbappadesassa etaṃ abbudoti nāmam. **Vassagaṇanā**ti ekato paṭṭhāya dasaguṇitam abbuda-āyumi tato aparam vīsatiḡuṇitam nirabbudādīsu vassagaṇanā veditabbā. Ayaṅca gaṇanā aparicitānam dukkarāti vuttam “**na tam sukaram saṅkhātun**”ti. Keci pana “tattha tattha paridevanānattena kammakāraṇanānattanapi imāni nāmāni laddhāni”ti vadanti, apare “sītanarakā ete”ti. **Sabbatthā**ti ababādīsu padumapariyosānesu sabbesu nirayesu. **Esa nayoti** heṭṭhimato uparimassa vīsatiḡuṇitam atidisati. Dasame natthi vattabban.

Kokālikasuttādivaṇṇanā niṭṭhitā.

Theravaggavaṇṇanā niṭṭhitā.

(10) 5. Upālivagga

1. Kāmabhogīsuttādivaṇṇanā

91-94. Pañcamassa paṭhamādīni uttānatthāni. Catutthe tapanam santapanam kāyassa khedanam tapo, so etassa atthīti tapassī, tam **tapassim**. Yasmā tathābhūto tapanissito, tapo vā tannissito, tasmā āha “**tapanissitakan**”ti. Lūkam pharusam sādhusammatācāravirahato na pasādanīyam ājīvati vattatīti lūkhājīvī, tam **lūkhājivim**. **Upakkosatī**

uppaṇḍeti, upahasanasena paribhāsati. **Upavadatī**ti avaññāpubbakam apavadati. Tenāha “**hīleti vambheti**”ti.

Kāmabhogīsuttādivaṇṇanā niṭṭhitā.

5. Uttiyasuttavaṇṇanā

95. Pañcame paccante bhavam **paccantimarū**. Pākārassa thirabhāvam uddhamuddham pāpetīti **uddhāpaṃ**, pākāramūlam. **Ādi**-saddena pākāradvārabandhaparikhādīnam saṅgaho veditabbo. Paṇḍitadovārikaṭṭhāniyam katvā bhagavā attānam dassesīti dassento “**ekadvāranti kasmā āhā**”ti codanam samuṭṭhāpesi. Yassā paññāya vasena puriso paṇḍitoti vuccati, tam **paṇḍiccanti** āha “**paṇḍiccena samannāgato**”ti. Tam tam itikattabbatāsu chekabhāvo byattabhāvo **veyyattiyam**. Medhati sammoham hiṃsati vidhamatīti medhā, sā etassa atthīti **medhāvī**. Thāne thāne uppatti etissā atthīti **thānuppattikā**, thānaso uppajjanapaññā. Anupariyāyanti etenāti anupariyāyo, so eva pathoti **anupariyāyapatho**, parito pākārassa anusamyāyanamaggo. Pākārabhāgā sandhātābbā etthāti **pākārasandhi**, pākārassa phullitappadeso. So pana heṭṭhimantena dvinnampi iṭṭhakānam vigamena evam vuccatīti āha “**dvinnam iṭṭhakānam apagataṭṭhānan**”ti. **Chinnaṭṭhānanti** chinnabhinnappadeso, chiddaṭṭhānam vā. Tam hi vivaranti vuccati.

Uttiyasuttavaṇṇanā niṭṭhitā.

6. Kokanudasuttādivaṇṇanā

96. Chaṭṭhe **kandhāpi diṭṭhiṭṭhānam** ārammaṇaṭṭhena “rūpaṃ attato samanupassatī”ti-ādivacanato. **Avijjāpi diṭṭhiṭṭhānam** upanissayādibhāvena pavattanato. yathāha “assutavā bhikkhave puthujjano ariyānam adassāvī ariyadhammassa akovido”ti-ādi¹. **Phassopi diṭṭhiṭṭhānam**.

1. Abhi 1. 208 piṭṭhe.

Yathā cāha “tadapi phassapaccayā¹ phussa phussa paṭisaṃvediyantī”² ca. **Saññāpi diṭṭhiṭṭhānaṃ.** Vuttaṃ hetam “saññānidānā hi papañcasankhā³, pathavito saññatvā”⁴ ca ādi. **Vitakkopi diṭṭhiṭṭhānaṃ.** Vuttampi cetam “takkañca diṭṭhīsu pakappayitvā, saccam musāti dvayadhammamāhū”⁵, “takkī hoti vīmaṃsī”⁶ ca ādi. **Ayonisomanasikāropi diṭṭhiṭṭhānaṃ.** Tenāha bhagavā “tassevaṃ ayoniso manasikaroto channaṃ diṭṭhīnaṃ aññatarā diṭṭhi uppajjati, atthi me attāti tassa saccato thetato diṭṭhi uppajjati”⁷ ti-ādi⁷.

Yā diṭṭhīti idāni vuccamānānaṃ aṭṭhārasannaṃ padānaṃ sādharmaṇaṃ mūlapadam. Diṭṭhiyeva **diṭṭhigataṃ** gūthagataṃ viya, diṭṭhīsu vā gataṃ idaṃ dassanaṃ dvāsaṭṭhidiṭṭhīsu antogadhattātipi **diṭṭhigataṃ**, diṭṭhiyā vā gataṃ **diṭṭhigataṃ**. Idaṃ hi “atthi me attā”⁷ ti-ādi diṭṭhiyā gamanamattameva, natthettha attā vā nicco vā kocīti vuttaṃ hoti. Sā cāyaṃ diṭṭhi dunniggamaṇaṭṭhena **gahanaṃ**. Duratikkamaṭṭhena sappaṭibhayaṭṭhena ca **kantāro** dubbhikkhakantāra vālakantārādayo viya. Sammādiṭṭhiyā vinivijjanaṭṭhena, vilomaṇaṭṭhena vā **visūkaṃ**. Kadāci sassatassa, kadāci ucchedassa vā gahaṇato virūpaṃ phanditanti **vipphanditaṃ**. Bandhanaṭṭhena **saṃyojanaṃ**. Diṭṭhiyeva anto tudanaṭṭhena dunnīharaṇīyaṭṭhena ca sallanti **diṭṭhisallaṃ**. Diṭṭhiyeva pīlakaraṇaṭṭhena sambādhoti **diṭṭhisambādho**. Diṭṭhiyeva mokkhāvaraṇaṭṭhena palibodhoti **diṭṭhipalibodho**. Diṭṭhiyeva dummocaniyaṭṭhena bandhanaṇti **diṭṭhibandhanaṃ**. Diṭṭhiyeva duruttaraṇaṭṭhena papātoti **diṭṭhipapāto**. Diṭṭhiyeva thāmagataṭṭhena anusayoti **diṭṭhānusayo**. Diṭṭhiyeva attānaṃ santāpetīti **diṭṭhisantāpo**. Diṭṭhiyeva attānaṃ anudahaṭīti **diṭṭhipariḷāho**. Diṭṭhiyeva kilesakāyaṃ gantheṭīti **diṭṭhigantho**. Diṭṭhiyeva bhusaṃ ādiyati **diṭṭhupādānaṃ**. Diṭṭheyeva “saccan”⁷ ti-ādivasena abhinivisati **diṭṭhābhiniveso**. Diṭṭheyeva “idaṃ paran”⁷ ti āmasati, parato vā āmasati **diṭṭhiparāmāso**. Samuṭṭhāti etenāti samuṭṭhānaṃ, kāraṇaṃ. Samuṭṭhānassa bhāvo samuṭṭhānaṭṭho, tena **samuṭṭhānaṭṭhena**, kāraṇabhāvenāti attho. Sattamaṭṭhamesu natthi vattabbaṃ.

Kokanudasuttādivaṇṇanā niṭṭhitā.

1. Dī 1. 38 piṭṭhe.

4. Ma 1. 1 piṭṭhe.

6. Dī 1. 15 piṭṭhe.

2. Dī 1. 41 piṭṭhe.

3. Khu 1. 414; Khu 7. 216 piṭṭhesu.

5. Khu 1. 416; Khu 7. 228 piṭṭhesu.

7. Ma 1. 10 piṭṭhe.

9. Upālisuttādivaṇṇanā

99-100. Navame ajjhogāhetvā adhippetamatthaṃ sambhavitum sādhetum dukkhāni **durabhisambhavāni**. Aṭṭhakathāyaṃ pana tattha nivāsoyeva dukkhoti dassetuṃ “**sambhavitum dukkhāni dussahāni**”ti vuttaṃ. **Araññavanapatthāni**ti araññalakkhaṇappattāni vanasaṇḍāni. Vanapatthasaddo hi saṇḍabhūte rukkkhasamūhepi vattatīti araññaggahaṇaṃ. **Pavivekanti** pakārato, pakārehi vā vivecanaṃ, rūpādiputhuttārammaṇe pakārato gamanādi-iriyāpathappakārehi attano kāyassa vivecanaṃ, gacchatopi tiṭṭhatopi nisajjatopi nipajjatopi ekasseva pavatti. Teneva hi vivecetabbānaṃ vivecanākārassa ca bhedato bahuviddhattā te ekattena gahetvā “pavivekan”ti ekavacanena vuttaṃ. **Dukkaraṃ pavivekanti** vā pavivekaṃ kattum na sukhanti attho. **Ekibhāveti** ekattabhāve. **Dvayaṃdvayārāmoti** dvinnaṃ dvinnaṃ bhāvābhirato. **Haranti viyāti** saṃharanti viya vighātuppādanena. Tenāha “**ghasanti viyā**”ti, bhayasantāsuppādanena khādītum āgatā yakkharakkhasapisācādayo viyāti adhippāyo. **Īdisassāti** aladdhasamādhino. **Tiṇapaṇṇamigādisaddehīti** vāteritānaṃ tiṇapaṇṇādīnaṃ migapakkhi-ādīnaṃca bhīsanakehi bheravehi saddehi. **Vividhehi ca** aññehi khāṇu-ādīhi yakkhādi-ākārehi upaṭṭhitehi **bhīsanakehi**. Ghaṭena kīlā **ghaṭikāti** eke. Dasamaṃ uttānameva.

Upālisuttādivaṇṇanā niṭṭhitā.

Upālivaggavaṇṇanā niṭṭhitā.

Dutiyaṇṇāsako niṭṭhito.

3. Tatiyapaṇṇāsaka

(11) 1. Samaṇasaññāvagga

1. Samaṇasaññāsuttādivaṇṇanā

101-112. Tatiyassa paṭhamādīni uttānāni. Chaṭṭhe **nijjarakāraṇānī** pajahanakāraṇāni. Imasmim maggo kathiyatīti katvā **“ayam heṭṭhā -pa- puna gahitā”**ti vuttaṃ. Kiñcāpi nijjiṇṇā micchādīṭṭhīti ānetvā sambandhitabbaṃ. Yathā micchādīṭṭhi vipassanāya nijjiṇṇāpi na samucchinnāti na samucchedappahānadassanattamaṃ puna gahitā, evaṃ micchāsāṅkappādayopi vipassanāya pahīnāpi asamucchinnatāya idha puna gahitāti ayamatto **“micchāsāṅkappassā”**ti-ādīsu sabbapadesu vattabboti dasseti **“evaṃ sabbapadesu yojetabbo”**ti iminā. **Ettha cāti** “sammāvimuttipaccayā ca aneke kusalā dhammā bhāvanāpāripūriṃ gacchantī”ti etasmim pālipade. Ettha ca samucchedavasena ca paṭippassaddhivasena ca paṭipakkhadhammānaṃ sammadeva vimuccanaṃ **sammāvimutti**. Tappaccayā ca maggaphalesu aṭṭha indriyāni bhāvanāpāripūriṃ upagacchantīti maggasampayuttānīpi saddhādīni indriyāni uddhaṭāni. Maggavasena hi phalesu bhāvanāpāripūri nāmāti. **Abhinandanatṭhenāti** ativiya sinehanatṭhena. Idam hi somanassindriyaṃ ukkaṃsagatasātasabhāvato sampayuttadhamme sinehantaṃ tementaṃ viya pavattati. **Pavattasantati-ādhipateyyatṭhenāti** vipākasantānassa jīvane adhipatibhāvena. **Evanti-ādi** vuttasseva atthassa nigamaṃ. Sattamādīni uttānatthāni.

Samaṇasaññāsuttādivaṇṇanā niṭṭhitā.

Samaṇasaññāvaggavaṇṇanā niṭṭhitā.

(12) 2. Paccorohaṇivagga

1. Paṭhama-adhammasuttādivaṇṇanā

113-6. Dutiyassa paṭhamadutiyāni uttānatthāni. Tatiye **jānaṃ jānātīti** sabbaññutaññāpēna jānitabbaṃ sabbaṃ jānāti eva. Na hi

padesañāṇe t̥hito jānitabbaṃ sabbaṃ jānāti. Ukkaṭṭhaniddesena hi avisesaggahaṇena ca “jānan”ti iminā niravasesaṃ ñe yyajātaṃ pariggayhatīti tabbisayāya jānanakiriyāya sabbaññutaññāṇameva karaṇaṃ bhavituṃ yuttaṃ, pakaraṇavasena “bhagavā”ti saddantarasañnidhānena ca ayamatto vibhāvetabbo. **Passitabbameva passatīti** dibbacakkhu paññācakkhu dhammacakkhu buddhacakkhu samantacakkhusaṅkhātehi ñāṇacakkhūhi passitabbaṃ passati eva. Atha vā **jānaṃ jānātīti** yathā aññe savipallāsā kāmarūpapariññāvādino jānantāpi vipallāsavasena jānanti, na evaṃ bhagavā. Bhagavā pana pahīnavipallāsattā jānanto jānāti eva, diṭṭhidassanassa abhāvā passanto passatiyevāti attho. **Cakkhu viya bhūto** dassanapariṇāyakaṭṭhena cakkhu viya bhūto. Yathā hi cakkhu sattānaṃ dassanattamaṃ pariṇeti sādheti, evaṃ lokassa yāthāvadassanasādhanatopi dassanacikapariṇāyakaṭṭhena cakkhu viya bhūto, paññācakkhumayattā vā sayambhuñāṇena paññācakkhum bhūto pattoti vā cakkhubhūto.

Ñāṇasabhāvoti viditakaraṇaṭṭhena ñāṇasabhāvo. Aviparītasabhāvaṭṭhena pariyaṭṭi dhammapavattanato vā hadayena cintetvā vācāya nicchāritadhammamayoti **dhammabhūto**. Tenāha “**dhammasabhāvo**”ti. Dhammā vā bodhipakkiyā tehi uppannattā lokassa ca taduppādanato anaññasādhāraṇaṃ vā dhammaṃ patto adhigatoti **dhammabhūto**. Setṭhaṭṭhena brahmabhūtoti āha “**setṭhasabhāvo**”ti. Atha vā brahmā vuccati maggo tena uppannattā lokassa ca taduppādanato, tañca sayambhuñāṇena pattoti **brahmabhūto**. Catusaccadhammaṃ vadatīti **vattā**. Ciraṃ saccappaṭivedhaṃ pavattento vadatīti **pavattā**. **Atthaṃ nīharitvāti** dukkhādi-atthaṃ tatthāpi pīlanādi-attaṃ uddharitvā. Paramattaṃ vā nibbānaṃ pāpayitā **ninnetā**. Amatādhigamaṭṭhena amatassa dātāti **amatassa dātā**. Bodhipakkiyadhammaṃ tadāyattabhāvato **dhammasāmī**. Catutthe natthi vattabbaṃ.

Paṭhama-adhammasuttādivaṇṇanā niṭṭhitā.

5. Saṅgāravasuttādivaṇṇanā

117-154. Pañcame **appakāti** thokā, na bahū. **Athāyaṃ itarā pajātiyā** panāyaṃ avasesā pajā sakkāyadiṭṭhitīrameva anudhāvati, ayameva bahutarāti attho. **Sammadakkhātetī** sammā akkhāte sukathite. **Dhammetī** tava desanādhamme. **Dhammānuvattinoti** taṃ dhammaṃ sutvā tadanucchavikaṃ paṭipadaṃ pūretvā maggaphalasadchikaraṇena dhammānuvattino. **Maccuno thānabhūtaṃ** kilesamārasaṅkhātassa maccuno nivāsaṭṭhānabhūtaṃ. **Suduttaraṃ taritvā pāramessantīti** ye janā dhammānuvattino, te etaṃ suduttaraṃ duratikkamaṃ māradheyyaṃ taritvā atikkamitvā nibbānapāraṃ gamissanti.

Kaṇhaṃ dhammaṃ vipphāyāti kāyaduccaritādibhedāṃ akusalaṃ dhammaṃ jahitvā. **Sukkaṃ bhāvēthāti** paṇḍito bhikkhu abhinikkhamaṇato paṭṭhāya yāva arahattamaggā kāyasucaritādibhedāṃ sukkaṃ dhammaṃ bhāveyya. **Okā anokamāgammāti** okaṃ vuccati ālayo, anokaṃ vuccati anālayo. Ālayato nikkhamitvā anālayasaṅkhātāṃ nibbānaṃ paṭicca ārabha.

Tatrābhiratimiccheyyāti yasmim anālayasaṅkhāte viveke nibbāne imehi sattehi durabhiramaṃ, tatrābhiratimiccheyya. **Duvidhepi kāmeti** vatthukāmakilesakāme. **Cittaklesehīti** pañcahi nīvaraṇehi **attānaṃ pariyodapeyya** vodāpeyya, parisodheyyāti attho.

Sambodhiyaṅgesūti sambojjhaṅgesu. **Sammā cittaṃ subhāvitanti** sammā hetunā nayena cittaṃ suṭṭhu bhāvitaṃ vaḍḍhitaṃ. **Jutimantoti** ānubhāvavanto, arahattamaggañāṇajutiyā khandhādibhede dhamme jotetvā ṭhitāti attho. **Te loke parinibbutāti** te imasmim khandhādiloke parinibbutā nāma arahattappattito paṭṭhāya kilesavaṭṭassa khepitattā sa-upādisesena, carimacittanirodhena khandhavaṭṭassa khepitattā anupādisesena cāti dvīhi parinibbānehi parinibbutā, anupādāno viya padīpo apanṇattikabhāvaṃ gatāti attho.

Ito paraṃ yāva tatiyo paṇṇāsako, tāva uttānatthameva.

Saṅgāravasuttādivaṇṇanā niṭṭhitā.

Tatiyapaṇṇāsako niṭṭhito.

4. Catutthapaṇṇāsaka

155-166. Catutthassa paṭhamavaggo uttānatthoyeva.

1. Brāhmaṇapaccorohaṇīsuttādivaṇṇanā

167-210. Dutiye ca paṭhamādīni uttānatthāni. Dasame **pacchābhūmivāsinoti** paccantadesavāsino. **Sevālamālikāti** pātova udakaṃ orohitvā sevālañceva uppalādīni ca gahetvā attano udakasuddhikabhāvajānanatthañceva “lokassa ca udakena suddhi hotī”ti imassa atthassa jānanatthañca mālaṃ katvā pīlandhanakā. **Udakorohakāti** pāto majjhanhe sāyanhe ca udaka-orohaṇakā. Tenāha “**sāyatatiyakam udakorohaṇānuyogamanuyuttā**”ti. Ekādasamādīni uttānatthāni. Catutthe paṇṇāsake natthi vattabbaṃ.

Brāhmaṇapaccorohaṇīsuttādivaṇṇanā niṭṭhitā.

Catutthapaṇṇāsako niṭṭhito.

(21) 1. Karajakāyavagga

1. Paṭhamanirayasaggasuttādivaṇṇanā

211-746. Pañcamassa paṭhamādīni uttānatthāni. Navame yasmim santāne kāmāvacarakammaṃ mahaggatakammañca katūpacitaṃ vipākadāne laddhāvasaraṃ hutvā ṭhitaṃ, tesu kāmāvacarakammaṃ itaraṃ nīharitvā sayam tattha ṭhatvā¹ attano vipākaṃ dātuṃ na sakkoti, mahaggatakammameva pana itaraṃ paṭibāhitvā attano vipākaṃ dātuṃ sakkoti garubhāvato. Tenāha “**taṃ mahogho parittaṃ udakaṃ viyā**”ti-ādi. Ito paraṃ sabbattha uttānameva.

Paṭhamanirayasaggasuttādivaṇṇanā niṭṭhitā.

Iti manorathapūraṇiyā aṅguttaranikāyaṭṭhakathāya

Dasakanipātavaṇṇanāya anuttānatthadīpanā samattā.

1. Ohīyitvā (Sam-Ṭī 2. 382 piṭṭhe.)

Ekādasakanipāta

1. Nissayavagga

1. Kimatthiyasuttādivaṇṇanā

1-10. Ekādasakanipātassa paṭhamādīni uttānatthāneva. Dasame **janitasminti** kammakilesehi nibbatte, jane etasminti vā **janetasmim**, manussesūti attho. Tenāha “**ye gottapaṭisārino**”ti. Janitasmim-saddo eva vā i-kārassa e-kāraṃ katvā “janetasmim”ti vutto. **Janitasminti** ca janasminti attho veditabbo. Janitasminti sāmāññaggahaṇepi yattha catuvaṇṇasamaññā, tattheva manussaloke. **Khattiyo seṭṭhoti** ayaṃ lokasamaññāpi manussalokeyeva, na devakāye brahmakāye vāti dassetuṃ “**ye gottapaṭisārino**”ti vuttaṃ. **Paṭisarantīti** “ahaṃ gotamo, ahaṃ kassapo”ti paṭi paṭi attano gottam anussaranti paṭijānanti vāti attho.

Kimatthiyasuttādivaṇṇanā niṭṭhitā.

Nissayavaggavaṇṇanā niṭṭhitā.

2. Anussativagga

1. Paṭhamamahānāmasuttādivaṇṇanā

11-14. Dutiyassa paṭhamādīni uttānatthāni. Tatiye **kabaḷikārāhārabhakkhānanti** kabaḷikārāhārūpajīvīnaṃ. Ko pana devānaṃ āhāro, kā āhāraṇelāti? Sabbesampi kāmāvacaradevānaṃ sudhā āhāro. Sā heṭṭhimehi heṭṭhimehi uparimānaṃ uparimānaṃ paṇītatamā hoti, taṃ yathāsakaṃ divasavaseneva divase divase bhuñjanti. Keci pana “biḷārapadappamaṇaṃ sudhāhāraṃ bhuñjanti, so jivhāya ṭhapitamatto yāva kesagganakhaggā kāyaṃ pharati, tesameva

divasavasena satta divase yāpanasamattho hotī”ti vadanti.

Asamayavimuttiyā vimuttoti maggavimokkkena vimutto. Aṭṭhannaṃ hi samāpattīnaṃ samāpajjanassa samayopi atthi tassa asamayopi, maggavimokkkena pana vimuccanassa samayo vā asamayo vā natthi. Yassa saddhā balavatī, vipassanā ca āradhā, tassa gacchantassa tiṭṭhantassa nisīdantassa nipajjantassa khādantassa bhuñjantassa ca maggaphalappaṭivedho nāma na hotīti na vattabbaṃ. Iti maggavimokkkena vimuccantassa samayo vā asamayo vā natthīti maggavimokkho asamayavimutti nāma. Catutthe natthi vattabbaṃ.

Paṭhamamahānāmasuttādivaṇṇanā niṭṭhitā.

5. Mettāsuttavaṇṇanā

15. Pañcame **sesajanāti** mettāya cetovimuttiyā alābhino.

Samparivattamānāti dakkhiṇeneva passena asayitvā sabbaso parivattamānā. **Kākacchamānāti** ghurughurupassāsavasena vissaraṃ karontā. **Sukhaṃ supatīti** ettha duvidhā supanā sayane piṭṭhippasāraṇalakkhaṇā kiriyāmayacittehi avokiṇṇabhavaṅgappavattilakkhaṇā ca. Tatthāyaṃ ubhayatthāpi sukhaveva supati. Yasmā saṅikaṃ nipajjitvā aṅgapaccaṅgāni samodhāya pāsādikena ākārena sayati, niddokkamanepi jhānaṃ samāpanno viya hoti. Tenāha “**evaṃ asupitvā**”ti-ādi.

Niddākāle sukhaṃ alabhitvā dukkhena suttattā eva paṭibujjhanakāle sarīrakhedena nitthunanaṃ vijambhanaṃ ito cito ca viparivattanañca hotīti āha “**nitthunantā vijambhantā samparivattantā dukkhaṃ paṭibujjhantī**”ti. Ayaṃ pana sukkena suttattā sarīrakhedābhāvato nitthunanādivirahitova paṭibujjhati. Tena vuttaṃ “**evaṃ appaṭibujjhitvā**”ti-ādi. Sukhappaṭibodho ca sarīravikārābhāvenāti āha “**sukhaṃ nibbikāraṇa**”ti.

Bhaddakameva supinaṃ passatīti idaṃ anubhūtapubbavasena devatūpasamhāravasena cassa bhaddakameva supinaṃ hoti, na pāpakanti katvā vuttaṃ. Tenāha “**cetiyaṃ vandanto viyā**”ti-ādi. Dhātukkabhohahetukampi cassa bahulaṃ bhaddakameva siyā yebhuyyena cittajarūpānugūṇatāya utu-āhārajarūpanaṃ.

Ure āmukkamuttāhāro viyāti gīvāha bandhitvā ure lambitamuttāhāro viyāti kehici tam ekāvalivasena vuttam siyā, anekaratanāvalisamūhabhūto pana muttāhāro amsappadesato paṭṭhāya yāva kaṭippadesassa heṭṭhābhāgā palambanto ure āmukkoyeva nāma hoti.

Visākhathero viyāti¹ so kira pāṭaliputte kuṭumbiyo ahoṣi. So tattheva vasamāno assosi “tambapaṇṇidīpo kira cetiyamālālaṅkato kāsāvapajjoto, icchiticchi taṭṭhāneyevettha sakkā nisīditum vā nipajjitum vā, utusappāyaṃ senāsanasappāyaṃ puggalasappāyaṃ dhammassavanasappāyanti sabbamettha sulabhan”ti. So attano bhogakkhandham puttadārassa niyyātetvā dussante baddhena ekakahāpaṇeneva gharā nikkhamitvā samuddatīre nāvaṃ udikkhamāno ekaṃ māsam vasi. So vohārakusalatāya imasmim ṭhāne bhaṇḍam kiṇitvā asukasmiṃ vikkiṇanto dhammikāya vaṇijjāya tenevantaramāsenā sahaṣsam abhisamhari. Iti anupubbena mahāvihāram gantvā pabbajjam yācati. So pabbājanatthāya sīmam nīto tam sahaṣsatthavikam ovaṭṭikantarena bhūmiyam pātesi. “Kimetan”ti ca vutte “kahāpaṇasahaṣsam bhante”ti vatvā “upāsaka pabbajitakālato paṭṭhāya na sakkā vicāretum, idāneva nam vicārehi”ti vutte “visākhassa pabbajjaṭṭhānam āgatā mā rittahatthā gamimsū”ti muñcitvā sīmāmālake vikkiritvā pabbajitvā upasampanno. So pañcavasso hutvā dvemātikā paguṇā katvā attano sappāyam kammaṭṭhānam gahetvā ekekasmiṃ vihāre cattāro cattāro māse samapavattavāsam vasamāno cari. Evaṃ caramāno—

Vanantare ṭhito thero, visākho gajjamānako.

Attano guṇamesanto, imamattham abhāsatha—

“Yāvatā upasampanno, yāvatā idha māgato.

Etthantare khalitam natthi, aho lābho te mārisā”ti².

So cittalapabbatavihāram gacchanto dvedhāpatham patvā “ayaṃ nu kho maggo, udāhu ayan”ti cintayanto aṭṭhāsi. Athassa pabbate adhivatthā

1. Visuddhi 1. 305 piṭṭhepi vitthāro āgato.

2. Visuddhi 1. 106 piṭṭhepi.

devatā hatthaṃ pasāretvā “eso maggo”ti dasseti. So cittalapabbatavihāraṃ gantvā tattha cattāro māse vasitvā “paccūse gamissāmī”ti cintetvā nipajji. Caṅkamasīse maṇilarukkhe adhivatthā devatā sopānaphalake nisīditvā parodi. Thero “ko eso”ti āha. Ahaṃ bhante maṇilīyāti. Kissa rodasīti. Tumhākaṃ gamaṇaṃ paṭiccāti. Mayi idha vasante tumhākaṃ ko guṇoti. Tumhesu bhante idha vasantesu amanussā aññamaññaṃ mettaṃ paṭilabhanti, te dāni tumhesu gatesu kalahaṃ karissanti, duṭṭhullampi kathayissantīti. Thero “sace mayi idha vasante tumhākaṃ phāsuvihāro hoti, sundaran”ti vatvā aññepi cattāro māse tattheva vasitvā puna tatheva gamanacittaṃ uppādesi. Devatāpi puna tatheva parodi. Eteneva upāyena thero tattheva vasitvā tattheva parinibbāyīti. Evaṃ mettāvihārī bhikkhu amanussānaṃ piyo hoti.

Balavapiyacittatāyāti iminā balavapiyacittatāmattenapi satthaṃ na kamati, pageva mettāya cetovimuttiyāti dasseti. **Khippameva cittaṃ samādhiyati**, kenaci paripanthena parihīnajjhānassa byāpādassa dūrasamussāritabhāvato khippameva samādhiyati, “āsavānaṃ khayāyā”ti keci. Sesāṃ suviññeyyameva. Ettha ca kiñcāpi ito aññakammaṭṭhānavasena adhigatajjhānānampi sukhasupanādayo ānisaṃsā labbhanti. Yathāha—

“Sukhaṃ supanti munayo, ajjhantaṃ susamāhitā.

Suppabuddhaṃ pabujjhanti, sadā gotamasāvaka”ti¹ ca ādi.

Tathāpime ānisaṃsā brahmavihāralābhino anavasesā labbhanti byāpādādānaṃ ujuvipaccanīkabhāvato brahmavihārānaṃ. Tenevāha “nissaraṇaṃ hetāṃ āvuso byāpādassa, yadidaṃ mettācetovimuttī”ti-ādi². Byāpādādivasena ca sattānaṃ dukkhasupanādayoti tappaṭipakkhabhūtesu brahmavihāresu siddhesu sukhasupanādayo hatthagatā eva hontīti.

Mettāsuttavaṇṇanā niṭṭhitā.

1. Visuddhi-Ṭī 1. 370 piṭṭhepi.

2. Dī 3. 205; Am 2. 257 piṭṭhesu.

6. Aṭṭhakanāgarasuttavaṇṇanā

16. Chaṭṭhe **beluvagāmaketi** vesāliyā dakkhiṇapasse avidūre beluvagāmakō nāma atthi, taṃ gocaragāmaṃ katvāti attho. **Sārappattakulagaṇanāyāti** mahāsāramahappattakulagaṇanāya. **Dasame ṭhāneti** aññe aññeti dasagaṇanaṭṭhāne. Aṭṭhakanagare jāto bhavoti **aṭṭhakanāgaro**. **Kukkuṭārāmoti** pāṭaliputte kukkuṭārāmo, na kosambiyam.

Pakatatthappaṭiniddeso ta-saddoti tassa “bhagavatā”ti-ādīhi padehi samānādhikaraṇabhāvena vuttassa yena abhisambuddhabhāvena bhagavā pakato adhigato supākaṭo ca, taṃ abhisambuddhabhāvaṃ saddhim āgamanīyapaṭipadāya atthabhāvene va dassento “**yo so -pa-abhisambuddho**”ti āha. Satipi ñāṇadassanasaddānaṃ idha paññāvevacanabhāve tena tena viśesena nesam viśayaviśese pavattidassanattaṃ asādhāraṇañāṇaviśesavasena vijjāttayavasena vijjābhinnānāvaraṇavasena sabbaññutaññāṇamaṃsacakkhuvaseṇa paṭivedhadesanāñāṇavasena ca tadatthaṃ yojetvā dassento “**tesam tesan**”ti-ādimāha. Tatha **āsayānusayaṃ jānatā** āsayānusayañāṇena, **sabbaññeyyadhammaṃ passatā** sabbaññutānāvaraṇañāṇehi. **Pubbenivāsādīhīti** pubbenivāsāsavakkhayañāṇehi. **Paṭivedhapaññāyāti** ariyamaggapaññāya. **Desanāpaññāya passatāti** desetabbadhammānaṃ desetabbappakāraṃ bodhaneyyapuggalānaṃ ca āsayānusayacaritādhimutti-ādibhedam dhammaṃ desanāpaññāya yāthāvato passatā. **Arīnanti** kilesārīnaṃ, pañcavidhamārānaṃ vā sāsanaṃ vā paccatthikānaṃ aññatitthiyānaṃ. Tesam pana hananaṃ pāṭihāriyehi abhibhavanaṃ appaṭibhānatākaraṇaṃ ajjhupekkhaṇaṃ ca. Kesivinayasuttañcettaṃ nidassanaṃ. Tathā ṭhānāṭṭhānādīni **jānatā**. Yathākammūpage satte **passatā**. Savāsanānamāsavānaṃ khīṇattā **arahatā**. Abhiññeyyādibhede dhamme abhiññeyyādito aviparītāvabodhato **sammāsambuddhena**.

Atha vā tīsu kālesu appaṭihatañāṇatāya **jānatā**. Kāyakammādivasena tiṇṇampi kammānaṃ ñāṇānuparivattito nisammakāritāya **passatā**. Davādīnampi abhāvasādhikāya pahānasampadāya **arahatā**.

Chandādīnaṃ ahānīhetubhūtāya akkhayapaṭibhānasādhikāya sabbaññūtāya **sammāsambuddhenā**ti evaṃ dasabala-aṭṭhārasa-āveṇīkabuddhadhammavasena¹pi yojanā kātabbā.

Abhisāṅkhatanti attano paccayehi abhisammukhabhāvena samecca sambhuyya kataṃ. Svāssa katabhāvo uppādanena vedītabbo, na uppannassa paṭisaṅkharāṇenāti āha “**uppādītan**”ti. Te cassa paccayā cetanāpadhānāti dassetuṃ pāḷiyāṃ “abhisāṅkhatāṃ abhisāṅcetaṃ”ti vuttanti “**cetayitāṃ kappayitāṃ**”ti atthamāha. **Abhisāṅkhatāṃ abhisāṅcetaṃ** ca jhānassa pātubhāvadassanamukhena viddhamāsanabhāvaṃ ulliṅgeti. Yaṃ hi ahutvā sambhavati, taṃ hutvā paṭiveti. Tenāha pāḷiyāṃ “**yaṃ kho panā**”ti-ādī. **Samathavipassanādhamme** ṭhitoti ettha samathadhamme ṭhitattā samāhito vipassanaṃ paṭhapetvā aniccānupassanādīhi nīcāsāññādayo pajahanto anukkamena taṃ anulomaññāṇaṃ pāpetā hutvā vipassanādhamme ṭhito. Samathavipassanāsāṅkhātesu dhammesu rañjanaṭṭhena **rāgo**. Nandanaṭṭhena **nandī**. Tattha sukhumā apekkhā vuttā, yā nīkantīti vuccati.

Evaṃ santeti evaṃ yathārutavaseneva imassa suttapadassa atthe gaḥetabbe satī. **Samathavipassanāsu chandarāgo kattabboti** anāgāmiphalaṃ anībattetvā tadatthāya samathavipassanāpi anībattetvā kevalaṃ tattha chandarāgo kattabbo bhavissati. Kasmā? Tesu samathavipassanāsāṅkhātesu dhammesu chandarāgamattena anāgāminā laddhabbassa aladdha-anāgāmiphalaṃ nībattetvā. Tathā satī tena anāgāmiphalaṃ laddhabbameva hotī. Tenāha “**anāgāmiphalaṃ paṭiladdhaṃ¹ bhavissati**”ti. Sabhāvato rasiṭabbattā avīparīto attho eva **attharaso**.

Aññāpi kāci sugatīyoti vīnīpātīke sandhāyāha. **Aññāpi kāci duggatīyoti** asurakāyamāha.

Appaṃ yācītena bahūṃ dentena uḷārapurīsenā viyā ekāṃ dhammāṃ pucchītena “āyampi ekadhammo”ti kathītatthā ekādasāpi dhammā pucchāvāsena ekadhammo nāma jāto² paccekāṃ vākya-parīsamāpanāññāyena. **Pucchāvāsena**ti “atthi nu kho bhante ānanda tena -pa- sammāsambuddhena ekadhammo sammadakkhāto”ti

1. Paṭividdhamā Ma-ṭṭha 3. 10 piṭṭhe.

2. Kato (Aṭṭhakathāyaṃ)

evaṃ pavattapucchāvasena. **Amatuppatti-atthenā**ti amatabhāvassa uppattihetutāya, sabbānipi kammaṭṭhānāni ekarasāpi amatādhigamassa paṭipattiyāti attho. Evamettha aggaphalabhūmi anāgāmiphalaabhūmiti dveva bhūmiyo sarūpato āgatā, nānantariyatāya pana heṭṭhimāpi dve bhūmiyo atthato āgatā evāti daṭṭhabbāti. Pañca satāni aggho etassāti **pañcasatām**. Sesamettha uttānameva.

Aṭṭhakanāgarasuttavaṇṇanā niṭṭhitā.

7. Gopālasuttavaṇṇanā

17. Sattame **tisso kathā**ti tisso aṭṭhakathā, tividhā suttassa atthavaṇṇanāti attho. Ekekaṃ padaṃ nālaṃ mūlaṃ etissāti evaṃsaññitā **ekanālikā**. Ekekaṃ vā padaṃ nālaṃ atthaniggamanamaggo etissāti **ekanālikā**. Tenāha “**ekekassa padassa atthakathanan**”ti. Cattāro aṃsā bhāgā atthasallakhaṇūpāyā etissāti **caturassā**. Tenāha “**catukkaṃ bandhitvā kathanan**”ti. Niyamato nisinnassa āraddhassa vatto saṃvatto etissā atthāti **nisinnavattikā**, yathāraddhassa atthassa visum visum pariyoṣāpikāti attho. Tenāha “**paṇḍitagopālakam dassetvā**”ti-ādi. Ekekassapi padassa piṇḍatthadassanavasena bahūnaṃ padānaṃ ekajjhaṃ atthaṃ akathetvā ekamekassa padassa atthavaṇṇanā ayaṃ sabbattha labbhati. **Catukkaṃ bandhitvā**ti kaṇhapakkhe upamopameyyadvayaṃ, tathā sukkaṭṭhetti idaṃ catukkaṃ yojetvā. Ayaṃ edisesu eva suttasu labbhati. **Pariyoṣānagamananti** keci tāva āhu “kaṇhapakkhe upamaṃ dassetvā upamā ca nāma yāvadeva upameyyasampaṭipādanatthāti upameyyatthaṃ āharitvā saṃkilesapakkhaniddeso ca vodānapakkhavibhāvanatthāyāti sukkaṭṭhampi upamopameyyavibhāgena āharitvā suttatthassa pariyoṣāpanaṃ. Kaṇhapakkhe upameyyaṃ dassetvā pariyoṣānagamanādīsupi eseva nayo”ti. Apare pana “kaṇhapakkhe sukkaṭṭhetti ca taṃtaṃupamūpameyyatthānaṃ visum visum pariyoṣāpetvāva kathanam pariyoṣānagamanan”ti vadanti. **Ayanti** nisinnavattikā. **Idhāti** imasmiṃ gopālakasutte. **Sabbācariyaṇaṃ āciṇṇāti** sabbehipi pubbācariyehi ācaritā saṃvaṇṇitā, tathā ceva pāli pavattāti.

Aṅgiyanti avayavabhāvena ñāyantīti **aṅgāni**, koṭṭhāsā. Tāni panettha yasmā sāvajjasabhāvāni, tasmā āha “**aṅgehīti aguṇakoṭṭhāsehi**”ti.

Gomaṇḍalanti gosamūhaṃ. **Pariharitunti** rakkhituṃ. Taṃ pana parihaṇaṃ pariggahetvā vicaraṇanti āha “**pariggahetvā vicarituṃ**”ti. **Vaḍḍhinti** gunnaṃ bahubhāvaṃ bahugorasatāsankhātaṃ parivuddhiṃ. “Ettakamidan”ti rūpīyatīti **rūpaṃ**, parimāṇaparicchedopi sarīrarūpampīti āha “**gaṇanato vā vaṇṇato vā**”ti. **Na parisesati** vinaṭṭhabhāvasseva ajānanato. **Ñīlāti** ettha **iti-saddo** ādi-attho. Tena setasabalādivaṇṇaṃ saṅgaṇhāti.

Dhanusattisūlādīti ettha issāsācariyaṇaṃ gāvīsu kataṃ **dhanulakkhaṇaṃ**. Kumārabhattigaṇānaṃ gāvīsu kataṃ **sattilakkhaṇaṃ**. Issarabhattigaṇānaṃ gāvīsu kataṃ **sūlalakkhaṇanti** yojanā. **Ādi-saddena** rāmavāsudevagaṇādīnaṃ gāvīsu kataṃ pharasucakkādilakkhaṇaṃ saṅgaṇhāti.

Ñīlamakkhikāti piṅgalamakkhikā, khuddakamakkhikā eva vā. Saṭati rujati etāyāti sātīkā, samvaḍḍhā sātīkā **āsātīkā**. Tenāha “**vaḍḍhanti**”ti-ādi. **Hāretāti** apanetā.

Vākenāti vākaṭṭhena. **Cīrakenāti** pilotikena. **Antovasseti** vassakālassa abbhantare. **Niggāhanti** susumārādiggāharahitaṃ. **Pītanti** pāṇiyassa pītabhāvaṃ. Sīhabyagghādīparissayena **sāsaṅko sappatībhayo**.

Pañca ahāni etassāti pañcāhiko, so eva vāroti **pañcāhikavāro**. Evaṃ **sattāhikavāro**pi veditabbo. **Ciṇṇaṭṭhānanti** caritaṭṭhānaṃ gocaraggahitaṭṭhānaṃ.

Pitiṭṭhānanti pitarā kātabbaṭṭhānaṃ, pitarā kātabbakiccanti attho. **Yathārucim gahetvā gacchantīti** gunnaṃ ruci-anurūpaṃ gocarabhūmim vā nadipāraṃ vā gahetvā gacchanti. **Gobhattanti** kappāsattīkādīmissaṃ gobhuñjitabbaṃ bhattaṃ. Bhattaggahaṇeneva yāgupi saṅgahitā.

Dvīhākārehīti vuttaṃ ākāradvayaṃ dassetuṃ “**gaṇanato vā samuṭṭhānato vā**”ti vuttaṃ. **Evaṃ pāliyaṃ āgatāti** “upacayo santatī”ti jātim dvidhā bhinditvā hadayavatthum aggahetvā dasāyatanāni

pañcadasa sukhumarūpānīti evaṃ **rūpakaṇḍapāliyaṃ**¹ āgatā. **Pañcavīsati rūpakoṭṭhāsāti** salakkhaṇato aññaṃaññaṃsaṅkarābhāvato rūpabhāgā. **Rūpakoṭṭhāsāti** vā visum visum appavattitvā kalāpabhāveneva pavattanato rūpakalāpā. **Koṭṭhāsāti** ca aṃsā avayavāti attho. **Koṭṭhanti** vā sarīraṃ, tassa aṃsā kesādayo koṭṭhāsāti aññepi avayavā koṭṭhāsā viya koṭṭhāsā.

Seyyathāpīti-ādi upamāsaṃsandanaṃ. Tattha **rūpaṃ pariggahetvāti** yathāvuttamā rūpaṃ salakkhaṇato ñāṇena pariggaṇhitvā. **Arūpaṃ vavatthapetvāti** taṃ rūpaṃ nissāya āramaṇaṅca katvā pavattamāne vedanādiḥ cattāro khandhe arūpanti vavatthapetvā. **Rūpārūpaṃ pariggahetvāti** puna tattha yaṃ ruppanalakkhaṇam, taṃ rūpaṃ. Tadaññaṃ arūpaṃ. Ubhayavinimuttamā kiñci natthi attā vā attaniyam vāti evaṃ rūpārūpaṃ pariggahetvā. Tadubhayaṅca avijjādinā paccayena sapaccayanti **paccayam sallakkhetvā**, aniccatādilakkhaṇam āropetvā yo kalāpasammasanādikkamena kammaṭṭhānam matthakam pāpetum na sakkoti, so na vaḍḍhatīti yojanā.

Ettakam rūpaṃ ekasamuṭṭhānanti cakkhāyatanaṃ sobhāyatanaṃ ghāṇāyatanaṃ jivhāyatanaṃ kāyāyatanaṃ itthindriyam purisindriyam jīvitindriyanti aṭṭhavidham kammavasena, kāyaviññatti vacīviññattīti idaṃ dvayam cittavasenāti ettakam rūpaṃ ekasamuṭṭhānam. Saddāyatanaṃ mekam utucittavasena **dvisamuṭṭhānam**. Rūpassa lahutā mudutā kammaññatāti ettakam rūpaṃ utucittāhārasena **tisamuṭṭhānam**. Rūpāyatanaṃ gandhāyatanaṃ rasāyatanaṃ phoṭṭhabbāyatanaṃ ākāsadhātu āpodhātu kabalīkāro āhāroti ettakam rūpaṃ utucittāhārakammavasena **catusamuṭṭhānam**. Upacayo santati jaratā rūpassa aniccatāti ettakam rūpaṃ **na kutoci samuṭṭhātīti na jānāti**. **Samuṭṭhānato rūpaṃ ajānantoti**-ādīsu vattabbaṃ “gaṇanato rūpaṃ ajānanto”ti-ādīsu vuttanayeneva veditabbaṃ.

Kammalakkhaṇoti attanā kataṃ duccharitakammam lakkhaṇam etassāti kammalakkhaṇo, bālo. Vuttamā hetam “tīṇimāni bhikkhave bālassa bālalakkhaṇāni. Katamāni tīṇi? Duccintitacintī hoti dubbhāsitaḥāsī

1. Abhi 1. 172 piṭṭhe.

dukkaṭakammakārī. Imāni kho -pa- lakkhaṇāni”ti¹. Attanā kataṃ sucaritakammaṃ lakkhaṇaṃ etassāti kammalakkhaṇo, paṇḍito. Vuttampi cetam “tīṇimāni bhikkhave paṇḍitassa paṇḍitalakkhaṇāni. Katamāni tīṇi? Sucintitacintī hoti subhāsikabhāsī sukatakammakārī. Imāni kho -pa- paṇḍitalakkhaṇāni”ti². Tenāha “**kusalākusalakammaṃ paṇḍitabālalakkhaṇaṃ**”ti.

Bāle vajjetvā paṇḍite na sevātī yaṃ bālapuggale vajjetvā paṇḍitasevanaṃ atthakāmena kātabbam, taṃ na karoti. Tathābhūtaṃ ca ayamādīnavoti dassetuṃ puna “**bāle vajjetvā**”ti-ādi vuttam. Tattha yaṃ bhagavatā “idaṃ vo kappatī”ti anuññātaṃ, tadanulomañce, taṃ **kappiyaṃ**. Yaṃ “idaṃ vona kappatī”ti paṭikkhittaṃ, tadanulomañce, taṃ **akappiyaṃ**. Yaṃ kosallasambhūtaṃ, taṃ **kusalaṃ**, appaṭipakkhaṃ **akusalaṃ**. Tadeva **sāvajjaṃ**, kusalaṃ **anavajjaṃ**. Āpattito ādito dve āpattikkhandhā **garukaṃ**, tadaññaṃ **lahukaṃ**. Dhammato mahāsāvajjaṃ **garukaṃ**, appasāvajjaṃ **lahukaṃ**. Sappaṭikāraṃ **satekicchaṃ**, appaṭikāraṃ **atekicchaṃ**. Dhammatānugataṃ **kāraṇaṃ**, itaraṃ **akāraṇaṃ**. **Taṃ ajānantoti** kappiyākappiyaṃ garukalahukaṃ satekicchātekecchaṃ ajānanto suvisuddhaṃ katvā sīlaṃ rakkhituṃ na sakkoti, kusalākusalaṃ sāvajjānavajjaṃ kāraṇākāraṇaṃ ajānanto khandhādīsu akusalatāya rūpārūpapariggahampi kātuṃ na sakkoti, kuto tassa kammaṭṭhānaṃ gahetvā vadḍhanā. Tenāha “**kammaṭṭhānaṃ gahetvā vadḍhetuṃ na sakkoti**”ti.

Govaṇasadise attabhāve uppajjitvā tattha dukkhuppattihetuto micchāvitakkā āsāṭikā viyāti **āsāṭikā**ti āha “**akusalavitakkaṃ āsāṭikaṃ ahāretvā**”ti.

“Gaṇḍoti kho bhikkhave pañcannetaṃ upādānakkhandhānaṃ adhivacanaṃ”ti³ vacanato chahi vaṇamukhehi vissandamānayūso gaṇḍo viya pilotikākhaṇḍena chadvārehi vissandamānakilesāsuci-attabhāvavaṇo satisaṃvarena pidahitabbo, yaṃ pana evaṃ na karotīti āha “**yathā so gopālako vaṇaṃ na paṭicchādeti, evaṃ saṃvaraṃ na sampādeti**”ti.

1. Ma 3. 201; Am 1. 100 piṭṭhesu.

2. Ma 3. 208; Am 1. 101 piṭṭhesu.

3. Saṃ 2. 304; Am 3. 114, 191 piṭṭhesu.

Yathā dhūmo indhanaṃ nissāya uppajjamāno saṅho sukhumo taṃ taṃ vivaraṃ anupavissa byāpento sattānaṃ ḍaṃsamakasādiparissayaṃ vinodeti, aggijālāsamuṭṭhānassapubbaṅgamo hoti, evaṃ dhammadesanāññassa indhanabhūtaṃ rūpārūpadhammajātaṃ nissāya uppajjamānā saṅhā sukhumā taṃ taṃ khandhantaraṃ āyatanantarañca anupavissa byāpeti, sattānaṃ micchāvitakkādiparissayaṃ vinodeti, ñāṇaggiālāsamuṭṭhāpanassa pubbaṅgamo hoti, tasmā dhūmo viyāti **dhūmoti āha “gopālako dhūmaṃ viya dhammadesanādhūmaṃ na karotī”**ti. Attano santikaṃ upagantvā nisinnassa kātabbā tadanucchavikā dhammakathā **upanisinnakakathā**. Katassa dānādipuññaṃ anumodanakathā **anumodanā**. Tatoti dhammakathādīnaṃ akaraṇato. **“Bahussuto guṇavāti na jānanti”**ti kasmā vuttaṃ, nanu attano jānāpanatthaṃ dhammakathādi na kātabbamevāti? Saccam na kātabbameva, suddhāsayaena pana dhamme kathite tassa guṇajānaṃ sandhāyetaṃ vuttaṃ. Tenāha bhagavā—

“Nābhāsamānaṃ jānanti, missam bālehi paṇḍitaṃ.

Bhāsaye jotaye dhammaṃ, paggaṇhe isinaṃ dhajan”ti.

Taranti otaranti etthāti **titthaṃ**, naditaḷākādīnaṃ nahānapānādi-atthaṃ otaraṇaṭṭhānaṃ. Yathā pana taṃ udakena otiṇṇasattānaṃ sarīramalaṃ pavāheti, parissamaṃ vinodeti, visuddhiṃ uppādeti, evaṃ bahussutā attano samīpaṃ otiṇṇasattānaṃ dhammodakena cittamalaṃ pavāhenti, parissamaṃ vinodenti, visuddhiṃ uppādenti, tasmā te titthaṃ viyāti **titthaṃ**. Tenāha **“titthabhūte bahussutabhikkhū”**ti. **Byañjanaṃ kathaṃ ropetabbanti** bhante idaṃ byañjanaṃ ayaṃ saddo kathaṃ imasmim atthe ropetabbo, kena pakārena imassa atthassa vācako jāto. “Nirūpetabban”ti vā pāṭho, nirūpetabbaṃ ayaṃ sabhāvanirutti kathamettha niruḷhāti adhippāyo. **Imassa bhāsitassa ko atthoti saddatthaṃ pucchati. Imasmim thāneti imasmim pāḷippadese. Pāḷikim vadatīti bhāvatthaṃ pucchati, attho kim dīpetīti bhāvatthaṃ vā saṅketatthaṃ vā. Na paripucchatīti** vimaticchedanapucchāvasena sabbaso pucchaṃ na karoti. **Na paripaṇhatīti** pari pari attano ñātum icchaṃ na ācikkhati na vibhāveti. Tenāha **“na jānāpeti”**ti. Teti bahussutabhikkhū. Vivaraṇaṃ nāma atthassa

vibhajitvā kathananti āha “**bhājetvā na desentī**”ti. **Anuttānikatanti** nāṇena apākaṭikataṃ guyaṃ paṭicchannaṃ. **Na uttānirū karontīti** sinerupādamūle vālikāṃ uddharanto viya pathavīsandhārodakāṃ vivarivā dassento viya ca uttānaṃ na karontī.

Evam yassa dhammassa vasena bahussutā “titthan”ti vuttā pariyāyato. Idāni tameva dhammaṃ nipariyāyato “titthan”ti dassetuṃ “**yathā vā**”ti-ādi vuttaṃ. Dhammo hi taranti otaranti etena nibbānaṃ nāma taḷākanti “titthan”ti vuccati. Tenāha bhagavā Sumedhabhūto—

“Evam kilesamaladhovaṃ, vijjante amatantaḷe.

Na gavesati taṃ taḷākāṃ, na doso amatantaḷe”ti¹.

Dhammasseva nibbānassotaraṇatitthabhūtassa otaraṇākāraṃ ajānanto “**dhammatitthaṃ na jānātī**”ti vutto.

Pītāpītanti gogaṇe pītaṃ apītaṃ gorūpaṃ na jānātī na vindati. Avindanto hi “**na labhatī**”ti vutto. “**Ānisaṃsaṃ na vindatī**”ti vatvā tassa avindanākāraṃ dassento “**dhammassavanaggaṃ gantvā**”ti-ādimāha.

Ayaṃ lokuttaroti padaṃ sandhāyāha “**ariyan**”ti. Paccāsattiñāyena anantarassa hi vippaṭisedho vā. Ariyasaddo vā niddosapariyāyo daṭṭhabbo. **Aṭṭhaṅgikanti** ca visuṃ ekajjhaṃ ca aṭṭhaṅgikāṃ upādāya gahetabbaṃ, aṭṭhaṅgatā bāhullato ca. Evañca katvā sattaṅgassapi ariyamaggassa saṅgaho siddho hoti.

Cattāro satipaṭṭhāneti-ādīsu avisesena satipaṭṭhānā vuttā. Tattha kāyavedanācittadhammārammaṇā satipaṭṭhānā lokiyā, tattha sammohavidhamaṃsanavasena pavattā nibbānārammaṇā lokuttarātī evaṃ “**ime lokiyā, ime lokuttarā**”ti **yathābhūtaṃ nappajānātī**.

Anavasesaṃ duhatīti paṭiggahaṇe mattaṃ ajānanto kismiñci dāyake saddhāhāniyā kismiñci paccayahāniyā anavasesaṃ duhati. Vācāya abhihāro **vācābhihāro**. Paccayānaṃ abhihāro **paccayābhihāro**.

1. Khu 4. 307 piṭṭhe Buddhavaṃse.

“**Ime amhesu garucittikāraṃ na karontī**”ti iminā navakānaṃ bhikkhūnaṃ sammāpaṭipattiyā abhāvaṃ dasseti ācariyupajjhāyesu pitupemassa anupaṭṭhāpanato, tena ca sikkhāgāravatābhāvadīpanena saṅgahassa abhājanabhāvaṃ, tena therānaṃ tesu anuggahābhāvaṃ. Na hi sīlādiguṇehi sāsane thirabhāvappattā anuggahetabbe sabrahmacārī anuggaṇhanti, niraṭṭhakaṃ vā anuggahaṃ karonti. Tenāha “**navake bhikkhū**”ti-ādi. **Dhammakathābandhanti** paveṇi-āgatam pakiṇṇakadhammakathāmaggaṃ. Saccasattappaṭisaṅghapaccayākārappaṭisaṃyuttaṃ suññatādīpanaṃ **gulhaganthaṃ. Vuttavipallāsavasena**ti “na rūpaññū”ti-ādīsu vuttassa paṭisedhassa paṭikkhepavasena aggahaṇavasena. **Yojetvā**ti “rūpaññū hotīti gaṇanato vā vaṇṇato vā rūpaṃ jānātī”ti-ādinā, “tassa gogaṇopi na parihāyati, pañcagorasaparibhogatopi na paribāhiro hotī”ti-ādinā ca attham yojetvā. **Veditabboti** tasmim tasmim pade yathārahaṃ attho veditabbo. Sesam sabbattha uttānamevāti.

Gopālasuttavaṇṇanā niṭṭhitā.

Iti manorathapūraṇiyā aṅguttaranikāyaṭṭhakathāya

Ekādasakanipātavaṇṇanāya

Anuttānatthadīpanā samattā.

Niṭṭhitā ca manorathapūraṇiyā aṅguttaranikāyaṭṭhakathāya

Anuttānatthapadavaṇṇanā.

Nigamanakathāvaṇṇanā

Mahā-aṭṭhakathāya sāranti aṅguttaramahā-aṭṭhakathāya sāraṃ.

Ekūnasatṭhimattoti thokaṃ ūnabhāvato mattasaddaggaṇaṃ.

Mūlaṭṭhakathāsāranti pubbe vutta-aṅguttaramahā-aṭṭhakathāya sārameva anunigamavasena vadati. Atha vā **mūlaṭṭhakathāsāranti** porāṇaṭṭhakathāsu atthasāraṃ. Tenedaṃ dasseti—aṅguttaramahā-aṭṭhakathāya atthasāraṃ ādāya imaṃ manorathapūraṇiṃ karonto sesamahānikāyānampi mūlaṭṭhakathāsu idha viniyogakkhamaṃ atthasāraṃ ādāya evamakāsinti.

Mahāvihārādhivāsīnanti ca idaṃ purimacchimapadehi saddhiṃ sambandhitabbaṃ “mahāvihārādhivāsīnaṃ samayaṃ pakāsayanti, mahāvihārādhivāsīnaṃ mūlaṭṭhakathāsāraṃ ādāya”ti. **Tenāti** puññaena. **Hotu sabbo sukhī lokoti** kāmāvacarādivibhāgo sabbo sattaloko yathārahaṃ bodhittayādhigamavasena sampattena nibbānasukhena sukhī sukhito hotūti sadevakassa lokassa accantaṃ sukhādhigamāya attano puññaṃ pariṇāmeti.

Ettāvatā samattāva, sabbaso vaṇṇanā ayaṃ.

Visatiyā sahassehi, ganthehi parimāṇato.

Porāṇānaṃ kathāmagga-sāraṃmettha yato ṭhitaṃ.

Tasmā **sāratthamañjūsā**, iti nāmena vissutā.

Ajjhesito narindena, sohaṃ **parakkamabāhunā**.

Saddhammaṭṭhitikāmena, sāsanujjotakārinā.

Teneva kārite ramme, pāsādasatamaṇḍite.

Nānādumagaṇākiṇṇe, bhāvanābhiraṭālaye.

Sītalūdakasampanne, vasaṃ **jetavane** imaṃ.

Atthabyañjanasampannaṃ, akāsiṃ sādhusammataṃ.

Yaṃ siddhaṃ iminā puññaṃ, yaṃ caññaṃ pasutaṃ mayā.

Etena puññaakammaena, dutiye attasambhave.

Tāvatiṃse pamodento, silācāraguṇe rato.

Alaggo pañcakāmesu, patvāna paṭhamaṃ phalaṃ.

Antime attabhāvamhi, metteyyaṃ munipuṅgavaṃ.

Lokaggaṃpuggalaṃ nāthaṃ, sabbasattahite rataṃ.

Disvāna tassa dhīrassa, sutvā saddhammadesanaṃ.

Adhigantvā phalaṃ aggaṃ, sobheyyaṃ jinasāsaṃ.

Sadā rakkhantu rājāno, dhammeneva imaṃ pajāṃ.

Niratā puññakammesu, jotentu jinasāsaṃ.

Ime ca pāṇino sabbe, sabbadā nirupaddavā.

Niccaṃ kalyāṇasaṅkappā, pappontu amataṃ padanti.

Aṅguttaraṭīkā samattā.

Aṅguttaraṭṭikāya tatiyabhāge

Saṃvaṇṇitapadānaṃ anukkamaṇikā

| Padānukkamo | Piṭṭhaṅko | | Padānukkamo | Piṭṭhaṅko |
|----------------------|-----------|--|---------------------|-----------|
| [A] | | | [A] | |
| Akaniṭṭhagāmī | 157 | | Aṭṭhakanāgaro | 361 |
| Akasiralābhī | 281 | | Aḍḍharattaṃ | 136 |
| Akicchalābhī | 281 | | Aṇḍakosaṃ | 215 |
| Akitti | 330 | | Atikkantaṃanusikāya | 83 |
| Akiriyāṃ | 212 | | Atipātayissanti | 161 |
| Akutobhayā | 24 | | Atipātova | 37 |
| Akkhitto | 45 | | Atītaṃsaññaṃ | 219 |
| Akhaṇḍāni | 135 | | Atekkiccho | 135 |
| Akhettaññū | 297 | | Attattho | 58 |
| Agatigāminim | 314 | | Attānupekkhī | 41 |
| Aggaññāni | 239 | | Atthaññū | 43, 191 |
| Aggahitadhammaggaṇaṃ | 165 | | Attharaso | 362 |
| Aggikkhandhaṃ | 195 | | Atthavase | 329 |
| Aggo | 56 | | Atthavaso | 60, 329 |
| Aṅgāni | 72, 364 | | Adantadamaṇaṃ | 236 |
| Acittikatvā | 50 | | Aduṭṭhacitto | 203 |
| Accantaniṭṭho | 178 | | Addhabhuttā | 159 |
| Accantayogakkhemī | 179 | | Adhikaraṇaṃ | 293 |
| Accayena | 189 | | Adhikaraṇāni | 199 |
| Acchandiko | 146 | | Adhikuṭṭanaṭṭhena | 30 |
| Ajjhupekkhati | 146 | | Adhigatamaṇena | 38 |
| Ajjhottharītā | 344 | | Adhippayāso | 206 |
| Ajjhomucchito | 21 | | Adhivāsanakkhanti | 76 |
| Añchanamattam | 288 | | Adhisayitāni | 194 |
| Aññā | 38 | | Anattā | 298 |
| Aññāṇaṃ | 219 | | Anatthajanano | 186 |

| Padānukkamo | Piṭṭhaṅko | Padānukkamo | Piṭṭhaṅko |
|-------------------|-----------|-------------------|-----------|
| [A] | | [A] | |
| Ananuvajjā | 72 | Anūnena | 341 |
| Anabhibhūto | 183 | Aneḷakaṃ | 60 |
| Anayo | 161 | Anokaṃ | 355 |
| Anariyaṃ | 105 | Anonaddhena | 103 |
| Anariyavohāro | 250 | Antako | 254 |
| Analasā | 240 | Antarato | 186 |
| Anavajjā | 72 | Antarāparinibbāyī | 156 |
| Anavayo | 46 | Antopūtikassa | 196 |
| Anāgāmī | 231 | Antovasse | 364 |
| Anikkhittadhuro | 281 | Apagamanakusalo | 145 |
| Aniccā | 331 | Aparappaccayā | 97 |
| Anicchitaṃ | 161 | Aparappaccayo | 225 |
| Aniyyānikattā | 338 | Apariggahā | 289 |
| Anissaravikappī | 41 | Aparihāniyā | 163 |
| Anukampāya | 162 | Apaviddhaṃ | 50, 287 |
| Anugato | 51 | Apāyamukhāni | 244 |
| Anujīvino | 26 | Apāyo | 87 |
| Anuttaraṃ | 43 | Apāraṃ | 305 |
| Anudhanaṭṭhena | 30 | Apunabbhavabhūtā | 214 |
| Anudhammabhūtaṃ | 255 | Apūtīni | 135 |
| Anudhammā | 255 | Appakasirena | 306 |
| Anupariyāyapatho | 190, 350 | Appicchakathā | 275 |
| Anupalittaṭṭhena | 222 | Appaṭīkūlasaññī | 49 |
| Anupubbanirodhā | 296 | Appaṭivānacitto | 17 |
| Anupubbavihārā | 297 | Appaṭivānī | 99 |
| Anupharaṇānubhāvo | 193 | Appaṭisamo | 215 |
| Anuviccakāraṃ | 221 | Appatissayo | 3 |
| Anusaṭaṃ | 215 | Appatissavo | 3 |
| Anussatiṭṭhānāni | 88 | Appanigghosaṃ | 306 |
| Anussarati | 84 | Abbhaññāsiraṃ | 216 |

| Padānukkamo | Piṭṭhaṅko | Padānukkamo | Piṭṭhaṅko |
|----------------------|-----------|--------------------|-----------|
| [A] | | [A] | |
| Abyatto | 297 | Avātātapahatāni | 135 |
| Abyābajjhaṃ | 240 | Avāpuraṇaṃ | 285 |
| Abyābajjhaparamatāya | 128 | Avipparisāratthāni | 305 |
| Abhavo | 339 | Avirādhitam | 161 |
| Abhiceto | 54 | Avirulhidhammattā | 211 |
| Abhijānāmi | 182 | Averaṃ | 240 |
| Abhiññāpāragū | 111 | Asaṃkiṇṇāni | 239 |
| Abhido | 135 | Asakkaccaṃ | 50 |
| Abhibhāyatanam | 245 | Asajjamāno | 82 |
| Abhibhū | 183 | Asaddhammā | 35 |
| Abhisāṅkhatam | 27 | Asanam | 161 |
| Abhisallekhikā | 274 | Asanthavavissāsī | 41 |
| Amatapariyosānā | 27 | Asambhinnaṃ | 300 |
| Amatogadhā | 27 | Asammuṭṭhā | 217 |
| Amanāpā | 46 | Asallīnam | 217 |
| Amanussaduṭṭhāni | 130 | Asahatthā | 50 |
| Amarāvitakko | 132 | Asātānam | 46 |
| Amarisanatthe | 52 | Asitam | 2 |
| Ammakā | 113 | Asitassa | 17 |
| Ayasabhāvaṃ | 186 | Asucisukhaṃ | 14 |
| Ayaso | 330 | Asurā | 227 |
| Ayosaṅkunā | 196 | Assako | 114 |
| Arahatā | 361 | Assāsarahitā | 188 |
| Ariyāya | 281 | Ahaṅkāro | 173 |
| Arīnam | 361 | | |
| Alabhantāpi | 93 | [Ā] | |
| Avakkipitvā | 144 | Ākārena | 341 |
| Avayā | 312 | Ākulā | 159 |
| Avassayo | 222 | Āgatāgamā | 116, 306 |
| Avassutassa | 196 | Āgamanakusalo | 145 |

| Padānukkamo | Piṭṭhaṅko | Padānukkamo | Piṭṭhaṅko |
|------------------|-----------|--------------------|-----------|
| [Ā] | | [I] | |
| Āgamayamāno | 283 | Iddhānubhāvena | 261 |
| Āghātaṭṭhavinayā | 51 | Iddhipādo | 230 |
| Ācariyo | 255 | Iddhividham | 82 |
| Ātatavitataṃ | 240 | Issattham | 57 |
| Ātappam | 76 | Issāso | 300 |
| Ātāpino | 219 | Issukī | 106 |
| Ādittam | 195 | [U] | |
| Ādīnavo | 223 | Ukkhipati | 229 |
| Ādhānaggāhī | 107 | Ukkhipāpentā | 164 |
| Ādheyyamukho | 47 | Ukkhipitvā | 144 |
| Ānisamso | 341 | Uggacchati | 259 |
| Ānubhāvo | 161 | Uggacchana-udako | 12 |
| Āpādikā | 242 | Uggatuggatā | 190 |
| Ābādhiko | 51, 97 | Ucchādanadhammassa | 287 |
| Ābhassarūpago | 183 | Uṭṭhānam | 19 |
| Ābhisamācārikam | 142 | Uṇhassa | 126 |
| Āraññakesu | 165 | Utupariṇāmajā | 333 |
| Āraddhavīriyo | 114 | Udakapappaṭakena | 51 |
| Ārāmato | 17 | Udaggacittam | 224 |
| Ārogyamado | 25 | Udarāvadehakam | 56 |
| Āvaraṇato | 161 | Udānam | 60 |
| Āvaraṇā | 22 | Uddhamso | 157 |
| Āvaranti | 22 | Uddhāpam | 350 |
| Āvi | 39 | Upakkosati | 349 |
| Āviñchanti | 211 | Upadhi | 141, 314 |
| Āsabham | 4, 140 | Upadhivipākam | 245 |
| Āsabhim | 210 | Upanāhī | 106 |
| Āsāṭikā | 364 | Upanijjhāyati | 174 |
| Āhāraṭṭhitikā | 322 | Upanisā | 116 |

| Padānukkamo | Piṭṭhaṅko | Padānukkamo | Piṭṭhaṅko |
|---------------------|-----------|------------------|-----------|
| [U] | | [O] | |
| Upapattiyo | 237 | Okappanaṃ | 23 |
| Upayanti | 21 | Okā | 355 |
| Upavādakā | 86 | Okāsādhigamo | 101, 299 |
| Upavāyatu | 172 | Okkhāyamāne | 195 |
| Upasaṃharanti | 61 | Otāro | 24 |
| Upasamāya | 274 | Ottappati | 1 |
| Upasiṅghanamattaṃ | 288 | Ottappī | 114 |
| Upahaccapariniḅbāyī | 157 | Opakkamikā | 333 |
| Upāyāya | 35 | Obhāsakaraṇaṃ | 218 |
| Upekkhaṃ | 114 | Orabbhikā | 122 |
| Ubbhidodako | 12 | Orabbhiko | 98 |
| Ubbhinna-udako | 12 | Orambhāgiyāni | 28 |
| Ummujjaṃ | 82 | Osīdanaṃ | 265 |
| Uyyodhikā | 327 | Osīdamāne | 159 |
| Urattāḷim | 139 | Ossaji | 258 |
| Urabbhā | 172 | Ohitabhāro | 115 |
| [E] | | [Ka] | |
| Ekanāḷikā | 363 | Kaṃsatāḷaṃ | 240 |
| Ekapiṇḅapātaṃ | 98 | Kaṭaggāho | 114 |
| Ekalohitabaddhā | 344 | Kaṭukānaṃ | 46 |
| Ekasūrā | 190 | Kaṇṭakataṭṭhānaṃ | 130 |
| Ekodi | 114 | Kaṇho | 254 |
| Evaṃgotto | 84 | Kathāpābhatāṃ | 304 |
| Evaṃnāmo | 84 | Kadariyo | 177 |
| Evaṃvaṇṇo | 85 | Kantati | 193 |
| Esanataṇhā | 291 | Kantanakavāto | 193 |
| Esanā | 312 | Kantassa | 182 |
| Esitataṇhā | 291 | Kantāro | 351 |
| | | Kapaṇapuriso | 213 |

| Padānukkamo | Piṭṭhaṅko | Padānukkamo | Piṭṭhaṅko |
|-------------------|-----------|---------------|-----------|
| [Ka] | | [Ka] | |
| Kappaṭṭho | 135 | Kuhako | 34 |
| Kappayavho | 208 | Kūṭaṅgamā | 117 |
| Kabyaṃ | 31 | Kūṭaninnā | 117 |
| Kamaṇīyā | 139 | Koṭṭhāgāraṃ | 45 |
| Kammaṃ | 235 | Koṭṭhāsā | 365 |
| Kammadāyādo | 25 | Kodhanaṃ | 186 |
| Kammalakkhaṇo | 365 | Kodhapareto | 186 |
| Kammavipākajā | 333 | Kodhena | 106 |
| Kammārāmatā | 36 | Korakajāto | 193 |
| Karajakāyo | 12 | | |
| Karaṇīyāni | 178 | [Kha] | |
| Karuṇāvippahāraṃ | 215 | Khajjamānānaṃ | 195 |
| Kallacittaṃ | 224 | Khaṇittim | 10 |
| Kallitakusalo | 101 | Khaṇḍaṃ | 94 |
| Kalyāṇamitto | 270 | Khato | 339 |
| Kalyāṇasampavaṅko | 270 | Khamo | 308 |
| Kavitā | 31 | Khayavirāgo | 179 |
| Kasambujātassa | 196 | Kharā | 186 |
| Kākacchamānā | 358 | Kharānaṃ | 46 |
| Kāyakalaho | 293 | Khārakajāto | 193 |
| Kāyaduccaritaṃ | 86 | Khuddakamadhu | 60 |
| Kālo | 141 | Khemaṃ | 204 |
| Kāveyyaṃ | 31 | | |
| Kāsikacandaṇaṃ | 132 | [Ga] | |
| Kilesasenaṃ | 321 | Gaggarassarā | 250 |
| Kukku | 294 | Gaṇo | 142 |
| Kuṭumalajāto | 193 | Gati | 141, 222 |
| Kudhito | 59 | Gabbhato | 214 |
| Kusalī | 204 | Gabbhaseyyā | 214 |
| Kusīto | 264 | Garukaraṇā | 95 |

| Padānukkamo | Piṭṭhaṅko | Padānukkamo | Piṭṭhaṅko |
|---------------------|-----------|---------------------|-----------|
| [Ga] | | [Ja] | |
| Garuṭṭhāniyo | 341 | Jaṅgalānaṃ | 307 |
| Gahaṇī | 45 | Jaṅghāvihāraṃ | 267 |
| Gahanaṃ | 351 | Jaññā | 292 |
| Gahitasajjhāyakaṇaṃ | 165 | Janitasmiṃ | 357 |
| Gāmaṇiko | 26 | Janetasmiṃ | 357 |
| Giñjakāvasatho | 98 | Jātiṃ | 84 |
| Gobhattaṃ | 364 | Jātibhūmiyaṃ | 118 |
| [Gha] | | Jātimaraṇasaṅkhayo | 100 |
| Ghaṃseyya | 196 | Jānatā | 361 |
| Ghaṭṭeyya | 24 | Jālakajāto | 193 |
| Gharadāsayodhā | 190 | Jīrati | 327 |
| Ghāṭeti | 205 | Jīvitasambhārā | 284 |
| [Ca] | | Jegucchitaṃ | 213 |
| Cakkavattivattaṃ | 44 | Jeṭṭhakaṣīlaṃ | 340 |
| Cakkavattī | 183 | [Ña - Ṭha] | |
| Cakkhundriyaṃ | 124 | Ñāṇadassanaṃ | 23 |
| Caṅkavāre | 154 | Ñāṇasabhāvo | 354 |
| Candappabhā | 205 | Ñātattacariyā | 220 |
| Caraṇasīlā | 255 | Ñātibyasaṇaṃ | 161 |
| Calakā | 190 | Ñāyo | 102 |
| Ciṇṇaṭṭhānaṃ | 364 | Ṭhānuppatti | 46 |
| Cīrakena | 364 | Ṭhānuppattikā | 350 |
| Cetasovinibandhā | 77 | [Ta] | |
| Cetovimutti | 9 | Takkaro | 41 |
| Codayamānena | 52 | Tathāgatabalāni | 140 |
| [Cha] | | Tadahuposathe | 231 |
| Chamāsikaṃ | 204 | Tanubhāvo | 195 |
| Cheko | 240 | Taruṇapīti | 10 |

| Padānukkamo | Piṭṭhaṅko | Padānukkamo | Piṭṭhaṅko |
|------------------|-----------|-----------------------|-----------|
| [Ta] | | [Da] | |
| Tāṇaṃ | 222 | Dānamayaṃ | 237 |
| Tāḷacchiggaḷena | 161 | Dāḷiddiyaṃ | 114 |
| Tiṇṇavicikicchā | 97 | Diṭṭhadhammavedanīyaṃ | 286 |
| Titthaṃ | 367 | Diṭṭhadhammikā | 330 |
| Tibbā | 130 | Diṭṭhadhammo | 54 |
| Tibbānaṃ | 46 | Diṭṭhavādītā | 250 |
| Tiracchānabhūtaṃ | 338 | Diṭṭhābhiniveso | 351 |
| Tirokuṭṭaṃ | 174 | Diṭṭhigantho | 351 |
| Tīrento | 258 | Diṭṭhipapāto | 351 |
| Tepīṭakaṃ | 255 | Diṭṭhiparāmaṣo | 351 |
| Teladhotāya | 196 | Diṭṭhipariḷāho | 351 |
| | | Diṭṭhisantāpo | 351 |
| | | Diṭṭhisambādho | 351 |
| | | Diṭṭhisallaṃ | 351 |
| | | Diṭṭhupādānaṃ | 351 |
| | | Dibbā | 83 |
| | | Dīgharattaṃ | 182 |
| | | Duggati | 87 |
| | | Duccaritaṃ | 227 |
| | | Duppañño | 146 |
| | | Duppaṭinissaggī | 107 |
| | | Dubbaṇṇe | 86 |
| | | Durabhisambhavāni | 352 |
| | | Dussīlassa | 196 |
| | | Devabheriyo | 257 |
| | | Devo | 257 |
| | | Doṇapākaṃ | 327 |
| | | Dovacassatā | 100 |
| | | Dvayaṃdvayasamāpattim | 173 |
| | | Dvayaṃdvayarāmo | 352 |
| [Tha] | | | |
| Thāmaṃvā | 281 | | |
| Thirabhāvappattā | 164 | | |
| Thirabhāvappatto | 35 | | |
| Thullakumāriyo | 39 | | |
| Thūṇaṃ | 121 | | |
| Therā | 116, 306 | | |
| [Da] | | | |
| Dakkhinā | 107 | | |
| Dakkhineyyo | 172 | | |
| Daṇḍaṃ | 159 | | |
| Daṇḍa-ukkāya | 169 | | |
| Daṇḍādānaṃ | 293 | | |
| Daṇḍe | 43, 300 | | |
| Davāya | 126 | | |
| Daharo | 242 | | |
| Daḷhaparakkamo | 281 | | |
| Dānaggaṃ | 288 | | |

| Padānukkamo | Piṭṭhaṅko | Padānukkamo | Piṭṭhaṅko |
|----------------|-----------|-------------------|-----------|
| [Dha] | | [Na] | |
| Dhanuggahā | 190 | Nijjarakāraṇāni | 353 |
| Dhanuggaho | 300 | Niddosā | 95 |
| Dhanulakkhaṇaṁ | 364 | Niddhamatha | 208 |
| Dhammacakkaṁ | 43 | Nidhāpeyya | 244 |
| Dhammaññū | 191 | Ninnetā | 354 |
| Dhammadharā | 116 | Nipako | 114 |
| Dhammabhūto | 354 | Nipaccakārārahaṁ | 209 |
| Dhammarājā | 183, 184 | Nippaṭibhāno | 21 |
| Dhammavedaṁ | 89 | Nippesiko | 35 |
| Dhammasāmī | 354 | Nippeso | 35 |
| Dhammānūsārī | 153 | Nibbānāya | 275 |
| Dhammikā | 90 | Nibbidā | 116 |
| Dhammiko | 183, 184 | Nimujjaṁ | 82 |
| Dhātukopena | 261 | Nimittaggāho | 124 |
| Dhumātattā | 103 | Niyato | 294 |
| [Na] | | Niyyāti | 41 |
| Nantakaṁ | 51 | Niraggaḷo | 205 |
| Nandī | 362 | Nirabbudaṁ | 204 |
| Namuci | 254 | Nirayo | 87 |
| Nāccāsannaṁ | 306 | Nisinnavattikā | 363 |
| Nātidūraṁ | 306 | Nissaraṇaṁ | 74 |
| Nikāmalābhī | 281 | Nihīnaṁ | 105 |
| Nikāmeti | 173 | Nīcavuttiṁ | 18 |
| Nikkhantaṁ | 101 | Nīlamakkhikā | 364 |
| Nikkhante | 99 | Nīvaraṇā | 22 |
| Niggāhaṁ | 364 | Nīvārayanti | 22 |
| Nicchātā | 297 | Nīhaṭāni | 312 |
| | | Nekkhammasukhassa | 14 |
| | | Nemittiko | 34 |

| Padānukkamo | Piṭṭhaṅko | Padānukkamo | Piṭṭhaṅko |
|------------------------|-----------|--------------------|-----------|
| [Pa] | | [Pa] | |
| Pakkhandati | 304 | Paṇīte | 86 |
| Pakkhandanti | 190 | Paṇītena | 142 |
| Paggahitaṃ | 217 | Paṇḍakā | 39 |
| Paggahitavīriyo | 2 | Patitakkhandho | 21 |
| Paccanubhoti | 82 | Patitapalāso | 192 |
| Paccantimaṃ | 189, 350 | Patimānesi | 210 |
| Paccayābhīhāro | 368 | Patissatā | 208 |
| Paccupaṭṭhitāya | 203 | Pathantaṃ | 176 |
| Paccorasmiṃ | 196 | Pathabyo | 185 |
| Pañcaṅgikassa | 240 | Pathavībhīnivesā | 117 |
| Pañcāhikavāro | 364 | Padahanabhāvo | 23 |
| Paññāpubbaṅgamaṃ | 153 | Padhānatthikassa | 267 |
| Paññāvāhī | 153 | Pannaddhajo | 28 |
| Paññāvimutto | 151 | Pabbatacārīnī | 297 |
| Paññīndriyaṃ | 230 | Pabhijjanasabhāvaṃ | 7 |
| Paññūpavicārā | 117 | Pamattabandhu | 254 |
| Paṭikūle | 49 | Pamukhanādaṃ | 140 |
| Paṭighātāya | 126 | Payogo | 141 |
| Paṭicarati | 207 | Parakkamanasabhāvo | 108 |
| Paṭippassaddhiladdhena | 142 | Paralokavijayāya | 241 |
| Paṭippassambhanti | 195 | Parāmasati | 83 |
| Paṭilābhakattena | 307 | Parāyaṇaṃ | 222 |
| Paṭilīnisaṃbho | 304 | Parikkhatā | 170 |
| Paṭisaṅkhā | 124 | Parikhā | 27 |
| Paṭisaranti | 357 | Paricca | 28 |
| Paṭisevati | 126 | Pariññāpāragū | 111 |
| Paṭihaṅkhāmi | 127 | Pariṇāmaṃ | 194 |
| Paṇakena | 59 | Pariṇāmakālo | 194 |
| Paṇidhāya | 77 | Parittena | 168 |
| Paṇītādhimuttiko | 146 | Paridevo | 102 |

| Padānukkamo | Piṭṭhaṅko | Padānukkamo | Piṭṭhaṅko |
|----------------------|-----------|----------------------|-----------|
| [Pa] | | [Pa] | |
| Parimaddanadhammassa | 287 | Pāpasahāyā | 165 |
| Paripaṇḥati | 116 | Pāpimā | 254 |
| Paripuṇṇaṁ | 145 | Pāraṁ | 305 |
| Paripuṇṇasīlā | 339 | Pāricariyakhamā | 160 |
| Pariyantakārī | 165 | Pāsanti | 204 |
| Pariyāpādentī | 29 | Pāsādikaṁ | 267 |
| Pariyāyo | 138 | Pāseti | 204 |
| Pariyesanā | 292 | Piṇḍadāyakā | 190 |
| Parisaññū | 192 | Piṇḍapātaṁ | 126 |
| Parisuddhāya | 24 | Pitāmahayugā | 45 |
| Pariḷāho | 74 | Pitiṭṭhānaṁ | 364 |
| Palāsavane | 335 | Pittasamuṭṭhānā | 333 |
| Pavivekaṁ | 352 | Piyajātikā | 139 |
| Pasatthappasattho | 60 | Piyavādinīyo | 16 |
| Pasannacittaṁ | 224 | Piyasamudāhāro | 308 |
| Pasayhakārassa | 160 | Piyasīlānaṁ | 329 |
| Pasīdati | 304 | Piyassa | 182 |
| Passatā | 361 | Piyo | 341 |
| Pahānapāragū | 111 | Piṇitaṁ | 19 |
| Paḷāsī | 34, 106 | Pītaṁ | 364 |
| Pākaṭo | 35 | Pītivegavissaṭṭhaṁ | 257 |
| Pākārasandhi | 350 | Puggalaparoparaññū | 192 |
| Pāṭikaṅkhaṁ | 281 | Pucimando | 208 |
| Pātimokkhaṁ | 271, 272 | Puñṇakiriyavattḥūni | 237 |
| Pātheyyaṁ | 191 | Puñṇatejēna | 261 |
| Pāpadhammassa | 196 | Puñṇattho | 54 |
| Pāpamittatā | 100 | Puttasambādhasayanaṁ | 132 |
| Pāpamittā | 165 | Puthubhūtaṁ | 256 |
| Pāpasampavaṅkā | 165 | Puthū | 21 |
| Pāpicchā | 165 | Pubbakoṭṭhako | 109 |

| Padānukkamo | Piṭṭhaṅko | Padānukkamo | Piṭṭhaṅko |
|-----------------|-----------|-----------------------|-----------|
| [Pa] | | [Ba] | |
| Pubbuṭṭhāyiniyo | 16 | Byādiṇṇakālo | 23 |
| Pubbenivāsaṃ | 84 | Byābhaṅgī | 2 |
| Pūrattaṃ | 228 | Brahmakāyikā | 168 |
| Pesitattassa | 219 | Brahmacariyānuggahāya | 127 |
| Pesitatto | 199 | Brahmapārisajjā | 168 |
| Pothujjanikaṃ | 105 | Brahmapurohitā | 168 |
| Ponobhavikā | 27 | Brahmabhūto | 354 |
| Porāṇāni | 239 | Brāhmaṇena | 43 |
| Posikā | 242 | [Bha] | |
| [Pha] | | Bhato | 18 |
| Phāsuvihāro | 127 | Bhayaṃ | 345 |
| Phuṭṭhantaṃ | 151 | Bhayabheravasaho | 345 |
| Pheṇuddehakaṃ | 196 | Bhayā | 236 |
| [Ba] | | Bhavo | 339 |
| Balamhi | 43 | Bhāvanāpāragū | 111 |
| Balavārammaṇe | 55 | Bhāsantaraṃ | 250 |
| Baliṃ | 159 | Bhimsanako | 257 |
| Bahuputtakaṃ | 251 | Bhūnahaccāni | 186 |
| Bahubheravaṃ | 21 | Bhogādhippāyā | 117 |
| Bahuvedanīyaṃ | 286 | Bhogānaṃ | 222 |
| Bahussutā | 116 | [Ma] | |
| Bāhujaññaṃ | 256 | Makkhī | 34, 106 |
| Bāḷhagilāno | 51 | Maṅkutaṃ | 329 |
| Biḷaṅgadutiyaṃ | 287 | Macchariyaṃ | 293 |
| Buddhacariyā | 220 | Maccharī | 107 |
| Bojjhaṅgā | 230 | Macchavilope | 14, 185 |
| Bodhimaṇḍe | 217 | Maṇḍakhette | 135 |
| Byantibhūtaṃ | 234 | Maṇḍanakajātiko | 242 |

| Padānukkamo | Piṭṭhaṅko | Padānukkamo | Piṭṭhaṅko |
|------------------------|-----------|-----------------|-----------|
| [Ma] | | [Ma] | |
| Maṇḍanāya | 126 | Mitto | 308 |
| Maṇḍabhūmi | 14 | Muttaṁ | 101 |
| Maṇḍalamālā | 103 | Muducittaṁ | 224 |
| Mattaññū | 191 | Musā | 331 |
| Madāya | 126 | Mūlaṁ | 208 |
| Manavaḍḍhanakā | 139 | Mūlasantānakāni | 118 |
| Manavaḍḍhanako | 341 | Mettaṁ | 89 |
| Manāpacāriṇiyo | 16 | Mettacittaṁ | 182 |
| Manujassa | 327 | Mettāvata | 147 |
| Manussadhammo | 22 | Medhāvī | 46, 350 |
| Manomayaṁ | 20 | [Ya] | |
| Manoharasilātalāni | 228 | Yathākammūpage | 86 |
| Mantapadaṁ | 57 | Yasassī | 35 |
| Mantādhīṭṭhānā | 117 | Yuttaṁ | 2 |
| Mantāyaṁ | 197 | Yutto | 342 |
| Mandahasitaṁ | 54 | Yuvā | 242 |
| Mamaṅkāro | 173 | Yoggācariyo | 14 |
| Mamāyanavacanaṁ | 90 | Yodhājīvā | 29 |
| Mahaccā | 21 | Yoni | 145 |
| Mahapphalā | 344 | [Ra] | |
| Mahāgovindo | 118 | Rajjantānaṁ | 210 |
| Mahātalasmim | 307 | Rañjetuṁ | 240 |
| Mahānisamsā | 27 | Ratanāni | 229 |
| Mahābrahmā | 183 | Rattaññāni | 239 |
| Mahiccho | 275 | Rattaññū | 35 |
| Mātāpettikasambhavassa | 287 | Ratharakkhā | 190 |
| Mālāgandhavilepanaṁ | 133 | Ramaṇiyaṁ | 267 |
| Māsācitaṁ | 265 | Ramaṇiyā | 251 |
| Micchādiṭṭhi | 107 | | |
| Micchādiṭṭhikā | 86 | | |

| Padānukkamo | Piṭṭhaṅko | Padānukkamo | Piṭṭhaṅko |
|--------------------|-----------|------------------|-----------|
| [Ra] | | [Va] | |
| Rasānisaṃso | 344 | Vaḍḍhi-atthe | 46 |
| Rāgapariyuṭṭhitam | 88 | Vaḍḍhikālo | 195 |
| Rāgapareto | 30 | Vaḍḍhitā | 95, 251 |
| Rāgavinayo | 107 | Vaḍḍheti | 102 |
| Rāgo | 362 | Vatthu | 296 |
| Rājā | 183 | Vasavattī | 183 |
| Rājiddhiyā | 161 | Vākena | 364 |
| Rāsikataṃ | 57 | Vācākalaho | 293 |
| Rūpaṃ | 364 | Vācāpeyyaṃ | 204 |
| Reṇuvaṭṭi | 193 | Vācābhihāro | 368 |
| Rogasamasīsī | 155 | Vājikā | 161 |
| [La] | | Vāmato | 308 |
| Lapako | 34 | Vālarajjuyā | 196 |
| Lahusaṃ | 197 | Vigatadaratho | 218 |
| Lābho | 121 | Viggaho | 293 |
| Lāmakabhāvo | 223 | Vighātakarā | 125 |
| Luñcitvā | 104 | Vighāto | 74 |
| Lūkhājīvim | 349 | Viceyya | 239 |
| Leṇaṃ | 222 | Vijitāvī | 184 |
| Lokajeṭṭhakakammaṃ | 213 | Vijjābhāgiyā | 106 |
| Lokatthacariyā | 220 | Viññuppasatthāni | 94 |
| Lokāyatavādakā | 300 | Viññūnaṃ | 72 |
| Lolo | 47 | Vittim | 173 |
| [Va] | | Vidhunantā | 215 |
| Vaṃsaññāni | 239 | Vinayadharā | 116 |
| Vajjidhammaṃ | 159 | Vinipāto | 87 |
| Vatṭissati | 93 | Vinipātikā | 167 |
| Vaḍḍhim | 364 | Vinīlakaṃ | 104 |
| | | Vinīvaraṇacittam | 224 |
| | | Vinodanaṃ | 132 |

| Padānukkamo | Piṭṭhaṅko | Padānukkamo | Piṭṭhaṅko |
|-------------------|-----------|------------------|-----------|
| [Va] | | [Va] | |
| Vipajjeyya | 99 | Velāmo | 288 |
| Vipphanditaṃ | 351 | Vesārajjappattā | 97 |
| Vipphārikataro | 168 | Vesiyāgocarō | 39 |
| Vimuccanaṃ | 74 | Vehapphalā | 169 |
| Vimuttā | 339 | Vocaritā | 152 |
| Vimuttikathā | 37 | [Sa] | |
| Vimuttiraso | 229 | Saṃkilissanaṃ | 223 |
| Virajaṃ | 224 | Saṃkīḷati | 174 |
| Virāgūpasamhitā | 144 | Saṃkelāyati | 174 |
| Virāgo | 116 | Saṃyojanaṃ | 351 |
| Vivaṭena | 103 | Saṃvasati | 229 |
| Vivādo | 293 | Sa-upaniso | 170 |
| Vivekaṭṭho | 199 | Sakadāgāmī | 231 |
| Viśaṃyutto | 28 | Sakuṇḍakabhattaṃ | 287 |
| Viśamagatassa | 222 | Sakkāyo | 28, 135 |
| Viśāradā | 255 | Sakkāraṃ | 160 |
| Viśuddhāya | 83 | Sakkāro | 121 |
| Viśūkaṃ | 351 | Sakkhibhabbataṃ | 143 |
| Vissatṭhupasevī | 41 | Saggo | 87 |
| Vissarati | 169 | Saṅgaṇikā | 142 |
| Vissāso | 24 | Sajālikā | 190 |
| Vihimsūparatiyā | 127 | Sajotibhūtaṃ | 196 |
| Vītamalaṃ | 224 | Sajjhāyitaṃ | 57 |
| Vīmaṃsā | 250 | Sañjagghati | 174 |
| Vīriyārambhakathā | 280 | Saṭho | 107 |
| Vuṭṭhitaṃ | 101 | Saṇikaṃ | 327 |
| Vuṭṭhito | 97 | Satakkakū | 15 |
| Vuddhippattaṃ | 256 | Satipaṭṭhānaṃ | 229 |
| Veyyattiyam | 46, 350 | Sato | 114 |
| Veyyābādhikānaṃ | 128 | | |

| Padānukkamo | Piṭṭhaṅko | Padānukkamo | Piṭṭhaṅko |
|--------------------|-----------|-----------------------|-----------|
| [Sa] | | [Sa] | |
| Sattabharitaṃ | 204 | Sampajjalitaṃ | 195 |
| Sattāvāsā | 293 | Sampaṭicchanakavāto | 193 |
| Sattilakkhaṇaṃ | 364 | Sampaṭipādento | 215 |
| Satthakavātā | 30 | Samparāyo | 330 |
| Satrayāgo | 205 | Samparivattakaṃ | 77 |
| Saddhā | 21 | Sampalimaṭṭhaṃ | 124 |
| Saddhāyiko | 347 | Sampahaṃseti | 146 |
| Saddhāvimutto | 152 | Sampiyeneva | 56 |
| Saddhindriyaṃ | 230 | Sambādhe | 101 |
| Santuṭṭhi | 276 | Sambukā | 133 |
| Santhāgāraṃ | 220 | Sambodhasukhaṃ | 14 |
| Sandiṭṭhikaṃ | 16 | Sambodhāya | 275 |
| Sandiṭṭhiparāmāsī | 187 | Sambodhiparāyaṇo | 294 |
| Sannipātabheriyā | 159 | Sambhataṃ | 241 |
| Sabbatthikā | 121 | Sambhavo | 100, 258 |
| Sabbapāliphullo | 193 | Sammaṃ | 204 |
| Samaṅgibhūtaṃ | 174 | Sammataḷaṃ | 240 |
| Samaṇena | 43 | Sammappadhānaṃ | 229 |
| Samadhosi | 121 | Sammāsambuddhena | 361 |
| Samannāgatā | 86 | Sarati | 169 |
| Samappitaṃ | 174 | Saraparittāṇaṃ | 190 |
| Samabharito | 14 | Savanasaṃsaggo | 31 |
| Samādānāni | 141 | Savantī | 21 |
| Samānadiṭṭhibhāvaṃ | 95 | Savamānā | 228 |
| Samāpattipāragū | 111 | Sasaṅkhāraparinibbāyī | 157 |
| Samiddhi | 286 | Sahabyatā | 17 |
| Samuggatena | 103 | Sahitaṃ | 178 |
| Samudācaranti | 144 | Sākacchā | 8, 9 |
| Samupabyūḷhaṃ | 57 | Sāgaradevena | 339 |
| Sampajjati | 235 | | |

| Padānukkamo | Piṭṭhaṅko | Padānukkamo | Piṭṭhaṅko |
|------------------|-----------|--------------------|-----------|
| [Sa] | | [Sa] | |
| Sājīvo | 27 | Suvaco | 308 |
| Sāṭṭheyyāni | 226 | Suvaṇṇe | 86 |
| Sāṭṭhakaṃ | 338 | Sūcighaṭikaṃ | 232 |
| Sādiyati | 173 | Sūrā | 184 |
| Sāpateyyaṃ | 26 | Sūlalakkhaṇaṃ | 364 |
| Sāmaggī | 330 | Sekhapaṇṇattisīlaṃ | 142 |
| Sārarahitā | 331 | Setakā | 51 |
| Sārādāni | 135 | Senāsaṇaṃ | 128 |
| Sāhasikakammaṃ | 185 | Selantaṃ | 176 |
| Sikkhāsamaḍḍānaṃ | 158 | Sevālamālikā | 356 |
| Sippiyo | 133 | Soko | 102 |
| Sirī | 191 | Soraccaṃ | 76 |
| Siloko | 121 | Soraccena | 18 |
| Sītassa | 126 | Snehaparetā | 12 |
| Sītibhāvaṃ | 146 | Snehānugatā | 12 |
| Sīlamayaṃ | 238 | | |
| Sīlavā | 271 | [Ha] | |
| Sīlasaññaṃmena | 108 | Hatthācariyā | 190 |
| Sīlasamaṅgino | 339 | Hatthārohā | 190 |
| Sīlasāmaññaṅgato | 94 | Hatthibandhā | 190 |
| Sukāraṇaṃ | 54 | Hatthivejjā | 190 |
| Sukkhadaṇḍako | 9 | Hatthisāriputto | 133 |
| Sukhavinicchayaṃ | 292 | Haritantaṃ | 176 |
| Sukhasayitāni | 135 | Hānabhāgiyā | 144 |
| Sugati | 87 | Hāretā | 364 |
| Suñkaṃ | 159 | Hirikopīnaṃ | 126 |
| Sudassanakūṭaṃ | 228 | Hirimano | 114 |
| Supaṭiyattāni | 228 | Hiriyati | 1 |
| Suppaṭividdhaṃ | 23 | Hīne | 86 |
| Subhakiṇhā | 169 | | |